

ब
ता
ल
प
ची
सी



व्यास लाल शर्मा

श्रीपति प्रकाशन

११५ विजय गढ़, जम्मू ।

ब
ता
ल
प
ची
सी

(डोगरी)

श्यामलाल शर्मा

BATAL PACHISI

(Twentyfive Tales of a Vampire)
From Somdeva's Katha Sarit Sagara

By

Shyamlal Sharma

❀ प्रकाशक :-

श्रीपति शर्मा

श्रीपति प्रकाशन, १६५ विजयगढ़, जम्मू

❀ मूल्य

Rs. 28/-

❀ प्रथमवार १९६४

❀ मुद्रक :—

आर० सी० प्रिंटिंग प्रेस,

अप्पर बाजार जम्मू

(Subsidised by the Academy of art, culture and
languages, J & K State, Jammu.)

अनुक्रमणिका

१	मुण्ड :—गूढ़ा भेत	१
२	पहली कथ :—दोषी कुरा ऐ ?	४
३	दृई कथ :—लाड़ी कोदी होई ?	११
४	त्री कथ :—चुरे कुरा, मर्द जां जनानियां ?	१६
५	चौथी कथ :—त्रौन्ने इचा बहादर कुरा होआ ?	२६
६	पञ्चमी कथ :—नाम कुमी ? बहादरै गी, जोतिषी गी जां जादू जानने आलेगी ?	३८
७	छेमी कथ :—मनुक्खै दी पन्शान : मुण्डी थमां ?	४४
८	सत्तमी कथ :—राजा बड्डा जां सत्त्वशील ?	५०
९	अठमी कथ :—सारें कशा नाजक तबीयत कोदी होई ?	६३
१०	नौमी कथ :—राजकमारी दा पति होने जोग कुरा होआ ?	६६
११	दसमी कथ :—बड्डे दिलै आला कुरा ? सेठ, चोर जां पति ?	७३
१२	बारमी कथ :—नजाकतै दी बी हद् ऐ !	८१
१३	बारमों कथ :—इन्ना कष्ट भोगेया लाज फी नई होआ ?	८६
१४	तेरमी कथ :—हत्या दा दोष कुसी ?	१०५
१५	चांदमी कथ :—फांसी उपर चढ़े दा चोर हस्सेया की ते रोया की ?	११३

- १६ पन्दरमीं कथ :- ब्याह ऊरे प्रमाण जेड़ा लावें फेरें
कन्नें होऐ ? १२१
- १७ सोलमीं कथ :- दलेरी ते हौसले इच बड्डा कुण ?
जीमूतबाहन जां शंखचूढ़ । १३५
- १८ सतारमीं कथ :- राजधर्म बड्डा जां राज भगती ? १६१
- १९ ठारमीं कथ :- अनाधिकारी गी विद्यादान देने दा ईऐ
फल हुन्दा ऐ । १६६
- २० उन्नीमीं कथ :- पिएड केड़े हत्थै उत्पर रखना चाही
दा हा ? १८१
- २१ बीमीं कथ :- ब्राह्मण कुमार की हस्सेआ ? १६१
- २२ इक्कीमीं कथ :- मता आत्तर कुण होआ ? २०७
- २३ बाइमीं कथ :- विद्या ते हाई पर अननी बुद्ध बी ते
होनी चाही दी ऐ ? २१७
- २४ त्रइमीं कथ :- शरीरै दा मोह ते मता पर जुआनी
दा चा उसथमां बीं मता हुन्दा ऐ ? २२३
- २५ चौबोमीं कथ :- भेत खुल्ला । २२६
- २६ खोरलो कथ :- ब्रताल पचोसी पड़ो ते रस्सो-बस्सो ? २३७

बताल पचीसी

आखदे न कहानी बी उन्नी गै परानी ऐ जिन्नां मानु ।
दौनें दा जनम ते बोध सेई हुन्दा ऐ किट्टा-किट्टा गै होआ ।
मानु दे अन्दर जिज्ञासा नां दा इक कुदरती खतोला हुन्दा ऐ
जेदे चिन्त-नशान असेई मानु दे बचपने थमां सेई होन
लगदे न । इसै खतोले कारण निक्के व्याने दादी नानी थमां
रोज नमे-सिर-नमियां कथां कहानियां सुनने दी जिद करदे न ।
दुनियां दिये नानिएं दादिएं अपने दोतरुएं पोतरुएं गी
जुगें-जुगें च कुण जानै किन्नियां कथां सुनाइयां न । जे ए
सब्वै कथां लखोई ते छपोई जन्दियां तां अज्ज उन्दे कन्नै कई
पुस्तकाले भरोची सकदे हे । एठीफे जे जबानी बनने आलियां ते
जबानी गै सुनाई जाने आलियां ए सब्वै कथां सम्हालियै नई
हियां रक्खी जाई सकदियां । पर फी बी उन्दें चा किश बँची
बचाइयै साड़े तगर पुज्जी सकियां न । संस्कृत भाषा दे प्रसिद्ध

काव्य-ग्रन्थ महाभारत अन्दर बी ईऐ नइयां सैकड़े सुन्दर कथां ऋषिणं विद्वानें किट्टियां करिऐ सम्हाली लैतियां हियां । इस चाली दियें लोक कथें दा इक अतिप्रसिद्ध संग्रह ग्रन्थ हा 'बृहत्कथा' । ए ग्रन्थ गुणाढय नां दे इक विद्वान नै लिखेया हा । उसनै ए ग्रन्थ संस्कृत भाषा इच नईं लिखियै उत्तर पछमी भारतै दी इक बोली (पैशाची) च लिखेया हा । पर ए ग्रन्थ अज्ज साढ़े कोल ऐ नईं । एबी आखना मुश्कल ऐ जे ए नसर (गद्य) हा जा नज्म (पद्य) । हा । इस ग्रन्थै थमां मसाला लइयै लिखे गे कई सुन्दर ग्रन्थ दा असेईं पता ऐ । संस्कृत दे प्रसिद्ध कश्मीरी कवि सोमदेव (११वीं सदी) दा "कथा सरित सागर", बुद्धिस्वामी नां दे कवि दा 'बृहत्कथा श्लोक संग्रह' ते कश्मीरी कवि क्षेमेन्द्र (१२मीं सदी) हुन्दा "बृहत्कथा मञ्जरी" ए त्रैवै प्रसिद्ध ते महत्वपूर्ण ग्रन्थ गुणाढय दी "बृहत्कथा" दे गै ऋणी न । सबनै "बृहत्कथा" च संग्रह कीती दियां लोक कथां लइयै गै इनें ग्रन्थें दी रचना कीती ही । बताल पचीसी, सिंहासन बतीसी, शुकसप्तती (तोता मैना दियां सत्तर कथां) इनें सबनै लोक कथें दा मूल इयै "बृहत्कथा" ऐ । कहानियें दे इस्सै भण्डारै'चा चुनियै तालियै ए बकखरे-बकखरे लोक कथें सम्बन्धी ग्रन्थ बने न । प्रसन्नता दी गल्ल ऐ श्री श्याम लाल शर्मा होरें सराहने जोग परिश्रम करियै डोगरी दे पाठकें आरतै संस्कृत दे इनें प्रसिद्ध कथा संग्रहें'चो 'बताल पचीसी' दा डोगरी-भाषा अनुवाद करियै आपेया ऐ ।

डोगरी भाषा दा साहित्यक बोध-विकास बल्लें-बल्लें होआ करदा ऐ। इस बोध बकासै गो पक्कि एं नी एं पर खडेरने आस्तै गद्य साहित्य दी बड़ी लोड़ हुन्दी ऐ। गद्य-साहित्य दा प्रारम्भ हुन्दा ऐ कथें कहानियें थमां। डोगरी भागवान ऐ जे अज्ज उसी मौलिक कथां कहानियां लिखने आले बी जुड़ी गे दे न। पर पढ़ने आलें दे घाटे करी ते दूइयें नेकें कठिनाइयें करी इऐ नेआ साहित्य बी बल्लें-बल्लें गै छपै करदा ऐ। इस कमी गी पूरा करने आस्तै दूइयें भाषें थमां सुन्दर ते प्रसिद्ध ग्रन्थें दे अनुवाद बड़े कारामद होई सकदे न। इस पासै श्री श्याम लाल हुन्दा ए दूआ सराहने जोग जतन ऐ। एदे थमा पहलें उनें 'भागवत् दियां कथां' नां दी इक पोथी छापी ही। ते हुण, ढाई सौ सफें दी ऐ रोचक पुस्तक "बताल पचीसी" उनें डोगरी भाषा दी भेण्ट कीती ऐ। उन्दे ए दमै प्रयास छड़े सराहने जोग गै नई दूए विद्वाने दे अपनाने जोग बी न। डोगरी दे पाठकें दी अज्ज थोड़ ऐ पर ए थोड़ हमेशा नई बनी रौहनी। स्कूलें च पढ़ने आले डोगरे विद्यार्थियें गी प्रैमरी स्कूलें च डोगरी भाषा पढ़ाने दा इक सरकारी फैसला होए दा ऐ। उनें जागतें बानें आस्तै मता सारा बाल-साहित्य लोड़चदा ऐ। पंजें दसें पोथिए कन्नें ए सारी लोड़ पूरी नई होई जानी इस थोड़ै गी पूरा करने आस्तै सैकड़े सुन्दर पोथियां लोड़चदियां न उस चाली दे अनुवादें राहें अस अपनी धरती दे बानें विद्यार्थियें आस्तै बड़ी सुन्दर भेण्ट देई सकनेआं।

“बताल पचीसी” जाने ते सयाने दौने चालीं दे पाठकें दा मनोरञ्जन करने आली पोथीए। इने कथें च रोचकता ते ऐ गै। इस देसै दे प्राचीन समाजी जीवनै दियां कई रंग बरंगी भलकियां बी इन्दे च टकोदियां भलकदियां न। उस समें दे आस्था विश्वास, नोति आचार ते समाजी भा-मुल्ल इने कथें च पढ़ोई सकदे न। डोगरी दे उजदे साहित्य आस्तै “बताल पचीसी” इक सुन्दर देन ऐ। में श्री श्यामलाल होरें गी उन्दी मैहनतू पर बधाई दिन्तां।

२५ दिसम्बर १९६४

कर्ण नगर, जम्मू

—रामनाथ शास्त्री

कामना

सोमदेव के कथा सरित में वैताल-पचीसी नामक एक बहुत सुन्दर प्रकरण है। उसमें वैताल और विक्रमा-दित्य की पचीस कहानियां संगृहीत हैं जो जीवन के व्यावहारिक पक्ष को लेकर मूलतः गुप्त युग में लिखी गई थीं। उनका उत्तरोत्तर संस्करण भी होता रहा। भारत के अनेक भागों में ये कहानियां प्रचलित हैं। मुझे यह देख कर अत्यन्त प्रसन्नता हुई है कि श्री श्यामलाल शर्मा ने उन कहानियों का डोगरी भाषा में अनुवाद प्रस्तुत किया है। श्री श्यामलाल शर्मा बहुत उत्साह से डोगरी भाषा के साहित्य की संवृद्धि करने में लगे हैं। मुझे उनके कार्य का जो परिचय मिला है उससे मैं बहुत प्रभावित हुआ हूं। मुझे आशा है कि भविष्य में भी वह इसी प्रकार डोगरी की उन्नति के लिये अपनी शक्ति का सदुपयोग करेंगे।

वासुदेव शरण अग्रवाल

अध्यक्ष कला तथा वास्तुकला विभाग
बनारस हिन्दू विश्व-विद्यालय
संस्थापक निदेशक ऋग्वेद एकडेमो
वाराणसी—५.

अपने पासेया

‘बताल पचीसी’ कथा सरित सागर दे ‘वैताल-पञ्च विंशति’ प्रकरणै दा अनुवाद ऐ। ए मन्नी दी गल्ल ऐ जे मूल लेखकै थमां अनुवादकै दा कर्तव्य कठोर हुन्दा ऐ। लेखकै दे भाव हुन्दे न ते कान्नी चलदी ऐ पर अनुवाद करने आले गी ओदी आत्मा च बड़ना पौन्दा ऐ ते कन्ने शब्दे ते भावें दा तालमेल इक्क नेया बहालना पौन्दा ऐ। अनुवाद ते पूरे दा पूरा कोता ऐ। संस्कृत शैली दे विस्तार आले वर्णनै गी घटाया ऐ पर जतन ईऐ रेआ ऐ कथा सूत्र कुतै नई त्रुट्टै। व्यक्ति वाचक नाएँ गी तत्सम रूपेँ इच गै लिखेया ऐ। उपमा ते रूपक बी उस्स चाली रौन दित्ते न।

प्रेमसर्वन्धी कहानियेँ च कुतै कुतै भावना दी प्रबलता ऐ। प्रेम समस्या हर युगै इच ते हर थारै च इक्कै नेई रई ऐ ते रौग। हर कहानी दे खतम होने उपर बताल राजा विक्रम गी प्रश्न पुछ्दा ऐ। ए प्रश्न कहानी दी जान हुन्दा ऐ। उत्सुकता ते जिज्ञासा उत्पन्न करने आला हुन्दा ऐ। राजे दा उत्तर शंका दा भलैयां समाधान करदा ऐ ते समें समें दे प्रचलित कनून रबाजें दियां घासियां प्रकट करदा ऐ। मेद ऐ बताल पचीसी बाने स्थाने दौनेँ गी रुचग।

—श्यामलाल शर्मा

बताल पचीसी

गदावरी नदी दे कण्डै प्रतिष्ठान नां दा इक थार हा ।
 भलोके समें बिच उत्थें त्रिविक्रमसेन नां दा इक बड़ा मन्ने-
 प्रमन्ने दा राजा हुन्दा हा । ओ विक्रमसेन दा पुत्तर हा ।
 ताकती बिच ओ इन्दरै दी बरोवरी करदा हा । रोज
 उसदा दरबार लगदा । के होऐ जे इक साधु ज्ञान्तिशील रोज
 दरवारें बिच आवै, सील वचन आखै, ते राजे कोल खड़ोते दे
 अफसरै गी इक फल नवेद देई ओड़ै । इयां करदे दस बरे बीती
 गे । इक दिन के होआ जे ताई' साधु फल नवेद दइयै गेआ,
 तुआई' राजे दा इक राखभा टोलो अपने राखे कोला छुड़किए
 दरवारें बिच आई बड़ेआ । राजे नैं ओ फल उसी दई ओड़ैआ ।
 बान्दरै फल खादा तां नुआड़े बिचा इक बड़ा कीमती हीरा
 भुवां पेई गेआ ।

राजे ए दिक्खिए ओ हीरा चुकी लैता ते खजाने दे अफसरै
 गी पुच्छेआ - अड़ेया ! जेड़ा फल साधु रोज नवेद दई जन्दा ऐ,
 ते अइं तुगी देई ओड़नां ओ फल कुत्थें छोड़े दे न ? ए सुनिए
 अफसर किश डरेआ ते आखन लगा—

महाराज ओ फल दुआरी कशा खजाने बिच सुट्टी ओड़दा
 रेआं । सरकार हुकम करन तां खजाना खोलिए दिक्खां । राजे
 दी आझा लइऐ ओ गेआ ते तौला गै परतोई आया । आखन

लगा—ओ फल ते सारे सड़ी गोदे न । पर उत्थें हीरे दा ढेर लगा दा ऐ ते ओ लोई आडु लिशका करदे न । राजा ए सुनिए बड़ा खुश होआ ते सारे हीरे उसै अफसर गी देई ओड़े ।

दूऐ दिन जिसलै साधु आया तां राजा आखन लगा महात्मा जी, तुस मेरी भेटा आस्तै रोज इन्ना धन की खर्च करदेओ ? अज जिन्ना चिर मिगी गल्ल नईं दसगेओ, में फल भेटा नईं लैनी । राजे दी ए गल्ल सुनिए साधु नैं राजे गी बकखरे गलाया में इक मन्त्र सिद्ध करना ऐं । इस कम्मै बिच इक बहादर आदमी दी मदत लोड़चदी ऐ । तुस वड़े वीर ओ, मेरी मदत करो । राजे आखेया - खरा. ते सहायता दा बचन दित्ता । साधु बड़ा खुश होआ । आखन लगा—अउं इत्थें मसानघाट रौनां । तुस ओंदे न्हेरे पक्खै बिच मिगी उत्थें वड़ै हेठ मिलेओ । अउं मस्या गी दिन घरोन्दे उत्थें बलगड । राजे पक्की हामी भरी ते क्षान्तिशील साधु बड़ा पसोए दा अपने आश्रमै गी परतोई गोआ ।

न्हेरा पक्ख शुरु होआ, ते जदूं मस्या दी रात आई राजे गी साधु दी गल्ल ते उसी दित्ता दा बचन चेतै आया । सिरै उपर काला मनासा बन्नेआ, हत्थै बिच तलवार फगड़ी, महलै बिच कुसै गी किश नईं दस्सेआ ते नभक्कं होइऐ मसानघाट जाई पुज्जा । तुआड़े खल्लड़े बिच त्राह गै नईं हा । मस्या दी रात ते न्हेर गवार छाए दा हा । चिखां धुखा करदियां हियां । उन्दे बिच खोपड़ियां, पिंजर ते हड्डु त्रिड़का करदे हे । सारा समां गै डरौना ते भै देने आला हा । मसानघाटै उपर भूत प्रेत ते मसान नच्चा करदे हे ते अपने डरौने कम्मै बिच लगे दे हे ।

गिद्धें दे हुआंकने कन्ने मसानघाट जीन्दे जागदे बकराल भैरों
जती दा दूआ रूप धारे दा लबदा हा । राजे साधु गी तुप्पेआ,
ओ बड़ै हेठ बैठे दा किश गोल कारां पा करदा हा । राजा
नुआड़े कोल पुब्जा ते आखन लगा—लौ महात्मा जी अउं
आई गेआं । दस्सो नाढ़े गोचरी के कम्म ऐ ? ए सुनिए साधु नैं
उबड़े दिखेया । राजे गी दिखियै बड़ा खुश होआ ते आखन
लगा—

महाराज ! जे कर तुस माढ़े उपर खुश ओ तां इत्थुआं दा
दूर दक्खन इकले जाओ । उत्थे इक टाली दा बूटा ऐ । नुआड़े
उपर इक मुड़दा टडोए दा ऐ । जाइऐ उस मुड़दे गी लेई आओ ।
तुस बीर ओ । इस कम्मैं बिच मेरी मदत करो ।

राजा शूरवीर हा, बचनै दा बद्धा हा आखन लगा “अउं
ए कम्म जरूर करड ।” ओ दक्खन आसै चली पेआ बलदियें
चिखें दी लोई बिच उस बक्खी जन्दे ते रस्ता तलोफदे राजे गी
ओ टाली दा बूटा मस्यां लब्बा । चिखा दे धुएँ कन्ने ओ बूटा
भड़ोई गोदा हा ते नुआड़े बिचा कच्चे मासै दी दरकन्न आवा
करदी ही । ओ भूत जन खड़ोता दा सेई हुन्दा हा । ओदे डालें
उपर इक मुड़दा टडोए दा इयां लबदा हा जियां कुसै राकशै नैं
मूण्डे उपर चुक्के दा होऐ । राजा बूटे उपर चढ़ेआ ते जिस
रस्सी कन्ने ओ मुड़दा टडोए दा हा ओ रस्सी बड़्ही ओढ़ी ते
उसी भुवां सुट्टेआ । जियां ओ भुवां पेआ ओ पीड़ा कन्ने
करलाया । राजे समभेआ खबरै ए जीन्दा ई ते हेठ आनिऐ
हमदर्दी कन्ने मलेआ ते चिक्केआ । इयां करने उपर मुड़दे नैं

राकश आङ्गु गड़ाका सुट्टेआ । राजा समझी गोआ जे नाढ़े बिच
बताल प्रवेश ऐ । उसनै नभक्क होई पुच्छेआ—हस्सना की
भई ? “आ किट्टे चलचै ।” दिखदा के जे मुड़दा जेदे बिच
बताल प्रवेश हा, फी बूटे उपर जाई टंगोआ । राजा फी चढ़ेआ
ते उसी भुवां तुआरेआ । बहादरें दा दिल हीरें कोला बी सखत
हुन्दा ऐ ते उत्थे कोई भै नई संजरी सकदा । राजे त्रिविक्रमसेन
नै उस मुड़दे गी मूएढे उपर सुट्टेआ ते चुप चपीते चली पेआ ।
उस मुड़दे बिच जिस बताल ने प्रवेश कीता दा हा ओ राजे गी
आखन लगा—

“राजा जी । अउं तुसैं गी कथ सनानां जेदे कन्ने तुन्दी बत्त
कटोई जाग ते पैण्डा नई बभोग । ध्यान लाइयै सुनेओ ।”

पैहली कथ

वारानसी शिवें दी नगरी नां करी मन्नी-प्रमन्नी दी नगरी ऐ। ठाठां मारदी ते बल खन्दी गंगा नाड़े कोल बगदी ऐ। चिरै दी गल्ल ऐ इर्थे राजा 'प्रताप मुकुट' राज करदा हा। राजा बड़ा प्रतापी हा। नुआड़े टिकके पुत्तरा दा नां बज्रमुकुट हा। शलैपे इच ओ कामदेव ते बहादरें इच बीरें दा सिरमनी हा। राजे दे मैन्तरी दा जागत बुद्धिशरीर राजकुमारै दा परम मित्तर हा।

इक बारी ए दमै मित्तर शकार खेडन गेदे खेडै च इन्ने मस्त होए जे वनै दे दूर मभाटै इक सरोबरै कण्डै जाई पुज्जे। सरै इच कुम्भियां ते कमल खिड़े दे सनाकड़े लबदे हे। बसैन्ती बा ते कोयलें दी कूक मनै गी गुत्कताड़ियां करदी ही। सरै इच इक दिव्व सुन्दरी अपनी सहेलियें कन्ने स्नान करा दी ही। राजकुमार ते ओ इक दूए गी दिक्खिए मोहित होई गे।

सुन्दरी जान लगी ते उन्न किश सैन्नियां ते सारतां कीतियां। इक कमल कन्नै उपपर रखेया। फिरी मरोड़ियां दर्ई दर्ई उसी 'दन्त-पत्र' बनाई ओड़ेया। दूआ कमल सिरै उपपर रखेया ते कालजे पर टकाया ते फी डुरी गई।

राजकमारै दे किश पिड़ पल्लै नईं पेया पर नुआड़ा मित्तर सब किश समझी गया ।

ओ सखियें कन्ने घर ते परतोई आई पर प्रेमै दी पीड़ै कन्ने वतेह होई गई । तुआईं राजकमार महलें परतोआ पर उसी बभोन लगा जे किश गुआची गया ऐ ।

किश उड्डे उड्डे दा ते दुआस रवै । इक दिन मित्तरै अगें ब्रुहासरेया । ओ सुन्दरी कियां थोऐ ? न नां, न ग्रां, न पता न थौ । बुद्धिशरीरै गलाया तुमें ओदियां सैनियां नईं समझियां ? ओ ते सब किश दस्सी गेदी ऐ ।

कन्नै उपर कमल रखने दा अर्थ हा जे “औं कर्णोत्पल राजे दे राजै च रौन्नी आं । कमल मरोड़िऐ ‘दन्तपत्र’ बनाइयै उन्न दस्सेया जे “औं दन्दूखण्डू दा कम्म करने आले दी कुड़ी आं ।” कमल उवड़ा चुकिऐ उन्न अपना नां पद्यावती दस्सेया ते कालजे उपर हत्थ रखियै आखेया हा जे ए दिल तुन्दा होआ ।”

“राजा कर्णोत्पल कलिंग देसै दा राजा ऐ । नुआड़ा इक दरबारी ‘संग्रामवर्धन’ ऐ जेड़ा दन्दू खण्डू दा कम्म करदा ऐ । नुआड़ी धी पद्यावती दिव्व सुन्दरी ऐ ते बन्वे गी जिन्दू थमां बी मती प्यारी ऐ ।” राजकमारै दे बुझदे दीये च तेल पेया । बड़ा खुश होआ ।

मित्तरै कन्ने गिनतरी करियै शकारै दै बहानै निकलेया ते बाकी साथियें गी पिच्छें छोड़िऐ बुद्धिशरीरै कन्ने कलिंग देश

जाई पुज्जा । राजे कर्णोत्पल दी नगरी तुप्पी ते दन्दू-खण्डू आले
 दा घर बी सेई करी लैता । रातीं इक बुड्डी दे घर जाई डेरा लाया ।
 घोड़ें गी दाना पट्टा पाया, पानी दस्सेया ते शपैलियै बन्नी
 ओड़ेया । बुड्डी कन्ने गल्लां करदे करदे पता लग्गा जे ओ पद्मावती
 गी जानदी ऐ । उनें बुड्डी गी खूब गफ्फा दित्ता ते आखेया जे
 पद्मावती गी स्नेहा दे जे सरै उपर जेड़ा राजकुमार लब्बा हा ओ
 आए दा ऐ । बुड्डिया हामी भरी पर जिसलै परतोई तां आखन
 लगी 'उस ते मी खरी निक्खर चादी ऐ । मुश्कपूर्ँ आले हत्थें
 मी तमाचे मारे न । दिक्खो हां दमैं पंजे मुहैं पर बनकी गोदे
 न ।' राजकमारै गी बड़ी नमोशी होई ते किश निम्मोभान
 होआ । पर बुद्धिशरीरै गलाया—जी नईं थोड़ा करो ! मुश्कपूर्ँ
 आले हत्थें दस उंगलियां बनकाने दा अर्थ ऐ जे शुक्ल पक्खै
 दियां दस रातीं बलगे । ए रातीं मिलने दे हक्कै च ठीक नईं ।
 राजकमारै गी साह फिरेया ते किश मेद होई ।

उनें बुड्डी गी खूब शान्दे लुआऐ । जलसे-फलसे कराये ते
 दसैं दिनें परैन्त फी टोरेया । ऐतकी परतोई तां आखन लगी जे
 ओ बोली किश नईं ते उस अल्ले कन्ने माड़ी छ्वातिया उंगलिएं
 दे त्रै नशान लाये न ।' मित्तरै राजकमारै गी समझाया जे
 पद्मावती आखारदी ऐ त्रै रातीं होर बलगी जाओ ।

त्रौं दिनें परैन्त बुड्डी गई तां पद्मावती नैं बड़ियां खातरां
 कीतियां, खूब खलाया पलाया, सब्बां परतोन् लगी तां शिड़कै
 उप्पर राजे दे हाथी छुड़की जाने दा रौला पेई गया । पद्मावती

नैं बुड्डी गी चौकी उप्पर बहालियै दुआरी हेठ तुआरेया ते आखेया जे बूटे दी हाम पगड़िऐ कन्ध टपेयां ते घर टुरी जायां । बुड्डी नैं उत्थुआं दी सारी ते इन्न मिन्न परतोने दी गल्ल उनें गी सनाई । मित्तरै राजकमारै गी आखेया—“लौ, तुन्दा कम ते बनेया । पद्मावती नैं इसै रस्तै तुसें गी अज सवां सदेया ऐ ।”

राजकमार जिसलै बागै दी कन्ध टपिऐ दुआरी हेठ पुज्जा तां रस्से कन्ने बज्झी दी चौकी लमकारदी ही । ते बान्दियां बल्गारदियां हियां । राजकमार उप्पर पुज्जा तां पद्मावती गल्ले लग्गी ते सत्कार कीता । दमै प्रेमी प्रीतै दे लुआरे लैन लगे ते गन्धर्व रीति कन्ने उनें व्याह करी लैता । राजकमार उत्थे गै छपिये रौन लेई पेया ।

इक दिन राजकमारै पद्मावती गी आखेया—मेरा मित्तर बी आयेदा ऐ, उसै बुड्डी घर रौन्दा ऐ । दनां मिली आमां । पद्मा गी जिसलै पता लगा जे रस्ता दस्सने आला ते ओ बजीरै दा जागत ऐ तां ओ किश सोचै पेई गई । उस बुद्धिशरीरै दी खातरै मूजब पान सपारी ते थाल लाई भेजेया बुद्धिशरीरै आखेया तुसें पद्मावती गी माढ़े बारे इच दोखी बनाई ओढ़ेया ऐ । ओ तुसें गी प्रेम करदी ऐ ते चान्दी जे होर कोई तुसें गी ओदे कशा खोई नई लै । ओ तुसें गी अपने कोल गै रखना चान्दी ऐ । ओ अपने माऊ बब्बै ते साक-सरबन्धिये गी छोड़िऐ तुन्दे कन्ने चली पवै नेई सबील करनी लोड़चदी ऐ ।”

ए गल्लां करा करदे हे जे सिढ़कै उप्पर नड़ोआ लंधेया । पता लग्गा जे राजे कर्णोत्पल दा राजकमार मरी गया ऐ । बुद्धिशरीरै

योजना बनाई लैती। उन्न राजकमारै गी आखेया—जे अज्जे पद्मावती कश जाइए खूब ऐश करो, उसी शराब पलाई पलाई बिल्कुल मत्तू करी ओड़ो। उसी कक्ख होश नईं रवै। नुआड़े लक्कै उपपर त्रसूलै कन्ने नशान पाई ओड़यो ते नुआड़े गहने बन्दे लइए दुआरी आलै रस्तै दुरी आवेयो। आखेदा ऐ लायक बजीरै दी सलाह सुनी, ढिल्ल मट्ट नईं करनी लोढ़चदी। राजकमारै उआं गै कीता। पद्मावती गी नशान पाइए ते गहने बन्दे लइए दुरी आया। बुद्धिशरीर हुन दूई खेड खेडन लगा।

ओ मित्तरै गी लइयै ते चेला बनाइए मसानघाट जाई बैठा इक दिन पद्मावती दा हार दइये आखन लगा 'इसी बजार लई जाओ, लोकें गी दस्सो इन्ना मुल्ल मंगो जे कोई दर्ई नईं सकै। पुलसा आले पुछन तां माढ़ा पता देओ।' पद्मावती नैं पुलसा च रपोट कराई दी ही। हार बेचदा चेला पुलसा आलें पगड़ी लैता ते गुरु हुन्दे कोल मसानघाट आये। गुरु होर गल्ल सनान लगे—मसानघाट रौन्ने आं। असें धन माया दा के कम्म ! राजकृणोत्पल दे टिकके पुत्तरै दा काल होआ तां उस रातीं इत्थें मसानघाट जोगनै दा मेला लग्गा। नुआड़ा कालजा खाइयै इक जोगन नेईं मत्तू होई जे माढ़ी माला खोन लगी। मे त्रसूलै दी इक सुट्टी नुआड़े लक्कै च ते हार नुआड़ा खुस्सी लैता। हुन ओ हार बजार बेचने गी चेला टोरेया।"

पुलसा आलें ए सारी गल्ल राजे गी सनाई। राजे नैं इक दासी पद्मावती दे लक्कै उपपर त्रसूलै दा नशान दिक्खन भेजी। उस गलाया जे नशान पक्क ऐ। राजे गी जकीन होई

गेया जे पद्मावती नैं गै नुआड़े राजकमार गी खादा ऐ । उन्न महात्मा कन्ने सलाह करिऐ पद्मावती गी शहरा बाहर कड़ी ओड़ेया । रात पई तां राजकमार ते बुद्धिशरीर घोड़े' उपपर चढ़िऐ उस थार पुज्जे जित्थे राजे दे लोक पद्मावती गी छोड़ी आये हे । उनें पद्मावती गी दम दलासा दित्ता ते अपने राजै च लई आये । राजकमार ते पद्मावती रस्सन-बस्सन लगे । पद्मावती दे माऊ बब्बै समझेया जे पद्मावती गी कोई जीव खाई गेया ऐ ते इस दुःखै विच उनें प्राण दर्ई ओड़े ।

ए सारी कथ सनाइऐ बताल राजे गी पुच्छन लगा—मेरा सैंसा मिटाओ । पद्मावती दे माऊ बब्बै दी मौती दा जिम्मेदार कुण ऐ ? बुद्धिशरीर, राजकमार जां पद्मावती ? राजे गलाया—तुस ते आपुं जानी जान ओ । एदे विच इनें त्रौणें दा दोस नई' । कसूर राजे कर्णोत्पलै दा ऐ ।

बुद्धिशरीरै जे किश कीता अपने स्वामी गितै कीता । राजकमार ते पद्मावती प्रेमै विच अन्नो होये दे हे उन्दा बी के कसूर । पर राजा कर्णोत्पल जरूर दोषी ऐ । उसी नीति दे नियमें दा पता नई', उस भेतियें कशा मामले दी पड़ताल नई' करवाई । न गै उसी सारतें सैनियें दा किश पता हा । उस गलत फैसला दइऐ पद्मावती दे माऊ बब्बै दी मौत कीती ।

राजे नैं उत्तर ते ठीक दित्ता पर मौन भंग नई' करने आली पतिंग्या त्रोड़ी ओड़ी ही । उस करी बताल नुआड़े भूण्डे परा लोप होई गेया । राजा परतियै उसी तुप्पन चढ़ेया ।

दूई कथ

राजा त्रबिक्रम सेन बताल गी आनने आस्तै फिरी
 शिंशपा दे बूटे कोल गेया । जिसलै ओ उर्थें पुज्जा ते
 चिखें दी लोई च तुप्पन लगा उस दिक्खेया जे मुड़दा
 भुवां पेदा कुरा करदा ऐ । मुड़दे गी मूण्डे उपपर चुक्कियै
 ओ चुपचाप निश्चित थां पासै चली पेआ । मूण्डे परा बतालै
 राजे गी पुच्छेया—“राजा जी ! जिस बिपता च तुस पेदे ओ,
 ओ तुन्दे जोग नईं । औं तुसें गी रोल कराने गितै इक कथ
 सनानां । ध्यान दइऐ सुनो ।

जमना नदी दै कण्डै इक ब्रह्मस्थल नां दा प्रां शड़ा ब्राह्मणें गी
 थोए दा हा । इर्थें चौनें वेदें दा पंडित अग्निस्वामी रौंदा हा । ओदे
 घर इक धी जम्मी । कुड़ी बड़ी गै शैल ही । ओदा नां भंदारवती
 रखेया । सच्च गल्ल ए ऐ जे जिसलै ब्रह्मा ने उसी घड़ेया
 तां उसी अपनी सुरगै दी दिव्व अपसरां बनाने कन्ने संदोख
 नईं हा होए दा । जिसलै ओ कुड़ी बड़ी होई तां काव्यकुब्जै दे
 त्रै ब्राह्मण जेड़े विद्या बुद्धि च इक्कै ने हे, उर्थें आए । उन्दे चा हर
 इक बक्खरा बक्खरा अग्निस्वामी गी आखन लगा जे भंदारवती
 मिगी व्याही दे, ते कन्ने गै ए बी आखदा हा जे मिगी नईं व्याही
 दिक्खी तां अउं जिन्द देई ओढ़ळ । कुड़ी दा बब्ब कुसै कन्ने बी

हामी नईं भरै । ओ डरदा हा जे इक गी दिन्ती तां दुए जिन्द दिन्दे न । नतीजा ए निकलेया जे कुड़ी कुआरी रई । ओ त्रैवे बी दिन रात उत्थें रौन लेई पे । मंदारवती दे चन्नै जनेह मुहें गी दिखदे रौन्दे । इयां बभौदा हा जे चकोरें दा प्रण उने धारी लेया ऐ ।

इक दिन के होआ जे मंदारवती गी चान चक्क गै बड़े जोरै दा ताप चढ़ेया ते ओ मरी गई । उनें त्रौणें गी बड़ा गम होआ । उनें ओदा किड़ा सजाया ते मसान घाट जाई फूकी ओढ़ेया । उन्दे चा इक्क नै ते उत्थें चिखा आलै थार धूनी रमाई लई ते उत्थें गै रौन लेई पेया । भिक्खेया मंगी चुंगी आनै ते दिन कड़ी उड़ै । दूआ ओदी सल्ह सुट्टन गंगा जी गया उठी । त्रीया सिर सुआह पाइए साधू होई गया ते बदेसैं निकली गया ।

जेड़ा साधु बनेदा हा ओ फिरदा फरांदा इक ग्रां च पुज्जा जेदा नां ब्रह्मलोक हा । उत्थें ओ इक ब्राह्मणै दे घर अभ्यागत बनिए गया । ब्राह्मणै नुआड़ा सत्कार कीता ते भोजन बरताया इन्ने च के होआ जे ओदा जागत रोन लेई पेया ब्राह्मणी उसी चुप्प कराने दे मते तरले करै पर ओ नईं चुप्प होऐ । उसी रोह चढ़ेया, ते उस जागतै गी चुक्किऐ बलदी अगगी च त्रट्टेया । जागतै दा कुंगला देह हा, पौन्दे गै मड़ोई गया । जिसलै अभ्यागत साधु ने ए किश दिक्खेया तां ओदे सरकण्डे उमरी आये । ओ आखन लगा—“हरे राम, हरे राम ! अउं ते ब्राह्मणै दे नईं

कुसै राकशै दे घर आई गयां । अउं ते इत्थे भोजन नईं करदा । एह भोजन ते साख्यात पापै दा ढेर ऐ ।” ओदी गल्ल सुनिऐ घरै आला आखन लगा—“आओ तुसें गी अपने मन्तरै दी शगति दस्सां, जेड़ा पढ़दे गै मोए गी जीन्दा करी ओढ़दा ऐ । ए आखिऐ उस मन्तरै आली इक पोथी कड़्ही, मंत्र पढ़ेया ते सुआऊ उप्पर मैत्री दी बभूत धूड़ी । ए करदे गै जागत पहले आहु जींदा जागदा उट्टी खड़ोता ।

साधु दा चित्त शान्त होआ ते उस भोजन पाया । घरै आले ब्राह्मणै ओ पोथी चौकी उप्पर ते रखी ते आपू भोजन करिऐ सेई गया । अभ्यागत साधु बी लेटी गया । जिसलै घरा आला कूक सेई गया तां साधु चोरी गै उठेया, पोथी चुक्की ते बाहर निकली गया । उस सोचेया जे अपनी प्रेमका गी जींदा करड ।

दिन रात सफर करदा ओ उत्थें मसानघाट पुज्जा जित्थें उस प्रेमका गी दाह दित्ता दा हा । उसै लै दूआ ब्राह्मण बी जेड़ा सल लेइऐ गंगा जी गेदा हा, उत्थें आई पुज्जा । उनै गी त्रीया साथी बी लब्बा जेड़ा उस चिखा आलै थार धूनी लाइऐ ते कुटिया पाइऐ रवा करदा हा । उस साधु बनिऐ गेदे ब्राह्मणै दूर साथियें गी आखेया—“इस कुटिया गी इत्थुआं चुक्को । माढ़े कश इक मंतर ऐ ते में प्रेमका दी मर्तूढ़ लइऐ, मंतर मारिऐ उसी फिरी जींदा करी लैड ।” उस दौनें गी रजामन्द करी लैता, कुटिया पुट्टी ते मन्तरै आली पोथी चा मंतर पढ़िऐ मैत्री दी बभूत उस चिखा आले थारै उप्पर सुट्टी । मंदारवती परतिऐ

जींदी होई गई। ओदा शरीर पहलें कशा, जिसलै उसी दाह दित्ता हा, मता कुन्दन होए दा निकलेया। ओ सुन्ने दी मूरत-जन बभोए दी ही।

जिसलै उनें त्रौनें दिक्खेया जे ओ जींदी होई गोई ऐ तां उनें गी काम सतान लगा। ओ मुड़िऐ भगड़न लेई पे, ते खिच्च वृद्ध शुरू होई पई। पहला आखन लगा—“ए ते मेरी लाड़ी ऐ। में मंतर मारिऐ इसी जींदा कीता ऐ।” दूसरा आखन लगा—ए माढ़ी ऐ। में ओदी मर्तूढ़े दी रखेया कीती ते अपनी तपस्या कन्ने उसी जींदा कीता ऐ।”

हुन राजा जी तुस इस भगड़े दा निर्ण करे जे ओ कुड़ी कोदी लाड़ी होई ? जे तुसें गी पता होऐ ते तुस दस्सो नईं तां तुन्दे सिरै दे सौ टोटे होई जाडन।

राजे बताल कशा ए सुनिऐ जबाब दित्ता—“जिसनें मंतरै कन्ने उसी जींदा कीता मेहनत ते उस मती कीती ते कष्ट बी मता भोगेया पर ओ उस कुड़िया दा बब्ब होआ। की जे उसने बब्बे आला कम्म कीता, उसी जीवन दान दित्ता। ते जेड़ा फुल्ल लइऐ गंगा जी गेया हा ओ नुआड़ा मित्तर मिथया लोड़चदा ऐ। पर जेड़ा प्रेमै च ओदी मर्तूढ़ा पर मसानघाट बेई रेया, ते ओदी मर्तूढ़ गलै कन्ने लाइऐ तपस्या करदा रेया, उऐ नुआड़ा पति समझना चाही दा ऐ। की जे उसै ने प्रेमिएं आली गल्ल नभाई ऐ।”

इयां बोलदे राजे त्रविक्रमसेन कशा फिरी मौन भंग होई
 गया । बताल ए सुनिए ओदे मूण्डे परा लोप होआ ते अपने
 थारै गया उठी । पर राजे महात्मा दा कम्म करना ध्याये दा
 हा । ओ उसी फिरी आनने गितै चली पेया । ए ठीक गै गलाए
 दा जे पक्के निश्चे आले अपनी गल्ल जरूर गै तोड़ चाढ़दे न,
 भांये उन्दी जान की नई चली जा ।

त्री कत्थ

वीर राजा त्रविक्रमसेन बताल गी आनने आस्तै फिरी
उस शिंशपा दे बूटे हेठ पुज्जा । उस बतालै गी मूण्डै
बाया ते चुपचाप चली पेया । बत्ता चलदे बताल गलान
लगा—“बड़ी बचित्तर गल्ल ऐ जे तुस रातीं मसानघाट
जाने ते परतोने कशा त्रान्दे नईं । रमान देने गितै अऊं तुसें गी
इक कत्थ सनानां । ध्यान लाइऐ सुनो—

पाटलीपुत्र नां दी परसिद्ध नगरी च इक राजा विक्रम
केसरी राज करदा हा । ओ राजा गुणें ते रतनें दी खान हा ।
ओदे कश विदग्धचूड़ामणि नां दा इक दिव्व बुद्धि आला तोता
हा जिसी सारे शास्त्र औंदे हे । ओ इक श्रापै दे कारण तोते
दी जून आए दा हा । उस राजे नैं तोते दी सलाह उप्पर मग्ध
देसै दी राजकमारी चन्द्रप्रभा कन्ने व्याह कीता । ओ राज-
कमारी ओडे गै कुलीन घराने दी ही जेडे दा राजा । इस राज-
कमारी कोल सोनिका नां दी इक मैनां ही । ए बी बुद्धि ते
जानकारी च बड़ी परसिद्ध ही । ए दोऐ तोता ते मैनां उस महला
इच किट्टे इक पिंजरे च रौन्दे हे ते अपने मालक ते मालकन दी
अपनी बुद्धि कन्ने मदत करदे हे ।

इक दिन तोता मैना उत्पर मोहित होई गया ते उसी आखन लगा—“अड़िए, आ व्याह करी लैचै । अस इस पिंजरे च किट्टे रौन्ने, बौन्ने ते सौन्ने आं । पर मैना उसी आखन लगी—में कुसै बी मरदै कन्ने गूढ़ी प्रीत नई लानी । मर्द बड़े धोखे-बाज ते किरतघन हुन्दे न ।” तोते नैं जबाब दित्ता—ए गल्ल सच नई जे मर्द धोखेबाज हुन्दे न । पर जनानियां जरूर धोखे-बाज ते निर्दयी हुन्दियां न ।” इयां दोऐ भगड़न लगे । उनैं दौनैं ए शर्त बन्नी जें तोता जित्तै तां मैनां ओदी लाड़ी बनै । जे मैनां जित्तै तां तोते गी ओदा गलाम बनना होग । ए शर्त लाइऐ ओ राजे कोल निर्णय लैन आये । राजा अपने पिता दी न्यायशाला इच बेठा दा हा । उस दौनैं दी गल्ल सुनी ते मैनां गी आखेया—“तू दस्स मर्द कियां किरतघन हुन्दे न ?” अरनी गल्ल सिद्ध करने आस्तै मैनां ए कथ सनान लगी—

कामन्दकी नां दी नगरी इच अर्थदत्त नां दा इक बड़ा अमीर सदागर रौन्दा हा । ओदा धनदत्त नां दा इक पुत्तर हा । जिसलै ओ मोआ तां धनदत्त फैलसूफिणं इच पेई गया । किश बदमाश ओदे गिरद कट्टे होई गे ते उसी जूए ते होर बुरियें गल्लें इच पाई ओड़ेया । सच्ची गल्ल ए ऐ जे बुरी संगत गै सारी बुराइणं दी जड़ हुन्दी ऐ । थोड़े चिरै इच गै ओदा सारा धन फजूलखर्चिणं च मुक्की गया, ते जिसलै गरीबी हत्थें शर्म-सार होआ तां अपना नगर छोड़िऐ बदेस गया उठी ।

दुरदा दुरदा ओ चन्दनपुर पुज्जा । भोजनै दी इच्छा करदा ओ इक सेठै दे घर गेआ । अगैं भागैं दा फेर दिक्खो सेठ नैं

दिक्खेया जे जागत बड़ा शैल ते जवान ऐ, कुल गोत्तर
आदि सारियां गल्लां पुच्छिए उसी अपने घर गै रक्खी लैता ।
अपनी धी रत्नावली उसी व्याही दित्ती ते उसी घर जुआई
बनाई लेया । ओ धनदत्त उत्थें सौहरे घर गै रौन लगी पेया ।

किश समैं परैन्त उसी पहली सारी बिपता भुल्ली गेई ।
उस मता धन किट्टा करी लैता ते फजूलखर्चिए च पौने आस्ते
घर जाने दियां गल्लां सोचन लगा । उसनै तरले मिनतां करिए,
सौहरे दी मरजी नई हुन्दे होई बी ओदे कशा जाजत लई
लेई । सेठै दी धी गै इक-भातर लुआद ही । पर कुड़ियां पराया
धन हुन्दियां न । के करदा ! सारे गहने बन्दे पुआइए ते इक
बुड्डी गी कन्ने लइए धनदत्त उत्थुआं चली पेआ । ओ सारे त्रै
जने गै हे । चलदे चलदे ओ दूर इक जंगलै इच पुज्जे । उत्थे
जाइए उसने ए गल्ल बनाई जे जंगलै इच चोरें डाकुएं दा डर
हुन्दा ऐ । सारे बन्दे तुआरिए कश रखी लैते । हे राम इन्हें मरदै
दा दिल जेड़े जूए ते बदकारी इच पे दे हुन्दे न, तलवारी दी
धारू आडु केड़ा कठोर हुन्दा ऐ ।

उस बदमाशै धनै आस्ते अपनी सतवंती लाड़ी गी जीएं
मारी ओढ़ने दी ध्याई लैती । उस लाड़ी गी ते बुड्ढिया गी इक
दन्दे दा रलकाया ते आपूं गेआ उठी । बुड्ढी ते हेठ पुजदे गै
मरी गई पर ओ लाड़ी भूड़िएं इच पलची गेई ते मोई नई ।
ओ बड़े जतनैं कन्ने मसां डडलै पर चढ़ी । ओदी अजें नई ही
लिखी दी । जड़ें ते भूड़ें गी फगड़दी फगड़दी उपर पुज्जी । बचारी

दे अत्थरू नईं हे थमोन्दे । रस्ता पुशदी पशांदी मसां उस शिङ्का पर पुज्जी जिस बक्खिया ओ आई ही ते बड़े कष्टे कन्ने अपने प्यौकै पुज्जी । चोटें करी ओदा अंग अंग तुल्ली गोदा हा । जिसले ओ इस हालती इच उत्थें पुज्जी, ओदे मा बव्व काहले होइए उसी पुच्छन लगे । पर उस सतवंती ने रोंदे रोंदे गलाया—“रस्ते इच असें गी डाकुएं लुट्टी लैता । उनें गी बन्निऐ त्रीददे लई गे । बुट्टी मरी गई ते मिगी दन्दे दा रुलकाई गे पर अउं बची गई आं । तुआई औंदे इक मशाफरै तरस खाइए मिगी दन्दे हेठा उपपर आंदा ते भागें कन्ने बची आं । ते इत्थें पुज्जी पई आं ।” जिसलै उस भली लोक रत्नावली नै ए गल्ल सनाई, माऊ बव्वै नै उसी दम दलासा दित्ता । ओ फिरी उसै पति दा ध्यान करदी उत्थें रौन लगी ।

ओदा पति धनदत्त अपने देस गोआ उठी ते उत्थें जूए ते बदकारी इच सारा धन लुटाई बैठा । ओ सोचन लगा—“अपने सौहरे कशा होर धन मंगी लई औनां । में उसी आखड जे ओदी धी घर सुखै इच ऐ ।” दिलै इच ए विचारिऐ ओ अपने सौहरे आसे चली पेया । जिसलै ओ उत्थें कोल पुज्जा तां ओदी लाड़ी नै उसी दिक्खी लैता । ओ ट्रांड़िऐ ओदे चरणें इच डिग्गी पई । खस्म भांए बुरा होऐ पर चंगी त्रीमत ओदे बारे च अपने भाव नई बदलदी । जिसलै ओ डरेया, उस बचारी नै ओ सारी कहानी उसी दस्सी ओड़ी जेड़ी उसनै घड़िऐ अपने माऊ बव्वै गी सुनाई ही । कियां डाकुएं हल्ला कीता, कियां ओ दन्दे दा डिग्गी ते होर सारियां गल्लां । हुन ओ

नधड़क होइए सौहरे घर बड़ेया । सस्सू सौहरे नै उसी दिखिए ओदा स्वागत कीता ते ओदे औने पर अपने मित्तरें गी इक धाम दित्ती । सौहरे ने खुश होइए उनें गी दस्सेया जे कियों ओदा जमातरा डाकुए कशा मसां बचेया हा ।”

ओ धनदत्त रत्नावली कन्ने रंगरलियां मनांदा रौन लई पेया ते सौहरे दे धनै कन्नै खेडदा रेया । पर धृगलानत उसी जे किश उस निर्दयी नै इक रातीं कीता । ओ सनांदे बी शर्मे कन्ने जीभ रुकदी ऐ, पर कत्थ पूरी करने आस्ते सनानी गै पौन्दी ऐ । इक रातीं उस अपने कन्ने सुत्ती दी अपनी लाड़ी गी जीए मारी ओड़ेया, ते ओदे सारे गहने बन्दे लइए चोरी गै अपने देसै गी नस्सी गेआ । एडे बुरे हुन्दे न मर्द ।

जिसलै मैनां ए सनाई बैठी तां राजे तोते गी आखेया—
“हुन तू अपनी गल्ल दस ।” तोता गल्लान लगा—स्त्रिएं दा सुभा बड़ा शोहला ते किश बी करी गुजरने आला हुन्दा ऐ । ओ चरित्तरहीन ते बड़ियां बुरियां हुन्दियां न । उस विशे च तुसें गी इक कत्थ सनानां ।

हर्षवती नां दी इक नगरी बिंच इक सेठ धर्मदत्त रौन्दा हा ते ओ करोड़ें च खेडदा हा । सेठै दी इक धी ही वसुदत्ता, जेड़ी शलैपे च बेजोड़ ही । सेठ उसी अपनी जिन्दू कोला बी जादा प्यार करदा हा । उस अपनी धियू गी इक नौजवान सेठपुत्तर कन्ने व्याही ओड़ेया । ओ शलैपे इच, धनै इच ते कुलीनता इच उस स्त्री कोला कुसै चाली बी घट्ट नई हा । उसी दिखिए जियां चकोर

चन्नै दियां किरणां दिक्खी खुश हुन्दे न, इयां स्त्रियां अपनियां अक्खियां कर्तारथ करदियां हियां । ओ नौजवान सेठ पुत्तर ताम्रलिप्ती नगरी इच रौन्दा हा । उत्थुं दे लोक बड़े इज्जतदार ते मन्ने तन्ने दे हे । इक बारी के होआ जे सेठ दी धी प्योकै आई दी ही ते ओ अपने शहरा इच व्योपारै इच मग्न हा । वसुदत्ता ने अपने कोठे परा इक सुन्दर नौजवान दिखेया । ओ चलचित्त मटयार ओदे पर मोहित होई गई । अपनी विश्वास-पात्तर नौकरानी गी सहिए उसी बलाया ते चोरी गै अपना प्रेमी बनाइए अपने कोल रखी लेया । ओ रोज रातीं ओदे कश गै रौन्दी ते उसनै अपना सारा प्रेम ओदे उपर केन्द्रित करी ओड़ेया ।

इक दिन ओदा पति अपने देसा दा उत्थें आया । ओदे प्योकिए अपने जमातरे गी दिखिए बड़े खुश होए । उस खुशी आले ध्याइँ उनें कुड़िया दा शिंगार कीता पर ओ अपने पति कन्नै बोली गै नईं । ओदी माऊ नैं बड़ा समझाया पर ओदा मुंह नईं सिद्धा होआ । जिसलै ओदा पति ओदे कन्नै गल्ल बात करन लगा तां घसेट बट्टिए सुत्ती रेई । ओदा दिल ते कुसै दूए कन्नै लगे दा हा । ओदा पति सफर करिए हुट्टे दा हा, कन्नै धामै दी ते शरावै दी खमारी चढ़ा करदी ही, ओ बी गूढ़ी नीन्दरा सेई गेआ ।

इन्ने चिरै इच बाकी घरै आले बी खाई पीए बेले होए ते सई गे । इक चोरै ने सन्न दिक्खी ते ओ कुड़ी दे कमरे विच बड़ेया । ओ सेठै दी कुड़ी उट्टी उसनै चोरै गी नईं दिखेया ।

ओ बल्लें गै बाहर निकली, उस अपने प्रेमी कन्नो मिलने दी गल्ल पक्की कीती दी ही । चोरै दिखेया जे ओदी गल्ल ते तोड़ नई चढ़ी । उस आखेया—“जिनें गहने-बन्दें आस्ते अउं आयां ओ सारे पाइए ते इकली रातीं कुतै बाहर चली ऐ । अम्मी दिखनां ए कुत्थें जन्दी ऐ ।” चोर ए गल्ल पक्की ध्याइए बाहर निकलेया ते चोरी चोरी वसुदत्ता दा पीशा करन लगा ।

ओदे हत्थै इच फुल्ल ते मता किश हा ते ओदी विश्वास-पात्तर सखी ओदे कन्नो ही । उए शड़ी ओदी भेतन ही । शहरा बाहर ओ इक बागै इच बड़ियां । उत्थें जाइए उस के दिखेया जे ओदा प्रेमी बूटे पर फांसी लगा दा हा ते ओदी लोथ लमका करदी ही । ओदे गल्लै इच रस्सा पेदा हा । शहरै दे राखें उसी रातीं उत्थे दिखेया ते समझेया जे ए कोई चोर ऐ ते फाह लाई ओड़ेया हा ।

ओ बड़ी दुखी होई ते ओदे खानेया गई । ओ बुआसरी—हाए, मेरा किश नई रेया । ओ भुवां विलन लगी ते कीरने पान लगी । उस प्रेमी दी लोथ बूटे परा तुआरी, उसी बहालेया अपने कन्नो आंदे दे अतर ते फुल्लें कन्नो उसी सजाया ते भांए ओ शड़ी लोथ गै ही, पर ओ बड़ी काम पीड़ा कन्ने अन्नी होई दी ही । गल्लें लग्गी, उस ओदा मुंह उबड़ा कीता ते प्यार लैता । उस प्रेमी दी लोथै इच बताल दा प्रवेश होए दा हा । उस नुआड़ा नक्क बड़ी खादा । ओ घबराई, ते उसी छोड़िए पीड़ा कन्ने करलाई । इन्ना किश होने पर बी ओ मुड़िए ओदे कश गई

मत ओ जीन्दा गै होऐ । जिसलै उसनै दिखेया जे बताल उस शरीरा चा निकली गेदा ऐ ते ओ हुन शड़ी लोथ गै ऐ तां हौली हौली उत्थुआं परतोई । ओ डरा करदी ही ते भलखोई दी बीही ।

इन्ना चिर ओ चोर छुपे दा सारा किश दिखदा रेया । ओ अपने आपै इच सोचन लगा—“इस महास्ती नै ए के कीता ? हे राम, स्त्रिएं दा दिल किन्ना खतरनाक ते काला हुन्दा ऐ । इस डूंगे खूऐ दी थाह गै कोई नई । हुन दिखो भला ए के करदी ऐ ।”

ए सोचिए ओ इस जनानी दे पिच्छे चली पेया । उसी दिखने दी बड़ी लून ही । ओ किश दूर ओदे पिच्छे गै रेया ।

वसुदत्ता चलिऐ अपने कमरे इच पुज्जी जित्थें ओदा खसम सुत्ता दा हा, ते रोन ते कर्लान लगी पई—“दौड़ो लोको, बचाओ, ए माड़ा खसम ऐ, जां शत्रु ! इस मेरा नक्क बड्डी ओड़ेया ऐ । में किश बी नई कीता ।” ओदा खसम, बच्च, नौकर-चाकर ए रौला सुनिए घबराए दे उठे । ओदे बच्चै नुआड़ा नक्क बडोए दा दिखेया । उसी बड़ा रोह चढ़ेया । उस नक्क बडुने दे जुरमै इच जमातरे गी मुलजम बनाई ओड़ेया । ओ गिरफ्तार होए दा बी किश नई बोलेया । ओ गूंगा जन होई गेदा हा । दिखने सुनने आले ते नुआड़ा सौहरा सारे गै ओदे खलाफ होई गेदे हे ।

चोर ए सब किल्ल दिखिए भट गै निकली गेया । खुड़बा खुड़बी च रात मस्यां बीती । सौहरा उस सेठपुत्तरै गी लइऐ राजे दे दरवारै इच हाजर होआ । सस्स ते बड्डे नक्कै आली लाड़ी बी कन्ने ही । उनें राजे गी सारा किश सनाया, ते राजे लाड़ी गी अंग हीन करने दे अपराधै इच सेठपुत्तरै गी फाह लाने दा हुक्म दित्ता । सेठपुत्तर तां बी किश नईं बुआसरेया । जिसलै ढोल बजांदे उसी फाह देन लेया करदे हे, ओ चोर राजे दे अफसरे कोल पुज्जा ते आखन लगा—“तुस इयां गै इस बचारे गी फाह नईं लाई ओड़ो । मिगी सारी गल्लै दा पता ऐ मी राजे कश लेई चलो, में सारी गल्ल सनानां ।

जिसलै चोरै ए आखेया तां पुलसा आले उसी राजे कश लई गे । चोरै माफी दा फर्मान लइऐ रातीं आली गल्ल शुरू कोला लइऐ अखीर तक राजे गी सनाई ते आखेया—“जे तुसें गी मादियें गल्लें पर जकीन नईं होऐ तां तुस नुआड़ा टुक्की खादा दा नक्क मुड़दे दे मुं हैं च दिखी लौ ।” राजे ए सुनिऐ अपने शपाही भेजे । जिसलै ए गल्ल सच्ची निकली तां राजे ओदी फांसी दी सजा हटाई ओड़ी । उस बदकार जनानी दे कन्न बी बड्डी ओड़े ते उसी देस-निकाला दई ओड़ेया । ओदे सौहरे दी सारी जायदात जव्त करी लैती ते चोरै उपर खुश होइऐ उसी शहरै दा कुदुआल बनाई ओड़ेया ।

“सो तुस दिक्खो—जनानियां सुभा दा गै वड़ियां दुष्ट ते धोखेबाज हुन्दियां न ।”

जिसलै तोते नैं ए सारी कथ सनाई नुआड़ा श्राप चुक्की
 गया ते ओ मुड़िऐ चित्ररथ गन्धर्व बनी गया । दिव्व देह धारण
 करिऐ ओ सुर्ग गया उठी । उसै लै गै उस मैना दा श्राप बी
 मुक्की गोआ ते ओ अप्सरा तिलोत्तमा बनिऐ सुरगै गी गई उठी
 ते उस राजद्वारै इच इस भगड़े दा निर्ण नई होई सकेया ।

बताल ए सारी कथ सनाइऐ राजे गी पुच्छन लगा—
 “महाराज, हुन तुस निर्ण देओ, मर्द कच्चे हुन्दे न जा
 जनानियां । ते जे जानी बुझिऐ नई दसगेओ तां तुन्दे सिरै दे
 टोटे होई जाडन ।”

राजे आखेया — “हे भूतराज ! जनानियां गै कचियां हुन्दियां
 न । होई सकदा ऐ कुतै मर्द बी कच्चा निकलेया होऐ, पर
 जनानियां ते हर थां, ते हर समै मुण्डा दा गै बदकार हुन्दियां न ।
 जिसलै राजा ए बोलेया तां बताल मूण्डे परा पहले आडु लोप
 होई गोआ ।

राजा उसी आनने आस्तै फी परतोआ ।

चौथी कथ

राजा त्रविक्रमसैन रातीं फी मसानघाट शिंशपा दे बूटे
हेठ पुज्जा । उस लोथी आले बताल गी मूण्डे पर चुकिए
नधड़क होइए चुपचाप चली पेया । बतालै गड़ाका
सुट्टेया । राजा चुपचाप चलदा रेया । बताल नैं उसी फी
आखेया—राजा जी ! उस शतान साधु आस्तै तुस इन्ना कष्ट की
पा करदेओ ? ए व्यर्थ खेचल करने इच तुस किश वचार नई
करदे । तुसें गी बत्ता चलदे इक कथ सनानां :—

शोभावती नां दी इक बड़ी शैल नगरी बिच इक बड़ा
शूरवीर राजा शूद्रक राज करदा हा । उसनैं बड़ियां लड़ाइयां
जित्तियां ते ओदी मशहूरी दूर दूर पुज्जी दी ही । ओदे राजै इच
बड़े धर्मकार्य हुन्दे रौन्दे हे ते बड़ा सुख ते रमान हा । धरती
इस बेलै राम राज कशा बी मती सुखी ही ।

मालवा देशै दा वीरवर नां दा इक ब्राह्मण ए सुनिए जे राजा
बहादरें दी कदर करदा ऐ नुआड़े कश नौकरी करन आया ।
ओदी लाड़ी दा नां धर्मवती हा, जागतै दा सत्तवर ते कुड़िया
दा वीरवती । इऐ ओदा टव्वर हा । त्रै नौकर बी हे । ओदे लक्कै
उपर इक बक्खी खोखरी, इक हत्थै इच तलवार ते दूण इच सुन्दर

ढाल ही । परिवार भाएं ओदा इन्ना गै हा, पर उस राजे कश पञ्ज सौ मोहरां तन्खाह मंगी । राजे नैं ओदी नुआरी पर बहादरी दे लकखन दिक्खे ते ओदी मुंह मंगी तन्खाह मन्त्री लैती । पर निक्के नेए टन्वरै आस्तै इन्नी तन्खाह मन्जूर करने करी राजे गी किश खतोला जरूर होई गोआ । ओ पता लान लगा जे एडी रकम ए फैलसूफिणं च खर्ची ओड़दा ऐ जां कुसै चंगे कम्मै च लांदा ऐ । उस भेटिए भेजे जे पता लाओ एदा रौन बौन कनेया ऐ । उसी पता लग्गा जे रोज गड्डैले ते ओ राजा गी मिलन औंदा ऐ ते हत्थै इच तलवार लइऐ राज दुआरा पर पहरा दिन्दा ऐ । फी जाइऐ सौ मोहरां भोजनै आस्ते अपनी लाड़ी गी दई ओड़दा ऐ । सौ मोहरें दे वस्तर, धियो, हवन, पान-सपारी लैदा ऐ । नहाइऐ विष्णु ते शिवे दी पूजा गितै सौ मोहरां बक्खरियां करी ओड़दा ऐ । बाकी दो सौ मोहरां ब्राह्मणें गी दान दई ओड़दा ऐ । पवित्तर धियो कन्ने हवन करिए ते बाकी विधियां पूरियां करिए भोजन करदा ऐ । फी सारी रातीं इकला राज दुआरै पर हत्थै च तलवार लइऐ पहरा दिन्दा ऐ ।

गुप्तचरें कोला ए पता लाइऐ जे ओ धर्म दे कम्मै काजै इच गै धन लान्दा ऐ, राजा मनै इच बड़ा खुश होआ । उस गुप्तचरें गी होर पीछा करने लई ठाकी ओड़ेया, ते वीरवर गी इक मन्ने दा वीर समझन लगी पेया ।

वीरवर नैं सोआ ते सुखै कन्ने नभाई लेया भाएं सूरज दियां किरणां बडियां तेज हियां । फी गरजदी ते बिजली दी तलवार

लशकान्दी बरखा रुत आई ते बाछड़ै कन्ने उन वीरवरै पर हमला करी दित्ता । दिन रात मोहलाधार बरखा पौन्दी रेई पर वीरवर बी राज दुआरै पर डटेया गै रेया । राजे नैं बड्डैलै उसी महला पर दिक्खेया । रातीं फी दिक्खन लगा जे उत्थें है जा नईं । उस पुच्छेया—“कुन पैहरा देआ करदा ऐ ?” वीरवर जवाब दित्ता—“महाराज, में हाजर आं ।” राजा नैं सोचेया, वीरवर सच्चें गै बड़ा बहादर ऐ ते माढ़ा बड़ा भगत ऐ । में इसी कोई कोई बड्डी पदवी देड । ए सोचिए राजा छत्तै पर हेठ उतरेया तें अपने महला इच जाइऐ सेई गोआ ।

दूऐ दिन सवां बड़ा काला डिगल चढ़ेया ते मोहलाधार बरखा शुरू होई । चौने पासै न्हेर गफार पई गोआ । राजा फी छत्तै पर चढ़ेया जे दिक्खै भला ओ उत्थें है जा नईं । उसनैं बाज मारी “दवाजे पर कुन ऐ ?” वीरवर नैं जवाब दित्ता—“महाराज, में आं ।” राजा ओदी बहादरी पर मोहत होए दा मनै इच ओदियां तरीफां करदा हा जे चानचक्क गै उसी कुसै कुसै जनानी दे रोने दी बाज आई । ओ बड़ी दुखी होई दी बैन पा करदी ही । ओ बड़ी गै दुआस लब्दी ही । राजा गी बड़ा क्यास आया । ओ सोचन लगा—“मेरी परजा इच ते नेआ दुखी कोई नईं जिसी इन्ना कष्ट पुज्जा होऐ । नां कोई इन्ना गरीब जां आतुर ऐ । ए इकली रोआ करदी केड़ी जनानी ऐ ?” उसनैं हेठ खड़ोते दे वीरवर गी आखेया—“वीरवर जी ! दूर कुतै कुसै जनानी दी रोने दी बाज आवा करदी ऐ । जाओ दिक्खेयो कुन जनानी ऐ ते की रोआ करदी ऐ ?”

वीरवर नैं ए सुनिए आखेया—“महाराज, हुनैं पता करनां लक्कै उपर खोखरी बन्निऐ ते हत्थै इच तलवार लइऐ चली पेआ । उसी उसलै दुनियां इक काला राक्षस गै बभोई । बिजली मिलका करदी ही, ते बड़े बड़े कण पवा करदे हे जियां पत्थर चौथ शुरु होई दी होऐ ।

राजा शूद्रकै उसी उस न्हेरी रातीं इकला जन्दे दिखिए तरस खादा ते तलवार फगड़िए चोरी चोरी पिशैं छपिऐ चली पेआ । वीरवर चुपचाप दृढ़ता कन्ने उसै बक्खी जा करदा हा जिधरा बाज आवा दी ही । दुरदे दुरदे ओ शहरा बाहर इक तला पर पुज्जा । उस दिक्खेया जे तला बिच खड़ोती इक जनानी ए कीरें पा करदी ही—“हे वीर दयालु सखी महाराज ! में तेरे बिनां क्रियां रौड । वीरवरै, जिसी राजे दे अपने पिछे पिछे औने दा कोई पता नईं हा, हरान होइऐ उसी पुच्छेया—“भागवानैं, तूं कुण एं, ते की रोआ करनी एं ?” उस जवाब दित्ता—“वीरवर जी ! अउं धरती आं । राजा शूद्रक सत्यवादी ते माढ़ा स्वामी ऐ पर अज्जै कोला त्रीए दिन ओदा काल होई जाना ऐ, ते फी मिकी नेआ राजा कुत्थुआं थोना ऐ । इसै दा मी गम होई गोआ ऐ ते अउं ओदे गितै ते अपने गितै रोआ करनी आं ।” ए सुनिए वीरवर दा धड़ाका निकली गोआ । उस पुच्छेया—“हे देवी ! राजे दे बचा दा किश उपा है जां नईं । इस राजे दी बदौलत गै दुनियां दी रखेआ होआ करदी ऐ ।”

धरती आखन लगी—“इस उपाधि गी टालने दा इक्कै उपा

ऐ ते शड़ा तुस गै उसी करी सकदे ओ ।” वीरवरै आखेया—
 “हे धरती ! ओ उपा तू भिगी तोले दस्स जे में उसी भटपट
 करां । नईं तां माढ़े जीने दा के गुण ऐ ?” धरती नै आखेया—
 “तेरे नेआ बहादर ते स्वामी भगत कुन ऐ ! राजे दे कल्याण दा
 ए इक उपा ऐ जे तूं अपने पुत्तर सत्त्ववर दी बलि चण्डी
 महाकाली अगो चाढ़ी ओड़ें तां राजा बची सकदा ऐ । काली
 अपने भगतें उपर बड़ी दयालु हुन्दी ऐ । राजे नैं काली दा
 मन्दिर वी अपने महला कश बनाए दा ऐ । जे तूं ए करें तां राजा
 सौ बरे होर जीग । जे तूं इस इस कम्मै गी तौले गै करी ओड़ें
 तां ते राजे दी रखेआ पक्की होई, नईं ते अज्जे थुवां त्रीऐ ध्याड़ै
 उस पक्क मरी जानां ऐ ।”

जिसलै धरती देवी नैं ए गलाया, वीरवर आखन लगा—
 “देवी अउं हुनै जाह ऐ ए कम्म तोड़ चाढ़नां ।” धरती नै आखेया
 —“परमात्मा करै तूं सफल होए ।” ते लोप होई गई ।

राजा पिछे खड़ोता दा ए सब किश सुना करदा हा ।

वीरवर न्हरे इच तौले गै घरै गी परतोआ । राजा बी बड़ा
 उत्सक हा । ओ बी नुआड़े पिछें चोरी चोरी चली पेआ ।
 वीरवरै अपनी लाड़ी धर्मवती गी जगाया ते राजे दी रक्षा गितै
 धरती देवी नैं जे किश दसेया हा, सुनाया । उस सुनिऐ जवाब
 दित्ता—“स्वामी जी ! राजे दी रक्षा ते असें गी कीती रै
 लोड़चदी ऐ । तुस अपने जागतै गी ठुआलो ते सारी गल्ल
 सनाओ ।”

वीरवरै अपने लौके जागत सत्त्ववर गी जगाया ते जे किश होई बीती ही सब सनाई । ते आखेया—“बच्चुआ ! जे किश चण्डी देवी गी तेरी भेटा देचै तां गै राजा बची सकदा ऐ । नई ते राजा नैं त्रीऐ ध्यावै मरी जाना ई ।

सत्त्ववर भाएँ मसूम बच्चा हा पर उस बहादरें दा जिगरा दस्सेया ते अपने नां दी लाज रखी । उस आखेया—“जे मेरी बलि कन्नो राजे दी जान बची जा तां माढ़ी मनै दी इच्छा पूरी होई जाग, ते में जेड़ा ओदा अन्न खादा ऐ ओदा बी ऋण चुकी जाग । तुस मिगी तौले गै देवी कश लेई चलो ते बलि दई ओड़ो । हुन तुस चिर नई लाओ । मिगी अपने स्वामी दे कल्याण दा साधन बनन देओ ।” सत्त्ववर दी गल्ल सुनिऐ वीरवरै आखेया—“शाबाश ! तू माढ़ा असल पुत्तर एं ।”

राजा जेड़ा वीरवरै दे पिछें पिछें आया हा, उस सारी गल्ल सुनी ते मनै च आखेया—“बन्व पुत्तर दोऐ गै इक्कै नेण हिम्मती न ।”

वीरवरै सत्त्ववर गी मूण्डै चुकेया, ओदी लाड़ी नैं अपनी कुड़ी वीरवती गी कन्नो लेआ ते काली माता दे मन्दिरै आसे चली पे । राजा बी छप्पिए उन्दे पिछें चली पेया । वीरवरै जागतै गी देवी दी मूरती अगें तुआरेया । बहादर जागतै नैं देवी गी मत्था टेकेया ते आखेया—“हे देवी ! मेरी बलि लै ते राजा शूद्रक दे जीवन दी रखेया कर । ओ होर सौ वरे पृथ्वी उपर निष्कण्टक राज करै ।” वीरवरै ए सुनिऐ शाबाश दित्ती, तलवार कड़ी फट्ट

दित्ता ते मुण्डी तुआरिऐ देवी गी भेटा करी दित्ती ते आखेया—
 “माढ़े पुत्तरै दी बलि लइऐ राजे दे प्राणें दी रखेया करेयां ।”
 उसैलै काशवाणी होई—“स्वामी-भगत होऐ ते थुआड़े नेआ ।
 अपने पुत्तरै दी बलि दइऐ तू राजे दे प्राणें ते राजै दी आखेया
 करी लैती ऐ ।” फी के होआ जे वीरवरै दी धी वीरवती अगो
 बधी, उस आऊ दा सिर अपनी गोदी इच लैता ते रोंदी रोंदी
 गमां कन्ने बतेह होई गई ते दुखै इच ओदे प्राण निकली गे ।
 राजा नैं छप्पे दे गै एह सारा किश दिखेया सुनेया ।

वीरवरै दी लाड़ी धर्मवती नैं आखेया—“असैं राजे दा
 कल्याण ते निश्चय करी गै ओड़ेया ऐ । हुन तुस मेरी गल्ल
 सुनो । साढ़ी कुड़ी भाएं बच्चा गै ही, ते उसी किश पता नईं
 हा, ओ अपने आऊ दे गमैं इच प्राण दई बैठी दी ऐ । मेरी ते
 सारी लुआद गै मुक्की गई ऐ । हुन जीने दा के लाह ? माढ़ी
 मूर्खता दिक्खो । अउं नुआड़े थार अपना सिर चाढ़ी ओढ़दी
 ते के हा ? राजे दा कल्याण होई जन्दा । हुन तुस मिगी जागतें
 दिएं लोथें कन्ने जली जान देओ ।” जिसलै उसनैं वीरवर गी
 ए गलाया, ते ओ आखन लगा—“इयां गै करी लौ, ईश्वर
 थुआड़ा भला करै । भली लोके ! हुण थुआड़े आसै जीन्दे रहिए
 सवाये पुत्तर दे गमां दै होर बाकी के रई गेआ ऐ ? एदा बसोस
 नईं कर जे तूं अपनी बली की नईं दित्ती । जे होर कुसै दी
 बलि कन्ने ए गल्ल होई जन्दी हुन्दी ते अउं नईं अपनी बलि
 देई ओढ़दा । ठहरी जा, अउं थुआड़े आस्तै चिखा बनानां । देवी

दुआरे दा जंगला वनने आस्तै ए लकड़ियां पेई दियां न इन्दे
कन्नो गै चिनी दिनां ।

ए आखिए वीरवरै चिखा चिनी, जागतै दिया लोथा गी उपर
रखिया ते दीए दी जोता कन्नो लाम्बू दित्ता । ओदी लाड़ी
धर्मवती नै ओदे चरणें उपर मत्था टेकेया । फी उस देवी दी
पूजा कीती ते प्रार्थना करन लगी—“हे परमात्मा, मी अगलै
जन्म बी इऐ पति थोन, ते साढ़े राजा शत्रुक दा कल्याण होऐ ।”
ए आखिए ओ चिखा पर जाई बैठी ते चिखा दे भड़ाम्बे
भड़की खड़ोते ।

वीरवर सोचन लगा—“मैं अपना कर्तव्य ते पूरा करी
ओड़ेया । काशवाणी नै बी आखी ओड़ेया जे राजे दी जिन्द
सुरक्षित होई गई ऐ । अउं स्वामी ऋणां दा मुगत होई गेआं ।
राजे दा निमक खादा हा, बदला चकाई ओड़ेया । हुन इकले
रहिए के जीनां ? शड़ा अपने आस्तै जीनां के जीनां होआ !
टव्वरै आस्तै गै ए सारे जतन हुन्दे न । टव्वरै दा बलिदान
करने परैन्त कोदे आस्तै जीनां ? अपनी बलि दइऐ दुर्गा भगवती
गी की नई परसिन्न करां ? ए आखिए ओ देवी दी स्तुति करन
लगा—“हे महिषासुर मर्दनी ! सुरु दानव दा नाश करने आली,
त्रिशूल धारनी देवी ! तेरी जय होऐ । तूं सबनै दी माता एं ।
तूं देवतें गी परसिन्न करने आली एं । तूं त्रौनै लोकें दी रक्षा
करनी एं । सारी दुनियां तुगी मस्था टेकदी ऐ । तूं मोक्ष प्राप्त
करने आलें दी परमधाम एं । तूं सूरज दियां किरणां धारण

करने आली एं । तूं मुसीबत दे न्हेरे गी दूर करनी एं । हे मुण्डमाला धारनी ! तेरी जय होऐ । हे काली तेरी जय होऐ । मेरी बलि लै ते राजा शूद्रक दा कल्याण कर ।” ए स्तुति करिऐ उस तलवारी दे भटके कन्ने अपनी मुण्डी बड़ी ओड़ी ।

राजा शूद्रक ए सब किश आपूं दिक्खा करदा हा । उसी बड़ा क्षोभ होआ । उस हरान होइऐ आखेया—“इस बहादर आदमी ते नुआड़े टब्बरै नैं माड़े आस्तै एडा बड़ा बलिदान कीता ऐ जेड़ा नां कदें कुसै ने कीता ते नां गै करग । ए ठीक गल्ल ऐ जे दुनियां बड़ी बेअन्त ऐ ते ओदे इच मता किश हुन्दा ऐ । पर नेए हृद निश्चे दा मनुक्ख कुत्थों थोना ऐ जिसनै अपने एडे बलिदानै गी बा नईं लगन दिक्ती ते जे में इस उपकार दा बदला नईं चकां ते माड़े राजै दा के लाभ ? ते माड़े जीने दा के लाह ? नेआ जीवन ते शड़ा पशुएं आला जीवन गै होग ।”

वीर राजे ए सोचेया ते अपनी तलवार कड़ी । देवी कश जाइऐ प्रार्थना करन लगा—“देवी मेरे सिरा दी भेटा लै, ते मेरा कल्याण कर । भिगी ए वर दे जे में सदा तेरा भगत रवां । इस वीरवरै अपने नां मताबक गै कम्म कीता ऐ । इसी ते नाड़े टब्बरै गी परतिऐ जीन्दा करी ओड़ो ।” ए प्रार्थना करिऐ उस अपनी मुण्डी बड़ुने गितै तलवार चुक्की लैती । उसै लै अम्बरा दा वाज आई—“राजा, नेआ कम्म नईं कर । अऊं थुआड़े उपपर बड़ी परसिन्न आं । ए ब्राह्मण वीरवर, नुआड़ी लाड़ी ते टब्बर फी जीन्दा होई जाग ।” ए गलाइऐ वाज बन्द होई गई । इन्न

चिरै गी वीरवर, नुआड़ी लाड़ी ते जागत उठी खड़ोते । राजा छप्पी गया ते छप्पिए उनें गी दिखिखे परसिन्न हुन्दा रेया । ते नुआड़ी अक्खिए दा खुशी दे अत्थरुं बगन लगे ।

वीरवर तौले उठेया जियां नींदरा दा जागेया होए । अपने जागत लाड़ी गी ते आपू गी जीन्दा दिखिए उसी बड़ा चवात लगा ते किश समझ नई आवै । उस लाड़ी गी कुआलेया, फी जागतै गी बक्खरे बक्खरे बाजां मारियां । तुस कियां जीन्दे होई गे ओ, तुस ते चिखा इच मरम होई गे दे हे । मिम्मी अपना सिर बड्डी ओड़ेया हा । में कियां जीन्दा होई गेयां ? ए के भूत खेड़ ऐ ? जां देवी दी किरपा दा चमत्कार ऐ ?” ओदी लाड़ी ते जागतै जवाब दित्ता — “साढ़े मुड़िए जीन्दे होने इच देवी दी किरपा दा चमत्कार गै लब्दा ऐ । असें गी ते किश पता नई ।” वीरवर बी इसै नतीजे पर पुज्जा । उनें सारें देवी दी पूजा कीती ते अपना कम्म सिद्ध करिए घर परतोए ।

वीरवर अपने टब्बरै गी घर छोड़िए रातो रात राजदुआरै पर पहरा देन जाई खड़ोता । राजा शूद्रक ए सब किश दिखिए अपने महला गी गया उठी हा । ओ छत्ता पर चढ़ेया ते उसनै पुच्छेया — “हेठ कुन ऐ ?” वीरवरै जवाब दित्ता — “महाराज ! अरुं आं । तुन्दी आज्ञा मूजब में उस जनानी गी तुपदा तुपदा दूर गया पर ओ छपन गै होई गई ।”

राजा वीरवरै दा जवाब सुनिऐ बड़ा हरान होआ । उस सब किश भलेयां आपू दिखे दा हा । ओ आखन लगा — “सच ऐ

उच्चि भावना आले लोक समुद्रै आहु धीरजवान ते हूँगे हुन्दे न । ओ एडी बहादरी दे कम्म करिऐ वी उन्दा बखान नईं करदे ।” ए बचार करदा राजा हेठ आनिऐ अपने कमरे इच सेई रेया । रात बीती गई ।

दूऐ दिन अड्डे पैहर जिसलै वीरवर दरबारै इच हाजर होआ, राजे ने खुश होइऐ सारे बजीरें गी सनाया जे वीरवरै राती के किश कीता । ए सुनिऐ सारें मुहें इच औंगलियां पाई लइयां ते धन्न धन्न करन लगे । राजे नैं वीरवर ते नुआड़े पुत्तरै गी लाट ते कर्णाट सूवें दा राज बखशीश कीता । राजे नैं उन्दी ए कदर पाई । वीरवर ते शूद्रक इकै बरोवरी दे राजे बनी गे ते सदा मित्तरें आहु गै बर्ता करदे रहे ।

बताल ए बचित्तर कथ राजे त्रविक्रमसैन गी सनाइऐ पुच्छन लगा—“अच्छा, राजा जी ! दस्सो उनें सारें इचा बहादर कुन होआ ? जे कर तुस सच नईं दसगेओ तां उऐ श्राप जेड़ा में तुसें गी दस्से दा ऐ, लगग ।”

राजे ए सुनियै जवाब दित्ता—“राजा शूद्रक सारें कशा बहादर हा ।” बताल आखन लगा—“वीरवर ओदे कशा बहादर नईं हा ? ओदी बरोवरी दा ते दुनियां इच कोई नईं । ओदी लाड़ी ओदे कशा वी बहादर नईं ही, जिस मां हुन्दे होए वी अपने पुत्तरै दा बलिदान हुन्दा दिक्खेया ? ओदा पुत्तर सत्त्ववर ओदे कशा वी बहादर नईं हा, जिस जागत हुन्दे होए वी एडा

जिगरा दस्सेया ? तुस कियां आखदेयो जे राजा शूद्रक सारें कशा बहादर ऐ ?”

बतालै दी ए गल्ल सुनियै राजा नैं जवाब दित्ता—“भई ए गल्ल नई । वीरवर बड़े उच्चे जन्मैं दा हा । ओदे कुला दी रीत ही जे अपने राजे दी खातर अपनी जान, स्त्री, पुत्तर सब किश बलि दई ओढ़ना चाई दा ऐ । ओदी लाड़ी बी बड़े उच्चे कुला दी सती ते पतिपरायण ही सत्त्ववर उन्दा जागत ते उन्दे आडु गै हा । सच गलान्दे न जनेया बक्खर होयै उयै नेआ तेल हुन्दा ऐ । पर राजा शूद्रक उनें सारें कशा बधी गया, की जे उसनैं उनें नौकरें आस्ते अपना बलिदान करना लाया हा जिनें मालक आस्तै अपना सर्वस लाना हुन्दा ऐ ।”

ए गल्ल सुनी बताल फिरी राजे दे मूण्डे पर छपन होई गया । ते अपनी दिव्य शक्ति कन्ने पहलै थार गया उठी । राजा पक्के निश्चे दा हा । ओ उसी आनने गी मसानघाट परतोआ ।

पञ्चमी कथ

राजा शिंशपा दे बूटे हेठ पुञ्जा, बताल उसै थार टाल्ले
कन्ने टडोए दा हा । राजे गी किश रोह बी चढ़ेदा हा
उन्न बताल गी तुआरेया, ते भटपट चली पेया । रातीं
मसानघाटै इचा चुपचाप लंघदे जन्दे राजे गी बतालै मूण्डे परा
आखेया—“राजा जी तुसें बड़ा औखा कम्म चुक्केया ऐ । जदूँ
में तुसें गी पहली बारी दिखेया, तुस मी बड़े चंगे लगन लेई पे
हे । अउं थुआड़ा मन परचाने आस्ते इक कथ सनानां ।

उज्जैनी नगरी इच इक बड़ा चंगा ब्राह्मण हा । ओ राजे
पुष्पसेन दा मन्त्री ते बड़ा विश्वासपात्तर हा । ओदा नां हा
हरिस्वामी । ओदी त्रीमत बी बड़ी कुलीन ही ते उन्दा जागत
देवस्वामी बी बड़ा चंगा हा । उन्दी इक धी ही जेदे शलैपे दी
बरोबरी कोई नईं हा करी सकदा । ओदा नां सोमप्रभा हा ।
जिसलै ओ जुआन ते व्याहने जोग होई, उस कुड़िया माऊ
हत्थें बन्वै ते भ्राऊ गी आखी भेजेया—“मेरे व्याह गितै कोई
नेआ वर तुप्पेयो जेड़ा वीर होऐ, विद्वान होऐ, जां मैतरे दी
सिद्धि आला होऐ । जे तुसें गी माढ़ी जिन्द लोड़चदी ऐ तां
होर कुसै कन्ने मिगी नईं व्याहेयो ।”

बन्वै गी ए सुनियै बड़ी चिन्ता होई । इनै त्रौनै गुणें आलें
इचा कोई उऐ नेआ वर तुप्पना सखल्ला कम्म नई' हा ।

ओ इसै दरेद-बुनै इच लगा दा हा, इन्ने इच के होआ
जे राजा पुष्पसेन नै उसी दक्खन देसै दे राजे कन्ने सन्धि
गितै राजदूत बनाइऐ भेजन लाया । दक्खनै दा राजा ओदे
उपर चढ़ी आया हा । जिसलै मन्त्री सन्धि दा कम्म नबटाई
बैठा, ओदे कश इक श्रेष्ठ ब्राह्मण आया । उसी मन्त्री दी कुड़ी दी
सुन्दरता दा पता लगा हा ओ तुआदे कन्ने व्याह गितै फर्मेश
लइऐ आया । हरिस्वामी नै उसी गलाया—“मेरी कुड़ी नै ओदे
कन्ने व्याह करना ऐ जेड़ा वीर होऐ, विदवान होऐ, जां मन्तर
विद्या दा स्याना होऐ । तुन्दे कोल इन्दे इचा केड़ा गुण ऐ ?”
ओ ब्राह्मण आखन लगा—“मेरे कश मन्तर सिद्धि ऐ ।”
हरिस्वामी नै आखेया—“अपने मन्तरै दी कोई करामात दस्सो ।”
उस अपनी मन्तर विद्या कन्ने इक रथ बनाया जेड़ा गासै इच
उड़दा हा । उस हरिस्वामी गी ओदे उपर बहालेया ते सारे गासै
दी ते त्रौनै लोकें दी सैर कराई, ते फी उसी दक्खनै दे राजे दे
द्वारै इच आनी तुआरेया । हरिस्वामी नै परसिन्न होइऐ उसी
बचन दई ओड़ेया ते सतमे दिनै दी लग पक्की होई गई ।

इन्ने चिरै इच के होआ जे उज्जैनी नगरी इच हरिस्वामी
दे जागत देवस्वामी कोल इक ब्राह्मण पुज्जा ते आखन लगा—
मिगी अपनी भैन व्याही दे । उस आखेया—“मादी भैनु' ने
ओदे कन्ने व्याह नई' करना जेड़ा शूरवीर, विदवान, जां

मन्तरसिद्धि आला नईं होग।” ब्राह्मणै आखेया—“अउं वीर
आं” ते जिसलै उसनै अपनी अस्त्र विद्या ते शस्त्र विद्या दे
चमत्कार दस्से, देवस्वामी बड़ा खुश होआ ते उस वचन दई
ओड़ेया। ओ कुड़िया दा बड़ा भ्रा होने करी वचन दई सकदा
हा। ते पणतें दी रा लइऐ उऐ सतमें दिनैं दी लग्ग पक्की करी
ओड़ी। इस निर्णै दा नुआड़ी माऊ गी पता नईं लग्गा।

इन्ने इच इक त्रीया आदमी नुआड़ी माऊ कोल गया ते
आखन लगा जे अपनी कुड़ी मिगी ब्याही दे। उस आखेया—
सादी कुड़ी गितै नेया वर लोड़चदा ऐ जेड़ा शूरवीर विद्यावान,
जां मन्तर सिद्धि आला होऐ।” उस आखेया—“में विद्वान
आं।” माऊ नै उसी बीते समय ते औने आले समै दे प्रश्न
पुच्छे ते तशफी करिए उसी वचन दई ओड़ेया, ते कन्ने उस्सै
सतसे दिनैं दी लग्ग पक्की करी ओड़ी।

दूऐ दिन हरिस्वामी घर वापस पुज्जेया, उन्ने सोमप्रभा दी
कड़माई करी औने दी गल्ल सनाई। लाड़ी ते पुत्तर दौनें
बक्खरे बक्खरे कड़माई करी ओड़ने दी गल्ल सनाई। हुन बड़ी
चिन्ता होई जे त्रैवै आई दुकडण।

ब्याह आलै रोज त्रैवे महाराज वनिए हरिस्वामी दे घर
आई पुज्जे। उसलै ऐसी वचित्तर घटना होई जे ब्याहनू कुड़ी
गुम होई गई। किश पता थौ नईं लग्गै। मती परचोल
होई। बड़ा तुप्पेया पर किश नईं बनेया। हरिस्वामी नै विद्वान
ब्याहनू जागतै गी आखेया—“जोत्शी जी, जोतश लाओ।

कुड़ी कुत्थे गई ऐ। “विद्वान ने ए सुनिऐ गलाया—” धूम्रशिख राक्षस उसी विन्ध्य देश इच अपनी गुफा इच लई गेदा ऐ। ए सुनिऐ हरिस्वामी डरेआ ते आखन लगा—” ए बड़ा माड़ा होआ। हुन ओ कींआं परतोनी ? ते व्याह कींआं होना ? “मन्तर सिद्धी आला ए सुनिऐ आखन लगा—“ घबराओ नई। मै पलै इच तुसैं गी उत्थें लई चलना जित्थें जोतिषी होरें गलाया ऐ।

ए अखिऐ उस पहलै आडू गासै इच उडने आला रथ बनाया। सब प्रकार दे हथियार ओदे इच रखे। हरिस्वामी, विद्यावान ते शूरवीर गी ओदे इच बहालेआ ते भट उत्थें राक्षसै आले थार लई गेआ। राक्षस नै दिक्खेआ ते उसी बड़ी क्रोपी आई। ते उस बाहर निकल्लिऐ ललकार मारा। दूऐ पासेआ हरिस्वामी नै उस शूरवीर गी अगें कीता। राक्षस ते उस वीर दे दरम्यान बड़ा भारी युद्ध होआ। दोऐ इक स्त्री आस्तै लड़ा करदे हे। ते उन्हें राम रावण आडू मतिएं किस्में दे हथियार चलाए। आखर के होआ जे शूरवीर नै अपने चन्द्रमुख तीर कने राक्षसै दी मुण्डी बड्डी ओड़ी। ते एडे बड्डे राक्षसै दी जिन्द कड्डी ओड़ी। ओदी गुफा इचा उनें सोमप्रभा गी कढेआ ते सारे उस मन्तर सिद्धी आले दे रथे पर चढ़िऐ परतोए।

जिसलै हरिस्वामी दे घर पुज्जे ते ब्याह फी रुकी गेआ ।
 लग्न आई पुज्जा पर ब्याह नई होऐ । भगड़ा शुरु होई गेआ ।
 विद्वान, मन्तरसिद्धी आले ते शूरवीर—इन्हें त्रौणें दरम्यान ।
 विद्वान आखन लगा—“जे में पता नई देआं कुत्थें छपैली दी ऐ ते
 ए कदूं थोनी ही ?” इसकरी ब्याह मेरे कन्ने होना चाही दा ऐ ।
 मन्तर सिद्धी आला आखन लगा—“जे में गासा इच चलने आला
 रथ नई बनांदा ते तुस कीआं देवतें आडू उरथे जाइऐ ते भट
 परतोई बी औदे । उस राक्षसैं कोल ते रथ सा ते तुन्दे कश रथ नई
 हुन्दा ते तुस कीआं ओदे कन्ने लड़दे? कुड़ी मी थोनी चाही दीऐ ।,
 शूरवीर आखन लगा—“ जे में लड़ाई इच राक्षसैं दी मुण्डी नई
 बढदा तां इसी कुन्न परताई आनना हा भाएं तुस किन्नी टिल्ल
 लान्दे ? इस करी ओ मी गै थोनी चाही दी ऐ । “हरिस्वामी
 उन्दी इस लड़ाई ते भगड़े गी दिविखए चुप जन होई गेआ ते
 थत्थो वत्थें पेई गेआ ।

राजा जी ! तुस मिगी दस्सो जे ओ कुसी थोनी लोड़चदी
 ऐ । जेकर तुसेंगी पता होए ते नई दस्सो तां तुंदा सिर
 बक्ख बक्ख होई जाग ।

राजा त्रविक्रमसैन नै ए सुनिऐ अपना मौन भंग कीता ते

बतालगी आखेआ—“ओ ते शूरवीर गी गै थोनी चाही दी ऐ ।
 उसनै अपने भुजाबल कन्ने उसी जित्तेआ, अपनी जान गी खतरे
 इच पाया ते राक्षसै दी मुण्डी बड्डी । विद्वान ते मन्तर सिद्धी
 आले दी मद्दत ते उसी सैभन गै प्राप्त होई गई । ए जोतिषी ते
 विद्यावान प्राया दूए दी मद्दत गै करदे न ।”

जिसलै बताल नै राजे दी ए गल्ल सुनी, ओ फी मूण्डै परा
 नस्सीऐ अपने थार जाई टंगोआ । राजा उसी लैने गी फी
 परतोआ । उसी किश वी बसोस नई होआ ।

छैमी कथ

राजा त्रविक्रमसैन शिंशपा बूटे हेठ पुज्जा, बताल गी
तुआरिए मूण्डे पर पाया ते चुपचाप तौली-तौली चली पेआ ।
रस्ते इच बताल नै आखैआ--“राजा जी, तुस बड़े ह्याने ते बीर
ओ । इसकरी में तुसें गी प्रेम करनां । अऊं तुसेंगी इक मजेदार
कथ सनानां, प्रनै आसै ध्यान देओ ।

यक्षकेतु नां दा इक बड़ा मशहूर राजा हा । ओदी राजधानी
शोभावती नगरी ही । उत्थें गौरी दा बड़ा परसिद्ध मन्दिर हा ।
उस मंदरै दे दक्खेनै गी इक सर हा उसी गौरीतीरथ आखदे हे ।
हर हाड़ म्हीने दी पुण्यां गी उत्थें सारे पासेआ लोक शनान
करन आँदे से ।

इक वारी पुण्यां गी इक धवल नां दा धुब्बा ब्रह्मरथल नां दी
नगरी थुआं उत्थें शनान करन आया । उसी शुद्धपट हुन्दी कुआरी
कुड़ी मदन सुन्दरी लब्धी । ओ बी उत्थें तीरथ न्हौन आई दी ही ।
ओ चन्नै गी शरमाने आली कुड़ी पर मोहत होई गेआ । उस
नुआड़ा नां ते परिवार दा थौ-पता लाया ते प्रेमपीड़ित होइये
वर परतोआ । नुआड़े बजोगै इच ओ बड़ा व्याकुल होआ ते

फाकें पई गेआ । जिसलै ओदी माऊ नै गल्ल पुच्छी, उस सारा किश सच्चोसच दस्सी ओड़ेआ । उसनै ए सारी गल्ल अपने पति विमल होरेंगी सनाई । उस आनिए अपने पुत्तरै गी आखेआ—‘ए बड़ी तौली सिद्ध होई जाने आली गल्ल ऐ । एदे आस्तै इन्नां निम्मोभान की हुन्ता ए ? में शुद्धपट गी आखनां, आ तुगी अपनी कुड़ी जरूर व्याही देग । अस इक्कै नेए कुलै दे आं, कन्ने धन ते पेशे इच बी बरोबर गैं ।’ इन्हें शब्दे कन्ने उस अपने जागतै दा चित्त शान्त कीता, रुट्टी खलाई ते होर मतिआं वस्तां खलाइयां । दूऐ दिन ओ उसी लइए शुद्धपट दे घर गेआ । उस आखेआ मादे जागत धवल कन्ने तुस अपनी कुड़ी मदन सुन्दरी दा व्याह करी ओड़ो । शुद्धपट नै नुआड़ा मान रखेआ ते बचन दई ओड़ेआ । उन्हें महरत कढ़ाया, लगग सधाई ते दूऐ दिन व्याह करी ओड़ेआ । धवल बड़ा परसिन्न होआ ते जिसी दिखदे गै मोहत होई गेआ सा, उस लाड़ी गी लइए घर परतेआ ।

मजे कन्ने समा बीतन लगा । इक दिन नुआड़ा साला (मदन सुन्दरी का भ्रा) उन्दै आया । सारें बड़ा सत्कार कीता । भैन गलें मिली । नाते सर्वन्धी सुखसान्द पुच्छन लगे । किश बसां करने परैन्त उस गलाया—‘मिकी घरा आलें भेजेआ ऐ । नराते आवा करदे न । दुर्गा पूजा उपपर मदन सुन्दरी ते भाइया होरें गी लैन आयां ।’ सारें आखेआ बड़ी चंगी गल्ल ऐ । उर्ने बड़ी धामधूनी करिए नुआड़ी खातर कीती ।

दूए दिन धवल मदन सुन्दरी ते नुआड़े आऊ कन्ने सौहर चलेआ । जिसलै ओ शोभावती नगरी इच पुज्जा, उसनै कोल गै दुर्गा दा बड्डा मन्दर दिक्खिए अपनी लाड़ी ते सोले गी आखेआ—“आओ देवी गी मत्था टेकी औचै ।” साले नै भान्नी पाई—“इसलै सखनें हत्थें के जाना ।” धवल आखन लगा—“खरा, मीं ऐ होई औना । तुस इत्थें बल्गे । ए आखिए ओ मत्था टेकन अन्दर उठी गेआ ।

जिसलै ओ अन्दर गेआ, उस देवी दी पूजा कीती, ते ध्यान करन लगा—“ठारां भुजा देवी नै कई राक्षसें गी मारी ओड़ेदा ऐ । अपने चरण कमलें कन्ने महिषासुर गी मली ओड़े दा ऐ ।” देवकरानी के होई जे नेए भाव ओदे मनै इच औन लगी पे । उस सोचेआ—“लोक पशुएं दी बलि दइए देवी गी पूजदे न । मोक्ष प्राप्ति आस्तै ते देवी गी परसिन्न करने गीतै अऊं अपनी बलि की नई देइ ओड़ां ।” ए सोचिए उस देवी दे अन्दरलै थानै इचा तलवार कड्डी । ए तलवार कोई देवी दा भगत चोढ़ी गेदा हा । उसलै मन्दरै इच होर कोई है नई हा । उसनै घड़यौलै दी संगली कन्ने अपने सिरै दे बाल बन्ने ते फट मारिए अपनी मुण्डी बड्डी ओड़ी । धड़ भुजां डिगगी पेआ ।

सालै मता चिर बल्गेआ । जिसलै ओ नई गै परतोआ तां आपूं देवी दे मन्दर अंदर गेआ । जे दिक्खी आवां । जिसलै उस अपने भनोए दी मुण्डी बढोई दी दिक्खी, ओदे शाड़ शुड़की

गे। उस घबराइए ऊआं गै उसै तलवारी कन्ने अपनी मुगडी बड्डी ओड़ी।

जिसलै ओवी नई परतोआ तां मदन सुन्दरी बड़ी घबराई ते देवी दे मन्दरै अन्दर गई जिसलै उसनै अपने पति ते भ्राऊ दी ए दशा दिक्खी, ओ भुआं डिग्गी पेई ते बर्लाप करन लगी—“हे राम। ए के कैहर होई गोआ, अऊं ते लटोई गई।” फी उठिए वैन पान लगी—“बचारे चानचक गै मरोई गे। हुन इस जीने दा क लाह ?” ओवी प्राण त्यागने गी त्यार होई ते देवी गी आखन लगी—“हे देवी ! कल्याण करने आलें इच तूं सारें दी शिरोमनी एं। पवितर सिद्धान्ते दी तूं रानी एं। शिवे दी अर्धगी ते स्त्रीमात्तर दी रखेआ करने आली एं। तू कलेश हरनी एं। तूं मेरा पति ते भ्रा मेरे कशा की खोई लैते न ? मेरे कन्ने ए किश करना तुगी नई सोभदा। अऊं ते थुआड़ी सदा दी भगत आं। मेरी दीन पुकार सुन, अऊं थुआड़ी शरण आई आं। अऊं अपना शरीर त्यागन लगी आं ! ए बड़ा दुखी होई गोआ ऐ। इक बर मिकी दे जे अऊं जिन्ने बी जनम लैं, ईऐ दौं माढ़े पति ते भ्रा होन।”

इन्हें शब्दे कन्ने उस देवी दी स्तुति कीती ते फी मत्था टेकन लगी। उस अशोक बूटे दी डाली भन्निए फाही बनाई ते अपनी गलै इच पाई लैती।

इन्ने चिरै इच गासा बाज ओई—“धीऐ एड्डो तौल नई कर। थुआड़ी लौकी ब्रेस, पर बड्डी हिम्मत दिक्खिए अऊं बड़ी खुश आं।

हुण तुं फाही गी बक्खी रख ते जाइऐ पति ते भ्राऊ दे धड़ें कन्ने मुण्डियां जोड़ मेरे बरदान कन्ने ओ जीन्दे होई जाडन ।”

मदन सुंदरी नै ए सुनिए भट फाही तुआरी, ते खुशी कन्ने उनें लोथें कश गई । पर इन्नी खुशी ते तौले इच उसी किश थौ नई रेआ ते परमेसरै दी करनी ए होई जे उस ने अपने पति दा सिर भ्राऊ दे धड़ै उप्पर लाई ओड़ेआ । ते भ्राऊ दी मुण्डी खस्मैं दे धड़ै पर लाई ओड़ी । ओ दोऐ राम राम करी उठी बैठे । उन्दे शरीरै उप्पर जरूमै दा निशान ते कोई नई सा पर उन्दे धड़ रली मिली गे दे हे ।

ओ इक दूए गी दस्सन लगे जे के किश कीआं होआ । ओ बड़े परसिन्न हे । उनें देवी दी पूजा कीती ते ते अगगे चली पे । पर मदन सुंदरी दिक्खा दी ही जे उन्दे धड़ बटोइ गे देन । उसी मुण्डियां जोड़ने इच आपू टपला लगगा दा हा । ओ बड़ी भलखोआ करदी ही ते उसी किश थौ नई आवा रदा हा जे हुन के होग ।

“राजा जी ! तुस मी दस्सो जे उन्हें दौने जने इचा ओदा खस्म केड़ा हा ? जे जानी बुझिए नई दसगेओ ते पहले आला आप तुसेंगी लगग ।” राजा त्रविक्रमसैन ने सारी कथ सुनी ते बतावै

दे प्रश्नै दा जवाब दित्ता —“ उन्दे दौने इचा जेदे धड़ा उप्पर ओदे खस्मा दी मुण्डी लग्गी दी ही, ओदा खस्म होआ । शरीरै दे सारे अंगे चा सिर गै नेआ अंग ऐ जेदे कन्ने अदमी पनछोंदा ऐ ।”

जिसलै राजा नै ए जवाब दित्ता, तां बताल मृण्डे उप्परा लोप होई गेआ । राजा परतिऐ उसी लैन चली पेआ ।

— — —

सतमीं कथ

राजा त्रविक्रमसैन परतिऐ शिशपा बूटे हेठ पुज्जा । बताल उर्थें गै टंगोए दा हा । उसी तुआरिऐ मूण्डे बाया ते चली पेआ । बताल नै रस्ते इच आखेआ—“राजा जी ! तुस हुट्टी गएओ । अऊं तुसेंगी इक कथ सुनानां ।

पूर्वी समुद्रै दे कण्ठे इक नगरी ऐ ताम्रलिप्ती । उर्थें दे राजे दा नां हा चण्डसिंह । ओ बड़ा वीर हा । उस मतियां लड़ाइयां जित्तियां पर विशे बासना इच नई फसेआ । उसनै मता धन शत्रु दा लुट्टेआ पर अपने गवाण्ठी राजें गी दुख नई दित्ता ।

इक बेरी दकखना दा इक राजपूत ओदे दुआर आया । ओदे कन्ने किश होर बी राजपूत से । उस राजे दे सामने अपना कुर्ता पाड़िऐ गरीबी दा रोना रोया । राजै शरनागत करी रखी लेआ । बरे बीती गए । ओ राजे दी सेवा करदा रेआ । पर राजे कशा किश बी कदें प्रापत नई होआ । इक दिन ओ सोचन लगा—“राजपूत कुलै इच जम्मिऐ अऊं इन्ना गरीब की आं ? गरीबी दस्सनी ही तां अनख दा भाव की भरेआ । मे किन्नी नेकनीती कन्ने कम्म करा करनां । मेरे साथिएं दी दशा बी बड़ी गिरी

गई ऐ अऊं बी भुक्खा कन्ने कदुआंदा बतेह होआ करनां, पर राजा ऐ जे माढ़े आसै दिखदा गै नई ।”

ओ बचारा इनें गिनतरिएं इच पेदा रौन्दा हा जे इक दिन राजा होर शिकार चढ़े । उन्दे कन्ने मते घुड़सवार ते प्यादे हे । उनें नेऐ जाड़ै पासै रुख कीता जित्थे बड़े जंगली जानवर हे । ओ राजपूत सोटा लइए अगें अगें द्रौड़ा करदा हो । किश देर ते राजा निक्का-शुक्का शकार खेडदे रहे, फी इनें इक सूर पिशें घोड़ा सुट्टेआ । सूर नस्सेआ ते पिशें लग्गे दे राजा होर दूर दूए जाड़ा इच जाई पुज्जे । बड़ा भारा जाड़ हा । वा वूचड़ें कन्ने रस्ता गै नई लब्दा हा । सूर छपन होई गेआ । राजा होर बतेह होई गए हे । परतोने गा रस्ता बी नई लब्दै । उस नौकरै कन्ने रौने दा दम रखेआ हा । उसी अपनी जिन्दू दी कोई पर्वाह नई ही । भुक्खाभाना तरयाए दा ते बतेह होएदा राजा दे घोड़े कन्ने द्रौड़दा गै आया । राजा घोड़े उप्पर चढ़े दा हा ते घोड़ा बाऊ कन्ने गल्लां करदा हा ।

राजा नै नौकरै गी इस दशा इच दिक्खिए जे बचारा कन्ने द्रौड़दा आया ऐ उसी किरपा करी पुच्छेआ “अड़ेआ, तुकी परतोने दा रस्ता औन्दा ए जां नई । नौकरै ए सुनिए बड़ी बेनती कन्ने हत्थ जोड़िए आखेआ — “महाराज । रस्ता मिकी औन्दा ऐ । पर साहब किश चिर बसां करी लौ । इसलै शिकल दपैर ऐ । ते सूरज देवता बड़े पर्चण्ड न ।” राजा नै ए गल्ल

सुनए बसां करने आली गल्ल मन्नी लैती । ते उसी आखेआ
 “दिक्खुआं भला कुतै पानी लब्दा ऐ ?” नौकर आखन लगा—
 “दिक्खनां महाराज ।” ए आखे ओ इक बूटे उपपर चढ़ेआ ।
 दूर उसी इक नदी बगदी लब्बी । ओ राजे गी नदी आसै लई
 गेआ । घोड़े उपपरा काठी तुआरी ते घोड़ा विलन लई पेआ ।
 उस घोड़े गी घा पाया ते पानी दस्सेआ । इआं नुआड़ा हुट्टन
 हटाया ।

जिसलै राजा होर शनान करी बैठे, नौकरै अपनी गण्ठी दा
 आमले कड्डे, ते धोइऐ उन्दे सामने रखे । राजै पुच्छेआ—
 “ए कुत्थुआं थोए ?” उसनै बेनती कीती—“महाराज । पिशले
 दस्सें वरें दा इन्दे पर गै गजारां करा करनां । सेवा करनां, ते
 साह्वें गी परसिन्न क.ने दा जतन करदा रौनां । छड़े भगवे गै
 नई पाए ते एकान्तवास नई कीतो ।” राजै ए सुनिए जबाब
 दित्ता—“एदा इन्कार नई थुआड़ा नां सत्वशील ठीक गै पाए
 दा ऐ ।” राजे गी तरस बी आया ते नमोशी बी होई । उस मनै
 इच गलाया—“नए राजे दा बी फिट्टे मुंह, जिसी ए बी पता
 नई जे ओदे आश्रतें इच कुन सुखी ते कुन दुखी ऐ । ते नेए
 मसाहवे दा बी फिट्टे मुंह जेड़े नेइआं गल्लां मिकी नई
 दसदे ।” किन्ना चिर राजा इनें बचारें इच पेदा रेआ । नौकरै
 छन्दे मिनतां करिए राजा गी दौं आमले लैने उपपर राजी करी
 गै लैता । राजै आमले खाइए पानी पीता, किश बसां कोता, ईआं
 ओदी भुख ब्रह किश शान्त होई ।

नौकरै घोड़ा आन्दा, तयार कीता । राजा घोड़े उपपर चढ़िऐ
चली पेआ । रस्ना दस्सने गीतै नौकर अगगे अगगे टुरी पेआ ।
राजे नै बड़ा आखेआ ‘जुनां, पिशें आई बौ, पर नौकर
घोड़े पर नई गै चढ़ेआ । राजे ने शहरा आसै बागां मोड़िआं ।
रस्ते इच पिशें रई गे दी फौज बी मिली पई । राजै नौकरै बड़ी
दी बड़ी तरीफ कीती । उसी बड़ा धन दित्ता, जगीर दित्ती, पी बी
राजे गी किश संदाख नई होआ । सत्त्वशील दे दिन फिरे, ओ
मीर आदमी होई गेआ । हुन ओ आश्रत नई रोआ, राजे
चण्ड सिंह दा अंग रक्क होई गेआ ।

इक दिन राजा नै उसी आखेआ—“लंका द्वीपक” जा, ते
उत्थों दे राजे गी आख जे मिकी अपनी कुड़ी व्याही देऐ । उत्थें
समुद्रै रस्ते जाना पौंदा हा । उस अपने इष्ट देवता दी पूजा
कीती, ते जहाज उपपर जाई चढ़ेआ । ओदे कन्ने किश ब्राह्मण
बी हे जेड़े राजे ने कन्ने लाई दित्ते हे । जहाज ने हच्चे अद्धा
रस्ता बी नई हा कट्टेआ जे समुद्रा बिच्चा इक भण्डा चढ़ेआ ।
सारे दिक्खिए हरान होई गे । ओ भंडा एड्डा बड्डा हा जे गासै
कन्ने गल्लां करदा हा । ए सुन्ने दा बने दा हा । ते मते रंगें दी
भोन दिन्दा हा । इन्ने चिरा गी इक बड़ा बदल चढ़ेआ ते जोरा
दी बरखा शुरू होई गोई । वा बी बड़ी तेज चलन लगी । ए
बरखा ते वा जहाजै गी भण्डे आले पासे लई चले । जहाज
खचोए दा भण्डे आसे गेआ तें बनकी गेआ जिआं म्हावत

हाथी गी लइऐ थम्भै कन्ने बन्नी ओड़दा ऐ । इन्ने चिरै इच के होआ भण्डा ते जहाज हेठ गै हेठ जान लगे । जहाज बी डुब्बन लगा ।

जहाजै उपपर चढ़े दे ब्राह्मण डरे ते कर्लान लगे, महाराज चण्ड सिंह हुन्दी दुहाई देन लगे । सत्वशील नै उन्दा बर्लाप सुनेआ । ओ बड़ा स्वामी भगत हा । ओदे कशा नई रौन होआ । उस कमर कस्सा बन्नेआ, तलवार फगड़ी ते भण्डे पिशें समुद्रै इच शाल दई ओड़ी । ओ समुद्रै दी क्रोपी दा मकाबला करने गीतै कुदेआ हा । उसी बिचली गल्ला दा पता नई हा । ओदे शाल देने पिछुआं लहरां जहाजै गी कुतै दा कुतै लई गइआं । ते ओदे बिब जिन्ने बी लोक हे, उनेगी समुद्रो जन्तुए खाई ओड़ेआ ।

सत्वशील नै शाल मारने पिशुआं आसै पासै दिक्खेआ । के दिखदा ऐ जे ओ इक बड़े मुन्दर शहरा बिच पुज्जी गेदा ऐ ते उत्थें समुद्र-उदर कोई बी नई हा । शहर सनहरी महलें कन्नं जगमग जगमग करा करदा हा । उनें महलें इच मोतिएं कन्ने जड़े दे थम्भ लगगे दे हे । बड़े बड़े शैल बाग हे जिन्दें बिच तला हे ते उन्दियां पौड़ियां हीरे जवाहरात कन्नं जड़ी दिआं हिआ । उत्थें उसी दुर्गा भगवती दा बड़ा मेरु पर्वत जेडा मन्दर लब्बा जेदे उपपर हीरे मोतिएं जड़े दा इक बड़ा भण्डा भुल्ला करदा हा । उस देवी अगो साष्टांग प्रणाम कीता । ते

श्लोक पढ़िऐ स्तुति कीती । ते बड़ऐ सोचन लगा, ए जे किरा
होआ ऐ, कोई जादू दी खेड़ ते नई ।

इन्ने इच इक सुर्गा दी अप्सरा ने भित्त गुआड़ेआ ते देवी
दे मन्दरै सामने आई । ओदिआं अक्खिआं हिआं जीआं नीले
कमल; ओदा मुंह फुल्लै आडू खिड़े दा हा ते ओदे पर हासा
खेड़ा करदा हा । ओदा शरीर एडा कुंगला हा जीआं नदडू दी
तार । ओ चलदी फिरदी कमलें दी भील गै बभोंदी ही । ओदे
कन्ने कोई उ्हार नौकरानियां हिआं । उसने देवी दे मन्दरै इच
पर्वेश कीता ते कन्ने गै सत्वशील दे हिरदे इच बी उतरी गई ।
ओ पूजा करिऐ मन्दरा दा परतोई पर सत्वशील दे हिरदै चा
नई निकली सकी । ओ अपने जगमग करदे रणवास गी गई
उठी । सत्वशील बी नुआड़े पिशे पिशे गेआ ।

उसी अन्दर जाइऐ इक होर गै शहर लब्बा । ओ शहर के
हा, इक सुन्दर बाग हा, जेदे बिच सारी दुनिया दियां ऐशां
कटियां होई दिया हिआं । ओ सुन्दरी उत्थें इक मोतिएं जड़े
दे कौचे उपपर बैठी दी ही । सत्वशील ओदे कोल जाइऐ कश
गै बई गेआ । ते नुआड़े चन्दरमुख गी अक्खीं ताड़ै लाइऐ
दिक्खन लगा । ईआं बभोंदा हा जीआं कोई मूरत खिचची दी
होऐ । ओदे अंग कम्बिऐ ओ भाव प्रगट करा करदे हे । ते
कन्ने सरकण्डे उव्भरी आए दे हे । उस सुन्दरी नै उसी मोहित
दिक्खिऐ अपनी नौकरानिएं गी सारत कीती । ओ सारत

समझिए उसी आखन लगिआं—“तुस साढ़े महमान ओ, साढ़ी खातर कबूल करो । उठो, न्हाओ ते न्हारी ऊरी करो ।”

ए सुनिए उसी किश ईखी होई । ओ मसां उठेआ ते बागै इच दस्से दे तला इच न्हौन लगा । चलोवी मारिए जिलै उस मुण्डी बाहर कडु ते के दिखदा ऐ जे ओ ताम्रलिप्ती नगरी इच चण्डसिंह राजे दे बागै इच पुब्जी गोदा ऐ । ओ सोचन लगा—
“ए भली गल्ल ऐ । खिन पहलैं में उस सुन्दर शहरै इच हा ते हुन इत्थें आं । ओ सुरगै दा भूटा बजोगै दी ज्वाला इच बदलोई गेआ ऐ । ए सब किश सुखना मात्तर हा ? पर में ते सब किश सन्चे मुच्चें दिक्खेआ हा । पताल दी उनें अपसरें भिकी धोखा दिता ऐ । बुद्धू बनाया ऐ ।”

ए सोचदा रेआ ते बतोए दा मत्तुऐ आङ्गू बागै इच फिरन लगा । सुन्दरी गी गुआई ओड़ने ईखी पूरी नई होने दा उसी बड़ा सल्ल होआ, ते ओ रोन लगा । मालिएं उसी इस दशा इच दिक्खेआ । पीले फुल्लें दा पराग ओदे पिण्डे उप्पर लगगे दा ईआं बभोंदा सा जीआं जुदाई दी अगग लगगी दी होऐ । उनें जाइऐ राजा चण्डसिंह गी सनाया । उसी बड़ा चर्ज होआ । ओ आपू उत्थें आया । उस भित्तरे गी शान्त कीता ते पुच्छेआ
“ए के ? चले कुतै आसे ते पुब्जे कुतै होर । तीर नशानें पर लगगा नई । गल्ल बनी नई ।” सत्वशील नै ए सुनिए अपनी जात्रा दी सोरी गल्ल सनाई ओड़ी । राजा ए सुनिए सोचन

लगा—“बड़ी बचित्तर गल्ल ऐ । इस बचारे नै कैंडी बहादरी कीती ते हसदे खेडदे जिन्द खतरे इच पाई ओड़ी पर प्रेम इच ठगोई गोआ ऐ । हुन ए कम्म में करी सकनां । मी नुआड़ा बदला मकाना लोडवदा ऐ । नुआड़ा स्थान तुआरना चाही दा ऐ ।” वीर राजे उसी आखेआ —“अच्छा, बसोस छोड़ । मैं थुआड़े कन्ने चलड ते उसै रस्ते उस पताल सुन्दरी कोल लई जाड ।” इआं राजे ने उसी शान्त कीता ते खलाया प्लाया ते तयार कीता ।

दूऐ दिन राजे नै राज अपने बजीरै गी सौंपे या जहाजै उपपर चढ़ेआ ते सत्त्वशीलगी कन्ने लई चली पेआ । सत्त्वशील रस्ता दसदा जन्दा हा । जिसलै औ पहले थार समुद्रै दे बश्कार पुज्जे तां उत्थें उनेंगी फी इक भण्डा उबड़ा हुन्दा लब्बा । उस नै राजे गी आखेआ—“दिकखो, ए ऊऐ बचित्तर भण्डा ऐ । परतिऐ उबड़ा होआ करदा ऐ । अऊं शाल देन लगां, तुस माढ़े पिशें आवेआ । इस भण्डे दे पिशें जाना ऐ सत्त्वशील नै ए गलाया, ओ भण्डे कश गए ते भण्डा मुड़िए डुब्बन लगा ।

पहलै सत्त्वशील नै ओदे पिशें शाल मारी । राजे नै बी आदे पिशें चलोवी मारा ते उसै पासे गोआ । थोडे चीरै पिशें ओ उस्से सुन्दर नगरी इच जाई पुज्जे । राजे गी बड़ा चर्ज होआ । उन्ने पार्वती देवी दी पूजा कीती ते सत्त्वशील कन्ने बई गोआ ।

इन्ने चिरै इच उस जगमग करदे रणवास बिच्चा अपनिएं दासिए कन्ने घिरी दी ओ सुन्दरी निकली । ओ जोती दा पुब्ज गै लब्दी ही । सत्त्वशील ने राजे गी दस्सेआ—“ईऐ जे ओ

सुन्दरी । “राजै उसी दिक्खिऐ ग्लाय—‘प्रेमका ते ठीक गै पसिन्द कीती ऐ ।’ सुन्दरी नै बी राजे गी दिक्खिऐ ते ओदे लक्खनै गी मनै इच सोचेआ—“ए सुन्दर मनुक्ख कुन होई सकदा ऐ ।”

ओ दुर्गा दे मन्दर पूजा करन गेई उठी । राजे नै बी ओदी पर्वाह नई कीती ते बागै इच उठी गेआ । थोड़े चिरैगी ओ असुर सुन्दरी पूजा करिऐ देवी दे मन्दरा दा बाहर आई । उस देवी अगगे वेनती कीती—“देवी माता ! मिकी चंगा बर देआं ।” बाहर आनिऐ उसनै नौकरानिऐ चा इक गी आखेआ—“जायां । बागै इच जाइऐ दिक्खेआ, ओ सुन्दर मानू जेड़ा मिकी जन्दे लब्बा हा—बागै इच ते नई ? उसी माढ़े आसेआ वेनती करेआं जे अज्ज साढ़ै गै पधारो ते भोजन पाओ । ओ कोई बड़े गै बीर लब्दे न ते उन्दी मती खातर कीती लोड़चदी ऐ ।” दासी ए हुकम लइऐ उसी तुप्पदे तुप्पदे बागै इच गई ते कोल जाइऐ अपनी मालकन दा स्नेआ देन लगी ।

बीर राजे नै ओदी गल्लै आसै ध्यान गै नई दिता ते बड़ी बेपर्वाही कर्ने आखेआ—“ए बाग गै खरा ऐ । असेंगी बड़ी खातरै दी लोड़ नई ।” जिसलै दासी नै असुर सुन्दरी गी ए गल्ल सनाई, उस समझी लैता जे ए मानू कोई बड़े उच्चे मनै आला ऐ ते एदी मती इज्जत कीती लोड़चदी ऐ ।”

ओ असुर सुन्दरी आपूँ बागै इच गई जीआं राजे दे
हुक्मै कन्ने खचोई दी गई होऐ—उस राजे कोल जिसनै बड़ी
लापवाही कन्ने सुरगै आली खातरदारी गी ठेडा मारेआ हा ।
ओ जाइऐ उसी आखन लगी—“परमेसरै तुसें गी माढ़े पति
रूप इच भेजेआ लब्दा ऐ । ए दुर्गा भगवती दी पूजा दा वरदान
लब्दा ऐ । जिसलै ओ बागै इच जा, रदी ही, वूटे झुकिऐ ओढ़ा
मान करदे हे ते वूटें उप्पर पैछी गाइऐ नुआढ़ा स्वागत करदे
हे । वेलां पलचिऐ प्यार करदिआं हिआं ते ओदे उप्पर फुल्लें दी
बरखा वरान्दियां हिआं ।

ओ राजे कोल जाइऐ आपूँ वेनती करन लगी जे ओ
नुआढ़ी खातर कबूल करी लै । राजे नै सत्वशील आसै दिक्खिऐ
उसी आखेआ—“में ते इत्थें देवी दी पूजा करन आया हा ।
जीआं माढ़े मित्तरै दस्सेआ हा । झण्डे दे पिशै आइऐ में
इस मन्दर इच आई पुज्जां । मन्दर दिक्खी लेआ ते देवी दे
दर्शन बी करी लैते न । ओदे परैन्त तुन्दे बी दर्शन होई
गए । होर के खातर असें लोड़चदी ऐ ?” सुन्दरी नै ए
सुनिऐ आखेआ—“तां फिरी दूआ शहर गै दिक्खी लौ । ओ
त्रौं लोके इच न्यारा ऐ ।” राजे ने गड़ाका मारिए आखेआ—

“इसनै मिकी ए बी दस्सेआ हा । ऊए नगरी जित्थे तला ऐ ते नौन्दे न ।” ओ आखन लगी—“राजा, ईआ मीना नई मारो । अऊं धोखेबाज नई । फी तुन्दे नेऐ मानू गी धोखा देना ? तुस ते पूजा जोग ओ । अऊं थुआड़ी दौने दी दासी आं । हुन मादी गल्ल नई मोड़ेओ ।”

राजे नै ए गल्ल सुनी तां मन्नी गेआ । सत्वशील गी कन्ने लइऐ उस जगमग करने आले रणवास अन्दर ओदे कन्ने गेआ । ओ दर्वाजा खोलिऐ उनंगी अन्दर लई गई । अन्दर जाइऐ उनें नुआड़ा शहर दिक्खेआ । उत्थों दे बूटे सदाबहार ते फुल्ल ते फल देने आले हे । सारे मोसम सारा साल उत्थे गै रौन्दे हे । सारा शहर मेरू पर्वत आडू सुन्ने ते हीरे उवाहरात कन्ने जड़े दा हा । असुर सुन्दरी ने राजे गी बड़े कीमती सिंहासन उप्पर बहालेआ । उसी अर्घदान दित्ता ते आखन लगी—“अऊं कालनेमि दी धी आं । कालनेमि असुरें दा राजा ऐ । चक्करधारी विष्णु देवता नै उसी सुरग भेजी ओड़े दा ऐ । जेड़े मेरे दो शहर तुस दिक्खे न, विश्वकर्मा (बिसकम्मै) नै बनाए दे न । ओ सब मनोरथ पूरे करदे न । बड़ेपा ते मौत क्ख नइ फड़कदी । हुन में तुसें गी अपना पिता समझनी आं । हुन में ते माड़ा शहर तुन्दे चरणे इच न ।” राजे ने ए सुनिऐ आखेआ—“जे ए गल्ल ऐ ते अऊं धीए थुआड़ा दान करी ओड़नां, बीर सत्वशील गी, जेड़ा माड़ा मित्तर ते रिश्तेदार ऐ ।” राजा साख्यात् भगवती दुर्गा दा वरदान गै

सिद्ध होआ। ओ सुन्दरी चुपचाप सब किश मन्नी गई। उसी एदे इच मती गै भलाई लब्धी।

सत्वशील दी मनै दी मुराद पूरी होई। ओदा असुर सुन्दरी कन्ने व्याह होई गोआ, ते दौनें नगरिएं दा राज थोई गोआ। राजे ने उसी ग्ताया—“थुआड़े जेड़े दो आमले खादे हे, उन्दे चा इक दा कर्जा चुक्का। दूए दा रेआ। फिरी कदे चकाड।” जिसलै उसने सत्वशील गी ए आखेआ, ओ बड़ी धीनगी कन्ने पैरें पेई गेआ। फी (राजै असुर सुन्दरी गी) आखेआ—“हुन मिकी अपनी नगरी दी बत्ता पाओ।” असुर सुन्दरी नै उसी ‘अजेय’ नां दी तलवार दित्ती ते इक फल खाने गी दित्ता जेड़ा बढापा ते मौती दा इलाज हा। ए दोऐ चीजां लइए राजे नै उस तला इच शाल मारी जीआं असुर सुन्दरी ने आखेआ हा। के होआ जे जिसलै ओ बाहर निकलेआ तां दिखदा के ए जे ओ अपने देसै इच पुज्जी गेदा ए। ओदे बी सारे मनोरथ पूरे होए। सत्वशील उस असुर सुन्दरी दी दौनें नगरिएं उपपर राज करदा रेआ।

“हुन मिकी दस्सो जे इनें दौनें चा पानी इच शाल मारने इच केड़ा मता हौसले आला हा?” बताल नै राजे गी प्रश्न पुछेआ, ते उस बचारे नै श्रापै दे डरै कोला त्राए दे जबाब दित्ता—“मेरा बचार ए जे इनें दौनें चा सत्वशील मता शूरवीर

हा । जिसलै उसनै समुद्रै इच शाल मारी ही उसी नां किश
पता हा नां थौ ते नां गै बची निकलने दी मेद । पर
राजे गी ते सारिएं गल्लें दा पता लग्गी गोदा हा । जिसलै राजे
ने शाल मारी ही, ओदे सामने किश गल्ल ही । ओ असुर
सुन्दरी कन्ने प्यार इच नई पेआ । उसी पता हा जे ताड
करिए ओ थोनी नई ।” बतात गी राजे कशा जबाब ते
छैल थोई गोआ । पर राजे दा मौन बी भंग होई गोआ । ओ
राजे दे मूण्डे परा उतरेआ ते फी उसै शिशपा बूटे पर जाई
टंगोआ । राजा बी फी परतोआ जे तौली जाइए उसी लई
आवै । सच ए जे बुद्धिमान इक कम्म रम्भिए जिन्ना चिर
उसी तोड़ नई चाढी लैन, पिछे गै नई दिन्दे ।



अठमी कथ

राजा त्रिविक्रम सैन शिशपा बूटे आसै परतोआ, बताल गी पगड़िऐ मूण्डे पर सुट्टेआ ते फी चली पेआ । रस्ते इंच बताल नै मूण्डे परा आखेआ — ‘राजा जी, तुस मती खेचल करा करदे ओ । तुन्दा हुट्टन हटाने आस्ते तुसेंगी इक गल्ल सनानां ।

अंग देसै इच इक थार शड़ा ब्राह्मणें गी थोएदा हा । उसी वृक्षघट आखदे हे । इत्थें इक बड़ा त्यागी ब्राह्मण रौन्दा हा । ओदा नां विष्णुस्वामी हा । ओदी लाड़ी बी बड़ी भलीलोक ते उच्चे कुलै दी ही । ओदे त्रै जागत होए, ओ त्रैवैगै अपनी विलक्षण ते तेज बुद्धि आस्तै मशहूर हे । समां पाइऐ ओ जुआन होईगे । इक दिन उस ब्राह्मणै जग रम्भेआ । उसनै अपने त्रौणे जागतें गी भेजेआ जे समुद्रा दा कछोपड़ फगड़ी आनो । ओ गए ते उनेंगी इक कछोपड़ लब्बा । बड़ा भ्रा दौनें गी आखन लगा—‘बापू हुन्दे जगै आस्ते कछोपड़ तुस लई जाओ । में नईं नेन हुन्दा । ए बड़ा लिसलिसा ते तिलकदा ऐ ।’ ए सुनिए उनें दौने आखेआ—‘तू नईं नेंदा ते अस बी नईं लेन्दे ।’ बड्डै आखेआ — ‘तुसेंगी जरूर नेना होग । नईं नेगेओ ते बापू हुन्दे जगै इच विघन पौग । तां ओ ते

तुसे सारे नरकै गी जागेओ ।” जिसलै उन्न ए गलाया तां लौके हस्सन लगे ते आखन लगे—“साढ़े करने जोग गल्ल तुसेंगी लब्दी ऐ, तुन्दा बी ते फिश फर्ज ऐ ।” बड्डा आखन लगा— तुसे पता ऐ खाने दे मामले इच मेरी केडी नाजक तबीयत ऐ ? जिस चीजा कशा भी घृणा होऐ अऊं उसी हत्थ बी नईं लाई सगदा । ए सुनिऐ मभाटला बोलीया—“अऊं तुन्दे कशा बी मती नाजक तबीयत आला आं । अऊं जनानिएं दा शलैपा समझने इच सारे कशा तीव्र बुद्धि रखनां ।” बड्डा आखन लगा—“तां पी लौका लई जाओ ।” लौके ने झूड़ी चाढ़िए आखेआ—“बड़े लायक बनदे ओ । में बिस्तरे दी पछाना इच सारें कोला मता नाजक तबीयत रखना ।”

ओ त्रैवे आ इक दूए कन्ने लड़नू लगी पे । सारे अपनी गल्ले गी तोड़ चाढ़ने दे पेश पे दे हे । उनें कछोपड ते उत्थें गै रौन दित्ता ते आपूं बिटंकपुर नगरी इच राजा प्रसेनजित दे दरबारा इच अपनी गल्ला दा न्यां करान जाई पुज्जे । डयोढी असफरै गी रपोट करिए, अन्दर गे उठी ते राजे गी सारी गल्ल सनाई । राजे नै आखेआ—“बल्गो । में तुन्दे सबने कशा पर्माणे लैग ।” ओ सारे उत्थें रौना मन्नी गे ।

जिसलै राजा भोजन करन लगा, उसने सारें गी सद्देआ, आसन दित्ते, मान कीता ते षटरस भाजन उन्दे सामने बर्ताया ।

बाकी सारे ते खान लई पे, ते जिसी खाने दी बड़ी परख ही, ओ नईं खा । कचा मुंह बनाइए बई रेआ । राजा आपूं पुछन लगा — “तुस की नईं खन्दे । भोजन ते बड़ा सुआद ते सगन्धी आला ए ।” उसनै बल्लें नेए जबाब दित्ता—“मिकी इस भत्तै इच मुड़दे दी वो आवा करदी ऐ । मेरे कशा इस पासै मुंह गै नईं देन हुन्दा ।” उसने सारें सामनें ए गल्ल सनाई । राजे नै सारें गी भत्त सिंघने आस्तै आखेआ । ओ आखन लगे— “महाराज ! ए ते बड़ी बधिया बासपति ऐ । एदी खशबो ते बड़ी शैल ऐ । पर ओ ब्राह्मण खाने दे मामले इच बड़ी नाजक तबीयत आला हा । ओ नईं खा ते कन्ने उसनै नक्कैगी दब्बा दई ओड़ेआ । राजा एदे पर बचार करन लगा ते गल्ला दी टोह कडुन लगा । उसी अपने अफसरें कशा पता लग्गा जे ए बास्पति जेदा भत्त बने दा ऐ, उस गां दा आई दी ऐ जेदे कश मसानघाट ऐ । राजे गी बड़ा चर्ज होआ । ते खुश होइए उसनै ब्राह्मणै गो आखेआ—“भोजन परखने दी तुन्दी बुद्धि कमाल ऐ । तुस होर किश खाई लौ ।”

जिसलै ब्राह्मण भोजन करिए तृप्त होई गे, राजे ने उनें गी बक्खरे बक्खरे कमरें इच भेजी ओड़ेआ । कन्ने अपने दर्बारा दी सारे कशा शैल दासी गी सहो भेजेआ । ओ सुन्दरी बड़ी दिव्व ही ते ओदा इक इक अंग सच्चे इच घड़े दा हा । ते ओदे श्लैपे इच कुतै बी दोष नईं हा । उसी खूब शिगार कराइए दूए ब्राह्मण कश टोरेआ जेदी जनानिएं दी परखा इच

बड़ी तीव्र बुद्धि ही। ओ कामदेव दी अग भड़काने आली चन्द्रमुखी जिसलै अपनी सुन्दरता दी लो खिलारदी उस ब्राह्मण दे कमरे इच पुञ्जी तां ओ जनानिएं दी परखा इच नाजक तबीयत आला बेहोश जन होन लगा। उस नक्क गी दब्बू दई ओड़ेआ ते राजे दे नौकरें गी आखन लगा—“जे माढ़ी जिन्द लोड़चदी ऐ तां इमी लेई जाओ। एदे कशा बकरी दी कची दर्कन्न ओंदी ऐ।”

जिसलै राजे दे नौकरें ए सुनेआ—ओ उस चगत होई दी सुन्दरी गी राजे कोल लई गे। ते सारी गल्ल जाई सनाई। राजे नै झट उस ब्राह्मण गी सही भेजेआ ते आखेआ—“इस सुन्दरी नै चन्नन मुश्कपूर ते कई प्रकार दे इतर फलेल लाए दे न, ते एदे कशा सगन्धी दियां मुहाटां आवा करदियां न। तुसेंगी बकरी दी मुश्क कुत्थुआं आई गई ?” राजे ने बड़ियां दलीलां दित्तिआं पर ओ अपनी गल्ला उप्पर अड़ेदा गै रेआ। राजे गी किश शक पई गेआ ते उन्न चलाकी कन्ने पुछी पुछी ए गल्ल कढी लैती जे निकके हुन्दे ओदी मां मरी गई ही ते उसी बकरी दे दुद्वै कन्ने पाले दा ऐ।

राजा ए पता लाइए मता हरान होआ ते ओदी नाजक तबीयत दी तरीफ करन लगा। त्रीऐ ब्राह्मण गी बक्खरे कमरे कमरे इच बड़ा बधिया बछैन पाई तित्तादा हा। तखतपोशा उप्पर सत्त तई डाईऐ उप्पर शैल शैल चिट्ठियां चादरां बछाई दित्ती

दियां हिंआ । हव्ये रातीं दा पैहला पैहर नई हा बीतेआ ज ओ उट्टिए बई गेआ । ते बक्खी हत्थ रखिए कुरन लगा । राजे दे अफसरै नै जाइए दिक्खेआ, ओदी बक्खी इच लाल सूआ ध्रफड़ पेआ दा हा । ईआं बभोदा हा जीआं कोई कुसैनै बाल ताढ़े दा होए । उनें राजे गी सारी गल्ल जोई सनाई । राजे नै आखेआ —“जाओ बिस्तरे दी इक इक तह पुट्टिए दिक्खो किश बिस्तरे इच ते नई ।” उनें जाई बिस्तरा पुट्टेआ । इक इक तह चुकदे गे ते सबनै कशा हेठली तह इच उनेंगी इक बाल लव्वा । उनं ओ बाल राजे गी आनिए दस्सेआ । ते उस ब्राह्मणै गी बी दर्बारा इच लई गे । राजे नै ओदा पिण्डा दिक्खेआ ते बड़ा चर्ज कीता । जे इक बाल नै सत्तै परते बिच्चा आदा पिण्डा कींआं वेधी ओड़ेआ ऐ ।

राजे नै त्रीणै पारखिएं गी त्रै त्रै हजार मोहरां दित्तिआं । राजा उन्दी नाजक तबीयतें पर बड़ा खुश होआ । ओ राजा दे दर्बारा इच गे रौन लई प ते उनेंगी भुल्ली गोआ जे ओ अपने बब्बे दे जग्गै आस्ते कछोपड़ लैन आए दे हे, ते कछोपड़ नई नइए उनें केड़ा पाप कीता ऐ ।

जिसलै मूगडे पर बैठे दे बताल ने ए बचित्तर कत्थ सनाई ते उन्न राजे गी पुछेआ —“राजा । मेरे श्रापै दी गल्ल चेत्ता रख ते सच्चोसच दस्स जे खाने, औरतजात पशानने ते बछैन पशानने इच त्रीणें चा केड़ा मती नाजक तबीयत आला हा ?”

राजा नै सुनिऐ ए जबाब दित्ता—“मेरा बचार ऐ जे बिस्तरें दी पशानूँ आला सारे कशा मती नाजक तबीयत आला ऐ । उस बारे इच ते कोई गल्ल नई बनान हुन्दी । ओदे पिण्डे उष्पर बाल चुबबने दा नशान साफ साफ लब्बा दा हा दूएँ दे बारे इच ते होई सगदा ऐ जे उनों चोरी चोरी भेत कढिऐ कुसै कशा पता लाई लेआ होऐ ।”

जिसलै राजे नै ए जबाब दित्ता बताल फिरी ओदे मूखै परा लोप होई गेआ । राजे नै बी हिम्मत नई हारी ते फो परतोआ ।

— — —

नौमीं कथ

राजा त्रिविक्रमसैन फिरी शिंशपा बूटे हेठ पुज्जा, बतालगी हेठ तुआरेआ, मूण्डे पर रखेआ ते चली पेआ । बताल नै उसी आखेआ—“राजा जी । रातींएलै तुसेंगी मसानघाटै इच फराटियां मारना सोभदा नईं । तुस दिक्खो ए केड्डा भयोनक थार ऐ । इस मसान घाटै इस भूत प्रेत, घोर न्हेरा ते चिखा बलने दा धूं पेदा ऐ । उस साधूगी परसिन्न करने गीतै तुस के खेचल करा करदेओ । में तुसें गी इक गल्ल सनाना, तुन्दा रस्ता मजे कन्ने कटोई जाग ।

आखदे न, सृष्टि दे आद कोला गै अवन्ती इच इक नगरी ऐ जिसी देवते बनाया हा । ओ शिवें दी देह समान विशाल ऐ ते उत्थें बड़ा नन्द ते सुख ऐ । जिआं शिवें दे शरीरा उपपर भस्म ते शेषनाग सोभदे न । सतजुग इच इसी पद्मावती आखदे हे । त्रेताजुग इच इसी भागवती, द्वापर इच हिरण्यवती ते कलजुगै इच इसी उज्जयनी आखदे न । इत्थुआं दा राजा वीरदेव बड़ा गै चंगा हा । ओदी रानी दा नां पद्मारति हा । राजा उसी लइऐ मन्दाकिनी नदी दे कण्डे गोआ, उसनै मता

चिर शिवें दी आराधना कीती । ओ पुत्तरै दी कामना करदा
 हा । मता चिर पूजा पाठ करिऐ ओ श्रान करने गी उठेआ ते
 फी पूजा इच मग्न होई गोआ । शिवजी परसिन्न होए ते उनें
 गासवानी कीती—“राजा ! तेरे घर इक बड़ा बार पुत्तर पैदा
 होग जेड़ा तेरे कुलै इच बड़ा टिकका होग ते इक कुड़ी होग
 जेड़ी शलैपे इच अपनी मसाल आपूँ गै होग ते सुरगै दिआं अप्सरां
 वी आदे अगें हेच होडन ।” राजा वीरदेव ए गासवाणी
 सुनिऐ ते अपना मनोत्थ सिद्ध मन्निऐ नगरी गी परतोई
 आया ।

राजे दै पहलें जागत होआ शूरदेव । ओदे पिछुआं रानी
 नै कुड़ी जम्मी । राजे नै ओदा नां अन्गरति पाया । ओ एड़ी
 शैल ही जे कामदेव गी बी मोहित करदी ही । जिसलै ओ बड़ी
 होई, ओदे आस्तै कोई जोग बर तुप्पने गीतै राजे नै पृथ्वी दे
 सारें राजें दियां मूरतां कपड़े उपर बनवाइऐ किट्टियां कीतियां ।
 पर उन्दे इचा इक वी ओदे जोग नई निकलेआ तां राजा नै बड़े
 प्यार कन्ने उसी आखेआ—“इन्दे इचा तो मिकी कोई दी तेरे
 जोग कई थोआ । में खंवर इच सारें गी सहनां ते तूँ उर्थें
 अपनी मरजी माफक बरी लैआं । राजकमारी ने आखेआ—
 “बापू जी ! मिकी आपूँ बर चुनदे शर्म औंदी ऐ । तुस मिकी
 कुसै शैल ते कुसै वी इक कला इच निपुन व्यक्ति गी व्याही
 देओ । मिकी कोई होर एदे कोला चंगा व्यक्ति नई लोड़दा ।”

राजा नै अपनी ध्यू अनंगरति दी गल्ल सुनिऐ उऐ नेऐ व्यक्ति दी तलाश शुरू करी दिती। इन्ने चिरा च दक्खनै दा चार बड़े बहादर ते निपुण व्यक्ति ए गल्ल सुनिऐ राजे कोल आए। राजे ने उन्दा स्वागत कीता ते ओ बक्खरे बक्खरे अपने गुण राजे गो दस्सन लगे।

पहले नै आखेआ—“में शूदर आं। मेरा नां पंचकुट्टिक ऐ। में पंज पशाकां रोज बनानां। पहली ते में अपने देवता गी दई ओड़नां, दूइ ब्राह्मणै गी, त्री आपू, चौथी इस लाड़ी आस्तै जे केदे कन्ने व्याह होई गेआ तां, ते पञ्चमी वेचिऐ अपने आम्ते खान पान कट्टा करनां। मेरे कोल ते ए कला ऐ। तुस अनंगरति मिकी व्याही देओ।

दूए नै आखेआ—“अऊं वैश्य आं ते मेरा नां भाषाज्ञ ऐ। मिकी सारे पशु पैछिएं दी बोलियां औंदियां न। तुस राजकमारी मिकी व्याही देओ।”

त्रीआ आखन लगा—“में खत्री राजा खडगधर आं। अपने बाहुबल करी परसिद्ध आं। मेरे जनेआ तलवार चलाने दा धनी दूआ कोई नई। ए राजकमारी मिकी व्याही देओ।” चौथे नै आखेआ—“अऊं ब्राह्मण आं ते मेरा नां जीवदत्त ऐ। मेरे कश ए गुण ऐ जे में मोए गी जीन्दा करी लौनां। ते सामरतक्ख खड़ा करी दिन्ता। मेरी कला दा बड़ा चर्चा ऐ। तुस राजकमारी मिकी व्याही देओ।”

जिसलै ओ सारे अपनी अपनी गल्ल सनाई बैठे, राजा अपनी कुड़ी कन्ने उत्थें बैठे दा सोचें पइ गेआ । ओ चारै अपने शकल-सूरती ते लावे कन्ने देवते गै लब्दे हे ।

बताल ए कथ सेनाइए राजा त्रविक्रम सैन गी पुछन लगा—
“माढ़ा श्राप रखेओ ते दस्सो जे अनंगरति उन्हेँ चौने चा कुसी देनी चाही दी ऐ ।”

राजा नै बताल दी गल्ल सुनिए जवाब दित्ता —“तू समा नष्ट कराने आस्तै मेरा मौन भंग करानां ऐ । नई तां तूं मिकी नेआ फजून प्रश्न की पुछदा । इक खत्री वंश दी राजकमारी इक शूदर जलाहे कन्ने कींआं बोही सकदी ऐ ? जां बनिए गी की व्याही दित्ती जा ? पशुएं ते पैछिएं दी बोली जानी लैने दा लाभ बी के ? जेड़ा चौथा ब्राह्मण ऐ ते अपने आप गी बड़ा शूरवीर मनदा ऐ, ओ ते जादूगर ऐ ते अपने कर्तव्य ते जाति कोला भ्रष्ट होए दा ऐ । इसकरी त्रीए मेदवार खडगधर गी व्याही देनी लोड़चदी ऐ । की जे जात बी इक्कै ते कन्ने ओ बड़ा शूरवीर ऐ ।”

बताल ने ए सुनिए ओदा मूण्ठा छोड़ेआ ते अपने जादू कन्ने उसै थार गेआ उठी । राजा उसी आनने आस्तै फी चली पेआ । निराशा बहादरें दे दिलें इच परवेश नई करी सकदी ।
उत्थें हौसले दा कवच मढ़े दा हुन्दा ऐ ।

दसमी कथा

राजा त्रिविक्रमसैन ने शिशपा बूटे परा बतालगी तुआरेआ, मूण्डे परचुक्केआ ते चली पेआ । रस्ते इच जन्दे बताल ने मूण्डे परा आखेआ—“राजा जी : तुस हुट्टी गोओ । ए कथ तुन्दा हुट्टन ते दुआसी दूर करग ।

इक बड़ा मशहूर राजा हा । ओदा हुकम सारे राजें पर चलदा हा । ओदी नगरी अनंगपुर बड़ी शैल ही । उत्थें इक बड़ा धनवान सदागर रौन्दा हा जेदा नां अर्थदत्त हा । ओदे टिक्के दा नां धनदत्त हा ते दूई लुआद कुड़ी मदनसेना जेड़ी स्त्रिणं विच हीरा ही ।

इक दिन ओ अपने बागै इच अपनी सखिणं कन्ने खेडा करदी ही जे उर्सा धर्मदत्त सेठपुत्तर नै दिक्खी लैता । ओ नुआड़े भ्राऊ धनदत्त दा मित्र हा । ओ मदन सेना गी दिखदे गै मोहित होई गोआ । मदनसेना के ही श्लैपे दा हाइ ही । धर्मदत्त गी कामदेव

दे बाणें बेधी ओढ़ेआ । ओ सोचन लगा—“हे परमात्मा !
 इन्ना श्लैपा ! इसी कामदेव ने आपूँ गै घढ़े दा लब्दा ऐ । इस
 मेरा हिरदा चीरी ओढ़ेआ ऐ । “ओ इनें बिचारें इच डुब्बा रेआ
 ते उसी गै दिखदा रेआ । ओ चकवें आडू होई गोआ । दिन
 बीतआ ते मदनसेना महलै अंदर चलो । मदनसेना गी पता नई
 हा जे ओ धर्मदत्त दे हिरदे इच बी चली गई दी ऐ । दिन घरोई
 गोआ । पच्छम दिशा लाल होई गई । ईआं बभोंदा हा जे मदनसेना
 दे नई लब्धने करी ओ गमैं दी अगू कन्नें भड़की उट्टी ऐ ।
 चन्द्रमा बी ओदे कशा मात खाई गई गोदा हा । जिसलै उस
 दिक्खेआ जे मदनसेन अन्दर टुरी गई ऐ ते ओ बी उबड़ा
 होआ । धर्मदत्त बी घर अपने टुरी गोआ ।

ओ उससै सुन्दरी दा ध्यान करा करदा हा । ओ खट्टा पर
 बक्खिआं गै मारदा रेआ । ईअं बभोंदा हा जे चन्ना दिआं
 किरनां उसी पुड़ा करदियां न । ओदे घरा आलै ते मित्तर उली
 मता पुच्छन पर ओ किश नई दस्सै । उसी ते कामदेव ने डौर भौर
 करी ओढ़ेदा हा । मसां रातीं दे अखीरलै पैहरें जाइऐ सुत्ता । उसी
 नीन्दरा इच बी सुखने उससै सुन्दरी दे औंदे रए । ओदी हीखी
 उसी मती दूर लई गई ही । बड्डैलै ओ उट्टेआ ते फी उससै बागै

इच गोआ टुरी । उस दिक्खेआ ओ इकली खड़ोती दी अपनी सखी गी बलगा करदी ही । ओदे कोल टुरी गोआ । ओदा मन करा करदा हा जे जफ्फी पाई लै । ओदे पैरें इच डिगिए छन्दे करन लगा ते बड़ियां कोमल ते मिट्टियां गल्ला करन लगा । उसनै बड़ी उत्सुकता कन्ने जबाब दित्ता—“अऊं कुआरी आं । मेरी दूए कन्ने कड़माई होई गोदी ऐ । हुन अऊं थुआड़ी नई बनी सगदी । माढ़े बब्बै नैं सेठ समुद्रदत्त गी वचन दई ओड़े दा ऐ । थोड़ेदिन रइ गो न मेरा ब्याह बी होई जाना ऐ । तुस इत्थुआं तौली गै जाओ उठी । मत कोई दिक्खी लै ते किश गड़बड़ होई जा “पर धर्मदत्त आखेआ” भाए किश होऐ, में थुआड़े वगैर नई रई सगदा ।”

जिसलै उस कुड़िए ए मुनेआ ते ओ डरी जे कुतै जबरदस्ती नई करी बवै । ओ उसी आखन लगी—“अच्छा पहलैं मेरा ब्याह होई लैन देओ, माढ़े बापू गी कन्यादान दा पुन्न खट्टी लैन देओ, ओदे पिशुआं अऊं तुन्दे कश जरूर आऊंग । तुन्दे प्रेमै माढ़ा मन जित्ती लैता ऐ ।”

उस सुनिए आखेआ—“अऊं उस स्त्री गी प्यार नई करदा जिस दूए नै जफ्फी पाईऐ प्यार कीता होऐ । जिस कमलै इच पहलैं कोई भौरा बैठा दा होऐ उर्थे दूआ भौरा नई बौन्दा ।” ए सुनिए ओ

आखन लगी —“ अच्छा, बोहने पिशुआं अऊ पहलें थुआड़े कश आऊंछ । पिशुआं अऊं अपने पति कोल जाड्ड ।” उस बादा बी कीता पर ओ उसी छोड़ै नई, ते आखे होर बादा कर । उस सगन्द खाइए उसी विश्वास कराया तां उसनै उसी जान दित्ता ओ बचारी किश निम्मोभान होई दी अपने महलै इच गई ।

ओ शुभ ध्याड़ा आया, ते ब्याह कारज संपन्न होआ । ओ अपने पात दे घर गई । दिनभर खुशिएं इच कटोई गोआ । रातीं ओ अपने पति कश गई । पर अपने पति दे प्यार गी उस उदास होए दे ध्यान नई लाया । जिसलै ओ छन्दे मिनतां करन लगा ओ रोन लई पई । ओ सोचन लगा—“सच्ची गल्ल ते ए ऐ जे ए माढ़ी परवाह गै नई करदी ।” उसनै उसी ग्लौया —“ हेसुन्दरी ! जे तुं मिकी प्यार नई करदी तां मिकी थुआड़ी लोड़ नई । तूं अपने प्रेमी कोल जेड़ा बी कोई ऐ, जा उठी ।” ए सुनिए उस मुण्डी भिगड़ी करिए ते बल्लें नेए आखेआ—“अऊं तुसेंगी अपनी जिन्दू कश बी मता प्यार करनी आं । पर जे किश अऊं ग्लानी आं, सुनी लौ । उबड़े दिखो, ते बादा करो जे मिकी डन्न नई देगेओ । इस गल्लै दी सगंद खाओ तां अऊं तुसेंगी गल्ल सुनानीं आं ।”

ए सुनिए नुआड़े पति नै, मरजी ते नई सी, पर गल्ल मन्नी लैती ते ओ भलखोई दी डरदी डरदी गल्ल सनान लगी

—“इक नौजवान धर्मदत्त ऐ। ओ माढ़े भ्राऊ दा भित्तर ऐ। इकवारी उस मिकी बागै इच इकले दिक्खेआ, ओ माढ़े उप्पर मोहित होई गेआ। उस मिकी रोक़ी लैता ते जबरदस्ती करने पर तयार होन लगा। मेरो मरजी ही जे माढ़े पिता गो कन्यादान दा पुन्न थोऐ, ते कन्ने भरडी नई पवै। में ओदे कन्ने ए वादा कीता जे व्याह पिशुआं अऊं पहले थुआड़ें कश औड, पिशुआं पति कोल जाड। “में अपना बचन नभाना ऐ। इस करी हे पति देव, तुस मिकी जान देओ जे औं पहलें ओददे कोल होई आवां। फी तुन्दे कश आई जांग। में निकड़े हुन्दे दी गै सच पालन करदी करनी आं।”

नुआड़िएं गल्लें समुद्रदत्तौ दा हिरदा बेधी ओड़ेआ। ओदे पर ते बिज्ज नेई डिग़ी पेई पर ओ बचनै दा बध्दा दा हा। ओ सोचन लगा—“ओ हो ! ए ते कुसै होर कन्ने प्यार करदी ऐ। ए ओदे कश गै जा उठी तां खरी गल्ल ऐ। अऊं की नाढ़ा बचन भंग करां इसी जान गै देना चाही दा ऐ। इसी लाड़ी मन्नने दा चा वी के ?” ए सब किश सोच करिए उसनै उसी आखेआ—“तुं जित्थें जाना ऐ जा।” ते आपूँ उस कमरे इचा उठिए बाहर आई गेआ।

इन्ने इच ठण्डी किरणें आला चन्न पूर्वै दी बड्डी प्हाड़ी पिशुआं चढ़ेआ। जीआं महलै दी छत्तै उपरा पूर्व अप्सरा मुस्कराई होऐ। न्हेरा हजे प्हाड़ी गुफें दिएं भाड़िएं कन्ने जफ़िआं पा करदा हा ते भौरे कुम्मिएं पर बवै करदे हे, इक चोर ने मदनसेना गी ईआं रातीं इकले जन्दे दिक्खेआ ते कुद्दिए आया ते नुआढ़ा

लड़ पगड़िए रोकी लैता । उसनै उसी पुच्छेआ—“तूं कुन ऐ ? ते कुत्थें जा करनी ऐं ?” ओ डरी गई ते आखन लगी—“तुई के ? छोड़ मिकी जान दे । मिकी कम्म ऐ ।” ओ आखन लगा—“अऊं चेर आं । ते तुकी कीआं शोड़ी ओड़ां ?” उस आखेआ—“तूं माढ़े गहने बन्दे लई लै ।” ओ आखन लगा—“सुन्दरी । इनें हीरें मोतिएं गी में के करना ? अऊं तुकी नई जान दिन्दा । तूं ते संसारै दा गहना एं । थुआड़ा मुखड़ा चन्द्रकांत मनी आंडू ऐ, थुआड़े बाल संगमृसा आंडू न, थुआड़ा लक्क हीरे आंडू ऐ, थुआड़े अंग सुन्ने आंडू न, ते लालमनिएं आंडूं पैर दिक्खने आलें गी मोहित करी लैन्दे न ।

जिसलै चोरै ए ग्लाय़ा ते उस बचारी नै सारी कथ सनाई ते उसी बेनती कीती—“थोड़े चिरै आस्तै मिकी माफी दे । में अपना बचन पूरा करी आंवां । बचन पूरा करिए अऊं सिद्धी थुआड़े कश गै आऊंग । तूं इत्थें गै रवेंआं । तूं माढ़ी गल्ला दा विश्वास कर । में अपना कीता दा बचन कदें नई ओड़ड ।”

चोरै ए सुनिए उसी जान दित्ता । उस बसाह कीता जे जनानीं अपना बचन नभाने आली ऐ । ओ उत्थें खड़ोइऐ नुआड़े परतोने गी बलगन लगा ।

ओ अपने पासेओ धर्मदत्त कोल गई । उसनै उसी पुच्छेआ ए सब कीआं होआ । उसी ओदी ताङ ते बड़ी ही पर उस सोचेआ ते उसी आखन लगा—“थुआड़े बचन नभाने उपपर अऊं बड़ा परसिन्न होआं । तू हुन पराई जनानी एं । में थुआड़े कन्ने के कम्म । तूं जीआं आईं ऐं, ऊंआं गै परतोई जा । दिख ! कोई दिक्खी नईं लै ।” ए सुनिए ओ आखन लगी—“इआं गै सही ।” ओ उत्थुआं परतोइए चोरै कश आई । ओ उसी शिड़कै कण्डै बलगा करदा हा । उसनै उसी पुच्छेआ —“पहले ए दस्स, जित्थें तूं गई ही उत्थें के होआ ?” उस सनाया जे सेठ धर्मदत्त नै उसी कीआं परतोन दित्ता ऐ । चोरै आखेआ “उस तुकी औन दित्ता ऐ तां अऊं बी तुकी छोड़ी दिन्नां । अऊं थुआड़ी सचाई पर बड़ा परसिन्न आं । तूं अपने गहने वन्दे लइए घर परतोई जा ।”

उसनै बी उसी छोड़ी दित्ता । ते सगों कन्ने होइए घर पजान गेआ । ओ अपने पति दे घर गई । उसी अपनी मर्यादा बचाई लैने दी बड़ी खुशी ही । ओ सती चोरी गै कमरे इच दाखल होई ते अपने पति कोल खुशी खुशी गई । उसनै उसी दिक्खिए पुच्छेआ । उस सारी गल्ल सनाई ओड़ी । समुद्रदत्त ने दिक्खेआ जे नुआड़ा बचन बी पूरा होई गेआ ते इज्जत बी बची गई ऐ, तां ओदी नुहार फिरी । ओ बड़ा परसिन्न होआ । ओ नुआड़ी पवित्तरता पर बड़ा परसिन्न होआ जे

उनुस आढ़े कुलै गी कलैक नईं लाया । एदे पिशुआ ओ नन्दै कन्ने रौन लगे, रस्सन बस्सन लगे ।

बताल नै मसानघाट राजा त्रविक्रमसैन गी ए कथ सनाई ते कन्ने आखन लगा—“इने त्रौणें (दौने सेठें ते चोरा) इचा बड़े दिला आला केड़ा हा ? जेकर जानी बुझिऐ नईं दसगेओ तां सिरै दे सौ टोटे होई जाने जे ।”

ए सुनिए राजे नै मौन भंग कीता ते आखेआ “उने त्रौणें चा चोर गै बड़े दिला आला हा । उने दौने सेठें चा कोई बी नईं । ए ठीक ऐ जे ओदे पति नै उसी जान दित्ता भाए ओ बड़ी शैल ही ते ओदे कन्ने बोही दी ही । पर ए गल्ल सिद्धी ऐ जे दूए गी प्रेम करने आली जनानी गी कोई नईं चांहदा । दूए नै छोड़ी दित्ता की जे ओदी बासना शांत होई गेदी ही । कन्ने उसी एवी डर हा जे ओदा पति राजे अग्रे शकैत लाग । पर चोरै गी कुसै दी पर्वाह नईं ही । ओ ते न्हरे इच ढाके मारने आला हा । ओ सच्चे गै बड़े दिला आला हा जे उस एडी सुन्दर जनानी ते इन्ने गहने बन्दे ईआं गै छोड़ी दित्ते ।”

बताल नै ए सुनिऐ नुआड़ा मूण्डा छोड़ेआ ते फी अपने थार पहलै आंडू गेआ उठी । राजे दी हिम्मत घटी नईं । ओ उसी आनने गी फी परतोआ ।

— — —

आरमी कथ

राजा त्रिक्रमसेन फी शिशपा बूटे हेठ गेआ, बताल गी तुआरेआ मृण्डे पर चुक्केआ ते चली पेआ । चलदे राजे गी मृण्डे परा बतालनै आखेआ—‘राजा जी, सुनो, अऊं तुसें गी मज्जेदार कथ सनानां ।

प्राचीन समें इच उज्जैनो इज इक राजा धर्म ध्वज राज करदा हा । ओदियां त्रै रानियां हिआं । त्रैवे राजें दियां धीयां हिआं । ते राजे दियां वड़ियां प्यारियां हिआं । पैहली दा नां इन्दू लेखा, दूई दा तारावली, ते त्री दा नां मृगांकवती हा । त्रौणें दा श्लैपा दिव्व हा । राजा बी अपने सारे शत्रुएं गी जित्तिऐ निवृत्त होऐ दा अपनी त्रौणें रानियें कन्नें नन्द मनांदा हा ।

इक बारी दी गल्ल ऐ जे बसन्त रितु दा तेहार आया ते राजा त्रौणें रानिएं गी लइऐ बागै इच नन्द मंगल करन गेआ ।

उस दिक्खेआ बैलां फुल्लें दे भारा कन्ने नीन्दिआं होआ
करदियां न । कामदेव दे बाण जन बभोदियां न । भौरें
दिआं रीडा धनुष दियां डोरिआं जन हिआं । बसन्त नै तीर
कमान सिद्ध कीते दे हे । राजा इन्द्र आङ्गू लबदा हा ।
ओ वूटें दिएं डालिएं उप्पर बैठी दिएं कोयलें दिएं कूकें गी
सुनिए नन्द मनान्दा हा । ओ आपू गै कामदेव दा अवतार
बनिए रानिएं कन्ने मधुपान करन लगा । ए शराव ओ नशा
ऐ जैड़ा काम देव रूप जीवन ऐ । पहलै रानियां अपने लाल-लाल
होठे कन्ने चखदियां हिआं ते फी राजा होर उस मिट्टी शरावै
दा नन्द लैन्दे हे ।

जिसलै इन्द्रू लेखा खेडा इच राजे दे बाल खिचचा करदी
ही इक नीला कमल ओदे कन्नां चा निकलेआ ते ओदी भोली
इच डिगी पेआ । ओदी चोटा कन्ने ओदे पट्टे उप्पर जरूम
होई गेआ । ओ कोमल रानी हाये हाये कर्लाइऐ बेहोश होई
गई । राजा ते दास दासियां ए दिक्खिए ए घबराए ते दुखी
होए । उन्हे ठण्डा पानी छनाकिए ते पक्खी मोलिये उसी
सुरत आन्दी । राजा उसी महलें इच लई गेआ पट्टी कराई ते
जे किश हकीमें वैदें लाज दस्सेआ ओ कराया ।

राती जिसलै दिक्खेआ जे हुन किश रमान आवा करदा ऐ राजा दृई रानी तारावली गी लइऐे महलै दे उस कमरे इच गेआ जित्थे चाननी खुल्ली आवा करदी ही । इक लोदानै इचा चाननी रानी दे शरीर उप्पर पेई । रानी राजे कन्ने सुत्ती दी ही । ओदा टल्ला उड्डिए खल्ल पई गेदा हा ते शरीरै दा ओ भाग उगड़ी होई गेआ हा । ओ कर्लाइऐे उट्टी खड़ोती “हाये, जली मोई ।” ते बिस्तरे परा उट्टिएे अपने अंग मलन लगी । राजा बी घबराइऐे उट्टेआ ते पुच्छन लगा ए के होआ—ए के होआ ? उसनै दिक्खआ रानी दे शरीरा उप्पर फलूए पई गये न ।” राजा नै पुच्छेआ तां रानी तारावली नै दस्सेआ ए हिस्सा चाननी इच नंगा होई गेआ हा इसकरी फलूए पई गे न । ए आखिए ओ रोन लगी । राजा घबराया, उसने दास दासिएं गी सहेआ । ओ बी घबराइऐे तांईं तुंआईं दौड़न लगे । राजे ने ओदे आस्ते कमल पत्रे दी सेज बनाई, ओदे पर पानी त्रोंकेआ, ते ओदे शरीरै उप्पर चन्नन लेप कीता ।

जिसलै त्री रानी मृगांक वती नै ए सुनेआ ते ओ अपने महलै चा राजे कश आई । जिसलै ओ खुल्ली बाऊ इच पुज्जी उसी दूरा दा चौल छड़ने दी बाज आई । हरणै आङ् मुट्टी २ अक्खीं आली रानी बाज सुनदे गै रस्ते इच वेई गेई ते कर्लाई ‘हाय, मरी गई । ते पीड़ा कन्ने हत्थ मलन लगी । दासियां उसी फी ओदे महला इच लई गेइआं । ओ बिस्तरे उप्पर

लैटिए कुरन लंगी । ओदियां दासियां बी रौआ करदियां
हियां ।

उनों दिक्खिआ ओदे हत्थें पर छाले पई गेदे हे । ते जखम
ईयां लब्धदे हे जीआं कमलें ऊपर भौरे वेठे दे होन । उनों
राजे गी जाइए सारी गल्ल सनाई । राजा धर्म ध्वज व्याकुल
होइए उत्थे पुब्जा ते पुछन लगा ए के होआ ?” जखमी रानी नै
अपने हत्थ दस्से ते आखन लगी—“जिसलै मिश्री मोहले दी
बाज आई, इनें हत्थे गी छाले पई गये । राजानै भट पट चन्नन
लैप तयार कराया ते ओदे हत्थें गी लाया जे किश
पीड़ घटै ।

ओ सोचन लगा—“इक रानी ते कमल फुल्ला दे डिगने
कन्ने जखमी होई गई । दूई चन्ने दिये किरनें कन्ने भडोई
गई ते त्री गी मोहले दी बाजा कन्ने गे हत्थें छाले पेई गये न ।
नजाकतै दी बी हद्द ऐ । नजाकत रानिएं दा गहना हुन्दी ऐ पर
इत्थें ते ए औगण बनी गेदी ऐ ।”

ओ इनें बचारें इच्च पेदा सारी रात पहरा गै दिन्दा रेआ ते
भसां जाइए रात मुक्की । ओ त्रै पहर के से सौ पहरें कशा
घट्ट नई हे । दूए दिन वैद हकीम ते डाक्टर किट्टे होए ते उनों
चौणें रानिएं गी राजी करी ओड़ेआ ।

बतालनै जिसलै ए अजीब कथ राजे गी सनाई ते उसने मूएडे परा ए स्वाल कीता—“राजा जी दस्यो, इनें त्रौणें चा सारें कशा नाजक केड़ी ऐ। जेकर जानी बुझिऐ नई दसगेओ ते आप लगग।”

राजे नै जवाब दिता—“सारे कशा नाजक ओ ही जिसी मोहले दी शड़ी बाज सुनदे गै हत्थ छालै पई गये। उस मोहले गी हत्थें छूता बी नई। दूइएं गी फी बी कमल ते किरणें दा सम्पर्क ते होआ।

जिसलै राजे ने ए आखेआ बताल परतिऐ ओदे मूएडे परा लोप होआ ते अपने थार गेआ उठी। परिश्रमी राजा फी उसी लैन चली पेआ।



बारमी कथा

राजा त्रविक्रमसेन फिरी शिशपा बूटे हेठ गेआ । बताल उसै थार टंगोए दा हा । उसनै बताल गी तुआरिए मूण्डे पर पाया ते पहले आङ्गू परतिए चुप चपीता चली पेआ । बताल ने मूण्डे परा बेठे दे गल्ल छेड़ी—“राजा जी, तुस मीं बड़े चंगे लगदे ओ । तुस कुसै कशा दब्बना भाखा नई । थुआड़ा दिल परचाने गी तुसें गी इक मजेदार कथ सनानां ।

अंग देसा च इक राजा यक्षकेतु हा । ओ नौ-जवान ते सुन्दर हा । ईआं बभोंदा हा जे कामदेव शिवे दे त्रीये नेत्रा दी अग्नि कोला डरिए देह छपैलन पृथ्वी पर आई गोदा होए । उसनै अपनी ताकती कन्ने सबनें गी जित्ती लौता । जीआं इन्द्र देवता दो बृहस्पति मन्त्री ऐ ईआं गै दीर्घदर्शी एदा मन्त्री हा । समे दी गति राजे दे चढ़दी जुआनी ते अल्हड़ बरेस ही उसनै राज-काज अपने मन्त्री गी सौपेआ । दुश्मन ते कोई रेदा गै नई हा । आप्रं छड़ा भोगे इच पई गेआ । ओ हर वेलै रानिए दे मैहलें इच बड़े दा रवै । ते न्यां करन दरबार इच नई जा । महलें इच जनानिए दिआं गल्लां ते गीत सुनदा रवै ते दरबार जाइए अपने हित चिन्तकें दी गल्ल नई

सुनै। अपनी वे पर्वाही इच ओ जनान खाने दिए खातर दारिए
इच रूखा दा रवै ते राजा दे कम्में आसै ध्यान नई देऐ।
राजा दा कम्म बड़ा खोचला जन होई गेआ।

प्रधान मन्त्री दीर्घ दर्शी ने राजा दे सारे कम्में दा भार
चुक्की रखेआ ते दिनरात बिना कुसै चिन्ता दे चलान्दां रेआ।
इक इस चाली दी चर्चा चलन लगी पेई। “दीर्घदर्शी नै राजे
गी विषे भोगें इच पाई ओड़े दा ऐ। राजा छड़ा नां दा गै
राजा ऐ। हुन राजा दी सारी हकूमत मन्त्री गै सांभी वेठा
दा ऐ।” मन्त्री दीर्घ दर्शी नै अपनी लाड़ी मेधावती गी अपने
वारे इच गल्ल सनाई—“राजा ते भोग विलासा इच पई गेदा
ऐ। मीएँ सारा कम्म काज चलानां। लोकें इच किश मेरे
खलाफ गल्ल चली पेदी ऐ। ओ आखदे न जे में सारा राज
सांभी लेदा ऐ। ईऐ नेई चर्चा भायें झूठी गै होऐ, महापुरुषें
गी दुख दिन्दी ऐ। भगवान रामचन्द्रे गी बी ईऐ नई
तोहमत लगगी ही ते उनें सीता गी त्यागी ओड़ेआ हा। नेई
स्थिति इच अऊं के करां?” गल्ल सुनिए मेधावती जेड़ी सच्चें
गै मेधावती (बड़ी समझदार) ही हठ निश्चे कन्ने आखन
लगी—‘तीर्थे’ दे वहाने तुस राजे कोला छुट्टी लौ। इसलै
ए बड़ा जरूरी ऐ जे तुस किश समें आस्तै कुसै होर देस दुरी
जाओ। तां तुसें गी कोई राजा दा लोभी नई आखग।
ते तुन्दे मतल्लक जेड़ी चर्चा चली पेई ऐ आपूँ गै खत्म होई
जाग। ते जिसलै तुस इत्थें नई होगेओ, राजा आपूँ राज

काज सम्हालग । ते ओदे इच आई दी ए त्रुटि बी दूर होई जाग । फिरी जिस लै तुस परतिऐ आगेओ तुसें गी अपना कम्म करदे कोई तोहमत नई लाग ।”

जिसलै दीर्घदर्शी दी लाड़ी नै उसी ए गलाया ओ आखन लगा—“इऐ गल्ल ठीक ऐ ।” राजे कन्ने गल्लां करदे करदे उसनै राजे गी फर्माँश कीती—महाराज तीर्थे जाने दी बड़ी मनोकामना ऐ । किश चिरै आस्तै छुट्टी देओ, ए धर्म काज पूरा करने गी बड़ा मन करा करदा ऐ ।” राजे नै ए गल्ल सुनिए गलाया—रौन देओ, फी कर्दे करी लैओ । इत्थे घरै इच गै धर्म काज करो, दान इत्यादि देओ ते सुरग प्राप्त करने आले कम्म करी लौ । मन्त्री नै ए सुनिए आखेआ—“महाराज —! दान करने कन्ने जेड़ी पवित्तरता औंदी ऐ ओ धन कमाने इच कीते दे पापे गी धोन्दी ऐ । पर तीर्थ करने करी जेड़ी पवित्तरता प्राप्त हुन्दी ऐ ओ अमर रौने आली हुन्दी ऐ । कन्ने स्यात गल्ल ए ऐ जे जुआनी इच गै तीर्थ जात्रा करी लैनी चाही ऐ । जिसलै शरीर अपने बस नई रौन्दा तां चलोन्दा बी नई मन्त्री नै गल्ल कीती ते राजा भानी गै पान्दा रेआ । इन्ने इ राजे दे सेवकै नै आनिए अर्ज कीती—“महाराज । सब ए गई ऐ, सूरज देवता अस्त होन लगे न, स्नान समा बीता करे ऐ, सरकार न्हाई लैन राजा होर स्नान करने उठे ते मन्त्री ती जात्रा दा विचार करदा घर टुरी आया ।

मन्त्री नै लाड़ी गी बी कन्ने नई लैता । ओ आखदी

रई । ते नौकरें गी बी पता नई लगन दित्ता ते चोरी जात्रा पर निकली गोआ । ओ इकला गै तीर्थे दी जात्रा करदा रेआ । हठ निश्चा हा इक देसा दा दूए देसा इच जन्दा उठी हा ईआं करदे करदे पौण्ड्र देसा इच जाई पुज्जा । उत्थें इक नगरै दे बाहर समुद्रै दे बगटै शिवजी दे मन्दिरै इच गोआ उठी ते पचवाड़ जाई ए बई गोआ इक सदागर निधिदत्त उत्थें शिव जी दो पूजा करन आये दा हा । उन्न मन्त्री गी सूरजा दी तपशू ते लम्भी जात्रा कनै हुट्टे ते बतेह होए दे दिखेआ ओ से० बड़ा अतिथि भगत हा । उस जात्री दा जनऊ ते टिक्का दिक्खियै उसी कौई बड्डा ब्राह्मण समझेया ते अपने घर लई गोआ । घर नैइए स्नान कराया, भोजन कराया मतियां खातरां कीतियां । जिसलै नुहाड़ा हुट्टन चुक्का तां उसी पुच्छन लग-“तुस कुन ओ, कुत्थुआं आए ओ ते कुत्थें जाना ऐ” ? ब्राह्मणै संकोचां दा गै जवाव दित्ता मेरा नां दीर्घ दर्शी ऐ । अंग देसा दा ब्राह्मण आं । ते तीर्थ जात्र करन निकले दां । सेठ निधिदत्त आखेआ—“सदागरी करन अऊं स्वर्ण द्वीप-गी-जाने आला आं । मेरे परतोने तोड़ी तुस साढ़े घर गै रवो । तीर्थ जात्रा दा जेड़ा हुट्टन तुसें गी होए दा ऐ ओ बी उत्तगी जाग । फी तुस अपने घर उठी जायो ।” ए सुनिए दीर्घ दर्शी नै आखेआ—“में रइए के

करना ऐ ? जो तुस मन्नो तां थुआड़े कन्ने गै चली पौनां ।
सेठ नै आखेआ खरा । मन्त्री नै चिरा दा बिस्तरे उप्पर सौना
छोडी ओड़े दा हा । ओ रात उसनै उत्थें कट्टी ।

दूए दिन ओ सेठ कन्नै समुन्दरै पर गेआ जहाजै उप्पर
माल लदोए करदा हा । ओह बी चढ़ी गेआ । जात्रा शुरू
होई गई । उस ओ भयानक ते बचित्तर सागर दिक्खेआ ।
ते समां पाईए ओ स्वर्णद्वीप जाई पुज्जा । कोई पुच्छै
प्राइम मिनिस्टर गी समुन्दरै दी जात्रा करने दी के लोड़ पई ।
जिसलै अपनी इज्जत पर गल्ल औन लगै तां इज्जतदार के
नई करी बौन्दे । ओ उससै द्वीप इच रआ । सेठ निधित्त
बेचने बट्टने इच लगगा रेआ ।

जिसलै जहाजै उपर परतोआ करदा हा उसनै दिक्खेआ
जे इक्क बड़ी बड्डी लहर उट्टी । ते कन्नै गै इक कल्प वृत्त
समुद्रा चा निकलेआ । एदियां सनहरी शाखां लिशका करदियां
हिआं । ते मुंगें दी फुहार कन्ने सज्जे दा हा । उसी बड़े
शैल फल ते मोतिएं दे फुल्ल लगो दे हे । एदे मुट्टे तने उप्पर
इक सुन्दर युवती बेठी दी ही । ओ अत्यन्त गै सुन्दर ही । ते
हीरे मोती जड़े दे सिंहासन उप्पर बेठी दी ही । ओ किश समे

आस्तै बिचार मगन होई गोत्रा । सोचन लगा “ए के गल्ल
 ऐ ? इन्हें इच ओ सुन्दरी अपनी बीना डुप्पर गान लगी ओदा
 भाव हा—“जेडे कर्म दे बीज मनुक्खा नै पिछलै जन्मा इच
 बीजे न उन्दा फल उसी निश्चित रूप कन्ने खाना गै पौग ।
 पिछले जन्मा दे कर्म फला गी किस्मत बी नई टाली सकदी ।”

गीत सम्भेआ ते उस दिव्व सुन्दरी नै कल्प वृक्ख, ते
 सिंहासन समेत जेदे उपर ओ बेठी दी सी, समुद्रै इच चलोबी
 लोई ओड़ी । दीर्घ दर्शी सोचन लगा—‘अब्ज इक चर्ज बस्त
 गै लब्बी ऐ । नई ते समुद्रै इच बूटा कुत्थें ते बूटे उपर गीत
 गान्दी दिव्व सुन्दरी कुत्थें । चानचक्क गै ओदा लब्बना ते
 भट गै छपन होइ जाना बचित्तर गै गल्ल ऐ । सच्चें गै समुद्रै
 गी रत्नें दी खान ठीक गै आखदे न । लक्ष्मी, चन्दरमा ते
 पारिजात वृक्ष ते होर कीमती बस्तां एदेचा गै निकलिआं हिआं ।
 जहाजा दे कप्तानै उसी डौर भौर दिक्खिआ ते ओ बाकी सारे
 मलाह उसी आखन लगे—“ए सुन्दरी इसै चाली सदा गै असेंगी
 लब्बदी ऐ । ते दिखदे गै छपन होई जन्दी ऐ । तुसें ए किश
 पैहली बारी दिक्खेआ ऐ ।

उनें बजीरै गी ए दस्सेआ ते ओ हरान होए दा गै रेआ ।
 इन्ने चिरै इच निधिदत्तै कन्ने जहाजा उपर चढ़े दे कण्डा आई
 पुब्जा जित्थें उनें पुब्जना हा । सेठै नै सारा माल तुआरेआ
 सारे नौकर चाकर परसिम्न होइ गए । मनै इच परसिम्न

होए दे घर पुज्जा ते घरै इच चहल बहल होई गई । किश चि
उत्थें रहिए उसनै निधिदत्त गी आखेआ—'सेठ जी, तुन्दे कन्ने
रहिए मता सुख पाया ऐ हुण अपने देसै गी जाने गी म
आखदा ऐ तुस सुखें रस्सो बस्सो ते अस चलनेआं ए गलाइए
उसनै सेठा कशा छुट्टी लैती ते चली पेआ । सेठा दी उसी
छोड़ने दी बिन्द मरजी नई ही । ओ चली पेआ ते हुण ओदे
गुण गै ओदे साथी हे । बड़ी लम्मी जात्रा करिए ओ अपने
अंग देसा इच पुज्जा ।

उसी ओदे दिक्खिए राजा यश केतु दे गुप्त चरें उसी जाई
सनाया जे मन्त्री होर आवा करदे न । राजा ओदे उठी जाने
करी बड़ा दुःखी हा । ओ मन्त्री गी मिलने आस्तै शहरा दे
बाहर पुज्जा । घोटिए गलें लाया ते अपने मैहला इच लई
गेआ । मन्त्री लम्मे सफरो करा लिस्सा होई गेदा हा । राजा
आखन लगा अड़ेआ । तू मिकी ईआं छोड़िए कुत्थें गेआ
उठी हा । ते कन्ने इन्ना लिस्सा की होई गेआ एं ? पर भानी
दा बर्तना कोई के जानै ? चानचक्क गै तुन्दी सलाह बनी ते
तुस तीर्थे गी चली बी गे । दस्सो केड़े नमें थारे दिक्खे न ते
नभियां चीजां दिक्खिआं न ? दीर्घदर्शी ने स्वर्ण द्वीप दी जात्रा
दा हाल सनाया ते सनादे सनादे उस त्रिभुवन सुन्दरी दी गल्ल
बी आई गई जेड़ी समुद्रै इचा निकली ही ते कल्प वृत्त कन्ने
उत्थें गै छपन होई गई ही । जीआं २ उसनै सब किश
दिक्खेआ हा ऊंआं गै दस्सी ओड़ेआ ।

सुनदे गै राजे गी उस सुन्दरी कन्नें प्रेम होई गया । ते उसी बभोन लगा जे उस सुन्दरी बिनां ओदा राज ते जीवन किश बी नई । उसनै मन्त्री गी बक्खरे आखेआ—मिकी ओ सुन्दरी दस्स । अऊं ओदे बिनां नई रई सकदा । अपने भारे गी पूजिए अऊं थुआड़े दस्से दे रस्ते रस्ते जन्नां । तूं इस कम्मे इच भानी नई पायां । ते नां गै पिच्छा करेआं । में इक्कला गै भेस बदल्लिए जानां ऐं । तूं माढ़े पिशुआं राज सम्हालेआं । मेरे आखेगी नई टालेआं, नई ते अऊं थुआड़े सिर चढ़ी मरी जाड ।” राजा ए आक्खिए चुप होई गया । उसने ओदा कोई जवाब नई सुनेआ । उसी आखन लगा—जा, हुण अपने साक सम्बन्धिए ते मित्तरें गी मिल । उनें चिरै दी हीखी लाई दी ऐ । ओदे औने दे स्वागतै इच मतियां खुशियां होइआं । पर मन्त्री किश निम्मोभान गै रेआ । खैरखाह वजीर राजे दे असाध औगणें गी दिखिए सच्चे गै दुखी हुन्दे न ।

दूए रोज राजा यक्षकेतु नै राज-काज मन्त्री गी सौंपेआ—साधू दा भेस बदलेआ ते जात्रा पर चली पेआ । रस्ते इच उसी इक महात्मा मिलेआ । ओदा नां कुशनाभ हा । राजा नै उसी परणाम कीता । महात्मा नै उस भेस बदले दे राजा गी आखेआ निशंक होईऐ जा, लक्ष्मीदत्त सेठै दे जहाजा उपपर चढ़ी जा, तुकी ओ सुन्दरी जरूर थोई जाग जेदे पिशें जा करनां ऐं । राजा महात्मा दा शीर्वाद सुनिए बड़ा खुश होआ ।

उसनै फी परणाम कीता ते अगड़ा चली पेआ । मते देस
 दरया ते प्हाड़ लंघिऐ ओ समुद्रै कण्डे पुज्जा । उसी बभोआ
 जीआं समुद्र नुआड़ी गै प्रतीक्षा करा करदा ऐ । समुद्रै दी
 पौड़ां नुआड़ियां अक्खिआं हिआं जेडियां उसी दिक्खां करदिआं
 हिआं । ते लहरां त्रेडियां भरमां हिआ । ते चिट्टे सैख ते
 सिप्पियां अखिये इच सफेदी दा भाव दसदिआं हिआं । समुद्रै
 दे कण्डे उसी लक्ष्मीदत्त सेठ मिलेआ जीआं उस महात्मा नै
 गलाया हा । ओ स्वर्णद्वीप दी जात्रा आस्तै विल्कुल तैयार
 होए दा हा । सेठै नै ओदे राज चिन्ह दिक्खिऐ उसी साष्टांग
 परणाम कीता । ए चिन्ह चरणै इच चक्र इत्यादि हुन्दे ने ।
 राजा जहोजा उपपर चढ़ी गेआ ते जात्रा शुद्ध होई गई । जिसलै
 मभाटै पुज्जे ओ सुन्दरी कल्प-वृक्ष दी डाली उपपर बेठी दी
 समुद्रा इचा निकली । राज उसी दिखेन लगा जीआं चकोर
 चन्ना गी दिखदा ऐ । ओ अपनी बीना कन्ने गान लगी ।
 “जे किश पिशले जन्मै इच कर्म कीते न उन्दा फल इत्थे भोगनां
 ऐ । पिशले कर्मे दे फला गी विधाता बी नई” मेटी सकदा ।
 एदे इच मनुक्ख बेबस हुन्दा ऐ । उसी ओ सब किश भोगना
 गै पौन्दा ऐ जे किश मत्थे इच लखोए दा होऐ । जिस थार ते
 जीआं जे किश होना होऐ होई गै जन्दा ऐ । एदे इच विन्दक
 शक नई ।”

राजा नै नुआड़ा ए गीत सुनेआ नुआड़े प्रेम वाणै कन्ने
 ओदा हिरदा वेधन गेआ । अगों दा साह अगों ते पिशें दा

पिशे, ओ सुन्न गै होइ गेआ । उसनै सोचेआ भावी जे किश करै सो हो । उसनै समुद्रै गी परणाम कीता ते नुआढ़ी स्तुति करन लगा—“हे रत्न कर जी, तुसेंगी परणाम ऐ । तुस बड़े अगाध ओ, तुसें ए सुन्दरी छपाई रखी दी ऐ । तुसें ए लक्ष्मी दा बिष्णु गी धोखा ते नईं दित्ता दा । अऊं थुआड़ी शरण औन लगां । उन्दे फंडे दी रक्षा आस्ते तुसें पर्वतें गी शरण दित्ती । माढ़ी इच्छा बी पूरी करो ।” हजे ओ ए स्तुति करा गै करदा हा जे ओ सुन्दरी सागरै इच लोप होई गई । राजा ने ए दिक्खिए नुआढ़े पिशें शाल दई ओड़ी । ईंआं बभोआ जे प्रेम अग्नि गी शान्त करने आस्ते उसनै पानी इच शाल मारी होऐ ।

जिसलै सेठ लक्ष्मीदत्त नै ए अनहोनें गल्ल दिक्खी उसनै सोचेआ राजा ते मरी गेआ । उसी इन्ना दुख होआ जे आत्म हत्या पर तयार होई गेआ । ईन्ने चिरा च उप्परा गासवाणी होई—“धीरज रख, तौल नईं कर, राजा शाल मारिए मोआ नईं । ए शाल मारने आला राजा यशकेतु ऐ जेड़ा भेस बदल्लिए आएदा हा । ओ उस सुन्दरी पिशले जन्मै इच नाढ़ी रानी ही । ओ उसी प्राप्त करिए तौले गै परतोग ते अपने राज अंग देसै गी जाग उठी । सेठै गी ऐ सुनिए सन्दोख होआ ते ओ अपनी जात्रा पर अगें चली पेआ ।

जिसलै राजा यशकेतु नै समुद्रै इच शाल मारी ओ इक बड़ी सुन्दरी नगरी इच जाई पुज्जा । ओ महलैं दी नगरी ही ।

उन्दे बड़े २ थम्मे उप्पर हीरे ज्वाहरात जड़े दे हे, सनेहरी कन्धां लश्कारे मारदियां हिआं । ते दुआरिआं परदे कन्ने सज्जीदियां हिआं । उस नगरी इच बड़े बाग हे जिन्दे इच तला हे हीरे ज्वाहरात उन्दी पौड़िएं इच जड़े दे हे, ते कल्पवृक्ष उनें बागें दी शोभा बधा करदे हे । ओ सारे घरें फिरेआ । हर इक घर घर दौलत कन्ने भरपूर हो पर मनुक्ख कोई नई हो, उसी ओ अपनी प्यारी सुन्दरी नई लब्बी । फिरदे २ उसी इक बड़ा उच्चा हीरे जड़ित मैहल लब्बा । ओ उप्पर गेआ । भित्त खोले ते अन्दर गेआ । उत्थे इक मोतिएं आले कौच उप्पर कोई मनुक्ख सुत्ता दा लब्बा । उसनै इक दुशाला अपने उप्पर लैता दा हा । राजे नै सोचेआ ऊपे नई होए । राजे ने तौले गै दुशाला पुट्टेआ ते ए ऊपे सुन्दरी ही । जीआं बदल हटने उप्पर चन्न चमकन लगदा ए ईआं गै नुआड़ा मुंह चमकन लगा । ईआं बभोन लगा जीआं ओ रात्री देवी पताल देस इच दिन कट्टन आई दी होए । राजा उसी दिक्खिए आनन्द मग्न होइ गेआ जीआं कुसै मरू-स्थल इच चलदे ते गरमी कन्ने भुजदे मशाफरै गी दरया लब्बी जा । उस सुन्दरी नै बी अक्खीं गुआड़ियां । उस सुन्दर राज चिन्हे आले वीर पुरुषैगी दिक्खिए भटपट बिस्तरे परा उठी होई । उसनै ओदा स्वागत कीता । नीठा मुंह करिए ओ अपने नेतर कमले कन्ने नुआड़े पैर पखारन लगी । बड़े निन्दे सुरै कन्ने पुल्लन लगी—“तुस कुन आ ? ते इत्थे कीआं आई पुज्जे ? इत्थे पजोना गै मुश्कल ऐ । तुन्दे राज चिन्ह दसदे न जे तुस कुसे राज परिवारा दे

मनुक्ख ओ, ते ए साधुएं आला वेस की धारण कीता दा ऐ ?
माढ़े उप्पर कीआं किरपा कीती ऐ ?

राजा नै सुनिए जवाब दित्ता — “सुन्दरी अऊं अंग देसा दा
राजा आं । माढ़ा नां यत्तकेतु ऐ । मेरे इक बड़े विश्वास
पातर भित्तरे भिकी दस्सेआ जे तुस रोज समुद्रै इचा बाहर
निकलदे ओ । में ए वेस धारण कीता राज छोड़ेआ” ते
तुन्दी खातर इत्थें आई पुज्जां । तुस दस्सो तुस कुन ओ ?”

ए सुनिए सुन्दरी नै बड़ी लज्जा, प्रेम ते खुशी कन्नै उत्तर
दित्ता—“विद्याधरें दा राजा मृगांक सेन ऐ । अऊं नुआड़ी धी
मृगांकवती आं । मी पता नई की माढ़ा पिता इस नगरी इच
इककला छोड़िए ते सारी परजा गी अपने कन्ने लइए कुतै गेआ
उठी गेदा ऐ । बड़ी दुआसी लगदी ऐ ते इस करी अऊं
कल्प वृक्षो उप्पर चढ़िए समुद्रै इचा बाहर निकलनीं आं ते
किस्मता दे गीत गानो आं ।

राजा ने ए सुनेआ ते उसी उस महात्मा दी बाणी चेतै आई ।
उसनै नुआढ़े कन्नै बड़ी भिडियां गल्लां कीतियां ते अपने प्यारा
कन्ने उसी मोहित करी लैता । ओ नुआड़ी रानी बनने गी मन्नी
गई । पर इक शरत लाई—पति देव—महीने इच चार दिन

न्हेरे ते चानने पकखै दी अष्टमी ते चौदेआ गी अऊं परबस हुन्नी आं । अदूं जित्थें कुतै अऊं जां तुसें ना मिकी पुछना ते नां गै रोकना । की जे एदे पिशें इक भेत ऐ ।” जिसलै उस दिव्व सुन्दरी नै व्याह दी ए शर्त दस्सी राजा भट मन्नी गेआ । ते उसनै गन्धर्व रीत। कन्ने उत्थें व्याह करी लैता ।

ईआं ओ नन्दा कन्ने रौन लगे । इक दिन मृगांकवती नै राजे गा आखेआ तुस ठहरो, अऊं इक कम्म करी आवां । अज्ज न्हेरे पकख दी चौदेआ ऐ में तुसेंगी एदे विषे इच गै ग्लाय़ा हा । ते जिन्नां चिर तुस इत्थें बलगगेओ—इस बलौरी गली अन्दर नईं जाएओ । इत्थें जाने करी इक भीला इच डिगी पौन हुन्दा ऐ ते फी मनुकख लोका इच पुञ्जी जन्दे न ।” ए आखिए ओ उत्थुआं बिदा होई । तलवार लइऐ राजा बी चोरी चोरी पिशें होई गेआ । ओ इस भेता दी तह इच जाना चांहदा हा । राजा गी इक राक्षस औंदा लब्बा । ओ निरा काल देव गै हा । न्हेरी गुफा आङू उसनै काला मूंह बाके दा हा । राक्षस नै घोर गर्जना कीती, मृगांकवती उपर हाबड़े दा पेआ । चुकिए मुहें इच पाइ बेठा ते निंगली गेआ । राजा नै जिसलै ए दिक्खेआ तां उसी अगग लगी उठी । उसनै अपनी तलवार म्याना चा कड्डी जीआं सप्प

अपनी कैचुली तुआरदा ऐ । राक्षसा दी मुंडी तुआरी भेठा
 कीती । राक्षसै नै ओठ मीटे दे हे । जिसलै राक्षा दे धड़ा
 इचा लहू दा फुआरा निकलेओ राजा दी क्रोध अग्नि शान्त
 होई । पर अपनी प्यारी दी मृत्यु दा गम नई घटेआ । राजा गी
 किश थौ नई आवा करदा हा, जे हुण के करै । इन्ने इच
 के होआ जे मृगांकवती उस राक्षसा दा टिड पाड़िऐ बाहर
 निकली आई । जीआं बदलें इचा चन्न बाहर आई जन्दा ऐ ।
 राजा उसी बाहर आए दे दिक्खिऐ बड़ा परसिन्न होआ ते
 नुआड़े गलें लगा । ओ आखन लगा—“ए सब किश सुखनां
 ऐं जां किश भरम ऐ । ए गल्ल के ऐ ?” ए सुनिए मृगांकवती
 गी सारी गल्ल चेतै आई गई । उसनै आखेआ—“ए नां
 सुखनां ऐ, नां गै भरम ए । ए ते माढ़े बब्बै दा श्राप ऐ ।
 माढ़ा बब्ब विद्या धरें दा राजा ऐ । पहलै ओ बी इसै नगरी इच
 रौन्दा हा । माढ़े होर बी बड़े आ हे पर माढ़ा बब्ब जिन्ना
 चिर में नई कछ होआं रुट्टी नई खन्दा हा । मिगी शिवजी
 दी पूजा दी लगन ही । अऊं हर अष्टमी ते चौदेआ गी इस
 सुनसान थां पर औंदी हुन्दी ही ।

इक चौदेआ गी अऊं इत्थें आई ते गौरी दी पूजा करदी
 रही । उसदिन किश नेई भानी बरती जे पूजा इच गै सब

पई गई । उसदिन माढ़े पिता नै किश नईं खादा पीता । भासै
 किन्नी गै भुख त्रे लग्गी, ओ मी बल्गदा ते रेआ पर उसी
 क्रोध बड़ा चढ़ेआ । जदू सबा वेलै अऊं मुंह नीठा कीते दे
 घर परतोई मिकी अपनी खुब बभोआ करदी ही । ईश्वर दी
 करनी उस दिन किस्मतै दे फेर नै नुआढ़े मेरे गीतै प्यार गी
 पिशें करी ओढ़ेआ । उसने मिकी श्राप दित्ता । ‘अपनी
 खड़मस्ती कन्नें तू मिकी अज्ज भुखें मारी ओढ़ेआ ऐ । महीने
 दी हर अष्टमी ते चौदेआ की—ते छड़े इनें दिनें गी इक राक्षस
 ‘कृतान्त सन्त्रास’ तुकी निंगली जा करग । जदू बी तू शिवें
 दी पूजा गी जागी ईआं होग पर तू जीन्दी गै नुआढ़े टिडा इच
 निकली आवा करगी । तुकी ए श्राप चेतै नईं रौग नां गै तुकी
 निंगलोने दा कष्ट होग । कन्नें इस नगरी इच तू इकली रै
 रौगी ।’ पिता नै श्राप देई ओढ़ेआ । में उनेंगी परसिन्न
 करने दा जतन कीता । ते किश चिर सोचिए उनें ए ग्लाय़ा जे
 ए श्राप अदू मुक्कग जदू “इक यक्षकेतु नां दा अंग देसा दा
 राजा थुआढ़े कन्ने व्याह करग । ओ जदू तुकी निंगलौंदे
 दिक्खग ते उसी बड़ी ओड़ग तू नुआढ़े टिड्डे इचा निकली
 औगी ते थुआड़ा श्राप मुक्की जाग । तुकी श्रापै दा चेता
 आई जाग ते बाकी सारिआं गल्लां बी चेतै आई जाह्न । ते

अपनियां दिव्य शक्तियां बी तुकी परतोई जाडन ।

उसनै माढ़े श्रापै दा ईआं ऐन्त दस्सेआ ते मिकी इक्कला छोड़िऐ अपना सारा अमला फैला लैइऐ मनुक्ख लोका दे निषद पर्वता गी गोआ उठी । ते अऊं इत्थें भटकदी रही ते श्रापा दे दुःख भोगदी रही ? हुण ओ श्राप मुक्की गोआ ते मिकी सब किश चेतै आई गोआ ऐ । अऊं अपने पिता कोल निषध पर्वतां गी जाड । साढ़े लोकें आस्तै नियम ऐ जे जिसलै श्राप मुक्त होऐ तां अपने लोका गी परतोई जन्नेआं । तुस भायें इत्थें रौ भायें अपने देसा गी जाओ तुसें गी खुली छुट्टी ऐ ।

राजा ओदी गल्ल सुनिए दुःखी होआ । उसनै उसी आखेआ—“अड़िये इक किरपा कर । सत्त दिन नई जा । इन्नां चिर अस इस बागा इच होने आली जुदाई दी पीड़ा गी बसारने दा जतन करनेआं ।

ओदे पिशुआं तूं अपने पिता कोल दुरी जायां, अऊं अपने देस जाह उठी । ओ सुन्दरी ए गल्ल मन्नी गई । छे दिन ते राजा ओदे कन्नें बागा इच ते तलायें इच खेडदा रेआ । तलाएं इच कमल खिड़े दे हे । हंस ते बतकां उत्थें कलोलां ते कलाप करदे हे । ईआं बभौदा जे उसी ठाका करदे होन जे

अड़िए नई जायां । सतमे दिन राजा अपनी प्यारी सुन्दरी गी
 भलेरिऐ मंडप दे तला कोल लई गेआ । ओ तला मनुक्ख
 लोका गी जाने गी चोर रस्ता हा । राजा नै सुन्दरी दे गले इच
 वावां पाइयां ते तला इच शाल दई ओड़ी ते अपने शहरै दे बागै
 दे तला इचा उस सुन्दरी कन्ने निकलेआ । जिसलै बागवानें
 उसी अपनी प्यारी सुन्दरी कन्ने दिक्खेआ ओ बड़े खुश होए ।
 उने भट दीर्घदर्शी मन्त्री गी जाई सनाया । मन्त्री
 आया । उसनै राजा गी परणाम कीता । उसनै दिक्खेआ जे
 ओ अपनी कल्पित सुन्दरी गी लइ आया ऐ । मन्त्री ते शहरा
 दे लोक राजा गी महला इच पजाइ आये । मन्त्री मनै इच
 सोचन लगा—‘कमाल ऐ’ जे ए इस दिव्व परी गी लइ बी
 आया ऐ । मिकी ते समुद्रै इच नाढ़ा शड़ा भलाका गै लगा
 हा । जीआं बिज्ज मलाका मारदी ऐ । सच्ची गल्ल ते ऐ
 जे विधाता नै मत्थे उप्पर जो किश लिखी ओढ़ेदा ओ तें पक्क
 होई गै जाना हुन्दा ऐ । भावें ओ किन्ना गै असम्भव लब्बै ।
 बाकी पर्जा ते राजा दे परतोई औने दियां खुशियां मना करदी
 ही ते ते प्रधान मन्त्री सोचें पेदा हा । ओ राजे दे सुन्दरी प्राप्त
 करी लैने उप्पर गै हरान होए दा हा । मृगांकवती नै दिक्खेआ
 जे राजा ते अपने देसा इच आई गेआ ऐ ते कन्ने सत्त दिन

बी पूरे होई गे न ओ विद्याधरे दे देसा गी जाने गी तयार होन लगी । उसनै ध्यान कीता पर नुआढ़ी उडने दी शक्ति बस होई दी ही । ओदा ते खजाना गै लटोई गेआ । बड़ी निम्मोभान होई । राजा नै उसी पुछेआ—तुस की दुआस ओ ?' मृगांकवती नै आखेआ—श्रोप मुक्कने दे बाद मता चिर तुन्दे कन्ने रौने करी माढ़ी उडने दी शक्ति समाप्त होई गई ऐ । तुन्दे प्यार नै माढ़ी सुरग जाने दी ताकत गै समाई ओड़ी ऐ ।" राजा यत्नकेतु नै ए सुनिए आखेआ—असली ते विद्याधरी गी हुन प्राप्त कीता ऐ । नुआढ़ी प्रसन्नता दी ए चरम सीमा ही ।

जिसलै मन्त्री दीर्घ दर्शी ने ए दिक्खेआ—ओ उस दिन घर गेआ ते विस्तरे उपपर लेटआ ते दुआसी कन्ने नुआड़ा दिल चुटी गेआ ते ओ मरी गेआ । राजा नै नुआड़ा सोग कीता । राजकाज आपू' सन्हालैआ । ते मृगांकवती कन्ने मता चिर नन्द भोगदा रेआ । मूण्डे उपपर बेठै दे बताल नै ए सारी कथ सुनाइऐ राजा गी पुछेआ—“उस प्रधान मन्त्री दा दिल की चुटेआ ? सफलता नुआढ़े स्वामी गी प्राप्त होई ही । ओ सुन्दरी उसी नई थोई इस करी उसी दुःख होआ ? जां ओ सारा राज आपू' सांभना चाहंदा हा ते राजा गी परतोए दे

दिक्खिए निराशा होई ? जेकर तुकी पता होआ ते तू नई
दस्सेआ तां थुआड़ा तप क्षीण होई जाग । ते कन्नें थुआड़ा
सिर टोटे २ होई जाग ।

राजा त्रविक्रम सैन नै बताल गी दस्सेआ उस चंगे ते गुणी
प्रधान मन्त्री दे दिला इच इनें दौनें भावें चा कोई नई हा आदे
दिला इच ए विचार आया—“इस राजा नै इस संसारा दिएं
जनानिएं पिछे राजकाज छोड़ि ओड़ेआ हा हुण ते सुर्गा दी
परी इसी थोई गई ऐ । इसी ठीक करने गीतै में किन्ना कष्ट
पाया पर ए रोग ते सगुआं बधेआ गै ऐ । में सोचेआ हा किश
सधार होग । होआ उलटा । इनें सोचें इच उस मन्त्री दा
दिल त्रुटी गेआ ।”

राजा दा उत्तर सुनिए ओ छलिया बताल फी अपने थार
परतोई गेआ । राजा बी पक्के निश्चे दा हा । ओ बताल
गी आनने आस्तै परतिऐ चली पेआ ।

— — —

तेरमीं कथ

राजा शिशपा वृद्ध कोल गेआ । उत्थुआं बतोल गी
तुआरेआ अपने मूण्डे पर चुक्केआ ते लई चलेआ । चलदे चलदे
बताल उसी आखन लगा—“लौ राजा जी, तुम्हें गी इक कथ
सनानां ।”

इक नगरी ऐ बाराणसी । ओ शिवें दी नगरी ऐ । उत्थें
इक ब्राह्मण रौन्दा हा । ओदा नां हा देवस्वामी । राजा ओदा
बड़ा मान करदा हा । उस ब्राह्मणै दा इक पुत्तर हा जेदा नां
हरिस्वामी हा । हरिस्वामी दी लाड़ी लावन्यवती सच्चें गै अति
सुन्दर ही ? बभौंदा हा जे विधाता नै तिलोत्तमा ते सुरगा दी
दूइआं अप्सरा बनाइऐ उसी घड़ेआ हा । की जे ओ अति
ऐन्त गै सुन्दर ते प्यारी ही ।

चाननी रात ही । हरिस्वामी उम सुन्दर चाननी इच
नुआढ़े कन्ने प्रेम-क्रीड़ा करदा करदा सई गेआ । इन्नें इच
के होआ जे विद्याधरें दा इक राजकमार मदन वेग गासा इच
उड़दा सैर करदा उत्थें आई पुजा । उसनै लावन्यवती गी
सुत्ते दे दिक्खेआ नुआढ़ा टल्ला ढिल्की गेदा हा । नुआढ़े

अंगे दी शोभा न्यारी ही । उस विद्याधर राजकुमार मदनके
दा मन डोली गेआ । ओ मोहित होई गेआ । ओ नुआ
प्रेमै इच अन्हा होई गेआ । उसनै डुआरी मारी, स
चुक्केआ ते सुत्ती गी गै लइए गासा रस्तै उड़ी गेआ ।

जिसलै नुआदा पति हरिस्वामी विज्जा उसी लाबन्यवत
नई लब्बी । औ हावड़िऐ उट्टी होआ । ओ सोचन लगा—
ए के गल्ल ऐ ? ओ कुत्थे गई ऐ ? खबरै रोए होई गई ऐ ?
जां माढ़े सच्चे भाव परखने आस्ते छप्पी गई ऐ ? माढ़े कने
मखौल ते नई करो करदी ? मतिएं सोचें इच पेदा ओ ताई
तुआईं फिरन लगा । कदे कोटे पर जा, बुर्जिएं इच दिक्खे,
बागा इच तुप्पै, ते जिसलै कुतै नईं लब्बी तां दुःखा दी आनि
इच जलन लगा ते बिलाप करन लगा—“हे चन्द्रमुखी ! मेरी
प्यारी, तुकी दिक्खिए इस रातीं गी खबरै दुःख लगा ऐ । ए चन
थुआड़ी सुन्दरता सामनै हेच होई गेआ हा । ते थुआड़े कश
डरदा अपनी किरणे कन्नें मिकी सुख पजांदा हा । आखो ते
चन्नना दा लेप करा करदा होऐ । ऊऐ चन्न तुकी नईं
दिक्खिए अपनी किरणें कन्नें मिकी बेधो करदाऐ । जलदे डां
उप्पर जाला करदा ऐ । जैहरा इच डोबि २ ऐ तीर मारा करदा

ऐ।” इन्नें बलापें ते कीर्णें इच रात सम्भी गई । नुआढ़ा दुःख बधदा गोआ ।

दूआ दिन होआ । लो होन लगी । न्हेरा नस्सन लगा पर नुआढ़े मना उप्पर छायेदा दुआसी दा न्हेरा दूर नईं होआ । ओ मता बलाप करन लगा । चकवे पत्नी रात बजोगा इच कटदे न ते सारी रात कर्लादे रौन्दे न । उन्दा रोना ते बर्लाप बी हरिस्वामी दे बलापा इच गै आई मिलेआ । ओदा दुःख ते बलाप कई हज्जार गुणां बधी गोआ । ओदे साक समंधी उसी समझान पर नुआढ़ा मन गै नईं खड़ोऐ । ओ प्रेम दे बजोगा दी अग्नि इच जला करदा हा । ओ जित्थें खड़ोंदी ही, जित्थें नहौन्दी ही जित्थें शिंगार करदी ही उनें थारें जाइ जाइऐ कीर्णें पान लगा ।

ओदे मित्तर ते साक समंधी उसी समझान लगे—“ओ मोई दी नईं, तूं कैसी जिन्द दिन्नांए ? तूं जींदा रौगा । इस करी धीरज कर, मर्द बन, उसी तुप्प । दुनियां इच के ऐ जेड़ा पक्के निश्चे आले मनुक्खा गी नईं थोई जेन्दा ।” रिश्तादारें ते मित्तरें दे मता समझाने करी ओदा मन किश खडोता ते उसनै हीखी पर डोर रखी । उसनै मनै इच आखेआ—“में सब किश

ब्राह्मणें गी दान करी ओड़णां । सारे तीर्थ करनां ते पाप धोनां
तीर्थ जात्रा करदे २ खबरै कुतै लब्धी गै पवै ?

ए सोच बचार करिए ओ उठेआ न्हाता, सारे नित्त क
कीते । दूए दिन उसनै सब किश ब्राह्मणें गी मनसी दित्ता
ते इक बड़ी धाम कीती । ते जगग कीता ।

नुआदी तलाश करने आस्तै, उसनै देस छोड़ेआ । श
अपनी जिन्द लइए तीरथ फिरन लगा । इक दिन मती गरम
ही ते ओ भुक्खा भाना हा । सूरज रूपी शेरै मुंह बाके दा ह
ते कयाड़ी दे बाल खलारे दे हे । बड़ी तत्ती बा चला कर
ही । ईआं बभौंदा हा जे बजोगी पतिण दे गरम साण क
तत्ती होई दी ऐ तपशा कन्नें दे जल सुक्की गये ते उन्दे इ
चिक्कड़ सुक्किऐ त्रेड़ां पई गइआं । ईआं बभौंदा हा जी
दिल त्रुट्टी गेदे होण । सड़कें दे कण्ठे दे बूटे बसन्त रि
जाने करी दुआस होएदे अपनी सां सां दे हौंके भरा करदे हे
उन्दे सुक्के पत्तर ते शाल ईआं बभौंदे हे जीआं गरमी क
ओठें उप्पर पप्पड़ी जम्मी दी हुन्दी ऐ ।

इऐ नेऐ मोस्मै इच हरिस्वामी अपनी लाड़ी दी तलाशा
निकले दा घूमदा घामदा इक प्रां इच आई पुज्जा ते उत्थे

ब्राह्मण पद्मनाभ जेड़ा जग करा करदा हा ओदे घर गोआ ।
 हरिस्वामी धुप बजोग भुक्ख त्रेह कन्ने ब्याकल होआ दा हा,
 ते पैण्डा चली चली नुआदी नुहार बिगड़ी गई दी ही, बड़ा
 लिंसा ते टल्ले मैले होई गो दे हे । बचारा भुक्खा कन्ने बतेह
 होई गोदा हा । उस दिक्खेआ जे पद्मनाभा दे घर ब्रह्म भोज
 होआ करदा ऐ । ओ डयोड़ी कन्ने लगिगए चुपचाप खड़ोइ
 गोआ । पद्मनाभ ब्राह्मणा दी लाड़ी नै उसी ईआं खड़ोते दे
 दिक्खिऐ तरस खादा ते सोचन लगी—भुक्ख केडी बला ऐ ! ए कुसी
 पराधीन नईं करी ओड़दी ? ए कोई घरस्थी लब्बदा ऐ । कीआं
 नींदा मुंह कररिऐ रूटी दी जाचना करा करदा ऐ । कोइ मता
 लम्मा सफर करिए पुज्जा ऐ । भुक्खा नै सारे अंग बिकल
 करी ओड़े दे न । ऐ बचारा बड़ा गै इस जोग ‘लब्बदा ऐ
 जे इसी भोजन कराया जा ।

ए बचार करिए ओ दयाल इस्त्री उठ्ठी । उसनै खीर धिओ
 ते खण्ड लई ते ओदे कोल जाइऐ आखन लगी—ए लौ कुतै
 भीला दे कण्ठे बइऐ खाइ लौ, इत्थें ब्राह्मणें दा मता घरमोल
 पेदा ऐ ते तुन्दे बौनें आस्दे थार बी खरी नईं ।

उसनै ओ खीरा दा भाण्डा लई लेआ ते भीला कण्ठे जाइऐ

इक बड़ै हेठ छोड़ेआ ते आपूं पानशनी करन लगा । कूली
 काली करिए मुंह धोइए ते बड़ा परसिन्न होए दा भोजने करन
 लगा ? पर होनी नेइ बरती जे जिलै ओ पंजशनी करा करदा
 हा इक इल्ल काले फिनियर सप्पा गी अपने पैचडें ते चुंजा
 कन्नै पगड़िए उसै वूटे उप्पर आई बेठी । उस मोए दे सप्पा
 दा जहर त्रिपका करदा हा । ओ जहर उस खीरा आले भाण्डे
 इच पेआ । हरिस्वामी नै ए दिक्खेआ नई ते खीर खाई
 ओड़ी । खाने परैन्त जहर चढ़न लगा ते उसी बड़ा कष्ट होन
 लगा । ओ आखन लगा—“जिसलै बधाता गै वाम होइजा,
 ते सारिआं गल्लां गै पुट्टिआं होई जन्दिदां न । दिक्खो खीर
 खण्ड ते धिओ मेरे आस्तै जहर होईगे न ।

जहरै दी पीड़ा कन्नै तड़फदा ते ए ग्लांदा ओ उस ब्राह्मण
 दे घरा पासै चलेया । ब्राह्मण ते जगग कर करदा हा ।
 उसनै नुआड़ी लाड़ी गी आखेआ—“जेड़ी खीर तुसैं मिकी
 दित्ती ही ओदे कन्नै मिकी जहर चढ़ी गोआ ऐ । कुसै स्याने
 गी सद्दो ए जहर तुआरै । नई ते तुसैं गी ब्रह्म हत्या दा
 पाप लगग ।

हरिस्वामी नै उस घरा आली गी ए ग्लाया । ओ ए सुनिए
 बड़ी निम्मोभान होई ते किश करने दा बचार गै करन लगी

इन्हें इच हरिस्वामी दिआं अक्खिआं मटोई गइआं ते ओ मरी गेआ ।

एदा नतीजा ए होआ जे जग्ग करने आले ब्राह्मणै अपनी लोड़ी गी घरा बाहर कड़ी ओड़ेआ । उसी बड़ा रोह चढ़ेआ जे इसनै इक अभ्यागत गी मारी ओड़ेआ ऐ । उसनै भली लोका दे बेकसूर होने दा बचार गै नई कीता । उस बचारी नै कीता भला कम्म ते पल्लै पई बदनामी ते खब्जल खुआरी । ओ बचारी प्राश्चित करन तीर्थे' गई उठी ।

न्यां करने आले अधिष्ठाता दे सामनै ए हवाल आई खड़ोता जे इस ब्रह्म हत्या दा दोषी कुन ऐ ? इल्लऐ सप्प ऐ, ओ ब्राह्मण ऐ जां ब्राह्मणी ए जिनें भोजन दित्ता हा । पर इस समस्या दा हल नई' निकलैआ ।

राजा त्रिविक्रम जी, तुस मिकी दस्सो जे इस ब्रह्महत्या दा जुम्मादार कुन ऐ ? जेकर नई' दसगेओ तां ऊऐ श्राप लगनां जे ।

बताल दी गल्ल सुनिए राजा गी 'मौन भंग करना पेआ । जवाब दित्ता—“इनें सारे' इच्छा कोई बी दोषी नई' । सप्प ते बिल्कुल गै नई होई सकदा । ओ ते आपूं शत्रू दा शकार बने

दा हा । इल्ला दा बी केह अपराध होई सकदा ऐ । उसी
 भुक्ख लगी दी ही ते उसी अपनी खुराक थोई ते ओ उसी खा
 करदी ही । ओ ब्राह्मण बी दोषी नई । ओ ते अपने धर्म
 कारज इच लगगे दे हे । उनें कोई पाप कर्म थोड़ा करनां हा ।
 में ते समझनां जे इस ब्रह्म हत्या दा पाप उसी लगग जेड़ा
 इनें चौनें इक्का कुसै गी बी इस हत्या दा दोष लाग ।”

जिसलै राजा नै ए जबाब दित्ता बतात नै नुआड़ा मूण्ढा
 छोड़ेआ ते परतिऐ अपने थार गेआं उठी । पक्के निश्चे आला
 राजा बी परतोआ ते नुआड़े पिशें चलेआ ।

चौदमीं कथ

राजा त्रिविक्रमसेन शिंशपा बूटे हेठ पुज्जा । उसनै बताल
गी फी पगड़ेआ; मूण्डे पर पाया ते जिसलै राजा उसी लइऐ
चली पेआ तां बताल ने उसी आखेआ—“ राजा जी, तुस हुट्टी
गए ओ; सुनो अऊं तुसें गी इके मजेदार कथ सनानां ।”

अयोध्यानगरी साक्षात् भगवान् बिष्णु दी राजधानी ही ।
उनें रामचन्द्रें दा अवतार धारेआ हा ते राक्षसें दा नास कीता
हा । उस नगरी इच इक राजा वीरकेतु होआ ऐ । ओ बड़ा
बलवान हा ते अपनी नगरी दी ईआं गै रक्षा करदा हा जीआं
परकोटा शहरा दी करदा ऐ । उस राजा दे समे इच इक सेठ
सेठ रत्नदत्त हा जेड़ा बपारिणं दा सरदार हा । ओदी लाड़ी
दा नां नन्दयन्ती हा उनें देवतें दी मती पूजा कीती ते उन्दे घर
इक कुड़ी होई जेदा नां उनें रत्नावली रखेआ । ओ कुड़ी अपने
पिता दे घर बधन लगी जीआं २ ओदा शरीर मठोंदा गया
ईआं २ गै ओदा शलैपा, ओदी शोभा ते नम्रता आदि गुण बी

बधदे गए । जिसलै ओ जुआन होई ते व्याह जोग होई तां बड़े बड़े सेठ ते राजे कड़माई आस्तै तुआड़े बव्वै गी फरमासां पान लगे । पर उस कुड़ी गी मरदे कन्नें किश नेइ नफरत ही जे ओ इन्द्र कन्ने बी व्याह करना नई चांहदी ही ।

ओ व्याह दा नां गै नई सुनदी ही । उसनै आखेआ अउं मेरी जाड पर व्याह नई करड । बव्व बी उसी बड़ा प्यार करदा हा । ओ बिचो बिची दुखी होआ । इस गल्ला दी चर्चा अयोध्या इच सारे लोकें गी पता ही ।

उनें दिनें चोरें दा जोर होआ, चोर लोकें गी लुटन लगे ते लोक किट्टे होइए राजा वीरकेतु कोल शकैत लइए गे—
“महाराज ! चोर असें गी लुट्टी लै करदे न । असें गी किश पता नई लगदा..... महाराज गै किश करन तां बचा ऐ ।”
राजा नै ए दरखास्त लइ लैती ते सारे शहरा इच सादे टल्ले आले शपाही लाई ओड़े ते आखेआ—“चोरें गी पगड़ो ।”

उन्दे कशा चोर नई पड़कोए । ते शहरा इच लोटी मर्च रही । इक राती राजा आपू पहर उप्पर गोआ । ओ शस्त्र लइए ताईं तुआंईं फिरा करदा हा उसी इक आदमी शहरा दी फसीला कोल चलदा लब्बा । ओदी चाल बड़ी फुर्तीली ही

ओदे पैरें दी शेड़ बिल्कुल नईं ही । ओ पिशें परतोइए बी दिखदा जन्दा हा । राजा नै आखेआ—“ठीक ऐ, ईऐ चोर ऐ, जेड़ा राती निकली आऊंदा ऐ ते शहर लुट्टी लैन्दा ऐ ।” ओ चोरा कोल गेआ । चोरा नै उसी दिक्खीए पुच्छेआ कुन ओ ?” राजा नै आखेआ—“इक चोर आं” ! चोरा नै आखेआ शाबाश तां ते तूं माढ़ा मित्तर होआ । साढ़ा दौनें दा पेरा इक्क ऐ । चल साढ़े घर, अऊं थुआड़ी खातर करा ।” राजा नै मन्नी लैता—जे ओदे घर गेआ । ओदा घर जंगला इच इक गुफा विच हा । ओ बड़ा सज्जे दा हा ते, ते जोतां बला करदिआं हिआं ओ घर ते राजा बली दा दूआ पताल देस गै बमोदा हा । अन्दर जाइए राजा इक आसनै ऊपर बेठा चोर अन्दरले कमरे इच गेआ । इन्ने चिरै इच इक दासी आई उसनै राजे गी आखेआ—“महाराज ! तुस इत्थें मौती दे मुंह कुत्थें आई पुज्जे ? ए वड़ा भारा नामी चोर ऐ ! ओ बाहर आइए तुसें गी जरूर नुकसान पजाग । अऊं सच गलानिआं ए बड़ा धोखेबाज ऐ । तुस इत्थुआं नस्सने दी करो ।” राजा ए सुनिऐ झट गै बाहर होई गेआ । अपने महला इच पुड्जिऐ उसै राती राजा नै फौज किट्टी कीती ।

लड़ाई आस्तै तयार होइए राजा नै उत्थें आनिए चोरा दी गुफा दा रस्ता रोकी लैता । सेना नै अपने फौजी बाजे बजाए । चोरा नै जिसलै दिखेआ जे भेत खुल्ली गेआ ऐ, रस्ता बन्द होई गेआ ऐ ओ सिर धड़ा दी बाजी लाइए लड़ने गीतै बाहर निकलेआ । उसनै लड़ाई इच अद्भुत गै वीरता दस्सी । इक्कला गै ढाल तलवार पकड़िए ओ लड़न लगा उसनै हाथिएं दिआं सुएडा बड्डी सुट्टियां घोड़ें दिआं जंडा कपी ओड़िआं ते सपादिएं दिआं मुण्डियां तुआरी ओड़िआं । जिसलै उसनै सेना इच नेआ पहर (उपद्रव) मचाया राजा आपू ओदे कन्नो लड़न आया । राजा तलवार चलाने इच बड़ा सिद्धहस्त हा । उसनै पैन्तरा मारेआ जे चोरा कोला 'नुआड़ी तलवार खुस्सी लैती । पिच्छुआं खब्जर बी खुस्सी लैता । राजा नै उसी निहत्था करिए अपने शस्त्र बी सुट्टी ओड़े ते जप्फा मारिए उसी ढाई लैता । ते जीन्दा गै पगड़ी लैता । उसी कैदी बनाइए ते नुआड़ा सारा धन लइए अपनी राजधानी गी परतोई आया । राजा नै आज्ञा कीती जे चोरा गी बड्डे लै फांसी लाई ओड़ो ।

हुण जिसलै ढोल बजाइए उस चोरै गी फांसी आले थार लई जा करदे हे उस सेठा दी कुड़ी रत्नावली नै उसी अपने

महला परा दिक्खेआ । भायें ओ घाल होआ दा ह। ते कन्नें
 ते उसी मिट्टी लग्गी दी ही ओ रत्नावली उसी दिखदे गै ओदे पर
 मोहित होई गई । ओ अपने पिता सेठ रत्तदत्त कोल गई—
 “में अपना पति चुनी लैता ऐ ! ओ ए आदमी ऐ जिसी फांसी
 लाने गीतै लई जा करदे न । तुस राजा कोल जाओ ते धन
 दइऐ छड़काई लई आओ । जेकर तुस ए नई करगेओ तां
 अऊं बी नुआदे पिछें परलोक उठी जांड ।” बब्बै नै कुड़ी गी
 आखेआ—“ए तूं के आखा करनीं एं । पहलों तूं इन्ने गुण-
 वान, ते कामदेव समान सुन्दर नौजवानें गी पसिन्द नई कीता ।
 ते हुण के होआ ऐ जे इस बदनाम चोरा गी चुनेआई ?”
 ओदे बब्बै नै बड़ी दलील दित्ती पर ओ अपनी जिहू पर डटी गै
 रही । सेठ राजा कोल गेआ ते अपना सारा धन पेश कीता ते
 आखेआ उस चोरा गी छोड़ी ओड़ो ते जान बखशी करो । राजा
 नै आखेआ—उसी ते में कदें नई छोड़ना भामें तूं करोड़
 मोहरां बी दएं । इस चोरा ने इन्नियां चोरियां कीतियां न ते कन्ने
 में अपनी जिन्द खतरे इच पाइऐ इसी पगड़ेआ ऐ ।” सेठ निराश
 होई परतोआ । ओदी कुड़ी ने ए सुनिए चोरा पिछें जिन्द देने
 दी ध्याई लई । साक समंधिएं मता समझाया पर ओ नई
 मन्नी । उस स्नान कीता, पालकी इच बेठी ते फांसी लाने

आले थार जाई पुज्जी । ओदे मा बब्ब ते दूए लोक बी रोन्दे
धोन्दे ओदे पिछें चले ।

इन्नें चिरै इच हत्यारें चोरा गी फांसी दे फट्टे उप्पर चादी
ओड़े दा हा । ते ओदे प्राण निकलने आले हे । उसनै उस
सेठ पुत्री गी अपने रिश्तादारें कन्नें ओदे दिखेआ । ते
जिसलै उसनै लोकें कशा गल्ल सुनी ते पहलें ते रोया ते फी
हस्सेआ । इन्नें इच ओदे प्राण पक्खरू उडरी गए । सेठा दी
कुड़ी नै ओदी लोथ लैती ते चिता उप्पर ओदे कन्नें गै
चढ़ी गई ।

उसलै शिवें जेड़े उर्थें अदृश्य रूप इच मजूद हे गासवाणी
कीती—“हे पति भक्त स्त्री, अऊं थुआड़ी पति परायणता उप्पर
बड़ा परसिन्न आं । तूं कोई वर मंग । उसनै ए गासवाणी
सुनी, शिवें दी पूजा कीती, ते ए वर मंगेआ—“हे देव ! मेरे
बब्बा दै कोई पुत्तर नई । ओदे घर सौ पुत्तर होन । ओदे
घर मिको छोड़िऐ होर कोई सन्तान नई । ईआं ते ओ मरी
जाग ।” उस स्त्री दी गल्ल सुनिऐ शिव बोले—“थुआड़े बब्ब
दे घर सौ पुत्तर होडन । तूं इक होर वर मंग । तूं बड़े
धीरज आली ते पक्के निश्चे आली इस्त्री ए । तुकी जरूर होए

किश देना लोड़चदा ऐ ।” ए सुनिए ओ बोली—“जे शिव इन्ने कृपालू न तां मेरा पति परतिऐ जीन्दा होई जा ते कन्ने भले लोकें आंड़ू जीवन चला ।”

शिवें अदृश्य इचा आखेआ—“तथास्तु । तेरा प्रति जीन्दा होइ जा, ते अगुआं भले लोकें दा जीवन चला । राजा वीरकेतु बी नुआड़े उपपर परसिन्न होऐ ।” ओ चोर भट गै उठी खड़ोता ते ओदे जखम बी पलोई गए ।

सेठ रत्नदत्त बड़ा खुश होआ ते उसी चवात बी बड़ा लगगा । ओ अपनी कुड़ी, जमातरे ते साक समंधिए कन्ने अपने महला इच आया ते उसी सौ पुत्तरें दा बर थोए दा हा इसनै इस बड़ी भारी धाम कीती ।

जिसलै राजा वीरकेतु गी इटना दा पता लगगा ओ बड़ा खुश होआ ते उसनै उस बहादर चोरा गी सदेआ, अपनी फौजा दा सेनापति बनाई ओड़ेआ । उस वीर चोरै नै अपना पहला खराब जीवन छोड़ी ओड़ेआ, सेठै दी कुड़ी कन्ने ब्याह करी लैता ते राजा कोला मान प्राप्त करिऐ रमानै दा जीवन कटन लगा ।

राजे त्रिविक्रम सेन गी कथ सनाइए ओदे मृण्डे पर वेठा
 दा बताल उसी प्रश्न पुच्छन लगा ते कन्ने गै पहली सगन्ध चेतै
 नुआई आखन लगा—“राजा जी जिसलै चोर फांसी लगा
 करदा हा ओ सेठा दी कुड़ी गी अपने बब्बा कन्ने ओदे
 दिक्खिए पहलै हस्सेआ ते फी रोया की ?” राजा नै आखेआ—
 “ओ रोया इस करी जे उसी बसोस होआ जे ओ सेठा दी
 भलाई दा बदला नई चकाई सकेआ । ते हस्सेआ इसकरी जे
 उसी बड़ी हरानी होई जे ए सेठ पुत्री जिसनै राजे महाराजे
 कन्ने व्याह करने कोला इनकार कीता हा, ओदे उपर मोहित
 होई गई ए । सच गै आखेआ ए जे इस्त्री दा हिरदा बी
 गुब्जलै आला गोरखधन्दा गै हुन्दा ए ।”

राजे दा ए जबाब सुनिए, जादू दी शक्ति आला बताल
 ओदे मृण्डे परा उतरिए फी अपने थार उससै बूटे उपर गेआ
 उठी । राजा उसी आनने गी परतिए चलेआ ।

— — —

पन्दरमी कथ

राजा त्रिविक्रमसेन फी शिंशपा बूटे हेठ गेआ उथुआं
बताल गी तुआरेआ, ते लइए चली पेआ । राह पे दे राजा दे
मूएडे पर चढ़े दा बताल आखन लगा—“लौ राजा जी, तुसें इक
होर कथ सनानां”—

नेपाल देसा इच इक नगरी ऐ शिवपुर, उथें पराने समें इच
इक राजा यशकेतु राज करदा हा । ते ओदा सच्चें गै जस्स बी
बड़ा हा । उसनै राजै दा कम्मकाज अपने मन्त्री प्रज्ञागार गी
सौंपेआ । ते आपूं अपनी रानी चन्द्रप्रभा कन्नें नन्दमंगल
सनान लगा । समां पाइए उस राना चा इक कुड़ी होई ।
ओदा नां शशिप्रभा रखेआ । ओ ऐ बी चन्द्रमा आंडू शैल ते
आखयें दी लो ही ।

समां पाइए ओ जुआन होई । वसन्त आलै महीनै इक
दिन ओ अपनी दासिएं गी लइए बागै इच बसन्त उत्सव दिखन
गई । बागै इच इक थां मनस्वामी नां दा इक धनाढ्य ब्राह्मण

बी बसन्त उत्सव दिक्खन आये दा हा । उस ब्राह्मणा नै उसी
 फुल्ल त्रोड़दे दिक्खेआ । जिसलै ओ अपने डूटे ते पोटे कन्ने
 डाली परा फुल्ल तुआरदी ही ते ओदी बांइ दा लुआरा लगदा
 हा ओ दिव्व गै बभोदी ही । मनस्वामी दी दृष्टि ओदे उप्पर
 गई ते उसनै मनस्वामी दा मन गै कावू करी लैता । ओ मोहित
 होई गोआ उसी अपनी सुरत गै नई रहई । ओ वेवस गै होई
 गोआ । ओ अपने आपै इच सोचन लगा—“शरीर धारण
 करिऐ ते बसन्त द्वारा किट्टे कीते दे फुल्ल काम देव दे पबं
 बाणें आस्ते लैन रति ते नई आई ? जां ए उस बनै दी देवी ते
 नई जेड़ी बसन्त पूजा आस्तै आई गई ऐ ?” ओ इनें गिनतरिएं
 इच पेदा हा जे राज कुमारी नै उसी दिक्खेआ । उसी ओ
 शरीर धारण कीता दा दूआ कामदेव गै लब्बा । उसी अपने
 फुल्लें, अंगें ते राजा दी बेटी होने दा कोई ध्यान नई रेआ ।

जिसलै ओ दोऐ जने इक दूए गी दिखदे गै पहली दृष्टि इच
 सब किश दई बेठे ते प्रेम कन्ने वेवस होई गो उसै लै इक खतरे
 दा रौला पेआ ! दोनैं सिर चुकिए उबड़ा दिक्खेआ जे के ऐ ।
 इक हाथी सुण्ड मारदा ते सुण्ड पुहाड़ादा, दूए हाथी दी मुश्क
 पाइऐ भुड़ होए दा जंजीर तड़ाइ दी, अपने म्हावतै गी सुट्टी

आए दा ते पागल होए दा बागा दे वूटे त्रोटदा भनदा तुआई
 आबा करदा हा । राज कुमारी दिय़ा दासिआं ते डरिऐ कुतै
 नस्सी गइआं । मनस्वामी तौलै गे अगगें बधेआ, उसनै
 राजकुमारी गी बांहे इच चुक्की लैता । राजकुमारी बी डरी दी
 नुआदे कन्नै चम्बड़ी गई । ओ बचारी डर, प्रेम ते लज्जा कन्नै
 भलखोई दी ही । मनस्वामी हाथी दे रस्ते कशा उसी दूर लइ
 गेआ । ओदियां दासिआं आइआं ते उग्र ब्राह्मण दी प्रशंसा
 करन लगिआं । ओ राजकुमारी गी महलें इच लई गइआं ।
 ओ जन्दी जन्दी अपने छड़काने आलेगी परती परती दिक्खदी
 रई । सारा समां ओ अपने बचाने आले दे ध्यान इच गजारदी
 ही ते प्रेम अग्नि उसी चारै पहर जलांदी रौन्दी ही ।

मनस्वामी बी बागा चा बाहर गेआ उठी । जिसलै उसनै
 दिखेआ जे ओ अपने अन्दरले कमरें इच गई उठी ऐ ओ ओदी
 हीखी इच तड़फन लगा ते सोचन लगा—“में ओदे बिना नई
 रई सकदा, में ओदे बिनां बची गै नई सकदा । उस औकड़ा
 इच जादू दा उस्ताद मूलदेव गै मेरी खीरी मेद ऐ ।” उसनै
 जीआं कीआं करिऐ दिन ते कडुआ हे दूए दिन ओ मूलदेव
 होरें गी मिलन गेआ । अगगे मूलदेव होर अपने मित्र राशि

कन्नें बैठे दे हे ते जादू दे मते चमत्कार उत्थें हे । श्मान
मनुक्खता दा रूप धारिए उत्थें वेठा दा हा । मनस्वामी नै
निसिएँ प्रणाम कीता ते मनै दी गल्ल दस्सी । ओ जादू दा
बादशाह ए सुनिए हस्सेआ ते आखन लगा जे ए कम्म होई
जाग । उसनै इक गोली अपने मुंहेँ इच रखी । ते ओ बुद्ध
ब्राह्मण बनी गेआ । दृई गोली मनस्वामी गी दित्ती जिसी
मुंहेँ इच रखने कन्नें ओ इक बड़ी सुन्दर इस्त्री बनी गेआ ।

ओ जादू दा बादशाह उस भेसै इच उसी राजा दे दर्बारा
इच लई गेआ । ए राजा ओदी प्रेमका राजकुमारी दा बब्ब
हा । ओ राजे गी आखन लगा—“मेरा इकै इक पुत्तर ऐ में
ओदे ब्याह आस्तै ए कुड़ी तुप्पी ए । बड़ा पैगडा चलिए
पुब्जां । पर ओ पता नई कुत्थें ठुरी गेदा ऐ । में हुण उसी
तुप्पन चलैआं । अऊं इस कुड़िया गी तुन्दे कोल छोड़ी जन्नां ।
तुस इसी अपने कोल रखो । अऊं आनिए लई जाड । तुस
सारे जगत् दी पालमा करदे ओ ।” राजा यशकेतु नै ए प्रार्थना
मन्नी लैती । उसी ए बी डर हा जे बुद्धा कुतै आप नई दई ओड़े ।
उसनै अपनी राजकुमारी गी सदेआ ते आखेआ—“इस कुड़ी गी
अपने कोल रखी लै । इसी अपने कच्छ गै सुआलेआं ते कन्नें
गे रुट्टी खलाया । राजकुमारी नै हामी भरी ते कुड़ी बने दे

मनस्वामी गी अपने अन्दरले कमरे इच लई गई । मूलदेव बी जेड़ा बुढ़ा ब्राह्मण बने दा हा कुतै गोआ उठी । मनस्वामी उस कुड़ी दे भेस इच अपनी प्रेमका कन्ने रौन लगा ।

किश दिनें इच राजकुमारी अपनी नमी स्हेलड़ी कन्ने खुली गई ते खण्ड खीर दोई गई । इक रातीं जिसलै ओ अपने प्रेमी दे बजोगै बिच घुला करदी ही ते अपनी सेजा उप्पर पासे मारा करदी ही, मनस्वामी नै जेड़ा उस कुड़ी दे रूप इच ओदे कछ गै सुत्ता दा हा बड़े भेतै कन्ने पुच्छन लगा—“अड़िए शशिप्रभा, तूं पीली की पई गइ दी एं ? ते अपने प्रेमी कशा बिछड़े बजोगी आछू दिनों दिन लिस्सी की हुन्दी जा करनीएं ? अपनी सच्ची स्हेलियें ते दांसएं कोला के छपाना होआ ? जेकर तूं मिकी नई दसदी अऊं अन्नपानी नई खाड ।

राजकुमारी नै ए सुनिए हौका भरेआ । ते बल्लें २ उसी आखन लगी । “में तुन्दें लोकें कोला वेबसाई नई” । सुन तुकी एदा कारण दसनी आ । इक दिन अऊं बागै इच बसन्त उत्सव दिखन गई ही । उत्थें मिकी इक बड़ा सुन्दर ब्राह्मण नौजवान लब्बा । बसन्त दे म्हीने आछू हा जेदे इच चाननी दी बहार हुन्दी ऐ ते त्रेल नई पौन्दी । दिखदे गै उसनै माढ़े मनै इच

प्रेमैदी अग भइकाई ओड़ी । में अपनी उत्सुक अखियें कन्ने
 उस मुख रूपी चन्द्रमा दियां अमृत किरणां पीया करदी ही ते
 चकोर आँडू व्याकुल होई दा उसी दिक्खा करदी ही जे उत्थें
 इक बड़ा बड़ा काले बदला आँडू हाथी अपनियां जंजीरा
 तेड़ाइए गर्जदा आई पुज्जा । ओदियें पुपुड़ियें चा मद बगा
 करदा हा । मेरियां दासियां ते डरिए नस्सी गइयां । मिकी
 बी थत्थो बत्ते पई गए । उस ब्राह्मण नौजवान नै मिकी अपनी
 वावें इच चुकेआ ते परें लई गेआ । ओदे शरीरे कन्ने स्पर्श
 ईआं वजोआ जीआं चन्नन दा लेप कीता होए । जीआं अमृत
 दी वर्षा होई होए । मिकी नेआ अनुभव होआ जे में वर्णन
 नई कर सकदी । मेरियां दासिआं फा किट्टियां होई गइआं ।
 माढ़ी मर्जी ते नई ही पर मिकी मेहला इच खिची लइ आइयां ।
 मेरी दशा सुरगा दा भुआ डिगो दे जीवै आँडू होई गई । अदू
 कशा कल्पना इच उस जिन्द बचाने आले कन्ने बढ़ियां
 मुलाकातां होईआं । जागदे बी ईआं वझोंदा जे ओ माढ़े कच्छ
 गै वेठा दा हा । जिसलै सौनियां ते सुखनै इच लब्बदा ऐ ओ
 प्यार करिए लाड लाइए मेरा ओपरापन हट दां ऐ । पर में नेई
 बदकिस्मत आं जे उसी प्राप्त नई करी सकदी । वस उस
 प्रतिमा दे बछोड़े दी अग गै मिकी बिचो बिच खाई

जा करदी ऐ।

जिसलै राजकुमारी दी अमृत आली बाणी सुनिऐ मनस्वामी
 दे कन्न वृत्त होइ गए ते उसी जकीन होई गेआ जे नुआदां कम्म
 बनी गेआ ते ओ बड़ा परसिन्न होआ । उसने सोचेआ हुण
 प्रकट होई जाना चाही दा ऐ । उसने मुहां चा गोली कडु ते
 उस ब्राह्मण दे असली रूप इच आनिऐ उसी आखन लगा हे
 चञ्चल नेत्रों आली, अऊं ऊऐ ब्राह्मणआं जिसी तूं अपनी इक
 नजरै कन्न खरीदी लैता हा । ते सचें मुचे गै अपना दास
 बनाई लैता हा । ते उसलै जेड़ा चानचक्क गै बछोड़ा
 होई गेआ हा ओदे कन्ने मिकी बड़ा दुःख होआ । ते उससै
 कष्टा दा नतीजा ऐ जे में इस्त्री दे रूप इत्थें पुज्जां । इस
 करी जेड़ा बछोड़ा असें दौनें पाया ऐ ओ विरथा नई गेआ ।
 इस हृदा कोला अग्रे जाने दी काम दी बी समर्था नई । जिसलै
 रामकुमारी नै अपने प्रेमी गी ईआं सच्चे मुच्चें अपने सामने
 दिखिखआ ते गल्लां करदे सुनेआ ओ प्यार, चबात ते लज्जा
 कन्ने भलखोई गई । उनें झटपट गन्धर्व व्याह करी लैता ।
 मनस्वामी नन्दै कन्नें दौं रूपें इच उस महला इच रौन लगा ।
 दिनें उसनै गोली अपने मुहां इच रखी लैनी ते राजकुमारी दी

सहेलड़ी बनी रौना ते रातीं गोली कड़ी लैती ते पुरुष रूप धारण करी लैना ।

समां बीतदा गेआ । राजा यशकेतु दे साले मृगांकदेव नै अपनी धिउ मृगांकवती दा ब्याह इक नौजवान ब्राह्मण कन्नें करी ओड़ेआ । ओ मन्त्री प्रज्ञागार दा जागत हा । बड़ा दाजदान दित्ता । मामे दे जागतै दे ब्याह उपपर शशिप्रभा बी गई । ओ अपनी सखियां ते दालियां लाइए गई । ओ मनस्वामी बी सुन्दा दासी दा रूप धारिए ते शैल टल्ले लाइए कन्नें गेआ ।

मन्त्री दे जागतै उस मनस्वामी गी उस दासी दे रूप इच दिक्खिआ ते कामदेव दा वाण उसी वज्जा । ओ लाड़ी गी लइए घर ते पुज्जा पर घर उसी बड़ा सुन्ना २ लगन लगा । ओदा दिल ते उस ओपरी दासी नै खोई लैता दा हा । ओ उसै दासी दी सुन्दरता दे ध्यान इच डुब्बा रवै । ओ काम बासना कन्नें बेसुध होई गेदा हा । ओदा बड़ा बुरा हाल होन लगा । सारे लोक जेड़े उत्थें आये दे हे घबराइ गए । नाच रंग बन्द होइ गए । इक दूए कशा पुच्छन लगे गल्ल के होइ गई । ओदे बब्बा गी पता लगगा । बचारा मन्त्री प्रज्ञागार बी दौड़दा आया । बब्बा नै दलासा दित्ता । बगड़बात करा करदा हा ।

ओदी बेहोशी दूर होई उसनै बब्बा गी सारा किश दस्सी ओड़ेआ । बब्ब बड़ा दुखी होन लगा । ए गल्ल ओदे बस्सा दी नई ही । राजा गी पता लगगा । ओ आपू चल्लिए आयां । उसनै दिक्खेआ जे मन्त्री दा जागत प्रेमा दी सतमी ह्दा तोड़ी पुज्जी गेदा ऐ । ते बड़ा बुरा हाल ऐ । उसने मन्त्रिण गी आखेआ इक ब्राह्मण अपनी कुड़ी साढ़े कोल छोड़ी गेदा ऐ । ओदा ब्याह कीआं करी ओड़चै । ते जेकर एदा ब्याह नई होआ ते ए जागत ते अन्तिम दशा गी प्रापत होई जाग । ते जे ए मरी जाग तां साढ़ा मन्त्री बी नई बची सकदा । ते जे मन्त्री मरी गेआ तां साढ़ा राज खीसबीस होई जाग । दस्सो, इत्थें हुण के करचै ? राजा दी गल्ल सुनिए बाकी मन्त्री आखन लगे राजा दा बड्डा गुण मर्यादा दी रखेआ करना ऐ । मर्यादा दी रखेआ चंगी मन्त्रणा कन्ने हुन्दी ऐ । चंगी मन्त्रणा मन्त्री गै दिन्दे न । जेकर मन्त्री मरी जा तां मन्त्रणा दा लोप हुन्दा ऐ ते मन्त्र नई रवै तां मर्जादा-दा-नास हुन्दा ऐ कन्ने बड़ी अल्ल ते ऐ जे इक्क ब्राह्मण मन्त्री दे प्राण जा करदे न इसकरी इस ब्राह्मण हत्या दे पाप कोला बचना लोडचदा ऐ । कन्ने मर्जादा दी रखेआ करनी चाही दी ऐ इस करी तुस इस इस्त्री

दा ब्याह मन्त्री दे जागतै कन्नें करी ओड़ो । जेकर ते जदू
ओ ब्राह्मण औग ते नराज होन लगग उसलै गल्ल सम्हाली लौगे ।
मामला ठीक करी लौगे ।

मन्त्रिये दी सलाह सुनिऐ राजा उस सुन्दरी दा जेड़ी बिच्चा
आदमी ही ब्याह मन्त्री दे जागता कन्नें करने गी राजी होई
गेआ । उनें म्हरत कढ़ाया तै मनस्वामी गी जेड़ा उसी सुन्दरी
दे वेसा बिच हा अन्दर मैहलो दा सदाया ? उसनै राजा गी
आखेआ—‘मिकी तुन्दे कोल छोड़ी गेदे न मेरा ब्याह कुतै होर
होना हा । ते जेकर तुसें मिकी कुतै होर थार देने दा निश्चा
करी लैता ए तां में के आखी सकनीआं । में मनना गै पौदा
ऐ । न्यां वेन्यां तुन्दे कोला छपा गुब्जा नई’ । पर मेरी इक शर्त
ऐ । ब्याह करिऐ जिन्ना चिर मेरा पति छः महीने तीरथ नई
करी लैग ओ मिकी अपनी लाड़ी नई समझै । जेकर ए शर्त
नई’ मनोई तां अऊं जीभ टुक्किऐ ते आत्म हत्या करिऐ प्राण
दर्ई ओड़ड ।

जिसलै मनस्वामी ने उस सुन्दरी दे वेस इच ए गल्ल आखी
राजा नै मन्त्री दे जागता गी स्नेहा पजाया । उसी तशफी होई
ते ओ शर्त मन्नी गेआ । भटपट ब्याह होआ । उसनै इक

मैहला इच मृगांकवती गी रखेआ जेड़ी पहले ब्याह दी ही । दूए
मैहला इच दूई गी छोड़ेआ । ग्खूव पैहरा लाइए ओ मूरख
तीरथ स्नान करने आस्ते ते अपनी प्रीतमा दी गल्ल पूरी करने
आस्तै बाहर गेआ उठी ।

मनस्वामी इस्त्री रूपा इच मृगांकवती कन्नं रौन्दा हा । कट्ठा
रौना बौना, खाना पीना, ते सौना चलदा हा । इक राती जिसलै
सोरियां दासियां सेई गइयां ओ मृगांकवती अपनी साकनां कन्नं
गल्लां करन लगी—“अड़िऐ मिकी नीन्दर नई आवा करदी, कोई
गल्ल सना—“ए सुनिए ओ बहूरूपिया उसी ए कथ सनान
लगा—पराने समें दी गल्ल ऐ । इक सूरज बंसी राजा हा ।
ओदा नां इड़ा हा । उसी गौरी नै श्राप दित्ता । ओ इस्त्री
बनी गेआ । पर नेई सुन्दर इस्त्री जे संसारै इच ओदे
मकाबले दी सुन्दरी इस्त्री नई ही उसी दिक्खिऐ बुद्ध ओदे
उपर मोहित होइ गेए । ओ इक मन्दिरै इच मिलदे रए ।
उस प्रेम दा परिणाम ए होआ जे पुरुरवा जम्मेआ । ए
कथ सनाइए ओ आखन लगा देवते दी किरपा कन्ने
जादू टूने दे असरै कने कई आरी दवार्ये कने बी मर्द जनानी
बनी जन्दा ऐ ते जनानी मर्द होई जन्दी ऐ । ते ईआं बड़े बड़े लोकें

दा आपुं इच प्रेम होई जन्दा ऐ ।

ओ कोमल सुन्दरी अपने पति दे बजोगै बिच कल्पा करदी
ही । की जे ओ उसी ब्याह हुन्दे गै छोड़िऐ गेदा उठी हा । ए
कहानी सुनिए ओ उसी आखन लगी—अड़िऐ । इस कथै नै
मेरे रवां खड़ेरी ओड़े न । मेरा दिल डोबी इच जान लगा ऐ ।
मिकी दस्स, एदा मतलब के होआ ? मिकी ए किश के होआ
करदा ऐ ?” उस भेस बदले दे नै ऐ आखेआ—ए प्रेम दी
तीव्रता दे लक्खन न । मिकी बी होए हे, में थुआड़े कशा के
छपालना होआ ?” मृगांकवती बल्लें उसी आखन लगी—“में
तुगी अपनी जिन्दू कशा बद्ध प्यार करनी आं । में तुकी मने
दी सच्ची गल्ल दसनी आं । कुसै चाली इस मैहला इच कोई
आदमी लइआ ।” ए सुनिए ओ बदमाश जादूगिरा दा चेला
ओदा भाव समझी गेआ ते आखन लगा—जेकर ए गल्ल ऐ तां
में तुकी इक गल्ल दसनां । मिकी विष्णु दा बरदान ऐ जे में
चांह ते रातीं पुरुष बनी सकनां । थुआड़े गीतै अऊं पुरुष बनी
जन्नीं आं ।” उसनै मुंहा इचा गोली कड़ी ते अपना असली
रूप दसेआ । ओ भरी जुआनी इच मस्त नौजवान हा । ईआं
ओ ब्राह्मण उस मन्त्री दे पुत्तरा दी लाड़ी कन्नें रौन्दा रेआ ।

दिनें उसनै जनानी बनी जाना ते राती मर्दे दा रूप धारण करी लैनां । किश दिनें गी जिलै उसी पता लग्गा जे मन्त्री दा पुत्तर औने आला ऐ ओ रातो रात उसी लइऐ कुतै नस्सी गेआ ।

नाई ए होआ ते दूऐ पासै मूलदेव गी ए सारा किश पता लग्गा । उसनै फी बुड्डे ब्राह्मण दा रूप धारेआ ते अपने मित्तर शशि गी नौजवान ब्राह्मणै दा रूप धारेआ ते राजा यशकेतु कोल जाई पुज्जा । आखन लगा—“राजा, अऊं अपने पुत्तरा गी तुप्पी लई आयां । मेरी नूंह मिकी बापस करो ।”

राजा डरेआ जे ए हुण कुतै श्राप नई देई ओडै उसनै बचार कीता ते उसी आखेआ “ब्राह्मण देवता । थुआड़ी नूहा दा मिकी पता नई कुत्थें गइ ऐ । इस करी मिकी खिमा कर, कसूर ते मेरा ऐ । मे थुआड़े जागता गी अपनी राजकमारी ब्याही दिन्नां ।” ओ बुड्डा ब्राह्मण अपना भूठा दावा करी जा करदा हा ते बड़ा रो छांटा करदा हा । राजा नै स्मूरत कढ़ाया ते उस ब्राह्मणै दे पुत्तरै गी अपनी कुड़ी ब्याही दित्ती । मूलदेव नूंह पुत्तरा गी लइऐ बापस आई गेआ । उसनै राजा कशा होर कोई धन दौलत नई लई ।

अगों मनस्वामी उनेंगी मिलेआ । उन्दे इच बड़ा जबर्दस्त भगड़ा चलेआ । मूलदेव दे सामनै ओ ते शशि भगड़न लगे ।

मनस्वामी आखन लगा—“शशि प्रभा ते मिकी ओनी चाही दी ऐ । बड़े चिरै दा में गुरु हुन्दी किरपा कन्ने ओदे कन्ने व्याह करी लैता दा ऐ ।” शशि नै आखेआ—“तू वेवकूफ ए । हुण थुआड़ा एदे कणे के कम्म ? ए मेरी लाड़ी ऐ । अग्नि देवता दे सामने नाढ़े बब्बै ने मिकी ए व्याही दित्ती ऐ ।” ओ जादू कन्ने प्राप्त कीती दी राजकुमारी दे मामलै उप्पर भगड़न लगे । ते भगड़े दा फैसला नई होऐ ।

इस करी राजा जी तुस मिकी दस्सो इनें दानें इचा राजकुमारी कोदी लाड़ी ऐ ? मेरा शक मिटाओ । नई दसोओ तां ऊऐ श्राप लगना जे । मूण्डे पर चढ़े दे बतालनै राजा गी ए आखेआ तां राजा ने जबाब दित्ता—मेरा बचार ऐ जे राजकुमारी शशि दी लाड़ी ऐ । की जे बब्बै ने सारें देसामनै विधि पूर्वक नुआड़ा व्याह शशि कन्ने कीता । मनस्वामी नै ते चोरा आडू छपिऐ गन्धर्व रीति कन्ने व्याह कीता । इक चोरा दा दूए दी कनूनी चीजा उपर के अधिकार होई सकदा ऐ ?

जिसलै बतालने ए जवाब सुनेआ ओ राजा दे मूण्डे परा उतरेआ ते फी अपने थार गेआ उठी । राजा बी मुड़िऐ तौलै परतोआ ।

— — —

सोलमीं कथ

राजा त्रिविक्रमसेन शिशपा बूटे हेठ पुज्जा, उसने बताल गी
इत्थुआं तुआरेआ मूण्डे पर पाया ते फी परतोआ । बापस
ओन्दे बताल राजे गी आखन लगा । सुनो, राजा जी । तुसैं
गी इक होर कथ सनोनां :

पृथ्वी उपर इक बड़ा पर्वत ऐ । ओदा नां हिमवान ऐ । ओ
सारे हीरे ज्वाहरातें दी खान ऐ । ओ गंगा ते गौरी दा
जन्मस्थान ऐ । ए दमैं जनियां शिवजी गी बड़ियां प्यारियां न ।
बड़े बड़े वीर कर्दें ओदी टीसी पर नई पुज्जदेऊँ ए सारे पर्वतें दा
सिर ताज ऐ । त्रौणें लोकें इच एदी महमा दी चर्चा ऐ । उस
हिमालय पर्वता दी इक बकखी इक नगरीऐ उसी स्वर्णनगरी
आखदे न । ईआं बभ्रोंदा जे सूरज भगवान दियां सारिआं
किरणां किट्टिआं होइऐ उत्थुआं गै चमकदियां न ।

ॐ१६५६ इच तानसिह ते हिलेरी नै इस टीसी पर पुज्जिए ए
कारनामा बी करी दस्सी ओड़ेआ ऐ ।

प्राचीन समें इच उस सुन्दर नगरी इच विद्याधरें दा स्वामी जीमूतकेतु रौन्दा हा । ओ मेरू ऊपर इन्द्र राजा आडू राज करदा हा ओदे महलें दे बागा इच कल्प वृक्ष हा । ओ वृक्ष राजा दी खानदानी बरासत ही । ओ सारिआं कामनां पुरिआं करदा हा, इसै करी ओदा नां कल्प वृक्ष ऐ । राजा नै कल्पवृक्ष दी पूजा कीती ते ओदी कृपा कन्ने राजे दे घर इक पुत्तर होआ जिसी पिछला जन्म चेतै हा । ते ओ बोधिसत्व दे इक अंश दा अवतार हा । ओ दानशीलता, ते धीरज दा धनी हा । सारें जीवें पर देया करदा हा । अपने गुरु दी सिक्खेआ पर अमल करदा हा । ओदा नां जीमूतवाहन हा । जिसलै ओ जुआन होआ बब्बा नै उसी जुवराज बनाई ओड़ेआ की जे ओ बड़ा गुणवान हा ते मन्त्रियें उसी ईऐ सलाह दिती ।

जिलै ओ जुवराज होई गेआ सारे मन्त्री ओदे कछ आए । ओ ओदी कल्याण कामना करदे हे । आखन लगे—जुवराज जी तुस बी इस कल्पवृक्ष दी पूजा जरूर करदे रवैओ । इसी कोई जित्ती नई सकदा । ते ए सारिआं कामनां पुरिआं करदा ऐ । जदूं दा ए साढ़े कोल ऐ होर शत्रुएं दी गल्ल गै जान देओ, साक्षात् इन्द्र बी साढ़ा किश नईं बगाड़ी सकेआ ।

जिसलौ जीमूतवाहन नै ए सुनेआ ओ मनै इच सोचन लगा-
दिखो, ए दिव्य वृक्ष साढ़े बजुर्गे कोल किन्ने चिरै दा ऐ पर
उने नाढ़े कशा एदी शान दे मताबक वर नई संगेआ । कईएं ते
छड़ी दीलत गै मंगी ते होर किश नई कीता । उने अपनी शान
बी घटाई ते इस कल्पवृक्षा दी मैहमा बी घटाई । अच्छा, हुण
अऊं एदे कशा इक गल्ल कराड जेड़ी में अपने मना इच ध्याई
दी ऐ ।”

उसनै पक्का बचार कीता ते अपने पिता कोल गोआ ।
जाइए उन्दी सेवा इच लगगी गोआ ते उनेगी परसिन्न करी
लैता । ईआं वेठे दे एकान्त इच आखन लगा—पिता जी,
साढ़े जीवन सागर इच जे किश बी लब्धदा ऐ स्थिर किश बी
नई । अक्ख भूमकदे गै नष्ट होई जाने आला ऐ । लहरें
आडू गै चलायमान ऐ खास करी ए सब, बड्डा बेला, ते
मनुक्खे दा भाग ते इन्ने खिन भंगुर न जे तुआईं पासेया प्रकट
हुन्दे ते ताईं नष्ट होई जन्दे न । ए कुतै बी थिर नई रौन्दे ।
इस सृष्टि दे चक्करै इच इकै गल्ल पक्की ऐ जे अपने पड़ोसी
गी दान दईऐ परसिन्न रखेआ जा । इस दान करी उत्पन्न
होई दी पवित्रता ते प्रसिद्धि जुगें तोड़ी कायम रौन्दी ऐ इस करी

हे पिता जी ईऐ नेआ दिव्य वृत्त असें छड़ा अपने जोगड़ा गै
 कैदे आस्ते रखेदा ऐ। संसार दिया सारियां गल्लां नाशवान न
 ते खिन भंगुर न। जेड़े साढ़े वजुर्ग आखदे हे 'ए साढ़ा वृत्त ऐ'
 ओ कुत्थें न, हुन उन्दे गीतें ए वृत्त कुत्थें ऐ ? न उन्दे बिचा
 कोई इस वृत्त दा लाभ उठाइ सकदा ऐ न गै ए वृत्त उनें गी किश
 लाभ दई सकदा ऐ। इसकरी पिता जी तुस मिकी आग्या देओ
 अऊं इस कल्प वृत्त दा जेड़ा सारें दियां कामनां पूरियां करदा
 ऐ, नेआ प्रयोग करां जिस कर्ने पड़ोसी गी दान देने दा अति
 उत्तम फल प्राप्त होग।

ओदे पिता नै आखेआ जीआं थुआड़ी मरजी। जीमूत
 वाहन कल्प वृत्त कोल गेआ ते आखन लगा—“हे देवता ! तुसें
 साढ़े वजुर्गे दियां कामनां पूरियां कीतियां। मादी बी इक ए
 कामना पूरी करो। ईआं करो जे दुनियां इच मिकी कोई बी
 गरीब नईं लब्बै। तुस जाओ परमात्सा थुआड़ा भला करै
 संसार इच जिन्नें बी धना दे लोड़वन्द न उन्दे आस्ते में थुआड़ा
 दान करनां। जिसलै उसनै हत्थ जोड़िऐ ए प्रार्थना कीती
 उसलै शमाना इचा बाज आई—तुसें मिकी छोड़ी ओड़ेआ ऐ,
 अऊं हुण चलेआं।” कल्प वृत्त उडिऐ शमाना उपपर गेआ ते

उत्थुआं पृथ्वी उपर धना दी बरखा कीती । ते इन्नी कीती जे कोई बी गरीब नई रेआ । प्राणिएं उपर नेई देया करने करी जीमूत वाहन दा जस त्रौणें लोकें इच बड़ा प्रसिद्ध होआ ।

पर एदे कन्नें इक होर बी गल्ल होई जे ओदे शरीक सारे ओदे दोखी होई गये । जिसलै उनेंगी पता लग्गा जे हुण उन्दे कोल कल्पवृक्ष जेड़ा उनें गी हर संकटा कोला बचांन्दा हा नई रेआ ते उनें समझेआ जे इस बेलै उनेंगी जित्तना सखल्ला ऐ । ओ सारे रलिये सलाह करन लगे । उनें कमर कस्सी, फौज बनाई ते जीमूत वाहन ते नुआदे बन्वै दा राज खोन चली पे ।

जीमूत बाहन ने ए दिक्किए अपने पिता गी आखेआ—
पिता जी जेकर तुस उठी खड़ो ते कुन तुन्दे मकाबले इच ठहरी सकदा ऐ ?

पर कुन नेआ दयालु पुरुष होग जेड़ा अपने साक समन्धिएं गी कतल करिये ते राज सम्हालग ? इस नाशवान शरीरा गीतै एड्डा पाप करै ? इस करी नेए राज्जे दा केह फायदा ? अस होर कुतै जन्ने उठीआं । उत्थें जाइए तप करगे जेदे कन्नें साढ़ा दौनें लोकें इच भला होग । जेड़े साढ़े साक समन्धी साढ़ा

राज लैना चोहंदे त । उनोंगी अपने मनै दी मरजी करन देओ
ते नन्द लैन देओ ।

ए सुनि ए नुआढ़े बब्बै नै आखेआ मिकी राज्जै कन्ने
केह ? थुआड़े गीतै गै ए राज हा । जे तूं देआ भाव कन्ने
राज छोड़ा करनां एं ते में बुड्डे बारै राज के करनां ए । राज
ते जीमूतवाहन इस गल्ला उपर मन्नी गये ते राज छोड़िऐ
जीमूतवाहन अपनी माऊ गी लइऐ मलय पर्वता गी गोआ
उठी । उत्थें इक नदी दी घाटी इच उसनै इक कुटिया बनाई
सारी नदी दे कण्डै कण्डै सन्दल ते चन्नन दे बड़े वृक्ष हे ते ओ
उन्दे कन्ने खटोई दी ही । ओ सदा अपने माऊ बब्बै दी सेवा
करदा रौन्दा हा । उत्थे नुआढ़ी मित्तरता इक मित्रवसु कन्ने
कन्ने होई गई जेड़ा सिद्धे दे राजा विश्ववसु दा पुत्तर हा । ओ
उसै पवतै उपर रौन्दा हा ।

इक दिन जीमूतवाहन जंगला इच फिरदे-फिरदे गौरी देवी
दे मंदिरै विच जाई निकलेआ । ते ओदा विचार बी पूजा
करने दा होआ । उसनै उत्थें इक बड़ी सुन्दर स्त्री दिक्खी जेदे
कन्ने होर स्त्रियां बी हियां ते कन्ने जेड़ी गौरां गी परसिन्न
करने आस्तै बीणा बजा करदी ही । ओदे कछ गै इक हरष

चुपचाप वीणा दा मधुर संगीत सुनो करदा हा । ईआं बभोंदा
 हा जे ओ हरण उस सुन्दरी दी अक्खिएं दी सुन्दरता दिखिए
 भलखोई जन गोदा ऐ । ओदियां अक्खिआं इन्नियां लम्भियां
 हिआं जे ओदे कन्ने इच बड़दिआं लब्धियां हिआं । ओ बड़ी
 पतली पतंग ही ते नुआड़ा लक्क एडा पतला हा जे ईआं बभोंदा
 हा जे बधाता ने बनाइऐ ते लक्का दा पगड़िऐ मुठ करसी लैती
 ही ते टिड्डा पर लहरां ओ उंगलियां बनकीदियां लब्धियां
 हिआं । जीमूतवाहन नै उसी दिखेआ ते दिखदे गै ओ
 अक्खिएं रस्ते नुआड़े हिरदे इच बड़ी गई । ते दिल चराई
 लई गई । उस सुन्दरी नै बी उसी दिखिआ । ओ बागै दी
 शोभा बधा करदा हा । उसी दिखिए नुआड़े हिरदे बिच
 उथल-पुथल मची गई । ओ कामदेव दा मितार बसन्त
 बभोंदा हा जेड़ा कामदेव दा शरीर नष्ट होई जाने उपपर दुखी
 होएदा उस जंगला बिच आए दा हा । ओ मोहित होई गई ।
 ते नेई व्याकल होई जे नुआड़ी सहेली आडू ओदी बीणा बी
 वेसुदी होइऐ चुप्प होई गई ।

जीमूतवाहन नै ओदी इक दासी गी पुच्छेआ—“थुआड़ी
 सखी दा के शुभ नां ऐ ? ए कोदे कुला दा गहना ऐ ?” दासी

नै जवाब तित्ता—‘ए मित्रवसु दी भैन ते सिद्धे दे राजा विश्ववसु दी धी ऐ। नाढ़ा नां मलयवती ऐ जीमूतवाहन गी ए किश दस्सिए उस चतर सखी नै उसी नुआढ़ा कुल, नां ते ओ कीआं उत्थें आयेदा ऐ ए सारा किश पुछिए मलयवती गी आखेआ अड़िए। तूं विद्याधरें दे राजकुमार हुँदा आपूं आनिए स्वागत की नई करदी ? ए ते ने महमान न जे सारी दुनिया नै इन्दा स्वागत कीता लोड़चदा ऐ। ए सुनिए बचारी राजकुमारी चुप्प होई गई ते उसो किश शर्म आई गई। ओ सखी जीमूतवाहन गी आखन लगी—“ए राजकुमारी बड़ी शर्माकल ऐ। इस करी नाढ़े थार अऊं तुन्दा स्वागत करनीआं। इस करी उसनै इक पुष्पमाला ते अर्घ्य उसी दित्ता। जिसलै उसनै जीमूतवाहन गी हार दित्ता उसने झटपट ओ हार मलयवती दे गले इच पाई ओड़ेआ। उस राजकुमारी नै अपने काले नेतरें कन्ने ईआं दिखेआ जीआं ओ बी नीले कमलें दा हार ओदे गले इच पा करदी होऐ।

ईआं उने चुपचाप ते अपने स्वंवरा दी रस्म पूरी करी लैती। इन्ने चिरै गी इक दासी नै आनिए राजकुमारी गी आखेआ—“तुन्दे माता जी तुसें गी चेता करा करदे न तौले

चलो ।” राजकमारी ए सुनिए चली ते पई पर उसी बड़ा कष्ट
होन लगा । नुआढ़ी मरजी ते आखा नईं ही करदी । नुआढ़ी
नजर अपने प्रीतम दे मुं है कन्ने चमका गेदी ही ते मसां त्रूढ़िए
उसनै खिच्चेआ । ते अपने घर गई । जीमूतवाहन बी नुआढ़ा
ध्यान करदा अपनी कुटिया गी परतोआ ।

मलयवती अपनी माऊ गी मिलिए अपने कमरे इच गई ते
खट्टा पर पई गई । उसी अपने प्रीतम दा बजोग लगगी गोआ ।
ओदिएं अक्खिएं अगो धुन्ध जन छाई गई । ईआं बभोंदा
हा जीआं नुआढ़े हिरदै इच बल्दी बजोगा दी अग्गा दा धूं
होए । ओदा शरीर प्रैमै दी अगू कन्ने जलन लगा । ते ओदी
अक्खियें च अश्रुएं दा हाड़ आई गोआ ? ओदियां दासिआं
उसी चन्नन दां लेप ते कमल पत्रें दे फणाके करान लागिआं
पर उसी बिस्तरै, इच दासी दी गोदा इच जां भुंवां किश भी रमान
नईं आवै । दिन ढलेआ चन्द्रमा पूरब दिशा इच निकलेआ
ते पूर्व दिशा दा मत्था चुम्मन लगा । ओ बचारी इन्ती
शर्माकल ही जे बचारी अपने प्रीतम गी मिलने दा स्नेहा बी
नईं भेजी सकै । न गै उसी कोई होर तरीका आवे जेड़े प्रेमी
बर्तदे न ।

ओदा मन ईऐ करै जे हुए जीआं नईं । ओदा हिरदा संगड़ोन लगा । उसनै ओ रात मसां गजारी । चन्द्रमा बी उसी चंगा नईं लग्गैदा हा । ओदा हिरदा कमल आङ्गू बन्द होइ गेआ ते दुआसी ईआं छाई जीआं भौरें दीआं बीढां कमला गो घेरी लैन्दिआं न ।

तुआईं जीमूतवाहन बी ओदे बजोगै विच पलेष्टे मारन लगा ? कामदेव उसो पीड़ा देन लगा । उसी नमां नमां गै प्रेम लग्गा हा पर ओदा असर तौलेगे बभोन लग्गा । नुआढ़ा रंग पीला पई गेआ ? शमै दे मारे ओ किश बुआसरदा नईं हा पर जेड़ा बी हौका नुआढ़े मुंहां दा निकलदा हा पीड़ा गै प्रकट करदा हा ।

दूए दिन ओ मती हीखी कन्ने गौरी दे मन्दिर पुज्जा जित्थे उसी सिद्धें दी राजकुमारी लब्बी ही । प्रेम दी अगगी कन्ने पीड़ित उसी कुटिआ दे तपस्वी दा जागत जेड़ा ओदे कन्ने आएदा हा तसल्ली देआ करदा हा ।

मलयवती बी उत्थें आई । ओदे कोला बजोग सहारन नईं होआ करदा हा । ओ इक्कली गै इक नकेवले थार गई । ते प्राण त्यागन लगी । उसी अपना प्रेमी नईं लब्बा । ओ इक

बूटे ओलै हा । ओदी अखिएं चा अथू बगा करदे हे ते ओ
 गौरी अगों प्रार्थना करन लगी । “देवि—इस जन्म ते थुआड़ी
 देआ नईं होई ते जीमूतवाहन मेरा पति नईं बनी सकेआ । हुण
 अगलै जन्म उसी मेरा पति जरूर बनायां ।’ ए आखिए उसने
 दुपट्टे दा फाह बनाया इक अशोक बूटे कन्ने उसी बन्नेआ ते
 देवी दे मन्दिरै दे सामने फाह लगन लगी । ओह आखन
 लगी—हे राजकमार जीमूतवाहन तुस इन दयालु ओ, पर तुसें
 मेरे उपर किरपा नईं कीती ।’ ए आखिए उसनै फाह अपने गले
 इच पाया । उसैलै देवी दी शमाना इचा बाज आई । इन्नी
 तौल नईं कर विद्याधरें दा राजकमार जीमूतवाहन जेड़ा अगगे
 रहे राजा बनने आला ए थुआड़ा पति होग ।

जिसलै देवी नै ए आखेआ जीमूतवाहन नै बी ए सुनेआ ।
 ओ अपनी प्रेमका कोल गोआ । ओ तपस्वी मित्तर बी नुआड़े
 न्ने हा । ओ तपस्वी राजकुमारी गी आखन लगा—“ए लौ
 अपने महाराज, जेड़े देवी जी नै तुसेंगी दित्ते न ।” जीमूतवाहन
 धेड़े प्यार कन्ने ओदे कन्ने गल्लां कीतियां ते अपने हत्था
 ने नुआड़े गला इचा फाह तुआरेआ । उनें दौनें गी ईआं
 गा जीआं अमृता दी बरखा होआ करदी होऐ । मलयवती

शरमा कन्ने भु'आ लकीरां खोतरन लगीं । उस्सैलै नुआदी इक सखी जेड़ी उसी तुप्पा करदी ही बड़ी खुश होइऐ आखन लगी—“सखि । तू बड़ी भागवान ऐं । थुआड़ी मुराद पूरी होई । जे किश तूं आखदी ही ऊऐ होई गोआ । अज्ज गै राजकुमार मित्रवसु नै मेरे सामनै थुआड़े पिता गी गलाया— पिता जी, विद्याधरें दा राजकुमार जीमूतवाहन जिसने कल्पवृक्ष दा दान करिऐ त्रौणें लोकें इच जस कमाया इत्थें आयेदा ऐ । असें ओदा मान करना लोड़चदा ऐ । ओ साढ़ा महमान ऐ । आओ अस ए रत्नें दा रत्न अपनी राजकुमारी उसी ब्याही देचै । ईऐ नेआ बर बी असें गी नई थोना, राजा मन्नी गोआ ऐ । उसने आखेआ—जीआं थुआड़ी मरजी । थुआड़ा आ मित्रवसु इस्से कम्मै गीतै इस राजकुमार हुन्दी कुटिया गी गोआ ऐ । हुण थुआड़ा ब्याह तौले गे होई जानां ऐ । इस करी तूं अपने महला गी चले ते राजकुमार होरें गी बी अपने थार जानदे । सखी कशा ए गल्ल सुनिए राजकुमारी बड़ी प्रसन्न होई ते ओ अपने महला गी चली । ओ खुशी बी होई ते विछड़ने करी दुःखी बी होन लगी ? ओ परतोइऐ २ दिखदी २ गई उठी ।

जीमूतवाहन बी तौलै गै अपनी कुटिया गी परतोआ । अगें मित्रवसु उत्थें आयेदा हा उन्न गल्ल दस्सी । जीमूतवाहन दियां

सारियां डच्छयां पूरियां होई गइयां । उसनै खुशी कन्ने मन्नी
 लैता । जिसलै उसनै अपना पैला जन्म चेतै कीता उसने
 दस्सेआ जे मित्रवसु ओदा भित्तर हा ते ओदी भैन नुआड़ी लाड़ी
 ही । मित्रवसु ए सुनिए बड़ा खुश होआ । उसनै जीमूतवाहन दे
 माऊ कव्वै गी गल्ल सनाई । ओबी ए सुनिए बड़े खुश होए ।
 अपना कम्म तोड़ चाड़िए ओ अपने माता पिता कोल गेआ ।
 ओबी बड़े प्रसन्न होए । उसै दिन ओ जीमूत वाहन गी अपने
 घर लई गेआ । उसनै जाइए उसै दिन व्याह दा प्रबन्ध रचाया
 ते अपनी भैनुं दा व्याह विद्याधरें दे राजकमार कन्ने करी
 ओड़ेआ । जीमूतवाहन व्याह करिए अपनी लाड़ी मलयवती
 कन्ने रौन लगा । इक बारी के होआ जे ओ मित्रवसु कन्ने
 मलय पर्वत उपर फिरदे फिरदे समुन्दरै कण्डे इक बनै इच जाई
 पुज्जा । उत्थें उसनै हड्डिओं दे बड्डे बड्डे ढेर दिक्खे । उसनै
 मित्रवसु गी पुच्छेआ—“ए केद्वे जीव न जिन्दियां ए हड्डियां
 किट्टियां कीती दियां न ?” मित्रवसु नै उसदयालु व्यक्ति गी
 आखेआ - अऊं तुगी ऐदे मतल्लक थोड़े इच गै कत्थ सनानां ।
 बड़े चिरै दी गल्ल ऐ सप्पें दी माऊ कद्रू नै इकवारी गरुडै दी
 माऊ विनता गी इक शर्ता उपर जित्ती लैता ते उसी अपनी दासी
 बनाई लैता । ईआं बैर बधी गेआ ते बली गरुड नै अपनी

माऊ गी छड़काया ते कद्रू दे पुत्तरे सप्पे गी खाना शुरु करी
दित्ता । उसी आदत गै पई गई ओ पताल जा उठी कईएँ गी
ओ मारै कईएँ गी ओ पैरें इच रोल्लै ते कई डेरै कन्ने गै
मरी जान ।

जिसलै सप्पे दे राजा वासुकि नै ए दिक्खेआ ओ डरेआ जे
ईआं ते ओदी सारी जाति गै इक भपटा इच खत्म होई जाग ।
उसनै गरुड़ दी (खशामद) कीती ते ओदे कन्ने इक समभोता
करी लैता । उसनै आखेआ—हे पक्षिणं दे राजा, तुन्दे भोजन
आस्तै अऊं रोज दक्षिण सागर कण्ठे इक सप्प भेजी ओड़ा
करड । तुस कदें बी पताल नई आवा करो । इक बारी सारें
सप्पे गी मारिए तुसैं गी के लाभ ऐ, जिसलै सप्पे दे राजा नै ए
योजना दस्सी ते गरुड़ ने अपने फायदे दी गल्ल दिक्खेए इसी
मन्ती लैता तदुएँ दा पक्षिणं दा राजा समुंदरे दे कण्ठे वासुकि
दा भेजे दा इक सप्प रोज खन्दा ऐ ए गरुड़ द्वारा खादे दे
सप्पे दे हड्डियें दे ढेर नजेड़े किट्टे होई होई पहाड़ा जिन्ने
होई गये न ।

देआ ते धीरज दे खजाने जीमूतवाहन गी जिसलै मित्रवसु
कशा ए पता लग्गा ओ मनै इच बड़ा बसोस करन लग्गा ।

उसनै मित्रवसु गी आखेआ—राजा वासुकि बड़ा कायर ऐ जेड़ा आपुं गै अपने हत्थे अपनी पर्जा दा इक व्यक्ति शत्रू कोल भेजी ओड़दा ऐ । ओदे इक हजार बूथे न ते इक हजार गै मुंह न ओदे कोला इन्ना की नई खोआ—“जे पहले मिकी खा” । उसनै गरुड़ गी इन्नी खुल्ली छुट्टी कीआं दई ओड़ी जे ओदी सारी जाति गी खतम करी ओड़ै । सप्पें दिएं स्त्रिएं दे रोज रोजे कर्लाने कन्ने बी ओदा हिरदा नई पिलगर दा । गरुड़ बी कमाल ऐ कश्यप ऋषि दा पुत्तर विष्णु जी दी सवारी इच लग्गीऐ पवित्र होए दा । फी बी नेए पापकर्म करै । पतनै दी हृद हुन्दी ऐ ।’ ए आखिए उस महात्मा नै अपने मनै इच ए गल्ल ध्याई लैती में इस नाशवान शरीर दा बलिदाने करिए दुनियां इच गल्ल ते पूरी करी जां । जे अऊं इक नागा दा जीवन बचाइ लै ते अपने शरीर गी गरुड़ अगो भेएट करी देआं तां बड़े गै भाग न ।

जिसलै ओ इनें बचारें इच पेदा हा मित्रवसु दे पिता दा इक दास उसी सहन आया । जीमूतवाहनै मित्रवसु गी भेजी ओड़ेआ ते आखेआ—तू चल, अऊं बी आया ।’ जिसलै ओ गेआ उठी तां ओ आपुं ताईं तुआईं फिरन लगा । ते जेकिश

सोचेआ हा उसी तोड़ चाढ़ने दा जतन करन लगा । उसी दूरा
 दा इक रोने दी बाज आई । ओ उर्थें गोआ । पर्वता दी इक
 बड़ी बड़ी सिलू उपर इक सुन्दर नौजवान बड़े बसोसै इच वेठा
 दा हा । कुसै राजे दा अहलकार आनिऐ उसी उर्थें छोड़ी गोआ
 हा । ओ नौजवान इक बुड़ी जनानी गी बड़े प्रेम कन्ने समझा
 करदा हा—ते जनानी रोआ करदी ही । ओ जनानी गी परतोने
 आस्तै आखा करदा हा ।

जीमूतवाहन छप्पिऐ सुनन लगो भई कुन ऐ । ओदा हिरदा
 देआ कन्ने पिगलदा करदा हा । बुड़ी जनानी अत्यन्त
 दुःखी ही ओ पलै पलै उस नौजवाना आसै दिखदी ही ते अपना
 दुःख ईआं प्रकट करा करदी ही—ओ वच्चा शंखचूड़ । में तुकी
 किन्ने दुःख पाइऐ प्राप्त कीता हा । तूँऐं साढ़े कुलै दा इक
 मातर दीआएं । हुण तुकी कुर्थें दिखड । जिसलै थुआड़ा
 चन्द्रमा समान मुंह नई लब्बा तां थुआड़ा बब्ब बी दुःखा दे
 समुन्दरा इच डुब्बी जाग । उसने बुड़े वेलै कीआं जीना ?
 थुआड़े शरीर गी सूरजा दी किरणा कन्ने पीड़ हुन्दी ही ओ
 गरुड़ कशा खलोने दी पीड़ कीआं जरग । ए भागें दा फेर
 कनेआ होआ जे सपें दे राजा गी इन्नी बड़ी सपें दी जाति चा

माढ़ी बदकिस्मती करी तू'एँ लब्बा ?”

जिसलै ओ बर्ताप करी वेठी ओ नौजवान नुआढ़ा पुत्तर उसी आखन लगा—में अगें गै दुःखी आं । तूं होर की दुःखी करनी एं ? हुण घर जा । में तुकी खीरला प्रणाम करनां । हुण गरुड़ दे औने दा समां होई गेआ ऐ ।” जिसलै उस बुड़ी नै ए सुनेआ ओ दुःखी दृष्टि कन्ने सारे पासै दिक्खन लगी तो जोरा कन्ने रोन लगी—“माढ़ा कक्ख नई रेआ । कोई माढ़े बच्चे गी बचाओ ।”

बोधिसत्त्व दा अंश जीमूतवाहन ए सब किश सुना ते दिक्खा करदा हा । उसी बड़ी देआ आई । ओ आखन लगा—ए शंख-चूड़ नाग ऐ । इसी वासुकि नै गरुड़ दे भोजना आस्तै भेजेआ ऐ । ए नाढ़ी मा ऐ जेदा ए इक्क मातर पुत्तर ऐ । ए बचारी पुत्तरा दे प्रेम करी इत्थे आई पुज्जी ऐ । ते दुक्खा कन्ने रोआ करदी ऐ । जेकर अऊं अपना नाशवान शरीर इसी वचाने गीतै नई लाई देआं तां माढ़ा ए शरीर धारण करना गै बिरथा ऐ ।

जीमूतवाहन नै ए बचार पक्का कीता ते खुशी खुशी उस बुड़ी जनानी कोल गेआ ते आखन लगा—मां जी अऊं शुआड़ो

पुत्तरा गी बचांड । बुड्डी जनानी डरी ते त्राई उसनै समझेआ
 जे गरुड़ आई गेआ । कर्लान लगी गरुड़ तूं मिकी खाई लै,
 शंखचूढ़ नै आखेआ—मां डर नई । ए गरुड़ नई । इसी
 दिक्खिए ते हिरदे गी बड़ी शान्ति हुन्दी ऐ । गरुड़ ते बड़ा
 डरौना ऐ ।” शंखचूढ़ दी गल्ल सुनिए जीमूतवाहन नै आखेआ—
 “मां, अऊं इक विद्याधर आं । थुआड़े पुत्तरा गी बचान
 आयां । में अपना शरीर गरुड़ गी खलाई ओड़ड । तूं अपने
 पुत्तरा गी लइऐ घर परतोई जा ।

बुड्डी ए सुनिए आखन लगी—ए नई होई सकदा । उच्चे
 भाव इच तुम्हीं माढ़ा पुत्तर एं । नेए आखे समें इच तूं माढ़े
 उपर एड़ी किरपा कीती ऐ ।” जीमूतवाहन नै जवाब दित्ता—हुए
 तुस दोऐ जनै माढ़ी गल्लै इच भानी नई पाओ ।” जिसलै ओ
 जादा जोर लान लगा तां शंखचूढ़ गै आखेआ—हे महात्मा तुसें
 अपनी देआ दा सबूत दित्ता ऐ । पर में अपना शरीर बचाइऐ
 तुन्दा बलिदान नई दई सकदा । कंकरा गी बचाने गीतै हीरा
 कुन गुआ । माढ़े जनेए लोकें कन्ने ते दुनियां भरोची दी ऐ ।
 जेड़े छड़े अपने आस्तै गै जीन्दे न । पर थुआड़े जनेए लोक
 जेड़े दूएं दा भला सोचदे न घट गै हुन्दे न । दूए में शंखपाल

दी जाति उपर कलंक नई लानां । जीआं इक दाग नै चन्द्रमा
गी कलंक लायेदा ऐ ।'

शंखचूड़ नै उसी ठाकने दा जतन कीता ते माऊगी आखेआ
मां, तूं जा, ए खतरनाक थां छोड़ । तुगी ए कतल करने आला
कुप्पड़ नई लब्बदा । सप्पे दा खून लोथड़े बनिए इत्थे किन्नां
लगगा दा ऐ । ए ते काल दा बिछौना गै बनी गेदा ऐ । में
समुन्दरा दे कण्ठे जाइऐ गोकर्ण देवता दी पूजा करनी ऐ ते
गरुड़ दे औने कोला पलैं पुब्जनां बीऐ ।' ए आखिए उसनै माऊ
कोला छुट्टी लैती ते गोकर्ण देवता दी पूजा करन गेआ उठी । सा
रौंदी गै रई ।

जीमूतवाहन नै निश्चा कीता जे इन्ने इच गरुड़ आई गेआ
तां दूए आस्तै अपना बलिदान देने दा प्रण पूरा होई जाग ।
हज्जे ओ सोचा करदा हा जे इन्ने इच पत्तीराज गरुड़ दे औने
करी वृक्ष उन्दे फंड दी बाऊ कन्ने मुतदे लब्बे ओ सां सां ईआं
बभौंदी ही जे गरुड़ा गी पापकरने कोला ठाका करदी होऐ ।
ओ समझी गेआ जे गरुड़ा दे औने दा समां होई गेआ । उसनै
दूए गीतै अपना बलिदान देना पक्का करी लैता । ते उस
कुप्पड़ा उपर चढ़ी गेआ । समुंदर अपनी लहरें कन्ने तुआड़ा

धीरज ते हौसला दिखवन लगा । इन्ने इच श्माना गी छपैलदा
 ते इक्कै डुआरी मारदा गरुड़ आया ते इक्कै झपटा मरिऐ चुंजा
 कन्ने उस दयालु परुषा गी उस कुप्पड़ा परा चुक्की लई गेआ । ते
 मलय पर्वता दी टीसी पर उत्थे बइऐ खाने गीतै गेआ उठी ।
 उसनै उसी सिरा परा द्रेढ़ेआ ते नुआढ़े खूनै दे तोपे भुंवा
 डिगदे गए । गरुड़ उसी खान लगा ते ओ विद्याधरें दा
 राजकुमार सोचां करदा हा—परमात्मा करै मेरा शरीर हर
 जन्मा इच ईआं गै दूएँ दी भलाई आस्तै कम्म आवै । जेकर ए
 मिकी दूएँ दी भलाई दा रोकन तां मिकी सुर्गा दी जां निर्वाण दी
 बी लोड़ नई । जिसलै ओ ए सोचा करदा हा उसलै श्माना दा
 फुल्लें दी बरखा होई ।

ताईं के होआ जे जीमूतवाहन दे मुकटा दा हीरा लहू कन्ने
 लिबबड़े दा ओदी लाड़ी मलयवती अगो डिग्गा । उसने दिखदे
 ने पशानी लैआ । ते कम्बदे १ अपने सस्सु सौहरे गी दस्सेआ ।
 ओ रोआ करदी ही । ओ दोऐ जने ए किश दिखदे गै सारी
 गल्ल समझी गये । राजा जीमूतकेतु ते रानी कनकवती नै अपनी
 दिव्व शक्ति कन्ने समाधी लाइऐ असली गल्ला दा पता लाई
 लेआ । अपनी नूँहां गी कन्ने लइऐ ओ झटपट उस थां गी चले
 जित्थें मरुड़ ते जीमूतवाहन हे ।

तुआईं शंखचूड़ बी गोकर्ण दी पूजा करिऐ परतोआ ते
 उसनै दिक्खिआ जे सिल खूना कन्ने लबड़ोई दी ही । बचारा
 रोत लगा ते आखन लगा—“बड़ा माड़ा होआ । अऊं केडा
 पापीआं । ओ बड़ा महात्मा हा । ओ बड़ा दयालु हा । उसनै
 पक्क गै माढ़ी थार अपनी बलि दई ओड़ी ऐ । में दिक्खनां
 ओ माढ़ा शत्रू उसी कुत्थें लई गेआ ऐ । परमात्मा करै ओ मिकी
 जीदा लब्बी जा । तां अऊं इस वेजती कोला बची जन्तां । ओ
 खूनां दियां त्रिपकी दियां बूदां दिखदा २ उस पासै चली पेआ ।

गरुड़ उसी खारदा हा । उसने दिखेआ जे ओ प्रसन्न ऐ ।
 उसनै खाना बन्द करी ओड़ेआ । सोचन लग—कमाल ऐ । ए
 कोई बड़ा गै शूरवीर लब्बदा ऐ । जे में इसी खा करनां ते ए
 खुश होआ करदा ऐ । एदे प्राण बी नई निकले । ते जिन्तां
 शरीर ठुडने कशा बचे दा ऐ उत्थें रोम रोम खड़ोता दा ऐ ।
 जीआं टल्ला लपेटे दा होऐ । कन्ने मिकी किन्नं प्रेम कन्ने
 दिक्खा करदा ऐ । ए मिकी अपना भला करने आला समझा
 करदा ऐ । ए नाग नई होई सकदा । ए जरूर कोई महात्मा ऐ ।
 अऊं नई इसी खन्दा । अऊं इसी पुच्छनां । जिसलै गरुड़
 इनें सोचें पेदा हा जीमूतवाहन नै उसी पुछेआ—हे पक्खरूँ दे

राजा, तू बस की करी ओड़ी ऐ ? मेरे शरीर इंच हवै मास ते खन ऐ । ते तुन्दा हवै रज बी नई होआ । तुस अपना खाना चालू रखो ।” गरुड़ ए सुनिए बड़ा हरान होआ ते आखन लगा— भई । तू नाग नई । सच दस कुन ए ?” जीमूतवाहन नै आखेआ—“अऊं सच्चें गै नाग आं । तुसें गी ए खाल करने दी के लोड़ ऐ ? तुस अपने सुभा दा कम्म करदे जाओ । कुन मूरख ऐ जेड़ा अपनी ध्याये दा कम्म पूरा नई करदा ?

जिसलै ओ गरुड़ गी ए जवाब देआ करदा हा उसैलै शंख-चूढ़ उथे पुज्जा ते दूरा दा गै जोरेआं कर्लाया । “हे गरुड़, तौल नई कर, जुलम नई कर, तुकी के पाप लगगे दा ऐ ? ए नाग नई । थुआड़े आसै निश्चित कीदा दा नाग अऊं आं ।” शंख-चूढ़ ए आखिए झटपट उथें आया ते दौनें दे वशकार आनिए खड़ेई गोआ । गरुड़ गी शशोपंज विच पे दे दिखिए आखन लगा—तुकी थौह की नई आवा करदा ? दिख मादियां दौं जीभां न, ते फिन्न ऐ । ते तुकी इस विद्याधरा दा सुन्दर मुंह नई पन्छोंदा ?

जिसलै शंखचूढ़ ए ग्ला करदा हा उसले जीमूतवाहन दी लाड़ी ते मा वच्च बी आई पुज्जे । जिसलै उनें उसी टुकके बड़े

दिक्खेआ ओ आखन लगे—ओ दयालु जीमूतवाहन, तूं दूएँ
आस्तै अपनी जिन्द दर्ई ओड़ी ऐ। हे गरुड़, तूं कनेआ वेसमभी
दा कम्म कीता ऐ ?

गरुड़ गी ए सुनिए बड़ा दुःख होआ। ओ आखन लगा—
सच्च गे में बोधिसत्व दा अवतार मारी खादा ऐ ? ए ऊऐ
जीमूतवाहन ऐ जेड़ा अपनी जिन्द दूएँ आस्तै दर्ई ओड़दा ऐ ?
ए ऊऐ ऐ जेदा जस, त्रौणें लोकें इच प्रसिद्ध ऐ ? अच्छा हुण ए ते
मरी गेआ ऐ अऊं बी अगी इच जली मरनां। जहरा दे वूटे
दा फल बी कदें मिट्टा होआ ? गरुड़ ईऐ किश सोची २ दुखी
होआ करदा हा जे जीमूतवाहन अपने टब्बरै गी दिक्खिए जखमें
दी पीड़ा कन्ने मरी गेआ।

ओदे मा बब्ब बड़े दुःखी होए ते बर्त्ताप करन लगे। शंखचूढ़
बी अपनी लापर्वाही उपर अपने आपा गी फटकारन लगा।
जीमूतवाहन दी लाड़ी श्माना आसै दिक्खिए देवी अम्बिका गी
लामा देन लगी—देवी ने पिछें उसी वरदान दित्ता हा—हे देवि !
तूं मिकी वरदान दित्ता हा जे माढ़ा पति सारे विद्याधर राजें दा
सरताज होग। हुण थुआड़ा बर कींआं झूठा होआ ऐ ? जिसलै
ए आखेआ तां देवी साक्षात् प्रकट होई गई। आखन लगी—

बेटा मेरी गल्ल नईं भूठी होई सकदी । उसनै अपने घड़े चा
अमृत छिड़केआ ते जीमूतवाहन सत्या सानां उठी खड़ोता ।
नुआड़े सारे जरूम भलोई गेदे हे ते ओ अगुआं कोला बी शैल ते
नरोआ हा ।

ओ उठेआ । उसनै देवी गी साष्टांग प्रणाम कीता । फी
सारे गे देवी अगें साष्टांग प्रणाम करन लगे । देवी उसी आखन
लगी—अऊं थुआड़े बलिदान उप्पर बड़ी प्रसन्न आं ।
अऊं थुआड़ा अपने हथें अभिषेक करनीं आं । ते विद्याधरें दा
सम्राट बनानी आं । तूं इक कल्प ए राज भोगगा ।

ए आखिए देवी नै अपने घड़े इचा अमृत त्रोंकेआ ते पूजा
करिए लोप होई गई । उस बेलै शमाना इचा फुल्लें दी बरखा
होई । ते देवता लोक खुशी दे बाजे बजान लगे ।

गरुड़ नै बड़ी धीनता कन्ने जीमूतवाहन गी आखेआ—हे
महाराज । अऊं थुआड़े उप्पर बड़ा प्रसन्न आं । तुस ते लासानी
वीर हो । तुन्दे नेआ दरया दिल कुसनै होना ऐ । तुसें नेआ
कम्म कीता ऐ जिस करी त्रौणें लोकें गी चबात लगगा करदा ऐ
सारे संसारै इच कन्धा-कन्धा उपर एदा जस लखोई गेआ ऐ ।
मिकी तुस आज्ञा करो अऊं तुसें गी जे किश मंगो उऐ बर

दिनों।' ए सुनिए ओ महात्मा आखन लगा—तुस प्राश्चित करने, गीतै अगों सप्प खाना छोड़ी देओ। ए सप्प जेड़े तुसें खादे दे न, ते जिन्दी हड्डिएं दे ढेर लगगे दे न इनेंगी फी जिन्दा करो।

गरुड़ ने आखेआ—चंगा ईआं गै सई। अज्जै कोला अऊं हुण सप्प नईं खाड। परमात्मा गै बचा। जेड़े सप्प में पिछें मारे दे ते खादे दे न ओ जीन्दे होई जान।

उसैलै सारे सप्प जेड़े गरुड़ नै खादे दे हे, ते जिन्दी हड्डियें दे ढेर लगगे दे हे जीन्दे होई गए। ओ सारे चंगे भले पहले आङ्क होई गे। सारे देवता, सप्प ते कुटियावासी खुशी खुशी उत्थें किट्टे होए। मलयपर्वत दी महमा बी त्रिलोकी दी महमा आङ्क होई गई। विद्याधरे दे राजे गी जीमूतवाहन दी गल्ल देवी दे बरदान कोला पता लगगी। ओ सारे आये, ओदे चरणें पए। उसनै गरुड़ गी विदा कीता। ओ सारे जीमूतवाहन गी हिमालय पर्वता उपपर लई गए। ओ उन्दा सम्राट हा जेदा अभिषेक देवी नै अपने हस्थें कीता हा। जीमूतवाहन अपने माऊ बबवै कन्ने मित्रवसु ते मलयवती कन्ने, ते शंखचूड़ कन्ने जेड़े आनिए उत्थें गै रौन लगगी पेदे हे सजे कन्ने राज भोगन लगा। ओदे कश अपार गै धन दौलत होई गई जेड़ी विद्याधरें किट्टी कीती दी ही। ते जेड़ी ओदे पुन्न प्रतापा दा फल ही।

ए मजेदार कथ सनाइए बताल नै राजा त्रिविक्रमसेन गी
 दूआ प्रश्न पुछेआ । इने दौने शंखचूढ़ ते जीमूतवाहना विच
 धीरज ते हिम्मत इच बड्डा कुन हा । नई दसगेओ तां ऊए श्राप
 लगना ए जेड़ा में पहलें आखेदा ए । राजा त्रिविक्रम सैन ने ए
 सुनिए मौन भंग कीता जे कुतै श्राप नई लगै ते बड़ी शान्ति
 कन्ने आखेआ ।

जीमूतवाहन आस्तै ते ए कोई चर्ज नई हा की जे उसनै मते
 जन्में इच ए गुण प्राप्त कीता हा । पर तारीफ दे काबल ते
 हिम्मत शंखचूढ़ दी ए । जेड़ा मौत कोला बची गेआ हा ते
 दूआ ओदे थार आपूंगै बलि लग्गा करदा हा ते फी बी इन्ना
 फासला चलिऐ उत्थें पुज्जा ते अपना आप पेश करी दित्ता ।

जिसलै बताल नै ए गल्ल सुनी ओ भट राजे दे मूण्डे परा
 उतरेआ ते अपने थार जाई पुज्जा । राजा पहले आङू फी ओदे
 पिच्छें चलेआ ।

— — —

सतारमीं कथ

ओ बीर राजा त्रिविक्रमसेन मुड़िऐ शिशपा बूटे हेठ पुज्जा,
बताल गी उत्थुआं तुआरेआ, मूएडे पर पाया ते परतोआ ।
बताल मूएडे परा बोलैआ राजा जी तुस बड़ी खेचल करा करदे
ओ । तुन्दा जी होर करने गी इक कथ सनानां ।

गंगा जी दे कण्ठै इक कनक पुर नगरी हो । उत्थुआं दे लोक
मर्जादा नईं हे तोड़दे । उत्थें कलजुगै नै प्रवेश नईं हा कीता ।
उत्थुआं दा राजा यशोधन हा ते सच्चें गो ओदा जस बड़ा हा ।
ओ लोकें गी संसारा दे दुःखे कशा ईआं बचांदा हा जीआं पृथ्वी
गी समुन्दरा कोला बड़ा भारा पर्वत । जिसलै बधाता नै उसी
घड़ेआ तां ईआं बभ्भोन्दा हा जे उसनै सूरज ते चन्द्रमा किठे
करी ओड़े न । उसी दिक्खिऐ लोक बड़े खुश हुन्दे हे पर ओदे
तेज ते प्रतापै दी गरमी कन्ने सेक बी बड़ा लगदा हा । चन्द्रमा
दी कला ते घटदी बददी रौन्दी ऐ पर नुआड़ी राजसीमा कदें
नईं घटदी ही राजा शास्त्रें इच ते बड़ा बिदवान हा पर पड़ोसी

दी निन्दया कदें नईं करदा हा ओदे राज्जै इच गरीबी दी कमी
 ही पर खजाना ते फौज भरपूर ही । ओदी पर्जा नुआड़े गुण
 गान्दे एल्ले आखदी ही जे राजा होर कुसै कोला नईं डरदा छड़ा
 इक पापकर्मा कोला डरदा ऐ । ओ लालची पर छड़े जस्सै दा,
 ओ नफरत दे करदा हा पर दूएँ दिणं जनानिणं कोला । ओ
 वीरता, दानवीरता ते प्रेम दी मृति हा ।

उस दी राजधानी इच इक सेठ हा । सेठै दी इक धी ही
 उन्मादिनी । ओ हज्जे कुआरी ही । ओदी सुन्दरता नेईं ही जे
 उसी दिखदे गै सुरत भुल्ली जन्दी ही । ओ ते कामदेव गी बी
 पागल करने आली ही । उसनै जुआनी इच पैर रखेआ ।
 ओदा बब्ब बड़ी नीतिवान हा । ओ राजे कोल गेआ ते आखन
 लगा मेरी इक कन्या ऐ । ओ त्रिलोकी दा रतन ऐ । में नुआड़ा
 ब्याह करना ऐँ । में तुसँ गी सनान आयां की जे में ईआं
 गै कुसै गी ओ रतन दई ओड़ने दी हिमत नईं करी सकदा
 राजा गै संसार दे सारे हीरे ज्वारातें दा स्वामी हुन्दा ऐ इस करी
 तुस मालकओ भायें स्वीकार करो भायें रह करो ।

सेठकशा ए गल्ल सुनिऐ राजा नें बड़ी नम्रता कनें अपने
 ब्राह्मण भेजे जे दिक्खी आओ उस सुन्दरी गी शुभ चिन्ह ते

लकखन हैन जा नई । ब्राह्मण गए ते उन्हे त्रिलोकी दी लासनी
 सुन्दरी गी दिक्खेआ । ओ ते बड़े घबराए ते कने चकित होए ।
 उने आपने आप उपपर संजम कीता ते सोचन लगे—‘जे राजा
 गी ए सुन्दरी थोई तां राज ते गेआ । इसी दिक्खिए नुआढ़ा मन
 राज्जै इच लगना गै नई’ । अस राजे गी दसदे गै नई’ जे एदे
 शुभ लकखन हैन । उन्दे ए गल्ल पक्की मिथी ते राजा गी जाइए
 भूठ गलाया—जे नुआढ़े शुभ लकखण हैंनई’ । राजा नै सेठ दी
 ध्यू कन्ने व्याह करने कशा नां करी ओड़ी ।

राजा नै आज्ञा कीती—सेठ जी तुस अपनी कुड़ी उन्मादिनी
 दा व्याह सेनापति बलधर हुन्दे कन्ने करी ओड़ी । ओ सुन्दरी
 अपने पति कने रौन लगी पर उसी ए गल्ल खाई जे राजा नै
 नुआढ़ा अपमान कीता ऐ ए आक्खिए जे आदे लकखन शुभ
 नई’ । समां बीतेआ । बसन्त रितु आई । शरद रितु दा हाथी
 जिसनै अपने चमेली दे चिट्टे दन्दे कने कमले दे क्यारें गी
 जुआड़ी ओड़ेआ हा बसन्त दे शेर कोला मरोआ । बसन्त रितु
 दा शेर बनै इच खेडां करन लगा । घनेरे खिड़े दे फुल्ल नुआढ़े
 क्यादी दे केसहे ते अम्बें दियां मिज्जरां नुआढ़े पञ्जे जन हे ।
 उस रितु इच इक दिन राजा यशोधन हाथी उपपर चढ़ेआ ते

अपनी नगरी इच वसन्त उत्सव दिक्खन निकलैआ । इस सूचना
दा नगरा वज्जेआ जे सारिआं जनानियां ओलै होई जान ।
राजे दी सुन्दरता किश नर्थ नई करी ओड़ै ।

उन्मादिनी नै ए नगरा सुनेआ । राजा नै नुआढ़े कने
ब्याह करने दा इनकार करिऐ अपमान कीता दा हा ओदा बदला
लैने गीतै ओ अपने महलै दे छत्ता उपरा नुआढ़े सामनै होई ।
राजा नै उसी दिक्खेआ । ओ काम अग्नि दी जुआला जन गै
लब्बी जिसी मलय पर्वत दी बा भड़का करदी ही । राजे दा मन
बड़ा ब्यथित होआ । उसी दिक्खिऐ नुआढ़े कालजे इच कामवान
लगा । नुआढ़ा हिरदा चरोई गेआ ते ओ वेसुरत होई गेआ ।
ओदे खिदमतगारें उसी होशा इच आन्दा । ओ अपने महला इच
पुब्जा ते उसनै उनेंगी पुच्छेआ ! उनें दस्सेआ जे ओ ऊऐ सुन्दरी
ऐ जेड़ी सेठ तुसेंगी ब्याही देन लगा हा । ते तुसें नां करी ओड़ी
ही । जिनें आनिऐ ए आखेआ हा जे नुआढ़े लक्खन ते चिन्ह
शुभ नई राजा नै उनें गी देस-नकाला दई ओड़ेया । ते आपू
दिनरात नुआढ़े ध्याना इच गल्लान रौन लगा । ओ आखै । ए
चन्द्रमा वी कनेआ ठीठ ऐ जे उस सुन्दरी दे हुन्दे नुआढ़े सामनै
चढ़दा ऐ । इसी ते दाग ऐ ते उस सुन्दरी दे मुंहा उपपर ते इक

बी दाग नईं । ओ ते दुनियां दिएं अक्खिएं दी लोए ।

ए सोचदा राजा नुआड़े प्रेमै दी अग्गी इच जलन लगा ते रोज बरोज लिस्सा होन लगा । शर्मा दा मारा बिचली गल्ल छपाई रक्खै । मसां जाइए उसनै अपने अन्तरंग मित्तरें गी ए गल्ल दस्सी । ओ आखन लगे—ओ थुआड़े हुकमा इच ऐ । तुस उसी अपने आस्तै लई लौ । पर राजा धर्मात्मा हा उसनै उन्दी गल्ल नईं मन्नी ।

सेनापति बलधर गी ए सारी गल्ल पता लगगी । ओ रजे दा बड़ा भगत हा । ओ आनिए राजे दे चरणें इच डिग्गा । ते आखन लगा महाराज । तुस उसी अपनी दासी बनाई लौ । तुस उसी दूए दी इस्त्री नईं समझो । अऊं तुसें गी ओ दिन्तां । तुस उसी अंगीकार करो । नईं ते में उसी मन्दिर छोड़ी जन्नां । फो तुसें गी लैने इच कोई पाप नईं होग की जे उसलै ओ दासी मात्तर गै होग ।'

जिसलै सेनापति बड़ा जोर लान लगा राजे गी किश रोह आया ते पुच्छन लगा—में राजा होईए ईऐ नेआ कुकर्म कीआं करां ? जे में धर्मा दा रस्ता छोड़ी ओड़ां तां अपने अपने धर्मा पर कुन चलग ? ते तू माढ़ा भगत होइए ए पाप करने गी की

आखना एं ? एदे कने बिन्दक मारी खुशी होग पर दूए जन्मा
 इच बड़ा दुःख बनग । ते जेकर तूं अपनी धर्मपत्नी गी
 छोड़गा तां ए जुर्म होग ते अऊं तुकी दण्ड देंड । कीजे धर्मा दा
 निरादर ते कदे वी बर्दाश्त नई होई सकदा । इस करी मेरे
 आस्तै ते इक्कै रस्ता ऐ । ओ मृत्यु दा । ए आखिए राजे नै
 सेनापति दी गल्ल मोड़ी ओड़ी । धर्मात्मा लोक अपनी जिन्द
 दई ओड़दे न पर धर्मा दा रास्ता नई छोड़दे । राजा नै ईआं गै
 सारे शहरदारें दी गल्ल वी नई मन्नी । सारे गै लोक ए अर्ज
 लइऐ नुआदे कछ आये ।

राजे दा शरीर ते प्रेम-अग्नि दे तापा इच घुली घुली मुक्की
 गेआ । ते छड़ा नां ते प्रसिद्धि गै बाकी रई । पर सेनापति गी
 ईआं राजे दा मरनां बर्दाश्त नई होआ । ओ वी चिखा पर
 चढ़िए मरी गेआ ।

राज भक्ते दे कम्म बी न्यारे गे हुन्दे न । उन्दी कोई थाह
 नई पाई सकदा ।

जिसलै मूएहे पर बेठे दा वताल राजा त्रिविक्रम सेन गी ए
 अजीव कथ सुनई वेठा ओ राजे गी पुच्छन लगा—कर्तव्य
 पालने इच इनें दोनें चा कुण बड्डा ऐ ? चेता रखेओ, जे नई

दस्सेआ तां ऊऐ शर्त जे । राजा नै ए सुनेआ मौन ओड़ेआ ते जबाब दित्ता — “इनें दौनें इचा धर्म पालने इच राजा बड्डा ऐ” । बताल नै ए सुनेआ तां किश मुंह बट्टिऐ आखेआ—राजा ए तुसें कींआं आखी ओड़ेआ जे सेनापति धर्मपालने इच राजे कोला बड्डा नई ? उसी अपनी लाड़ी दी सुन्दरता दा पता हा ते सारे लोक बी जानदे हे फो बी उसनै नई श्लैपे आली सुन्दरी राजे गी भेष्ट कीती । राजे दी भक्ति दे कारण । ते जिसलै राजा मरी गोआ तां आंपू गै चिखा पर चढ़िऐ प्राण दर्ई ओड़े ? राजानै ईआं गै इनकार करी ओड़ेआ । उसी नुआढ़ी इस्त्री दे बारे इच किश पता गै नई हा ।”

जिसलै बताल नै ए गलाया तां राजा हस्सेआ ते आखन लगा—मन्नी लैता जे सेनापति खानदानी हा ते उस नै अपने स्वामी गीतै ए किश कीता पर एदे इच चबात के ऐ ? ए ते नौकरें दा धर्म ऐ जे ओ अपने स्वामी गीतै जान बी दर्ई ओड़न । पर राजा लोक बड़े खाहमखाह हुन्दे न । ते हाथिएं आडू वेकावू हुन्दे न । ते जिसलै किश करने पर आई जान तां कुसै बी धर्म कर्मा दी पर्वाह नई करदे । ओ बड़े हंकारी हुन्दे न ते जिसलै अभिषेक दा जल उन्दे सिरा पर पौन्दा ऐ तां ओ हाड़ा आडू सारी सोच समझ रुढ़ाइऐ लई जन्दा ऐ । ते जिसलै उनें

गी चौरियां मुलदियां न तां ओ सारे शास्त्रें थमां दिक्खे दे बुद्धि दे कण डुआरी ओड़दियां न जीआं ओ मक्खिआं ते मच्छर डुआरदियां न । ते जेड़ा राज छत्तर हुन्दा ऐ ओ सचाई दियां किरणां नईं पौन दिन्दा न गै सूरज दियां किरणां पौन दिन्दा ए । उन्दिआं अक्खिआं ऐश्वर्य कन्ने चुन्ध्याई जन्दिआं न ते उनें गी सच्चा रस्ता नईं लब्बदा । नहुष जनेए राजा जिनें सारा संसार जित्ती लैता हा कामदेव नै उन्दा मन बी थिर नईं रौन दित्ता । उनेंगी बी बिपता मेलनी पेई । पर ए राजा जेदा एडा बड़ा राज हा—उन्मादिनी कच्छा हारेआ नईं । उन्मादिनी बी लक्ष्मी आङ्गू चैवचल ही । राजा नै पापा दे रस्ते उपर पैर रखने कोला अपने प्राण देई ओड़ना चंगा समझेआ । ते प्राण दई बी ओड़े । इस करी में समझनां जे राजे दा संजम सेनापति कोला जादा ।”

बताल नै राजा दी गल्ल सुनी ते भट अपने जादू दे असरा कन्ने मूण्डा छोड़ेआ ते अपने थार पुज्जी गेआ । राजा बी तौले गै ओदे पिछे चलेआ । महापुरुष इक कम्म शुरू करिऐ उसी बिना पूरा कीते दे नईं छोड़े । भायें ओ कम्म किन्ना गै कठिन की नईं होऐ ।

ठारमीं कथ

राजा त्रिविक्रमसेन मसान घाट पुज्जा । चिखा बला करदियां
हिआं । लपटां निकला करदियां हिआं । जीआं घोरी राक्षस
जीभां बाहर लमकाइए फिरा करदे होन । राजा शिशपा
बूटे हेठ गेआ ।

ओ ए दिक्खेए बड़ा हरान होआ जे इक्कै नेइआं लोथां
बूटे कने लमका करदियां न । सारिएं इच गै बतालें दा प्रवेश
हा । राजा सोचन लगा ए के गल्ल बनी ? ए बताल चलाकी
करिए माढ़ा समां नष्ट करना चाहदा ऐ । मिकी पता गै
नई लगदा जे इन्दें विचा केढ़ी लोथ लैं । जे रात कम्म तोड़
चाढ़े बिना गै बीती गई तां में अरगी इच जली मरड । में
ए बेजती नई बर्दाशत करनीं ।”

बताल गी राजे दी मरजी दा पता लगगा ओ उस राजे पर
बड़ा खुश हा । उस अपनी सारी माया खिचची लैती । राजे
नै दिक्खेआ बूटे पर इक्कै लोथ लमका करदी ऐ । उसनै

बताल गी तुआरेआ मूएडे पर बाया ते इक बरी फी चली पैआ ।
 चलदे चलदे गी बेताल ने ओखेआ राजा अऊं तुन्दी हिम्मता पर
 बड़ा खुश आं । लौ इक कथ सुनो इक नगरी ऐ उज्जैनी । ओ
 भोगवती ते अमरावती कोला उतरिऐ दूए दर्जे पर ऐ । ओ
 नगरी शिवें आपूं अपने-रौने गीतै ताली । जिस लै गौरी नै बड़ा
 उगार तप कीता ते शिव प्रसन्न होए तां उन्हें गी उज्जैनी
 नेईं सर्वोत्तम थां गै चंगी लग्गी । इत्थे सब किस्में दे नन्द
 मंगल हे । ते बड़े पुन्न करने आलें गी गै प्राप्त हुन्दे हे ।
 उत्थें कठोरता ते सख्ती इस्त्रिएं दे स्तनैं इच गै लब्बदी ही
 त्रेढापन बी उन्दी भरमें इच गै लब्बदा हा । चौचलता
 छड़ी उन्दी अक्खिएं इच गै थोन्दी ही । न्हेरा छड़ा रातीं
 गै हुन्दा हा । त्रिक्खो त्रेडी गल्लां कविएं दी गुज्जी वक्रोक्ति
 इच गै थोई सकदी ही । पागलपना हाथिएं इच ते ठण्ड
 ते सीत खतरें इच, चन्ननै इच ते चन्द्रमा बिच गै लब्दे हे ।

उस नगरी इच इक विद्वान ब्राह्मण रौन्दा हा । ओदा
 नां देवस्वामी हा । उसनै बड़े जग कीते ते बड़ा धन ओदे
 कोल हा । राजा चन्द्रभ नुआदी बड़ी कदर करदा हा ।
 उस ब्राह्मणै दे घर इक पुत्तर होआ जेदा नां चन्द्र स्वामी

हा । इक वरी के होआ जे चन्द्र स्वामी जूआ खेडने आस्ते
 आस्ते जुआरिएं दी गुफा इच गेआ । बिपता ते मसीबतां
 जूए दे पासे ते नरदें दे रुपा इच हरणें आङ्गू अक्खियां
 मलकांदियां उस गुफा इच औंदियां गै रौन्दियां हिंआं ।
 ते कदें कुसै गी ते कदें कुसै शिकंजै चाढ़दियां हिंआं ।
 जुआरिएं दे रौलें ते लड़ाई जगड़ें कन्नें गुफा गूजदी रौन्दी
 ही । ईऐ आखदी बभौंदी ही—इत्थें आनिए कोदा धन
 नई गेआ ? भामें अलकापुरी दा राजा कुबेर बी नई आई
 जा इत्थें आनिए ओ बी गरोब होई जाग । नुआढ़ा बी फक्का
 नई रोग ।” चन्द्रस्वामी नै जाइऐ जुआरिएं कन्नें जूआ
 खेडना शुरू करी दित्ता । ओ सब किश हारी गेआ । टल्ले
 नई बचे । फी उसनै दुहार चुक्केआ । ओ बी हारेआ ।
 जुआरिए ओदा कशा धन मंगन लगे । ओ कुत्थुआं देऐ ।
 गुफा दे चौधरी नै डण्डा लइऐ धडना शुरू कीता ते मारी
 मारी बथेह करी सुट्टेआ । जिसलै सारा पिण्डा चथोआ
 ओ बेहोश होई गेआ । बट्टे आङ बेहरकत होई गेआ ।
 मरी जन गेआ ते ऊंआं गै पेदा रेआ ।

दो त्रै दिन उससै दशा इच पेदा रेआ । गुफा दे चौधरी

गी बड़ा रो चढ़ेआ । उसनै उत्थें औनैं आले जुआरिएं गी
आखेआ—“इस नै मरिऐ आकड़ी जाने दा पब्ज कीता दा
ऐ । इस करी इस बदमाशा गी लइ जाओ ते कुसै सुक्के
खूऐ इच सुट्टी ओड़ो । अऊं तुस्सें गी मजूरी दर्ई ओड़ु ।

चौधरी दी गल्ल सुनिए उन्हें जुआरिएं चद्र स्वामी गी
चुक्केआ ते दूर जंगला इच लई गे । ओ खूह तुप्पन लगे ।
उन्दे चा इक बुड्डा जुआरिआ बोलेआ—“ए मरी ते गेदा ऐ ।
इसी खूऐ इच सुट्टेने दा के फायदा ऐ ? इत्थे गै त्रट्टो । उत्थें
जाइऐ आखी ओड़गे खूऐ इच सुट्टी आए आं । सारें गी
ए गल्ल मनै लग्गी । सारे मन्नी गे ते उनें ऊंआं गै कीता ।
उनें चन्द्र स्वामी गी उत्थें गै छोड़ेआ ते घरो घरी गए उठी ।
पिछुआं चन्द्र स्वामी उठेआ ते कोल गे शिव जी दे मंदिरै
इच जाई बड़ेआ । मसां सुरत फिरी ते दुखी होइऐ सोचन
लगा—में मता गै बसाह कीता । जुआरिएं मिकी लुट्टी लैता ।
माढ़े टल्ले बी खुस्सी लैते । मिकी डण्डे कन्नं घड़ी सुट्टेआ
ते मेरी मिट्टी पलीत करी ओड़ी ऐ । जे मिकी मा-बब्ब साक
समंधी ते मित्तर ईआं दिक्खन तां के आखन ? हुन ते अऊं
इत्थें गै दड़ी रौना । रात पौग तां बाहर निकल्लिए रुट्टी दा

सरिस्ता करड ते सलगी दी चकोड । ओ भुक्खा भाना ते
नंगमनंगा इनें सोचे इच पेदा हा जे सूरजै दा ताप घटी गोआ ।
सूरजा नै गासा दी शमानी चादरै गी तुआरेआ ते अस्ताचल
आसै धरोन लगा ।

इन्नें इच इक पाशुपत महात्मा आई गो । उन्नें सारे
शरीरा उपर बभूत मलो दी ही । जटां खिल्लरी दिआं
हिआं । हत्था इच तरसूल हा दूए शिव जी गै बओं दे हे ।
उनें चन्द्र स्वामी गी दिक्खेआ ते पुच्छेआ—भई तूं कुन एं ?
उसनै सारी गल्ल सनाई ते चरणें इच नमस्कार कीता ।
महात्मा नै उसी आखेआ—तूं चानचक्क साढ़ी कुटिया इच
अतिथि आई गोआ एं । भुक्का कन्नें बथेआ होआ दा एं,
इस करी उठ्ठ, न्हा, ते जे किश में मंगी आन्दा एं उस भिक्खा
चा तूं बी खा । सुनिऐ चन्द्र स्वामी आखन लगा—महात्मा
जी, अऊं ब्राह्मण आं । तुन्दी भिक्ख कीआं खां ?” महात्मा
जी वड़े अतिथि दो सत्कार करने आले हे ते उन्दे कोल दिब्ब
शक्तिआं बी हिआं । ओ अपनी कुटिया इच गए ।

उनें अपनी विद्या गी चेते कीता । ओदे कन्ने सारे मनोरथ
सिद्ध होई जन्दे हे । चेता करदे गै विद्या सामने प्रगट होई गई

ते आखन लगी—दस्सो, थुआड़े आस्तै के करां ? उसनै आज्ञा कीती—इस अतिथि दा सत्कार करो । विद्या नें 'हां' कीती ते चन्द्रस्वामी नै दिक्खेआ जे उत्थें इक नगरी बनी गई । कन्ने गै इक बाग ऐ ते उत्थें मतियां दासियां न । ओ दासियां उस नगरीचा निकलिआं, उस हरान वरान चन्द्रस्वामी कोल आइआं ते उसी आखन लगियां—महाराज, उठो, चलो. किश खाओ पीओ ते हुट्टन तुआरो । ओ उसी अन्दर लई गइआं । शनान कराया, अतर तेल लाया, बधिया टल्ले लुआए, ते इक्क होर बड़े शानदार महला इच लई गइआं । उत्थें चन्द्रस्वामी नै इक सुन्दरी दिक्खी जेड़ी उन्दी बड्डी सर्दार लगदी ही । ओदा अंग २ सुन्दर हा ईंआं बभोन्दा जे बधाता नै ए दिक्खने आस्ते जे ओ केडी सुन्दर बस्तु बनाई सकदा ऐ उसी बनाया होऐ । ओ झटपट नुआढ़ा स्वागत करने आस्तै उठ्ठी । ते उसनै अपने कच्छ सिंहासनै उप्पर बहाली लेआ । उसने नुआढ़े कन्ने बेहिए दिक्ख भोजन कीता ते पबे फल्ले दे सतै आला पान खादा । उसी बड़ा नन्द आया ।

दूए दिन बड्डै लै जागेआ ते ऊऐ शिवजी मन्दिर, नां उत्थे नगरी ते नां गै सुरगै दी सुन्दरी । ते नां गै उत्थे दासिआं । ओ

महात्मा हसदे २ कुटिया चा बाहर निकलै ते पुच्छन लगे—सुना भई । रातीं कनेआ नन्द रेआ ? चन्द्रस्वामी चलाक हा हिस्सलै दा मुंह बनाइए आखन लगा—महात्मा जी, रात ते बड़े नन्दै दी गजारी ऐ । पर हुण उस दिव्व सुन्दरी बिना नई बची सकदा ।’ महात्मा होर सुनिऐ हस्से ते दयालु होने करी आखन लगे— ठहरी जा, अज्ज रातीं बी ऊऐ नन्द लै जेड़ा कल्ल लैआ हा ।’ चन्द्रस्वामी भट्ट मन्नी गोआ । उस रातीं बी उसनै ऊआं गै मौजां मारियां ते हर रात गै मौजां लैन लगा ।

आखिर उसी पता लग्गा जे ए सब किश जादू विद्या कन्नै ऐ । इक दिन भागें गै उसी प्रेरेआ ते ओ महात्मा जी गी आखन लगा—महाराज तुस जेकर मेरे ऊपर इन्नी देआ करदे ओ अऊं तुन्दी गे शरण आएदां । मिकी ओ विद्या गै सखाई ओड़ो जेदी शक्ति इन्नी बड़ी ऐ । जिसलै ओ ए अर्दास करिऐ पिच्छें गै पई गोआ, महात्मा उसी आखन लगे तूं ए विद्या नई प्रापत करी सकदा । इसी प्रापत करने आस्तै पानी दे विच हेठ जाना पौंदा ऐ । उत्थें जिसलै साधक मन्त्र जपा करदा हुन्दा ऐ ते विद्या उसी रस्ते दा भटकाने गीतै बड़ी माया छोड़दी ऐ जे साधक कामयाबी नई हासल करी लै । उसी अपना आप जन्म लैन्दा लब्दा ऐ । ओ बच्चा बनदा ऐ, किशोर हुन्दा ऐ, तरुण बनदा ऐ

फी नौजवान होई जन्दा ऐ । नुआढ़ा ब्याह होई जन्दा ऐ ते जागत बी जमी पौन्दा ऐ । ते उसी ए भर्म पक्का होन लगी पौन्दा ऐ ऐ जे ए माढ़ा मित्तर ऐ ते ओ मेरा शत्रू ऐ । उसी अपना एका जन्म विसरी जन्दा ऐ । नां गै ए गल्ल चेतै रौन्दी ऐ जे ओ मन्त्र सिद्धि करा करदा ऐ । जिसलै ओ चौबिएं बरें दा हुन्दा ऐ ते गुरु दी बिद्या दे प्रताप कर्नें उसी चेता आऊंदा ऐ ते मन पक्का होऐ तां सारा असली जीवन चेतै ओई जन्दा ऐ । ते ए बी बम्होई जन्दा ऐ जे ए सब किश माया गै करा ऐ । भायें ओ माया दे प्रभाव हेठ ऐ ओ अग्नि इच प्रवेश करदा ऐ, बिद्या प्रापत करी लैन्दा ऐ, फी पानी दे वाहर निकलिये उसी सारी सचाई दा पता लगदा ऐ । जेकर साधक गी ए बिद्या प्रापत नईं होऐ तां ओदे गुरु कोल बी ए बिद्या नईं रौन्दी । की जे अन अधिकारी गी बिद्या देने दा ईऐ नतीजा हुन्दा ऐ । मेरे कछ बिद्या ऐ ते तूं ओदा सब किश फल माढ़े कछा प्रापत करी सकना एं । तूं इन्नी जिद की करनां एं ? दिक्खेआं कुतै माढ़ी बिद्या बी नष्ट नईं करायां ते अपना नन्द बी नईं गुआई बवआं ।

महात्मा जी नै ए समझाया बी पर ओ जिद्दू पर अड़या गै रेआ । “अऊं सब किश करी लैड । तुस चिन्ता नईं करो ।

महात्मा होर उसी विद्या देने गी मन्नी गए । सच ए महात्मा
 लोक अपने शरण आयें दी केड़ी गल्ल नईं पूरी करदे । ओ
 पशुपत महात्मा नदी कण्ठै गए ते उसी आखन लगे—जिसलै
 ए सिद्धि करदे तुकी माया घेरग अऊं तुकी अपने विद्याबलै कने
 चेत्ता कराड । उस माया दी खेडा इच जेड़ी अगग लब्बग
 तूं ओदे इच प्रवेश करी जायां । अऊं थुआड़ी सहायता
 आस्तै इत्थें नदी कण्ठै गै रौड । ओ महात्मा बड़े पवित्र हिरदे
 हे उनें ओ मन्त्र उसी दस्सी ओड़ेआ । चन्द्रस्वामी बी कूली
 करिए ते पवित्र होइए तैयार होइ गोदा हा । उसनै गुरु गी
 निमिए नमस्कार कीता ते दलेरी कन्ने पानी इच बड़ी गोआ ।
 गुरु होर कण्ठै रहे । जिसलै ओ पानी इच मन्तर जपा करदा
 माया नै अपना असर दस्सना शुरू करी दिता । उसी अपना
 सारा जन्म भुल्ली गोआ । उसी बभोआ ओ इक शहरा इच
 जम्मेआ ऐ । इक ब्राह्मणै दे घर । ते हौली २ बड्डा होन लगा ।
 ओदी सम्हाला गै उसी जनेऊ पाया ते शास्त्र पढ़ाये । फी नुआड़ा
 ब्याह होआ ते ओ ब्याहदिण रंग रलिण इच पई गोआ । कने
 इस जीवन दे दुःखें दो तजर्वा बी करन लगा । समा पाइए
 नुआड़े घर जागत बी होआ । ओ उस नगरी इच कम्में इच

रुज्जा रेआ अपने पुतरा दे मोह इच ते लाड़ी दे प्यार ते माऊ
बब्ब ते मित्तरे दे प्यारा इच फसेआ रेआ ।

जिसलै ओ अपना असली जीवन बसारिऐ ते कल्पना दा
जीवन गजारा करदा हा ओदे गुरु नै ठीक समां दिक्खिऐ
अपनी विद्या कन्ने उसी चेत्ता कराया । ओ इकदम गै सुखने दे
संसार इच्छा जागेआ । उसी भट गै अपना ते महात्मा हुन्दा
चेत्ता आया । ओ समझी गेआ जे ए सब किश माया दा गै
प्रपंच हा । ओ अग्नि इच प्रवेश करने गी तयार होआ । ए
करने उपर गै उसी विद्या दा फल प्राप्त होना हा । पर इन्ने इच
ओदे बड्डे बडेरे, साक-समन्धी, मित्तार आदि उसी घेरिऐ
खड़ोई गए ते ठाकन लगे । भायें ओ उसी ठाकदे रए ते दलीलां
दिन्दे रए ओ उन्दे कन्ने गै नदी कण्डे पुज्जा जित्थे चिखा तयार
ही । उसनै दिक्खेआ नुआड़े बुड्डे मा बब्ब ते लाड़ी बी मरने
गी तयार न । नुआड़े धी पुत्तर रोआ करदे न । ओ किश
थत्थो पत्थें इच पइ गेआ । 'जेकर में अग्नि प्रवेश कीता ते ए
सारे साक समन्धी मरी जाडन ए बी हव्हे पक्का नई' जे गुरु
हुन्दी गल्ल सच ऐ जां भूठा थौह नई' आवा करदा अग्नि प्रवेश
करां जां नई' करां । फी सोचन लगा गुरु जी गल्ल कीआं भूठी

होई सकदी ऐ ? उन्दी इक इक गल्ल सच्च होई ऐ । अऊं
खुशी कने अभिन प्रवेश करनां ।' उसनै ए विचार कीता ते अग्नि
प्रवेश करी ओड़ेआ ।

ओ बड़ा हरान होआ जे अगग उसी ईआं बभोई जीआं
बर्फ ठण्डी हुन्दी ऐ । ओ पानी बिच्चा निकलेआ । माया
खत्म होई गोदी ही । ओ कण्ठे आया । गुरु होर खड़ोते
दे हे । ओ उन्दे चरणें इच पेआ । जिसलै गुरु होरे पुन्छेआ
उसनै सारी आपबीती सनाई । आखिर इच दस्सेआ जे अगग
बिल्कुल ठण्डी लग्गी । गुरु होर आखन लगे—मन्तरा इच
जरूर कुतै गलती रई गोदी ऐ । नई ते अगग किआं थुआड़े गीतै
ठण्डी हो गई । मन्त्र सिद्धि इच ईऐ नेई गल्ल पड़लै बारी
सुनी ऐ ।

चन्द्र स्वामो आखन लगा—गुरु जी मिकी पक्का जकीन
ऐ जे में कोई खूब नई कीती ।

इस गल्ला दा पक्का निश्चा करने आस्तै गुरु जी नै विद्या
दा ध्यान कीता । ओ नां गुरु होरे गी फुरो ते नां गै चले
गी । ओ दोऐ जने विद्या गुआई वेठे । ते निम्मोभान होइऐ
गे उठी ।

जिसलै बताल ए सारी कथ सनाई बेठा ओ राजा त्रिविक्रम सेन गी पुच्छन लगगा राजा माढ़े मनां दा शक दूर। उनें दौनें दी विद्या की नास होई। चेले नै विधिपूर्वक गै सारा किश कीता हा।' बताल दी गल्ला दा राजा नै ए जबाब दित्ता—मिकी पता ऐ तूं माढ़ा समां नष्ट करा करनां एं फी बी थुआड़ा जबाब दिन्ना। व्यक्ति गी सफलता नई मिलदी भायें ओ इक मुशकल कम्मा गी ठीक विधि कर्नें बी करदा जा जिन्नां चिर ओदा मन पक्का नई। ते कन्ने ओ अपने धीरज इच विन्द बी खुब नई औन दे ऐ। करां नई करां आली भिजक नई लोड़चदी। इस मन्त्र सिद्धि इच ब्राह्मण दा चित्त पक्का ते इक्क थार नई रेआ। ओ डावां डोल होई गेआ। गुरु नै उसी चेत्ता बी कराया तां बी ओदा चित्त किश डोलेआ गै रेआ। इसै करी उसी मन्त्र सिद्धि नई होई। ते गुरु हुन्दी सिद्धि बी नष्ट होई की जे उन्नें इक अन-अधिकारी गी मन्त्र दस्सी ओड़ेआ।

जिसलै राजा ने ऐ जबाब दित्ता बताल उन्दे मूएठे परा लोप होआ ते फी अपने थार गेआ उठी। राजा पहले आङ मुड़िऐ उसी लैन चलेआ।

उन्नमी कथ

राजा त्रिविक्रमसेन फी गोआ । बताल गी तुआरेआ, मूएहै
पर चुकेआ ते चली पेया । जिसलै परतोइऐ आवा करदा हा
बताल आखन लगा । राजा जी ! आओ तुसेंगी इक मजेदार
कथ सुनां ।

वकलोक नां दी इक नगरी ऐ । ओ दूई देवपुरी गै समझो ।
उत्थुआं दा राजा सूर्यप्रभ राजा इन्द्र समान गै हा । ओ भगवान
विष्णु आडू पृथ्वी दी पालमा करदा हा । अपने बाहुबल कर्ने
पृथ्वी दी रक्षा करदा रेआ ते सारें दे चित्त प्रसन्न रक्खे । ओ
सारे लोकें दा दुःख दर्दा दा भार चुक्की लैदा हा । ओदे राजै
इच अकखीं इच अथरुं धूं गै लग्गै तां ओंदे हे । प्रेमिएं दे
इक दूए दे बजोगा इच मरने आली गल्ला दे बिना उत्थें कुसै
गी मृत्यु नईं ही ओंदी । ओदे राजै इच कुसैगी दण्ड नईं
हा । राजे दे दर्बारा इच चोबदारें कोल गै हुन्दा हा । सब
प्रकार दे धन ओदे कछ हे । इक्कै गरीबी ही जे ओदै घर
इन्नियां रानियां हुन्दे होई बी कोई पुत्र नईं हा ।

जिसल ए कहानी शुरू हुन्दी ऐ ताम्रलिप्ती नगरी इच इक बड़ा भारी सेठ हा धनपाल । ओ बड़ा गै धनवान हा । ओदे घर इक्कै कुड़ी ही धनवती । ओ इन्नी सुन्दर ही जे लोक आखदे हे ओ कोई श्राप लगिऐ भ्रष्ट होई दी विद्याधरी ऐ । जिसलै ओ जुआन होई ओ सेठ मरी गोत्रा ।

ओदे शरीकें ओदी सारी जैदाद साम्भी लेई । राजा नै रक्षा दा कोई विचबचा नई कीता ।

सेठै दी लाड़ी हिरण्यवती नै अपने कोल जेड़े हीरे ज्वाहरात हे सम्हाले ते रात पौन्दे गै अपनी कुड़ी धनवती गी लईऐ शरीकें कोला नस्सिऐ कुतै निकली गई । बड़ी मुश्कला कनें ओ शहरा बाहर निकली । उसनै धियु दा हत्थ साम्बे दा हा । इक राती दा न्हेरा... दूए पासै हिरदे इच अन्धकार पेई गोदा हा । नेई गल्ल होई जे गुप्प न्हेरे इच जन्दे ओदी इक चोरै कनें टक्कर लग्गी जिसी राजा दे कर्मचारी फाह लाई गोदे हे । चोर अजें जीदा हा मूण्डै पर लग्गी तां उसी मती पीड़ होई । ओ कुरेआ—माढे जरूमै उपपर लून कुसनै लाई ओड़ेआ ऐ ? सेठै दी लाड़ी नै पुच्छेआ—तूं कुन एं ? उसनै आखेआ—अऊं चोरी करदा पगड़ोई गोत्रा हा । मिकी

फाह देई गए न। पर में नेआ दुष्ट आं जे मेरी जिन्द हचे नईं निकली। भली लोके तुं कुन एं ? ते ईआं इसलै कुत्थें जा करनी एं ? सेठै दी लाड़ी ने सारी गल्ल सनाई ओड़ी। इन्ने इच पूरब दिशा इच चन्द्रमा चढ़ेआ ते लो होई गई। लोई इचे चोरै नै सेठै दी कुड़ी धनवती गी दिखेआ ते नुआड़ी माऊ गी आखन लगा - अऊं तुगी इक हजार सुन्ने दियां मोहरां दिन्नां। तूं मिकी अपनी कुड़ी ब्याई दे। ओ हस्सी ते ओखन लगी - हुण तूं ओदे कनें ब्याह करिए के करगा ? ओ आखन लगा - आऊं ते हुण मोए दा गैं। माढ़ा कोई पुत्तर नईं। ए ते तुकी पता गै जे पुत्तरहीन गी सुर्ग नई थोन्दा। माढ़ी गल्ल मन्नें ते एदे जेड़ा बी जागत होए - भायें ओ कुसै दे वीरजा दा होए माढ़ा खेतर होने करी माढ़ा पुत्तर होग। इस करी अऊं आखनां जे तूं मिकी ए कुड़ी ब्याई दे। मेरी अभिलाषा तोड़ चाढ़। सेठै दी लाड़ी ललचोई गई। उसनै मन्नी लैत्ता। उसनै कुतुआं जल आंदा ते चोरै दे हत्था उपर छोड़ेआ ते श्राखेआ - में कड़ी तुकी ब्याई दित्ती। उसनै सेठै दी कुड़ी गी बी ईए गल्ल आखी। फा नुआड़ी माऊ गी श्राखेआ - उस बड़ै दे बूटे हेठ जाइए सुन्ना पुट्टी लै। जिसलै में मरी जन्नां तां मिकी विधि कन्ने साड़ी-फूकिए मेरे फुल्ल

गंगा जी पजाई ओढ़ेआ । पिछुआं अपनी कुड़ी गी लेइए
वक्रलोक नगरी गी जायां उठी । उर्थें राजा सूर्यप्रभ दे राज्जै
इच सारे लोक सुखी न । उर्थें तूं सुखै इच रौगी । तुकी कोई
चिन्ता नईं होग । न कोई दुःख देग । ओ तरहाये दा हा ।
ए आखिए उसनै किश जल पीता । फांसी दा कष्ट उसी अगें
गै मता हा । ओदे प्राण निकली गए ।

सेठै दी लाड़ी नै बूटे हेठ जाइए धन पुट्टी लेआ । ते बल्लें
गै अपने पति दे मित्तरै दे घर गई उठी । उर्थें रहिए उसनै
चोरै दा दाहकर्म करवाया । फुल्ल गंगा जी टोरे, ते साध-
पिण्ड करवाये । ओ धन लइए दूए दिन उत्थुआं निकली ते
चलदे चलदे वक्रलोक नगरी इच जाई पुजी । उर्थें उसनै इक
सेठ वसुदत्त कोला मकान खरीदी लैता ते अपनी कुड़ी धनवती
कन्नै रौन लगी ।

अदू उर्थें उस नगरी इच इक अध्यापक रौन्दा हा विष्णु
शर्मा । ओदा इक चेला हा मनास्वामी बड़ा शैल ते नौजवान
हा । ओ बड़ा खानदानी ते पढ़ेआ लिखेआ दा हा पर
जवानी दी मस्ती नेई अन्नी हुन्दी ऐ जे ओ इक कंजरी हंसावली

कने फसी गोआ । पर ओ पंज सौ मोहरां मंगै । ओदे कोल
किश है नई हा । वचारा बड़ा दुआस रवै ।

इक दिन धनवती नै उसी अपने कोठे परा दिक्खेआ । ओ
सोहने शरीर आला गवरू नौजवान हा । ओ नुआदे श्लैपे
उपर मोहित होई गई । उसी अपने चोर पति दी गल्ल चेतै
आई । उसनै कोला दा माऊ गी सदेआ ते आखन लगी—
दिख कनेआ शैल ब्राह्मण नौजवान ऐ । नाढ़ी जुआनी ते
सुन्दरता अमृत बरसांदी ऐ । मा समझी गोई जे इसी नुआदे
कने प्रेम होई गोआ ऐ । उसनै सोचेआ नाढ़े पति नै इसी
आखेदा गै जे भायें कुसै दे वीरज कने पुत्तर जम्मी लेआं ।
की नई इसै गी सही लैचै ? ए सोचिए उस नै इक गुप्त
दासी गी भेजेआ जे उस ब्राह्मण नौजवान गी लई आ ।

दासी गई उस ब्राह्मण नौजवान गी बक्खी नेइऐ उसनै सारी
गल्ल सनाई ओ आखन लगा—जेकर ओ मिकी पंज सौ
माहरां देन तां अऊं औनां । दासी ने जाइऐ सेठानी गा सब
किश सनाया । उसनै दासी दे हत्थ धन भेजी ओड़ेआ । मनः
स्वामी गी जिसलै रुपया थोआ, ओ दासी कने सेठानी दी
धियू धनवती दे अन्दरले कमरे इच पुज्जा । उत्थे धनवती
पजाई दी ही । उसनै धनवती गी दिखेआ जीआं चकोर चाननी

गी दिखदा ऐ। ओ बड़ी शैल ही ते पृथ्वी दा गहना ही।
रातीं खूब नन्द-मंगल होआ ते बड्डै लै निककी लोई गै उत्थुआं
दुरी आया।

धनवती गी ओदा गर्भ रई गोआ। ते समां पाइऐ उसनै
जागत जम्मेआ। जागतै दे लखन बड़े चगे से ते बड़ी
किस्मता आला बभौंदा हा। ओ दोऐ मा धीयां पुतर जम्मने
पर बड़ियां खुश होइआं। शिवजी ने उनें गी सुखने इच दर्शन
दित्ता ते आखेआ—पंगूड़े इच पेए दे जागतै गी, कन्ने इक
हजार मोहरां पाइऐ लई जाओ ते बड्डै लै गै राजा सूर्यप्रभ दी
डयोढी छोड़ी आओ। एदा चंगा नतीजा निकलग। शिवे दी
आज्ञा सुनिए ओ दोऐ जागिआं। इक दूए गी सुखनो सनाया।
शिवजी दी गल्ल मन्तिऐ उनें जागतै गी पंगूड़े इच पाया कन्ने
सुन्ना रखेआ ते राजा सूर्यप्रभ दी डयोढी इच छोड़ी आइआं।

तुआई शिवे राजा सूर्यप्रभ गी वी आज्ञा दित्ती ओ पुतरा
गिते बड़ा तड़फा करदा हा।

“राजा उठ कोई इक बड़ा शैल जागत ते सुन्ना थुआड़े
मैहला दी डयोढी इच छोड़ी गोदा ई। पंगूड़े इच पेदा जागत
लई लै।” शिवे ए आखेआ तां राजा बड्डै जागेआ। उसी
चोबदार राखें आनिए ऊऐ गल्ल सनाइ। राजा आपू डयोढी

इच गेआ । उत्थें दिखेआ जे जागत ऐ ते कन्ने सुन्ने दा ढेर पेदा ऐ । उसनै जागतै दे हत्थें पैरें उपपर शुभ लक्खण, छत्तर, ध्वज आदि दिक्खे ते आखेआ—‘शिवें मिकी योग्य गै पुत्तर दित्ता ऐ ।’ उसनै आपूँ जागत चुक्केआ ते मैहलें अन्दर लई गेआ । राजे नै इक बड़ा जग कीता ते इन्ना धन बंडेआ जे शब्द ‘निर्धन’ गै अपने अर्थे जोगा नई रेआ । बारां दिन राजा नाच रंग करांदा रेआ । ते उसनै जागतै दा नां चन्द्रप्रभ रखेआ ।

राजकुमार चन्द्रप्रभ मठोन लगा ते बड़ा चंगा निकलेआ । सारे गै लोक बड़े खुश होए । समां पाइए ओ बड़ा होई गेआ ते पृथ्वी दा राज भार चुक्कने दे जोग होई गेआ । सारी पर्जा ओदी वीरता, विद्या ते दानवीरता उपपर बड़ी खुश ही । राजा ने दिखेआ जे ओदे इच सारे गुण हैन उसनै उसी टिका दई ओड़ेआ । आपूँ वृद्ध होने करी राजपाठ उसी सौंपिए काशी जी गेआ उठो । राजकुमार बड़ी योग्यता कने राजकाज चलान लगा तुआई राजा नै कठोर तपस्या कीती ते अपनी देह छोड़ी ओड़ी ।

चन्द्रप्रभा गी जिसलै राजा दी मृत्यु दा समाचार थोआ ओ बड़ा बर्ताप करन लगा । उसनै सारे स्नाध ते विधियां पूरियां

कीतिआं । उसनै मन्त्रिणं गी आखेआ—आऊं अपने पितृकृण
 कशा किआं मुक्त होई सकनां ? में अपने हत्थें सब कर्म करड ।
 अऊं उन्दे फुल्ल गंगा जी लई जाड ते आपूं पर्वाड । अऊं
 गेआ जी जाइए आपूं पिरड देड । आऊं सारे तीर्थ करड ।
 जगन्नार्थें तोड़ी जाड ।” ए सुनिए मन्त्री आखन लगे—राजा
 लोक एक किश आपूं नईं करदे । राजनीति दिआं अपनिआं
 गै गल्लां हुन्दिआं न । ते उनेंगी बक्खरै गै नभाना पौंदा ऐ ।
 ए कम्म तुस दूए कोला कराई सकदे ओ । अपना राज धर्म
 नभाना गै सारे तीर्थें पर जाने कशा बडा धर्म ऐ । राजा लोकें
 दी बड़ी रक्षा करदे न । तीर्थें आदि पर उनेंगी खतरा गै
 हुन्दा ऐ ।” राजा नै मन्त्रिणं दी गल्ल सुनिए आखेआ—
 नेए शक ते चिन्ता नईं करा करो । में पिता गीतै ए कम्म
 जरूर करने न । इसलै जवानी दी अवस्था इच तीर्थ करी लैने
 खरे न । इस शरीरा दा के आखना । खिनै इच नाशवान
 हुन्दा ऐ । जिन्ना चिर अऊं नईं परतोन्दा तुम राज-काज
 समालो । राजा दी पक्की सला दिक्खिए मन्त्री लोक चुप
 होई गये ।

राजा नै जाने दी तयारी करी लैती ।

चंगै घ्याडै राजे ने स्नान कीता । हवन कीता, ब्राह्मणें गी

दान दिता । रथै पर चढ़ेआ ते यात्रा पर चली पेआ । जसनै
 जोगिया वस्तर धारण करी लैते । सारे जगीरदार, राजपूत ते
 शहरदार नुआढ़े पिछें राजा दी सीमा तोड़ी अये । राजा नै
 मसां उनेंगी परताया । राजपाठ मन्त्रिण पर छोड़ेआ ते
 किश ब्राह्मणें गी कनें लैता ते तीरथ यात्रा पर चली पेआ । ओ
 देस लंघदा गेआ । कई प्रकार दे भेस ते कई प्रकार दिआं
 बोलियां ते भाषां उमी लब्धिआं । इआं ओ गंगा जी पुजा ।
 उसनै गंगा जी इच पौड़ां पौन्दियां दिखिआं । ओ सुर्गा गी
 पजाने आलियां पौड़िआं बमोन्दिआं हिआं । ए बी अम्बिका
 आंगर गै लब्दी ही । जेड़ी हिमालय चा आई ही ते शिवें
 दिआ जटां खिचची लई आई ही । देवराज ते देवतागण नुआढ़ी
 पूजा करदे हे । राजा अपने रथा परा उतरेआ । गंगा जी
 इच स्नान कीता । ते बिधिपूर्वक राजा सूर्यप्रभ दे फुल्ल
 पर्वाए ।

उत्थें स्नाद कीता, दान कीता, रथा पर चढ़ेआ ते अग्गे
 लच पेआ । इआं ओ प्रयाग आई पुज्जा । जित्थें गंगा जमना
 मिलिए लोकें दा कल्याण करदिआं न । ओ इआं लगदिआं न
 जियां हवन करदे घेओ दा धूं ते निकलने आली ज्वाला । उत्थें
 राजा चन्द्रप्रभ नै बरत रखेआ । स्नान दान तें स्नाध कीते ।

ए करिऐ अगो काशी आसै चली पे । मन्दिरे दे भण्डे दूरा
 दा लवन लगी पे । ओ आखा करदे हे 'आओ मुक्ति प्राप्त
 करो' । उर्थे उसनै त्रै दिन बरत रखे । शिवे पूजा कीती ।
 उर्थे मासै दे पिण्ड दान करीऐ अगो पोआ पासे चली पेआ ।
 ओ जात्रा करा करदा हा । रस्ते इच दिखेआ जे बूटे फलें
 कने लदोऐ दे न । पैछी मधुर गा करदे न । इआं बभौदा
 हा जे ओ नुआदिआं स्तुतियां करा करदे न । बाऊ दे फणकें
 कने फुल्ल मुलदे हे ते राजा गी प्रणाम करदे हे । ईआं बन
 प्रदेशे इचा लंगदा राजा गेआ आई पुज्जा । उर्थे उन स्राध
 कीता । ते ब्राह्मणे गी दान दिचे । फी ओ तपोवन इच गेआ ।
 उर्थे जिसलै ओ पिण्ड बट्टा करदा हा गेआ दे खुआ विच्चा
 त्रै हत्थ ओ पिण्ड लैने गितै निकले । राजा ए दिक्खिए बड़ा
 हरान हआ । ते अपने कने जेड़े ब्राह्मण हे उनेगी पुच्छन
 लगा—ए के गल्ल ऐ ? केड़े हत्था इच पिण्ड देआ । उने
 आखेआ—राजा, ए हत्थ जेड़े इच लोहे दा त्रिसूल दा ऐ । ते
 चारा दा हत्थ ऐ । जिस हत्था इच छाननी ऐ ब्राह्मणै दा हत्थ
 ऐ । ते त्रिआ हत्थ जेदे इच डूठी पेदी ऐ ते शुभ लक्खन न
 राजा दा हत्थ ऐ । असें नई पता तुसें केहड़े हत्थे इच पिण्ड
 देना ऐ । ते इसंदा के मतलब ऐ । ब्राह्मणे दी गल्ल सुनिए
 राजा कुसै निश्चे उपर नई पुज्जी सकेआ ।

जिसलै बताल नै राजा गी ए अजीब कथ सनाई तां पुच्छन
 लगा—राजा ! उसनै केड़े हत्था इच पिण्ड छोड़ना चाहदा ।
 दस्सो, नई ते ऊऐ श्राप लगनां ऐ ।

राजा सारे कानून जानदा हा । उसनै बताल गी दस्सेआ—
 ओ पिण्ड चोरा दे हत्थै इच देना लोड़चदा हा । की जे राजा
 चन्द्रप्रभ ओदा जागत हा । ओ नुआड़े कने कीती दी शरता
 मताबक जम्मेओ हा । बाकी दौनें दा पुत्तर नई होई सकदा ।
 ए ठीक ऐ जे ओ ब्राह्मणै दे बीरज कने जम्मेआ पर ओ नुआड़ा
 पुत्तर नई होई सकदा की जे उसनै इक रातीं आसै अपने आप
 गी वेचेआ हा । ओ राजा सूर्यप्रभ दा पुत्तर आखेआ जाई
 सकदा हा । की जे राजा नै नुआड़े सारे संस्कार कीते हे ते
 कने पालेआ पोसेआ हा । पर जे उसनै धन नई लैता दा हुन्दा
 तां । पंघूड़े इच जागतै दे सरहाने जेड़ा सुन्ना छोड़े दा हा
 ओ नुआड़े पालने पोसने गीतै हा । इस करी राजा चन्द्रप्रभ
 चोरा दा पुत्तर हा जेड़ा उसनै हत्था पर जल दान लैन्दे समै
 सेठै दी लाड़ी कने शरत कीती ते पुत्तर पैदा करने आस्ते
 आखेआ । कन्ने ओ सारा धन वी ते नुआड़ा गै हा । मेरा
 बचार ऐ जे राजा गी चोरा दे हत्था उपर पिण्ड देना
 चाहीदा हा ।

जिसलै राजा ने ए ग्लाय़ा—बताल नुआड़े मूण्डे पर लोप
 होआ ते अपने थार गेआ उठी । राजा त्रिविक्रमसेन फी
 परतोआ ते उसी लैन चलेआ ।

बीमी कथ

राजा त्रिविक्रमसेन नै शिशपा बूटे परा बतान गी तुआरेआ,
मूण्डे पर पाया ते चली पेआ। चुपचपीता चला करदा हा जे
मूण्डे परा बतात नै आखेआ—राजा जी तुस ए जिद की करा
करदे ओ ? जाओ, रातीं जाइऐ रमान करो, मिकी उस ठग साधू
कोल की लई जन्दे ओ ? जेकर तुसें ए जिद तोड़ चाढ़नी गै तां
तुन्दी मरजी। इक कथ सुनी लौ।

इक नगरी चित्रकूट ही। उत्थे जातां ब्रादरियां अपनी हई
ते मर्जादा कोला बाहर नई टपदियां हिआं। उत्थों दा राजा चन्द्रा-
वलोक हा। ओ सारे राजे दा सिरताज हा। ते उसी दिक्खिए
सारें गी ठण्ड पौन्दी ही। कवि लोक उसी बहादरी दा खुण्ड
आखदे हे। ओ सुन्दरता ते दानवीरता दा चश्मा हा। सूटा हा।
उस राजा गी इक्कै बड़ा दुःख हा जे इन्नी सुख संपदा इच
हुन्दे होई बी उसी मन मरजी दी लाड़ी नई थोआ करदी ही।

इक दिन राजा अपना जी किश होर करने गीतै बनै इच

शकार खेडन गेआ । किश घोडसवार नुआढ़े कन्ने हे । जीआं
 सूरज अपनी किरणें कन्ने न्हेरा दूर करदा ऐ ईआं गै राजा अपने
 तीरें कन्ने जंगली जानवरें गी मारन लगा । ओ अर्जना कोला बी
 वड्डा बीर बभ्भोन्दा हा । उसनै शेरें गी बथेह करी सुट्टेआ पीली २
 आल समेत उनें गी भुंवा सुआली ओढ़ेआ । जीआं इन्द्र नै
 पर्वतें दो फड कप्पी ओढ़े ते उनें गी भुंवा बहालि ओढ़ेआ ईआं
 गै राजा नै सारे जानवरें गी वेवस करी ओढ़ेआ ? राजा शकार
 चढ़ेदा घोड़े गी अड्डी लान्दा अगें गै अगें बधदा गेआ । घोड़े
 गी अड्डी लग्गी ते, चाबक पई ते ओ बा होई गेआ दिखदे गै
 चाली क्रोह ओ गए ते घोड़ा राजे गी लईऐ दूए बनै इच जाई
 पुज्जा । राजा दे टऊ फुल्ली गे ।

घोड़ा रुकेआ । राजेगी किश थौ पता नई रेआ जे ओ कुत्थें
 आई पुज्जा ऐ । ओ ताई तुआईं फिरन लगा । उसी इक बड्डी
 भील लब्बी । भीला इच कमल फुल्ल बाऊ कन्ने हिल्ला करदे
 हे ईआं बभ्भोआ जे उसी सदा करद होन । अपनै घोड़े परा
 काठी तुआरी, ते खोलेआ ओ भुंवा बिलन लगा । फी उसी
 पानी दस्सेआ ते नुहालेआ बूटे दी छां इच बन्हेआ ते घा पाया
 पिछुआं राजा नै आपूँ श्नान कीता ते पानी धानी पीता । ते
 थकेवां तुआरन लगा । राजा भीला दे आसे पासे दी सुन्दरता

दिक्खन लगा । भीला दे कण्डे इच अशोक वूटे हेठ इक बड़ी
 गे शैल ऋषि कन्या दिक्खी । नुआदी सखी बी कन्ने ही । उसने
 फुल्ले दे हार पाये देहे ते वूटे दी शाल लपेटी दी ही । उसी ओ
 बड़ी शैल सज्जा करदी ही । ऋषि एं आंडू केश विन्यास कन्ने
 ओ मूल गै मती शैल लब्बा करदी ही । राजा उसी दिक्खए
 मोहित होई गेआ ते सोचन लगा—‘ए कुन ऐ ? ए सवित्री ते नई
 इत्थें न्हौन आई दी ? जां शिवें दी गोदा इच निकलिये गौरी ते
 नई फी तपस्या करन आई दी ? जां चन्द्रमा दी लो सगन्ध
 खाई ऐ दिन चढ़ने पर इत्थें आई गे दी ?’ ए सोचदा ओ उस
 सुन्दरी कोल पुज्जा ।

ओ सुन्दरी राजे दे श्लैपे गी दिक्खिये डौर और होई गई ।
 ते हार परोन्दी दे हार हत्था दा ढिक्की गए । ओ सोचन लगी—
 ‘ए कुन इस बन इच ठुरी आया ऐ ? ए कोई सिद्ध ऐ जां
 विद्याधर ऐ ? ए अपनी सुन्दरता कन्ने सारी दुनियां गी बस
 करी सकदा ऐ । ओ उठी, ते मर्जादा दे मारे जान लगी । ऊंआं
 नुआदियां जंडा जाने कोला जबाब देआ करदियां हिआ ।

राजा बड़ी नम्रता ते धीनगी कन्ने नुआदें कश पुज्जा ते
 आखन लगा—‘बड़ी दूरा दा अऊं पहलो पहल इत्थे आयां—
 अऊं नई आखदा तूं माढ़ा स्वागत कर । थुआड़े दर्शन गै तू

करी ओड़दे न । पर ए के गल्ल होई जे अऊं आयां ते तूं चली
पेई, ए ते तपस्वियें दा धर्म नई ।” ए सुनिएं नुआड़ी सखी नै
जेड़ी बड़ी चतर सजोन गी, राजे दा स्वागत कीता ।

राजा बड़ा उत्सुक हा । उसनै बड़े प्रेमै कने पुछेआ —
थुआड़ी स्हेलड़ी केड़े कुलै दा गहना ऐ ? अमृत आंडू मिट्ठा एदा
के नां ऐ ? ए अपना फुल्लें आंडू शरीर इत्थें वनै इच तपस्या
कन्ने की सका करदी ऐ ? ओ सखी राजे दी गल्ल सुनिऐ
आखन लगी — “ए कन्व ऋषि दी कुमारी कुड़ी ऐ । मेनका नै
जम्मी ही । इत्थें कुटिया इच गै पत्नी ऐ । ते नाढ़ा नां इन्दी-वर
प्रभा ऐ । पिता दी आज्ञा कने ऐ भीला पर न्हौन आई दी ऐ ।
उन्दी कुटिया इत्थे कोल गै ।”

राजा ए सुनिऐ बड़ा खुश होआ । घोड़े पर चढ़ेआ ते कन्व
ऋषि दी कुटिआ पासै चलेआ । उसनै सोचेआ ऋषि गी नाढ़े
कने ब्याह आस्तै आखंड । उसनै घोड़ा बाहर बन्नआ ते आपूं
अन्दर गेआ । कुटिआ इच छड़े तापस गे तापस हैं जिनें जटां
रखी दिय़ां हिआं ते बूटें दी शाल पाई दी ही । उत्थें ऋषि कन्व
सारें कशा विरे दे बेठे दे हे जी तारें कन्ने चन्न । राजा नै जाइऐ
उन्दे चरणें इच प्रणाम कीता । ते पूजा कीती । ऋषि नै बी

राजे दा स्वागत कीता । ते फी गलाया — “वेटा चन्द्रावलोक सादी शिखा सुन, तुकी पता गै जे दुनियां इच सारे जीव मृत्यु कशा डरदे न । तूं बचारे निर्दोष हिरणें गी की मारना एं ? राजा लोकें दे शस्तर डरे दे लोकें दी रक्षा गीतै हुन्दे न । अपनी प्रजा दी धर्मा कने रक्षा कर । अपने शत्रुएं गी मार । ते उन्दी सम्पदा हाथी घोड़ें दे रूपै इच खोई लै । नन्दे कने राज कर, दान दे तै दुनियां इच जस कमा । पर ए शिकार खेडने आला पाप कर्म छोड़ी ओड़ ।

ए ते मृत्यु दी खे, ऐ । शिकार कोला के ला ? जेदे कन् मारने आला मरने आला ते घोड़ा चौणो गी बिता कोला मता कम करना पवै । तुकी नई पता पाण्डु कने के होआ हा ?

बुद्धि मान राजा नै सुनिए खुशी कनै सारी गल्ल सुनी लैती ते आखेआ तुन्दा हुकम सिरमथे उपर, तुसें माढे उपर बड़ा उपकार कीता ऐ । में अब्जै थुआं शाकार खेडना छोड़ेआ । हुन कुणै जीवै गी डरने दी लोड़ नई ।” ऋषि ए सुनिए आखन लगा—“अऊं बड़ा खुशी होआ जेड़ी तूं सारे जीवें गी सुरक्षा प्रदान कीची ऐ । अपनी मन सरजी दा बर मंगी लै ।” राजा नै मौका ताड़ेआ तै आखेआ “जे तुस माढे पर प्रसन्न ओ तां कपनी कुड़ी इन्दी वरप्रभा मिकी व्याही

देओ। राजे दी प्रार्थना सुनिए ऋषि नै संभेओ ए ठीक गै
जे अप्सरा दी कुड़ी रजे कन्ने बाही जा। ओ उसै लै
न्हाइए परतोई ही। ऋषि नै दान करी दित्ती।

आश्रमै दियां सारियां स्त्रियां किटियां होइआ। उनें नुआदा
शिगार कीता, ब्याह होआ। राजे नै उसी बी घोड़े पर बहाली
लैआ ते चली पेआ। सारे ऋषि उसी बर्धान आये। बचारे
रोआ करदे हे।

राजा गोआ उठी ते तुआईं सूरज देवता बी अस्त होई गये।
रात रानी न्हरेरे दा काला चोगा पाइए प्रेम दी मस्ती आई गई।

ठीक उसै बेलै राजे गी रते विच भीला कण्डै इक बड़ै दा
बूटा लब्बा। भीला दा पानी ईआं साफ हा जीआं सज्जनै दा
हिरदा। उनें दिक्खेआ जे ओ थार बेलें पत्रें कन्ने छदोए दा
हा ते कन्ने नर्म नर्म घा बी उत्थें हा। राजे नै सोचेआ रात
इत्थें गै गजारने आं। ओ घोड़े परा उतरेआ उसी पानी
दस्सेआ, घा पाया, फी आपूँ कण्डै बइए बसां कीता। पानी
पीता ते ठण्ड पई। मिठी २ बा बगन लगी। राजा उत्थे फुल्लें
दी सेजा उपपर उस बूटे हेठ तापस कन्या कन्ने सई गोआ। उसलै
न्हरेरे गी हटादा चन्द्रमा निकलैआ। उसनै पूर्व दिशा दा सुन्दर

मुंह चुम्मेआ । सारा शमान लोई कन्ने जग-मग जग मग करन
 लगा । चन्द्रमा दियां किरणां उत्थें लताकुञ्ज इच बी जाई बड़ियां
 ते लोई दे टिमकडे मनियां जन जगदियां लव्वन लगे दुआ दिन
 होआ राजा सेजा परा उठेआ, बड्डेले दा पूजा पाठ करिएे अपनी
 लाड़िया गी लइएे चलने गी तयार होआ । ओदा बिचार हा जे फौज
 लव्वी जाग । ओ चन्द्रमा जिसनै राती कमलें दी शोभा मद्धम
 करी ओड़ी ही हुन आपुं भित्था जन होइएे ते डरिएे पछमैं दे
 पर्वता पिछें छप्पन लगा । पूर्व दा सूरज निकलेआ, रोहै कन्ने
 लाल बिम्ब होएे दा । अपनी किरणें दी तलवार कटिएे चन्नै गी
 बड्डुनै गी सोगा होआ । चानचक गै उसै लै इक ब्रह्म राक्षस
 आई गेआ । धूएं दी कालख आंङू काला, ओदियां जटां
 धूड़मतूड़ियां तो बदला आंङू गब्जा करदा हा । उसनै आन्दरें दी
 माला पाई दी ही । बालें दा जनेऊ पायेदा हा । कसै मानू दी
 खोपड़ी दलका करदा हा ते नुआढ़े चा लहू पीया करदा हा ।
 उसनै लम्बे २ दन्द बाहर कटिएे जोरै दा गडाका सुट्टेआ ते बड़े
 रोहै कन्ने राजे गी आखेआ—हे मुख । अऊं ब्रह्मराक्षस ज्वाला
 मुखआं । ए धडै दा वूटा माढ़ा घर ऐ । इत्थुआं देवता नई डरदे
 लंघदे । तूं इत्थें अपनी लाड़ी कन्ने रेआ ते नन्द लैन्दा रेआ ।
 अऊं बाहरा दा चक्कर लाइ आयां । तूं माढ़े थां गी नन्द

मनाने दा थार समझना एं । अऊं तुकी नाढ़ा मजा चखानां ।
थुआड़े हिरदे इच बड़ी प्रेमै दी मस्ती आई दी ऐ । अऊं उसी
पाड़िऐ खाई जाऊ ते थुआड़ा लहू पी जाऊ ।

राजे नै नुआड़ी ड्रौनी धमकी सुनी ते दिखेआ जे अपनी लाड़ी
सहमी गइऐ । उसी पता ह्रा जे इस राक्षसै गी कोई शस्तर-अस्तर
ते लगना गै नई । इसकरी राजे नै डरदे २ बड़ी धीनगी
कन्ने आखेआ मेरा अपराध खिमा करो, ए धोखे इच होइ गेआ
ऐ । अऊं ते थुआड़ा अतिथि आं ते थुआड़ी शरण आयेदां ।
जे किश आखगेओ अऊं तुसें गी देऊ । तुसें गी नर बलि आनी
दिन्नां । तुसें गी वृप्ति होई जाग । महाराज तुस शान्त होई
जाओ, ते रोह छोड़ो ।”

राजे दी गल्ल सुनिऐ ब्रह्मराक्षस किश शान्त होआ । उसनै
सोचेआ—चलो ईआं गै सई ।’ ओ राजे गी आखन लगा—
“जेड़ा तूं माढ़ा अपमान कीता ऐ ओ इस शर्ता पर माफ होई
सकदा ऐ । कोई ब्राह्मण पुत्तर लब्ब जेड़ा सत्ते वरें दा होऐ,
समझदार होऐ ते थुआड़े गीतै आपूं अपना बलिदान देने गी
तयार होऐ । बड़ा चरित्रवान होऐ । जिसलै बलि लगाने लगै
नुआढ़े मा बब्ब उसी भुआं रखिऐ ओदे हत्थ पैर पकड़ी रक्खन
जिसलै नेई बलि थोई जा तूं आपूं अपने हत्थें तलवारी कन्ने

नुआढ़ां सिर कप्पिऐ मिकी देआं । अज्ज कोला सत्ते दिनें दे
अन्दर २ ए कम्म होई जाना लोड़चदा ऐ । जे ए शर्ता तोड़ नभाएं
तां खरा नईं ते राजा अऊं खिनै इच तुकी ते थुआड़े राज्जै गी
नष्ट करी ओड़ड ।” राजा नै ए सुनेआ ते डरेदे सारी गल्ल मन्नी
लैती । ओ ब्रह्म राजस उस्सै लै लोप होई गेआ ।

राजा चन्द्रावलोक इन्द्रीवरप्रभा दी लइऐ घोड़े पर चढ़ेआ
ते अपनी सेना गो तुप्पन चली पेआ । बड़ा किश निम्मोभान
होऐ दा हा । ओ अपने आपै इच सोचन लगा—“इस शकार ते
प्रेम नै पाण्डु आडू तबाही आनी ओड़ी ऐ । बड़ी मूरखता होई
ऐ । ब्रह्महात्तसै गीतै नेई बलि कुत्थुआं लब्बनी ऐ ? नगरी चलिऐ
सोचनेआं के होई सकदा ऐ ? इनें सोचे पेदा हा जे फौज उसी
तुपदी उत्थें आई पुज्जी । ओ अपनी लाड़ी ते फौजा समेत
चित्रकूट नगरी इच आई गेआ । जिसलै लोकें दिखेआ जे राजा
गी योग्य पत्नी थोई गई ऐ उनें मतिया खुशियां मनाइयां । पर
राजे दा दिल किश बुज्जे दा गै रेआ दूए दिन राजे नै मन्त्रिण
गी सहिए सारी गुप्त गल्ल सनाई । इक चतर मन्त्री आखन
लगा—“महाराज । जी थोड़ा नईं करो । अऊं तुन्दे आस्ते नेइ
बलि तुप्पी आनी देड । इस दुनियां इच बड़ी बड़ी विचित्र
गल्लां हुन्दियां न ।”

मन्त्री नै राजे गी ईआं तसल्ली कराई । तुआई आपू उसनै
 इक सत्ते बरें दे जागतै दी सुन्ने दी मूरति बनवाई । ओदे कन्ने
 इच हीरे ज्वाहरात पाये । उसी इक रथै इच पाया ते शहरें,
 कसवें ते थाएँ इच लई गेआ । रथै उपपर चाढ़ी दी मूरति गी
 लइऐ ओ थाएँ थाएँ खडोइऐ ए डौण्डी करदे हे । जाति दी
 भलाई गीतै इक ब्रह्मराक्षसै गी बलिदेनी ऐ । कोई ब्राह्मण जागत
 जेड़ा आपू अपने आपगी पेश करै, लोड़चदा ऐ । जेकर मा बब्ब
 मन्नी जान ते उनेंगी बलि देने वेलै ओदे हत्थ पैर थम्मने
 पौडन । जेड़ा कोई जागत अपने माता पिता दे लाभ आस्तै इनें
 शरतें गी मन्नग उसी ए सुन्ने दी मूरति, हीरे ज्वाहरात ते कन्ने
 सौ प्रां थोडन ।

हुण केह होआ जे इक सत्ते बरें दे ब्राह्मण जागतै ए डौण्डी
 सुनी । ए जागत राजे दे सदावरतै पर पलदा हा । बड़े
 हौसले आला ते चरित्रवान हा । ए निकका हुन्दा गै अपने
 साथिएं दी मदत करने इच नेकी समझदा हा । पिछले जन्मा
 इच उसनै इस गुणा दा भ्यास कीता दा हांग । ओ राजे दी
 पर्जा दे गुणें दी मूरति हा । ओ डौण्डी आले कोल गेआ ते आखन
 लगा—“अऊं थुआड़े कल्याण आस्ते बलि देड । पर में घर
 अपने माऊ बब्बे गी सनाई आवां ।” राजे दे कर्मचारी ए

सुनिऐ बड़े खुश होए ।

उनें आखेआ 'होई आ' । ओ घर गेआ ते हत्थ बन्निऐ माता पिता गी बेनती करन लगा—जाति दे भले आस्तै अऊं इस नाशवान देह दी बलि देन लगां । मिकी ए करने दी जाजत देओ । तुन्दी गरीबी वी दूर होई जाग । की, जेकर में बलिदान करइ राजा मिकी बनी दी सुन्ने दी मूरति, हीरे ज्वाहरात ते सौं ग्रां देग ओ अऊं तुसें गी दर्ई ओड़इ । इस चाली माढ़े उपर तुन्दा ऋण वी चुकी जाग ते कन्ने जाति दे लोकें दा कल्याण होई जाग । तुन्दी गरीबी दा अन्त होई जाग । मोढी थार तुन्दे होर पुत्तर होई जाडन ।

जिसलै माऊ बब्बै ए सुनेआ ओ आखन लगे —“वेटा, तू ए के आखा करना ऐ ?

तुगी बात ते नईं होई गेदा ? जां कोई चन्द्रा ग्रैह ते नईं चमकी गेआ ? इनें दौं इचा कोई गल्ल जरूर ऐ जे तू नेइआं गल्लां करनां एं । ओ कुण होग जेड़ा धना आस्तै अपने पुत्तर दी मृयु करग ? केड़ा बच्चा ईआं अपना बलिदान करग ? माऊ बब्बै दी गल्ल सुनिऐ ओ आखन लगा—अऊं भ्रष्ट बुद्धि कनें ए किश नईं ग्ला करदा । माढ़ी गल्ला आसै ध्यान देओ । बड़ी समझा दी गल्ल ऐ । ए

शरीर अतिअन्त गन्दा ते मैलू कने भरोचा दा ऐ। जमनै कोला लइऐ गै ऐ भ्रष्ट हुन्दा ऐ। दुःख दर्दा दा घर ते नष्ट होई जाने आला ऐ। इस करी स्याने लोक आखदे न इस नाशवान संसारै इच ईऐ इक पक्की ते अमर चीज ऐ जे इस तुच्छ शरीरा कने किश भला कीता जा। लोकें दे कल्याण कोला बद्ध होर के चीज होई सकदी ऐ? जेकर में अपने माऊ बब्बे दी सेवा नई करां, तां इस शरीरा दा के लाभ ईआं ते इऐ नेइआं गल्लां सनाइऐ उसनै रोंदे माता पिता गी इस गल्ला आस्तै मनाई लेआ। फी ओ राजे दे नौकरें कोल गेआ। उन्दे कशा सुन्ने दी मूर्ति, हीरे ज्वाहरात ते सौ प्रां दा पटा लेआ ते अपने माऊ बब्बै गी आनिए दित्ता। फी उसनै राजे दे कर्मचारिएं गी आखेआ चलो। ओ ते नुआढ़े माता पिता उन्दे पिछें पिछें चली पे। राजा कोल चित्रकूट पुज्जे।

राजा चन्द्रावलोक नै दिखेआ जे जागत आई गेआ ऐ। तां बड़ा खुश होआ। उसी ओ जागत हौसले दा अवतार ते अपने बचाने गीतै इक जैन्तर गै बभोआ। राजा नै उसी शनान कराया। तेल अतर लाया। हार पुआए। हाथी उप्पर चढ़ाया ते नुआढ़े माता पिता गी लइऐ राक्षसै दे थारै पासे चली

पैआ । पुजारी नै बडै दे बूटे गिरद कार मारी ते पूजा कीती कनें अगगी इच आहुति पाई । ब्रह्मराक्षस ज्वालामुख प्रकट होआ । उसनै बड़े जोरा दा गड़ाका मारेआ । ते मन्तर बोलन लगा । ओदे दर्शन बड़े भयानक हे । उसनै खून पीता दा, मुंह बाके दा ते हफा करदा हा । अक्खीं गुआला करदा हा । ओदे काले शरीरा दे साये कने शमाना दा रंग काला होई गोदा हा । चन्द्रावलोक नै धीनगी प्रणाम कीता ते आखेआ-हे पूजा जोग ! में थुआड़े गीतै ए नखलि आन्दी ऐ । जेड़ा बचन कीता हा ओदा अज्ज ठीक सतमा दिन ऐ । किरपा करिए अपनी बलि साम्बो । ब्रह्मराक्षसै ओठें उपर जीभ फेरदे फेरदे उस ब्राह्मण जागतै आसै दिखेआ ।

ओ जागत खुश होइऐ अपने आप गी आखन लगा—मिकी इस बलिदान दे बदले सुर्गा दी लोड़ नई । नां गै मिकी मुक्ति दी लोड़ ऐ । ओदे कनें लोकें दा भला नई हुन्दा । परमात्मा करै में हर जन्मै इच लोकें दी सेवा इच गै अपना शरीर भेटा करां । जिसलै ओ अपने मनै इच ए ध्या करदा हा देवत लोक शमानै इच रथें पर चढ़िऐ आये ते फुल्लें दी बरखा करन लगे ।

ब्राह्मण जागतै गी ब्रह्म राक्षसै दे सामने रखेआ । ओदे

माऊ बब्बै ओदे हत्थ पैर पगड़े । राजे नै तलवार कड्डी ते उसी बड्डन लगा । उसलै के होआ जे जागतै नै एडे जोरा दा गड़ाका सुट्टेआ जे ओ त्रैवे ते ब्रह्म राक्षस हरान होई गे उने हत्थ जोड़े, सिर नवाया, ते नुआड़े मुंहै आसे दिक्खन लगे ।

जिसलै बताल नै ए मजेदार कथ सनाई ते राजे गी ए प्रश्न कीता— ‘अपनी मृत्यु दे समे पर ओ ब्राह्मण जागत की हस्सेआ ? मिकी बड़ी उत्सुकता ऐ । तुस जेकर जानिए नई’ दसगेओ तां तुन्दा सिर सौ टोटे होई जाग ।’

राजा नै बताल दी गल्ल सुनिए जबाब दित्ता—सुन ओ जागत की हस्सेआ हा । तुकी पता ऐ जे कुसै कमजोर गी भय होऐ ते ओ अपनी जिन्द बचाने गितै अपने माता पिता कोल जन्दा ऐ । ओ नई’ होन तां ओ राजा कोल जन्दा ऐ । की जे राजे दा ए धर्म ऐ ओ सारें दी रक्षा करदा ऐ । जे राजे दी सहायता नई’ मिलै तां अपने इष्ट देवता दी शरण जन्दा ऐ । इत्थे ओ सारे गे मजूद हे । ते अपने धर्मा कोला बिल्कुल उलटा कम्म करन लगे हे । माऊ बब्बै नै लालचै करी नुआड़े हत्थ पैर पगड़े दे हे । राजा उसी बड्डने गितै तयार होए दा हा । ते रक्षा करने आला इष्ट ऊं आं गै खाने गी मुंह बाकिए खड़ोता

दा हा । ब्राह्मण जागत सोचन लगा दिखो एं के कम्म करन टुरे न । इस शरीरै आस्ते अपने धर्मा दे बिरुद्ध जा करदे न । इस देह नै नष्ट होई जाना ऐ । ए देह अन्दरा बाहरा नेआ गन्दा ऐ । दुःखें ते बमारिएं दा घर ऐ । इनें गी होर जीने दी के लून लगगी दी ऐ ? इस दुनियां इच ब्रह्मा विष्णु, महेश, इन्द्र ते होर सारे देवता बी नष्ट होई जन्दे न । इस करी ब्राह्मण जागतै गी खुशी बी होई ते चवात बी लगगा ते ओ हस्सेआ । खुशी इस करी जे ओ अपना धर्म नभाई चलेआ ते हरानो इस करी जे इन्दी विचित्र माया ऐ ।”

राजा मसां चुप गै कीता हा जे बताल फी मूण्डे परा लोप होआ ते अपने थार गोआ उठी । राजा इक क्षण नईं रुकेआ ते नुआढ़े पिच्छें चली पेआ ।

सच आखदे न जे महापुरुषें दे हिरदे सागर आडू गम्भीर हुन्दे न ।

— — —

इषिकमीं कथ

राजा त्रिविक्रमसेन मुड़िऐ गेआ, बताल गी मूण्डै पाइऐ फी परतोआ बताल आखन लगा 'राजा जी, आओ तुसें गी उगगर प्रेमे दी कथ सनां ।

इक विशालानगरी ऐ । इन्द्रपुरी कशा दूए दर्जे पर ऐ । जेड़े सत्पुरुष सुर्गा दा भ्रष्ट हुन्दे न उन्दे आस्तै बधाता नै बनाई ऐ ईआं बभोन्दा हा । इसदे राजा दा नां पद्मनाभ हा । ओ सज्जनें दी बड़ी कदर करदा हा ते दान करने इच दूआ बलि (राजा) हा । ओदे राज्जै इच इक सेठ अर्थदत्त हा जेड़ा धनसम्पदा इच राजाइन्द्र कोला बी अगें हा । ओदै घर धी जम्मी अनंगमंजरी ओ कुड़ी के ही बधाता नै सुर्गे दी अप्सरा गै भुंवा लइ आन्दी ही । उस सेठ नै नुआड़ा ब्याह इक दूए सेठै दे पुत्तर मनीवर्मा कन्ने करी ओड़ेआ । पर उसी धी बड़ी प्यारी ही इस करी ओ उसी अपने घरा दा जान नई दिन्दा हा उसनै मनीवर्मा गी घर-जुआई रखी लेआ । पर अनंगमंजरी गी मनीवर्मा ईआं लगौ जिआं तापे दे गी कनैन । पर ओ मनीवर्मा उसी ईआं प्यार

करदा हा जीआं इक कब्जूस अपने कमाए दे धनै गी करदा ऐ।

इक वारी ओ मनी वर्मा अपने माऊ बब्बै गी मिलन
ताम्रलिप्ती गोआ। किश दिनें बाद गरमी दी रूत शुरू होई गई।
सूरजा दियां किरणां नेईआं भखियां जे घरै दा गोदे जात्रुएं
आस्ते बाहर निकलना कठिन होई गोआ। बाऊ इच चमेली ते
जुहो दे फुल्ले दी सगन्ध ते ही पर ईआं बभोन्दा हा जे बसन्त
रितु दे बजोगै इच हौके भरा करदी ऐ। बल्लूने उड्डन लगे जीआं
पृथ्वी रमानै इच बढ़ले गी तौले औने दे स्नेहे भेजा करदी ऐ।
हुट्टे दे ते बसां करदे मशाफरें आङ्गू दिन बीतने दा नां गै नईं
लैन। पीली चाननी आलियां रातां बसन्त दे चले जाने करी
लौकियां होइ गइआं।

इस मोसम इच इक दिन अनंगमंजरी अपने घरा दी दुआरी
इच बेठी दी ही। नुआढ़ी स्हेलड़ी कोल बेठी दी ही। अनंगमंजरी
ने सन्दलै दा लेप कीता दा हा ते कन्ने म्हीन रेशमी साढ़ी लैती
दी ही। उसनै हेठ गली इच राजे दे पुजारी दा पुत्तर कमलाकर
लंगदा दिक्खिआ ? ओ कमलाकर कामदेव बभोआ जेड़ा रति गी
तुप्पन जाकरदा हा ? कमलाकर नै उसी दुआरी इच बेठे दे
दिखेआ। ओ चन्द्रमा दी कला आङ्गू लब्बी ते ओ उसी दिक्खिए
कुम्मिएं आङ्गू खिड़ी गोआ। दोऐ इक दृए गी दिक्खिए मोहित

होई गए । उनेंगी मर्जादा दा ख्याल नई रेआ कमलाकर दा साथी बी कन्ने हा उसनै नुआढ़ी नेई दशा दिखी ते ओ उसी मसा पकड़िऐ घर लई गेआ तुआई अनंगमंजरी बी अपने बसै इच नेई रही । ओ बी अपनी स्हेलड़ी कन्ने उठिऐ अन्दर गई उठी । प्रेमै दे तापै वन्ने मती दुखी होई ते उसी चेतै करी २ बिस्तरे पर पासै मारन लगी । उसी किश बी सुनचै लब्बै नई । दौं त्रै दिन उस मसां गजारे, किश शर्म ते डर बभोऐ, बजोग सहन नई होऐ, लिस्सी फड होई गई, मिलने दी कोई सबील नई बनै, बिल्कुल गै नई होने आली गल्ल समझिऐ उसनै आत्म हत्या दा निश्चा कीता । इक राती जिसलै नुआढ़ी दासिआं सुत्तीदियां हिआं ओ उठी ते चन्नै दी लोई इच अपने बागे दे तला उपपर इक बूटे हेठ जाई पुज्जी ओ अपनी इष्ट देवी चण्डी दी मूरति कोल गई । ओदी स्तुति करिऐ आखन लगी—इस जन्मा इच ते मिकी कमलाकर पति रूप इच मिलेया नई । अगलै जन्मा इच उसी जरूर मेरा पति बनाओ । ए बेनती करिऐ उसने अपने दपट्टे दा फान्ह बनाया ते अशोक दे बूटे कन्ने वन्नेआ । इन्ने इच के होआ जे नुआढ़ी अन्तरंग सखी जेड़ी उससै कमरे इच सुत्ती दी ही जागगी । उसने दिक्खेआ अनंगमंजरी है नई ओ तुप्पदी २ बागै इच आई । उसनै दिक्खेआ जे ओ गले इच फाह

पा करदी ऐ ओ कलई 'ठहरी जायां, ठहरी जायां' ते द्रौड़िऐ
 उस ओ फाह बडूडी ओड़ेआ । अनंगमंजरी ने दिक्खेआ जे
 नुआदी अन्तरंग सखी आई गई ऐ ते उसनै फा कप्पी ओड़ेआ ऐ
 ओ व्याकुलता कन्ने वेहोश होई गई । सखी ने दमदलासा दिता
 ते पुच्छन लगी 'तुकी के दुःख ऐ ?' अनंगमंजरी बुहासरी ते
 उसनै सब किश दस्सिऐ आखेआ — "सखि मालती अऊं माऊ
 बब्बै दे धीन होई माढ़ा प्रेमी मिकी थोना नई । इस करी मौत
 गै परमसुख ऐ ।" ए आखदे २ ओ काम अग्नि कन्ने इन्नी
 दुःखी होई जे वेहोश होई गई ।

आदी सखी मालती आखन लगी—कामदेव दी आज्ञा मोड़ना
 बड़ा गै कठन कम्म हुन्दा ऐ । दिक्खो काम ने माढ़ी सखी दी
 के दशा करी ओड़ी ऐ । ए दूइए जनानिएंगी काम पीड़ित होए
 दे दिक्खिऐ उन्दे पर हसदी हुन्दी ही जे इनें गी अपने उपर
 संजम गै नई ।" उसनै ठण्डा पानी त्रौंकेआ, बाऊ दो फणाका
 कराया ते मसां होशै इच आन्दा, ओदा ताप मेटने आस्ते कमल
 फुल्लें दी सेज बनाई ते नुआड़े हिरदे उपर शीतल हार रखेआ ।
 अनंगमंजरी दे अत्थरू नई थमोन, ओ आखन लगी— "सखी,
 इस हार ते इनें टुण्डवालिऐ कन्ने किश नई होना, जेकर तूं
 माढ़ा ताप हटाना ऐ ते माढ़ी जिन्द बचानी ऐ तां मिकी माढ़े

उसे प्रेमी कन्ने मला ।” मालती लाडै कनें बोली—“ए रात ते हुण मुक्की चली ऐ । कल अऊं थुआड़े प्रेमी दा बन्दोवस्त करिऐ उसी इत्थें गै लई औड़ ।” ए सुनिऐ अनंगमंजरी बड़ी खुश होई ते उसने गले दा हार तुआरिऐ सखी गी देई ओड़ेआ । ते आखेआ—हुण अपने घर जा ते बड्डेलै उत्थुआं गै तुआईं जायां उठी । ते कम्म तोड़ चाढ़ी आमंआं । इआं उस अन्तरंग सखी गी टोरिऐ ओ अपने घरै अन्दर आई गई ।

दूए दिन ओ मालती न्हरे मुंह उठी ते सारें दा नजर बचाइऐ कमलाकर दे घर जाई पुज्जी । ते तुप्पदी तुप्पदी बागै इच गई । उसनौ कमलाकर गी इक बूटे हेठ दिक्खेआ ओ कामअग्नि कनें जला करदा हा ते बिला करदा हा । कमल पत्रें दी सेजा उपर चन्नन लाए दा हा ते नुआड़ा अतरंग मित्र केले दे पत्रै कनें बा भोला करदा हा । “एह बी ते नईं नुआड़े बजोगै इच तपा करदा ?” ओ उत्थें ओल्है होइए दिक्खन लगा जे असल गल्ल केह ऐ ?

इन्नें इच कमलाकर दे मित्र नौ आखेआ—अड़ेआ । अकलीं ते पुट, बागै दी सुन्दरता गो दिख, मन किरा होर होई जाग । ए सुनिऐ ओ आखन लगा—‘माढ़ा मन ते ओ

सेठै दी कुड़ी अनंग मंजरी कड़ी ऐ लई गईदी ऐ । हुण इत्थें हिरदे इच है गै किश नई, सम्हालां केह ? दूई गल्ल ए होई ऐ जे माढ़ा हिरदा खाली दिक्खिए कामदेव नै अपने सारे बान इत्थें रक्खी ओड़े न । जिआं होई सकदा ऐ ओदे कन्नें मिकी मला । उस माढ़ा दिल चराई लैता दा ऐ ।” उसादयां गल्लां सुनिए मालती दे शक्क दूर होई गे । ओ खुश होई होई ते निकल्लिए नुआड़े सामनै गई उठी । ते आखन लगी—
 “बड़े खुश किस्मत ओ ! अनंगमंजरी नै मिकी तुन्दे कोल भेजया ऐ ते स्नेआ दित्ता ऐ—“ए के तरीका होआ जे कुसै दा दिल चराई लैना, ते पिरी दस्सिए बी नई औनां ।” तुसें माढ़ी सखी दा दिल चराई लैता ऐ । ओ आखदी ऐ हुण माढ़ा शरीर ते जान बी लइ लौ । दिन रात ओ भट्ठी ओङ्गू तपदी रौन्दी ऐ । तत्ते हौके भरदी ऐ, ओ बलदी काम अग्नि दा धूँ बभोदे न । नुआड़े अथरू नईं थमोदे ते सुरमा धनोइए ओ अथरू काले काले तोपे ईआं बभोदे न जीआं कमल फुल्ला पर भौरे आई बैठे होन । जे तुन्दी मरजी होए तां अऊं ईआं करां जेदे कन्नें दौनें गी लाह होए ।”

जिसलै मालती नै ए आखेआ कमलाकर आखन लगा— ए गल्ल सुनिए जे माढ़ी प्रेमका बी असें गी प्यार करदी ऐ बड़ा

रमान लग्गा ऐ पर इस गल्ला कोला जे उनेंगी बड़ा कष्ट होआ करदा ऐ—डर बी लग्गा करदा ऐ। हुन ते तुन्दी गै शरण ऐ। जिआं ठीक समझो करो।” मालती आखन लगी—अज्ज अऊं अनंग मंजरी गी नुआदे घरा दे बागै इच लई औड तुस उत्थें बाहर गै रवेओ। अऊं कुसै चाली तुस गो अन्दर लई औड ! फी तुस दोए जने मनमरजी कन्के मिली लयो ।” इआं कमलाकर गी प्रसन्न करिए ते अपना कम्म तोड़ चाड़िए अनंग मंजरी कोल गई। सारी गल्ल सनाई। मंजरी बड़ी खुश होई।

संजा कन्ने प्यार करदा सूरज घरोई गोआ। ते दिन मुक्का। चन्द्रमा चढ़ेआ जिआं पछम दिशा ने मत्थै टिक्का लाया होए। कुम्भिए दे मुंह खिड़ी गए ते ओ हस्सिए आखन लगियां—कमलें दी सोभा सादे कश आई गई ऐ।” प्रेमी कमलाकर नै बी टल्ले बदले, ओ बल्गी बल्गी हुट्टी गेदा हा। हौली हौली अनंग मंजरी दे घरै दे बागे कोल पुज्जा। मालती अनंग मंजरी गी उत्थें लई आई। अनंग मंजरी नै ए समां बड़ी कठनता कने गजारेआ हा। मालती नै उसी अम्बे दे कुंजै इच बहालेआ ते कमलाकर गी सदन गई। जिसलै कमलाकर उस कुंज इच बड़ेआ उसनै अनंग मंजरी गी उत्थें

दिक्खेआ ते उसी इन्नी खुशी होई जिआं हुट्टे दे मशाफरै गी
थां दिक्खिए हुन्दी ऐ ।

अनंग मंजरी नै उसी औंदे दिक्खेआ ते प्रेमभाव दी इन्नी
उग्रता होई जे उसने मर्जादा छोड़ी ते दौड़िए नुआदे गलें
लगी । मसां इन्ने बोल गै नुआदे मुंहा निकले—“तुस कुथें
टुरी गे हे । हुण में तुसें गी पकी लैता ऐ ।” प्रसन्नता दी
जास्ती कर्ने नुआदा साह रुकी गोआ ते ओ मरी गई । ते बाऊ
कन्ने मुड़की दी लता आडू पुंवा डिगगी पई । प्रेम दी रीत गै
ओपरी ऐ । ते नादे नतीजे बी खतरनाक हुन्दे न । ए दिक्खिए
कमलाकर उपर बिजली गै पई गई । इस विपदा गी दिक्खिए
ओ कर्त्ताया—‘ए के होई गोआ !’ ते बेहोश होइए डिगगी पेआ
भट गै होश आई जाने पर उसनै उसी बाहवें इच चुक्की लैता
ते गलें लान लगा, प्यार करन लगा ते बर्त्ताप करन लगा ।
नुआदा दिल दुःखै कन्ने इन्ना दबोआ जे फटी गोआ । मालती
उनें दौनें लोथे कोल खड़ोती दी रोन लगी । रात्री नै दिक्खेआ
जे दौनें प्रेमिएं दा अन्त होई गोआ ऐ ते ओबी मुक्की चली ।
दूए दिन दौनें दे साक समन्धिएं गी मालिएं कशा पता लगा
ते ओ शर्मा मारे दुखी होए । ते उन्हें गी बड़ा चबात बी
होआ । ओ मता चिर फिगड़ा मुंह करिए ईऐ सोचदे रए

जे के करचै । भैड़ियां जनानियां भैड़ियां गै हुन्दियां न ते
खानदान आस्ते मुसीबत गै आनदियां न ।

उसै लै अनंग मंजरी दा खस्म मनी वर्मा बी आई पुज्जा ।
ओ ताम्र लिप्ति दा अपने माऊ बब्वै गी मिली आया हा । उसी
अनंग मंजरी गी दिक्खने दा मता चा हा । जिसलै ओ सौहरे
पुज्जा ते उसी सारी गल्ला दा पता लगा ओ दौड़दा बागै इच
पुज्जा । अथरुं कन्नें नुआड़िये अखिये च किछ नई लब्बा
हा । अपनी लाड़ी गी दूए आदमी कनें मोए दे पेदे दिखिऐ
गमां दी गरमी कनें नुआड़ा साह बी रुकी गेआ ते ओ मरी
गेआ । सारे लोक उत्थे खड़ोते दे रोन कर्लान लगे ते सारा
शहर हरान होइऐ उत्थे किट्ठा होई गेआ । शिवे दे गरें चण्डी
देवी दा आह्वान करिऐ बेनती कीती—‘हे देवि—सेठ अर्थदत्त
नै थुआड़ी मूरति इस बागै इच थापी दी ऐ । ओ थुआड़ा बड़ा
भगत ऐ । ओदे पर कृपा करो ते नुआड़ा संकट कटो ।’ जिसलै
गरें शिवे दी प्यारी चण्डी गी ए प्रार्थना कीती उस दुख हरने
आली नै अखेआ—त्रैवै मुड़िऐ जी पौन, ते प्रेमै दा भूत उरी
जा ।’ नुआड़ी कृपा कनें ओ त्रैवै उठी खड़ोते । जिआं नीदरा
दे उठे होन । ते ओ प्रेमै दा भूत निकली गेदा हा । सारे
लोक ए चर्ज दिक्खिऐ हरान होए कमलाकर शर्मा कनें मुंह

नींदा करिऐ घर गोआ उठी । ते अर्थदत्त अपनी कुड़ी अनंग
मंजरी गी लेइऐ जेड़ी शर्मा कनें नीठी होई दी ही ते जुआई
गी लेइऐ बड़ा खुश होइऐ घर गोआ ।

जिसलै राती बताल नै ए कथ राजे गी सनाई ते पुछेआ—
ए त्रैवै प्रेम कन्ने अन्ने होए दे हे पर इनें त्रौणें चा बड्डा वेवकूफ
कुन हा ? सच दस्सेओ नईं तां ऊऐ श्राप लगना ईं ।”

राजा नै बताल दे प्रश्न दा उत्तर दित्ता मिकी ते ए
बभोन्दा ऐ जे इन्हें त्रौणें चा मनीवर्मा प्रेम कनें जादा अन्ना
होए दा हा ते मूरख ह । ओ दोऐ जने ते इक दूए आस्ते बड़े
आतुर हे ते समा बीतने करी उन्दी दशा उस हृद तोड़ी पुज्जी गेदी
ही । पर मनीवर्मा ते कमाल दर्जे दा मूरख हा जे उसनै अपनी
लाड़ी गी दूए कन्ने प्यार करीऐ मोए दे दिक्खेआ बी, ते बजाये
रोह करने दे नुआड़े प्रेम ते गमै इच प्राण दई बेठा ।”

राजा दा जबाव सुनिऐ बताल फी मूण्डे परा लोप होआ । ते
अपने थार जाई पुज्जा । राजा उसी आनने गी मुड़िऐ चलेआ ।

— — —

बाइमीं कथ

राजा त्रिविक्रमसेन नै शिशपा बूटे परा बतालगी तुआरी आन्दा । जिसलै मूण्डे पर पाइयै आवा करदा हा बताल आखन लगा—“राजा जी, तुस बड़े बीर ओ । लौ तुसें गी नमी गै कथ सनानां—

इक राजा हा धरनी वराह ते ओदी नगरी ही पाटलीपुत्र । ओदी पर्जा इच ब्राह्मण मते हे ते उसनै इक मुक्करी लाई दी ही । उसी ब्रह्मस्थल आखदे हे । उत्थे इक ब्रह्मण रौन्दा हा विष्णु-स्वामी । ओदी इक लाड़ी ही । बड़े चंगे सुभाआली ते ओदे माफक जीआं अग्नि गीतै ओहति हुन्दी ऐ । ओदे चा चार पुत्तर होए । उन्दा बचपन बीतया, उनें वेद पढ़े । समा पाइयै विष्णु शर्मा मरी गोआ ते नुआड़ी लाड़ी मरी गई ।

बचारें दी बड़ी बुरी दशा ही । कोई वालीवारस नई रेआ । ते जैदाद सारी साक सम्बन्धी खोई लई गऐ । ओ किट्ठे बड़ए सोचन लगे—हुण परवस्ती करने आला कोई रेआ नई । चलो

नाने कोल चलनेआं । उन्दा ननिहाल यज्ञस्थल इच हा । ए
बचर पक्का करिऐ ओ चली पे । रस्ते इच भिख मंगदे २ मते
दिनें ननिहाल पुज्जे । नाना होर ते मरी गो दे हे । मामें रौने
गीतै थार दित्ता ते रुट्टी दा बन्दोबस्त कीता । ओ उत्थें रहिऐ
बेद पढ़न लगे । उन्दे कोल घेला पैसा किश नई हा । मामे दा बी
चा चुकी गेआ ? उनें बी जाजन्दी करी ओड़ी । हुण उनें गी न
रुट्टी न टल्ले ते न किश होर थोऐ ।

इस बर्ता उणपर ओ बड़े दुःखी होए । इक दिन चोरी
बइऐ सोचन लगे । बड्डा भ्रा आखन लगा - “अइयो हुण के
करचै ? किस्मत गै सब किश करदी ऐ । आदमी ते इस दुनियां
इच कदें बी किश नई करी सकदा । अज्ज अऊं भौदां २
मसानघाट जाई पुज्जा । उत्थें में इक मनुक्ख दिक्खेआ लम्मी
तनीन दईऐ सुत्तादा हा । सारे अंग बसां करा करदे हे । ओ
मोए दा हा । उसी दिक्खेऐ मिकी ईर्खा होई । में आखेआ
ए भागवान ऐ । दुनिया दे दुखें कोला छुड़किऐ रमान कन्ने
सुत्ता दा ऐ । में निश्चा कीता अम्मी मरी जन्नां । में बूटे कन्नें
रस्से दा फाह बनाया में बेहोश होई गेआ पर जिन्द नई निकली ।
साह औंदा रेआ ? रस्सा त्रुट्टेआ ते अऊं भुंवा डिगगी पेआ ।
जिसलै मिकी होश आई में दिक्खेआ इक आदमी मिकी अपने

टल्ले कन्ने पक्खा भोला करदा ऐ । ओ आखन लगा — “जुना । एडा स्याना होइऐ ए के करन लगा एं ? चंगे कर्म करो तां सुर्ग थोन्दा मन्दे करो तां नरक मिलदा ऐ । जेकर तुकी किश दुःख ऐ तां चंगे कर्म कर । आत्महत्या करिऐ नरकै दा बास की लैनाएं ? ईआं गल्लां करिऐ उसनै मिकी धीरज दित्ता । आत्म हत्या करने कशा मोड़ेआ । ते आपूं गेआ उठी । में ओ बचार छोड़ी दित्ता ऐ, आपूं मरन हुन्दा गै नईं । जे भाग खुट्टे होन तां मरन बी नईं हुन्दा हुण अऊं कुसै तीरथै गी चलेआ । उत्थें जाइऐ तपस्या करड ते अपना शरीर छोड़ी ओड़ड । माढ़े कशा गरीबी दा ए दुःख नईं जरोन्दा ।” बड्डे आ दी गल्ल सुनिए लौकै आखन लगे — “तुस इन्ने स्याने ओ । गरीबी कोला के घबराना होआ ? ए ते स्याला दे डिग्गला आडू आई ते गई हुन्दी ऐ । धनसम्पदा ते चैचल स्त्री गी कुन साम्बी सकदा ऐ भायें इन्दी किन्नी बी सांभ की नईं करो । ए दोऐ कुसै दियां सक्कियां नईं हुन्दियां । इस करी स्यानी गल्ल ते ऐ जे अस नेई मेहनत करचै ते नेई बिद्या सिखी लैचै जे धन सम्पदा बड्डी दी पिछे २ दौड़े जीआं राखमें हरण मालकै पिछें दौड़दे न ।” आएं दी गल्ल सुनिए बड्डे नै अपने आपैगी सम्हालेआ ते ओ सोचन लगे — नेआ के होई सकदा ऐ ? उनें सोचेआ ते

आखन लगे—कोई जादू दी विद्या सिखनेआं । उनें ए गल्ल पक्की कीती । ते मुडिऐ मिलने दा इक थार निश्चत कीता ने चौनें कूटे आसै इक इक करिऐ गे उठी ।

समां पाइऐ ओ निश्चित कीते दे थारै उपर किङ्गे होए । इक दूए गी पुछन लगे के सिखेआ । इक आखन लगा—मैं ते ए सिखेआ ऐ जे कोई हड्डी लब्बी जा तां अऊं उस पशु दा मास ओदे उपपर चाढ़ी सकनां ।” भ्राऊ दा ए गल्ल सुनिऐ दूआ आखन लगा—“जिसलै मास चढ़ी जा तां अऊं उस पशु दी खल्ल ते बाल पैदा करी सकना ।” त्रीया आखन लगा —“अऊं उस पशु दे सारे अंग बनाई सकना ?” चौथा आखन लगा जिसलै अंग बनी जान तां अऊं जीवदान दइऐ उस पशु गी जीन्दा करी सकनां ।”

इक दूए दी गल्ल सुनिऐ ओ चारै भ्रा जंगलै इक कोई हड्डी तुप्पन गये जेदे उपपर ओ अपनी विद्या दा अभ्यास करन । उनेंगी इक शेर दी हड्डी लब्बी । उनें ख्याल गै नई कीता जे ए केड़े पशु दी हड्डी ऐ । पहलै नै हड्डी उपपर मास चाढ़ी ओढ़ेआ । दूए नै खल्ल ते बाल पैदा करी दित्ते । त्रोये नै सारे अंग बनाई ओढ़े । चौथे ने जीवदान दइऐ उसी जीन्दा करी ओढ़ेआ ? ओ भयानक शेर हा । ओ उठेआ, आल भुआड़ी दन्द कङ्गे,

पञ्जें खोले ते गर्ज सुट्टी । पहले उसनै उनें चौन्ने बनाने आलें गी
 पकड़ेअन, उथें गै उन्दा चांड़ा थापा कीता ते जीभ लपलपान्दा
 जंगला इच गेआ उठी । ओ सारे ब्राह्मण शेर बनाइए ते भयानक
 गल्ली करिऐ जिन्द नुआई वेठे । नेआ भयानक जन्तु बनाइए
 कुन सुखी होई सकदा ऐ ? जे किस्मत साथ नई देए । तां भायें
 किन्नी मेहनता कन्ने सिक्खी दी विद्या होए कोई लाभ नई
 दिन्दी । सगुआं जिन्द गै जन्दी ऐ । जतनै दा वृटा तां गै फलदा
 ऐ जे नुआड़ी जढ़ें इच अकली दा पानी थोए ते समझदारी दी
 बाड़ लग्गी रवै ।

उस रातीं बताल नै मूएढे परा राजे गी ए कथ सनोई । फी
 राजे गी पुछन लगा—“उनें गी खाइ जाने आला शेर बनाने
 इच इनें चौने चा मती गल्ली कोदी ही ? तौले जबाब देओ, नई
 तां ऊऐ श्राप लगना जे ।” राजा बताल दी गल्ल सुनिए सोचन
 लगा ए माढ़ा मौन भंग करना चाहदा ऐ । ते ईआं इसनै नस्सी
 जाना ऐं । अच्छा—फी पगड़ी लई औंढ ।’ ए निश्चा करिऐ
 उस जबाब दित्ता—कसूरबार ते ओ ऐ जिस जीबदान दित्ता ।
 दूए ते भास, बाल ते अंग बनाए । उनेंगी पता नई हा जे के
 पशु ऐ । पता नई होने करी उन्दे उपपर कोई दोश नई औंदा ।

पर जिसनै शोरा दा रूप दिखदे सुनदे छड़ी अपनी विद्या दा
कर्तव दसने आस्ते जीवदान दित्ता ऊऐ जुर्मदार ऐ।

राजे दी गल्ल सुनिए ओ बताल मूण्डे परा लोप होआ ते
परतिए फी अपने थार गेआ उठी। राजा नुआड़े पिछें चलेआ।

त्रइमीं कथ

राजा त्रिविक्रमसेन मुड़िऐ उत्थें पुज्जा । उसनै शिंशपा बूटे परा बताल गी तुआरेआ । बताल नै मते रूप बदले पर राजे नै उसी चुक्किऐ मूण्डे पर पाई गै लेआ । चुप धारण करिऐ ते चलने दी कीती । बताल उसी आखन लगा—‘राजा जी, जिस कम्मै गी तुस लग्गे देखो ओ तुन्दे जोग नईं ऐ पर इसी करने गित्तै तुस बड़ा धीरज दस्सा करदेओ । तुन्दो हुट्टन तुआरने आस्ते तुसैं गी इक कथ सनानां—

कलिग देसा इच शोभा वती इक नगरी ऐ । जिआं सुर्गा इच इन्द्रपुरी ऐ । चंगे कर्म करने आले गै इत्थें रौंदे न । इत्थें प्रद्युम्न राज करदा हा । ओ प्रद्युम्न देवता आङ्गू गै बड़ा शूरवीर हा । ओ राजै इच घाटे नां दी गल्ल कमाना इचा तीर निकलने उपर तीरै दे घाटे ही हुन्दी ही । दबा छड़ा उंगुलिणं दा सितारै दी तारें उपर हुन्दा हा पाप बी छड़ा बुढ़ापे दी अवस्था दा गै नां हा, ते जे कोई उग्रता ही तां ओ विद्याप्राप्ति आस्तै हुन्दी ही ।

उस नगरी इच ब्राह्मणे दी इक नुकर्री दी जिसी यज्ञस्थल
 आखदे हे । उनें इच इक ब्राह्मण बड़ा धनवान ते वेदें दा
 ज्ञाता हा । ओ अग्निहोत्री हा । अदैं घर हर समैं अग्नि बलदी
 गै रौन्दी ही । ओ देवतें दी ते अभ्यागतें दी बड़ी सेवा करदा
 हा । नुआड़ा नां यज्ञसोम हा बडेरी आयु इच जाइयै ओदैं
 इक जागत जम्मेआ । नुआड़ी लाड़ी बड़ी चंगी ही ते सौ
 मिनतां करिए ए जागत होआ । जागत होनहार हा, ब्राह्मणे
 ओदा नां देवसोम रखेआ । सोलें बरें दा हुन्दे उस सारे वेद
 शास्त्र पढ़ी लैते । बड़ा गै गुणवान ते मर्जादा पालने आला
 होआ । ईश्वर दा भाना के बर्तेआ जे ताप चड़ेआ ते ओ
 जागत चानचक मरी गेआ । ओ यज्ञसोम ते नुआड़ी लाड़ी
 जागते दी लोथा कनें जफी पाइए बर्लाप करन लगे । ओ उसी
 दाह कर्म करने आस्तै नेन गै नई देन ।

बृद्ध लोक किट्टे होऐ ते उसी समझान लगे—ब्राह्मण देवता !
 तुकी सारिएं गल्लें दा ज्ञान ऐ । इस नाशवान संसार दी
 गति दा तुकी पता ऐ । ए दुनियां पानी दे वुल्ले आडू खिन-
 भंगुर ऐ । उनें राजे आसै दिख जेड़े एडी बड्डी फौजे कनें
 राज करदे हे, अपने आप गी अमर समझदे हे, हीरे मोती
 जड़िएं सेजें पर सौन्दे हे, बड्डे ते शैल मैहलें इच रौन्दे हे,

जिन्दे मैदल संगीत कनें गूंजदे रौन्दे हे, चन्नन ते अतर फलेले
 कनें शरीरै उपपर लेप करदे हे, ते सुन्दर इस्त्रियां सारें पासेआ
 घेरी रखदियां हियां । उंदे शरीरें गी बी अग्नी कोला कोई
 नई बचाई सकेया । मसानघाट चिखा उपर इक्कले गै लेटना
 पौन्दा ऐ । साक सर्वन्धी ते भित्तर उत्थों तोड़ी गै रौन्दे ते
 बुआसरदे न । शरीर सङ्गोई जन्दे न ते रैद खैद गिहड़ ते
 दूए जन्तु खाई ओड़दे न । इस अन्त कोला कोई नई बची
 सकदा । इस करी, भलेआ लोका, तूं एडा स्याना होइए इस
 लोथा गी जफ्फी मारिए की बेठा दा एं ?”

होर बी मतें लोकें ईआं उसी समझाया । आखर रिश्तादारें
 मसां उसी जागता दी लोथा कशा ठुआलेआ । किड़े इच पाया
 ते रौंदे धौंदे मसानघाट लई गए । बड़े लोक नडोए कन्ने गये ।
 सारे इस भाना बरतने पर रोआ करदे हे ।

अदू उत्थें मसानघाट इक बुड्डा पाशुपत साधू रौन्दा हा ।
 ओदे कश शक्तियां हियां । ओ उत्थें कुटियां इच रौन्दा हा ।
 ओदा नां वामशिव हा । बड़ेपे करी ते तपस्या करी नुआड़ा
 शरीर लिस्सा फंग होई गेदा हा । नाडियां लब्धियां हियां
 ते ईए डर रौन्दा हा जे हुण डिग्गा कि हुण डिग्गा । उसनै चिट्ठी
 बभूत मली दी हुन्दी ही ते नुआडियां जटां धूड़ियां हियां ।

ओ दूआ शिवजी गै लव्दा हा। जिसलै उसनै कुटिया दे
बाहर ढाओपिञ्जर पेदा सुनेआ उस अपने चेलै गी अखेआ—
“जा, उठिए दिक्ख मसानघाट के ढाओ पिञ्जर पेदा ऐ ? नेआ
रौला कदे नई सुनेआ। तौला आनिऐ दस्स।”

ओ चेला मंगता साधू हा। बड़ा मूरख, दुष्ट ते हंकारी हा।
अपने गै ध्यानै इच फुल्लै दा रौन्दा हा। उसी किश जादु दूनें
दा बी गमान हा। उसदिन बड्डे साधू नै उसी निक्खरे दा हा
इस करी उसी किश रोह बी चढ़े दा हा। ओ आखन लगा—
नई चलेआ। आपू जा मेरी भिख्या दा समां जा करदा ऐ।”
गुरु नै आखेआ—फिट्टे मुंह तुकी ते कन्ने थुआड़े टिड्डा गी।
हव्ने अद्धा बहर दिन नई बीतेआ ते थुआड़ा भिख्या दा समा
कीआं होई गेआ ? ओ दुष्ट चेला किश मता रोहें हा। आखन
लगा—“जा ओए, बुड्डया ठेरेआ। अऊं कोई नई थुआड़ा चेला
ऊला ते नां गै तूं माढा गुरु। ए लै अपना ठूठा ते आपू गै
जा। अऊं कुतै होर पासै चलेआं।” ए आखिए उस कमण्डलू
ते सोटा नुआड़े अग्रे ढट्टेआ ते गेआ उठी।

ओ साधू अपनी कुटिया दा बाहर निकलैआ ते हसदा-हसदा
उत्थें पुज्जा जित्थें ब्राह्मणै दा जागत फूकनें गी आन्दा दा हा।
उसनै दिक्खेआ लोक जागतै दी जुआनी पर रोआ करदे न।

ओ आपूँ बढ़ापे करी दुखी हा । जन्तर-मन्तर ते उसी औंदे हे, उसनै जागतै दे शरीर इच बढ़ने दा निश्चा करी लैता । ओ इक बक्खी गोत्रा ते जोरेंआं ठा मारिए रोया । पिछुआं भट गै नच्चन लगा ते खुशी दियां सारतां करन लगा । जुआन बनने दी ताड करी उसनै अपना शरीर छोड़ेआ ते मन्तरें दे जोरा कन्ने जागते दे शरीरा इच पर्वश करी गोत्रा । ओ जागत चिखा उपर रखेदा हा । ओ भमानी मारिए उठी खडोत्ता । जिसलै साक समन्धिणं ए दिक्खेआ ओ खुशी कन्ने रौलापान लगे जीन्दा होइ गोआ जीन्दा होई गोत्रा ।”

ओ साधु बड़ा भारी जादूगिर हा । ओ ईआं जागतै दे शरीरा इच बड़ेआ हा । ओ अपना वर्त नियम नईं त्रोड़ना चांहदा हा । उसनै सारे सामने ए गल्ल बनाई—हुण अऊं परलोक गेदा हा शिवें मिकी आपूँ जीवनदान दित्ता ए ते आखेआ ए जे में पाशुपत साधु बनी जां । अऊं ओ नियम पालने आस्तै कुसै नकेवले थार चलैआ । नईं तां अऊं नईं जी सकदा । इसकरी तुस जाओ, ते अऊं बी चलैआं ।’ ओ पक्के निश्चे आला साधु हा उसनै सारेंगी टोरी ओड़ेआ । ओ बचारे दुखी सुखी हुन्दे अपने अपने घरें गए उठी । उस साधु नै अपना पहला शरीर डडला दा रलकाई ओड़ेआ ते आपूँ नमें

सिरे दा जुआन बनिऐ अपना नियम पूरा करने गीतै कुतै होर पासै गोआ उठी ।

उस रातीं रस्ते इच बताल नै राजा त्रिविक्रमसैन गी ए कथ सनाई ते पुच्छन लगा—राजा जी, जिसलै ओ जादूगर साधु नुआढ़े शरीरा इच बड़न लगा—तां ओ पहलै रोया की ते फी हस्सेआ की ? मिकी ए पता लाने दी बड़ी लूमक ऐ ।”

ओ राजा राजश्रुषि हा बताल दा प्रश्न सुनिऐ सोचन लगा जे जबाब नई दिता तां श्राप दर्ई ओड़ग । उसनै मौन त्रोड़ेआ ते आखेआ—“उस साधु दे भाव ए हे ओ दुखी इस करी होआ जे ओ शरीर छोड़न लगा हा जेड़ा इन्ने बरे कन्ने २ बधेआ, जेदे करी उसनै जन्तर मन्तर सिकखे ते जदूँ ओ लौका हा सऊ बब्बै ने लाड प्यार कीता । ओदा शरीर कन्ने बड़ा मोह होई गेदा हा—सैभन सारें दा होई जन्दा ऐ इस करी ओ ढा मारिऐ रोया हा । पर ओ नच्चेआ इस करी जे उसी नमां शरीर थोन लगा हा जिसी प्राप्त करिऐ ओ होर मती विद्या प्राप्त करग । दूए जुआनी कुसी प्यारी नईं हुन्दी ।”

बताल नै राजे दी गल्ल सुनी, उस मूएढा छोड़ेआ—ते फी शिंशपा बूटे उप्पर गोआ उठी । पर ओ निडर राजा उसी आनने गीतै मुड़िऐ चलेआ । पक्के निश्चों आले दृढ़ता इच प्हाड़ें गी मात करदे न । ते भायें कल्प बीती जा अपने निश्चे थुआं डिगदे नईं ।

चौविमीं कथ

राजा त्रिविक्रमसेन नै डौनी राता दी पर्वाह नईं कीती ते भसानघाट जाई पुज्जा । रातीं नै न्हरे दी चादर लइऐ, चिखें दी लपटें आलियां अकखीं गुआलिये राक्षसी आडू बड़ा विकराल रूप धारेआ पर राजा शिशपा बूटे हेठ गेआ ते बताल गी पकड़िये मृण्मै बाही लेआ ।

ते जिसलै परतोई चलन लगा बताल नै फी राजे गी आखेआ—“अऊं जाई जाइऐ ते नरिसऐ २ हुट्टी गेआं पर तुस नईं हुट्टे । हुण अऊं इक औखा प्रश्न पुच्छन लगा—सोची सगभिये जबाब देओ—

दखन देसा इच इक लौका नेआ सूबा ऐ । ओदे राजे दा नां हा धर्म । ओदी प्रजा इच धर्मात्मा लोक बसदे हे पर ओदे किश शरीक हे जेड़े नुआदी गही खुस्सना चांहदे हे राजे दी रानी दा नां चन्द्रावती हा, ओ बड़े उच्चे कुलै दी ही ते बड़ी धर्मात्मा ही । उस रानी इचा इक कुड़ी होई जेदा नां लावण्यवती हा ते ओ है बी बड़ी शैल ही ।

जिसलै ओ कुड़ी ब्याहने जोग होई तां राजे दे ओदे किश
 रिस्तादारें शरीकें किट्टे होईऐ उसी कड्डी लाया ते राज आपूंचे
 बंडी लैता । राजा अपनी रानी ते राजकमारी गी लइऐ ते किश
 हीरे ज्वाहरात लइऐ रातो-रात अपने सौहरे दे देस मालवे गी
 नस्सेआ । ते रातीं रातीं गै विध्याचल दे जंगला इच जाई पुज्जा ।
 उत्थें पुजदे गै लो होई गई । रात बिदा होई ते नुआड़े अथसं
 त्रेलू दे ओपें दे रूपै इच किरन लगे । तुआईं दा सूरज पूर्वा
 पासेआ निकलेआ जीआं हत्थ खड़ा करिऐ ठाका करदा होऐ
 भाई इस चोरे डाकुएं दे जंगला इच मत बड़दा होएं । ओ
 अपनी रानी ते कुड़ी कन्ने सफर करदा गै गोआ । उन्दे पैर कुशा
 कन्ने त्रम्बोई गे । भीलें दा इक ग्रां आई गोआ । इत्थुआं दे लोक
 आसे पासे दे ग्राएं दे लोकें गी लुट्टी लैन्दे हे ते जीएं मारी
 ओड़दे हे । भले लोक इस ग्रां गी निरी जमपुरी गै समझदे हे
 ते त्रांदे हे ।

दूरा दा गै राजे गी दिक्खिऐ ते नुआड़ी पशाक ते बन्दे
 दिक्खिऐ मते सारे शवर लोक शस्त्र अस्तर लइऐ उसी लुट्टेने
 आस्ते द्रौड़े । राजा नै ए दिक्खिऐ अपनी रानी ते कुड़ी गी
 आखेआ —पहले इनें तुसें गी गै पकड़नां एं इस करो तुस इस
 पासै जंगलै इच बड़ी जाओ ।” राजे दी गल्ल सुनिए डरी दी

रानी ते लावण्यवती जंगला इच बड़ी गइयां । राजे नै अपनी
 ढाल तलवार सोत्तरी ते औने आले शवर लोकें गी बड़ी टकाया ।
 चोरें दे सरदार नै सारा गां किट्ठा कीता ते इक्ले राजे पर ठुट्टी
 पेआ । उनें ओदी ढाल त्रोंड़ी ते उसी जीए' मारी ओढ़ेआ ।
 चोरें दा सरदार ओदे सारे गहने बन्दे लइए गेआ उठी । रानी
 चन्द्रावती नै छप्पियै ए सारा किश ते राजा गी बढोन्दे
 दिक्खिआ ओ लावण्यवती गी लइए नस्सी । ते दूर जाइए इक
 होर घने जंगलै इच जाई बड़ी । उत्थे बूटे हेठ शां खूब ही जीआं
 हुट्टे दे ते गरमी दे मारे दे मशाफर सुत्ते दे होन । हुट्टी दी,
 निम्जोभान होई दी ते रोन्दी चन्द्रावती अपनी कुड़ी कन्ने कमलें
 आली भीला दे कण्ठै अशोक बूटे हेठ बई गई । इन्ने इच इक
 कन्नोआं दा राजा घोड़े पर चढ़ेदा अपने राजकमार कन्ने उत्थें
 शकार खेडन आई गेआ । ओदा नां चण्डसिंह हा । उसनै भुजा
 पैरो लगगे दा दिक्खेआ ते ओ अपने पुत्तर सिंह पराक्रम गी
 आखन लगा—अस इन्ने शैल ते भागें आले पैरें पिछे चलने
 आं । जे असें गी पता लगगी गेआ जे ए कोदियां स्त्रियां न तां
 इन्दे चा जेड़ी थुआड़ी मरजी होग पसिन्द करी लेआं । ए सुनिये
 सिंह पराक्रम आखन लगा—जेदे लौक पैर न ऊपे माढ़े माफक
 हो सकदी ऐ । बड्डे पैरें आली जरूर बड़ी होनी ऐ ते तुन्दे गीतै

ठीक रौग । चण्डसिंह पुत्रा दी गल्ल सुनिऐ आखन लगा —
 अडेआ, तूं के आखनां एं ? थुआडी मौरो दा हचें हुण गै ते
 सुर्गबास होआ ऐ । नेई चंगी धर्मपत्नी गुआइऐ हुण होर ब्याह
 करने दी ताड गै नईं रई । चण्डसिंह दे पुत्रै नै ए सुनिऐ
 आखेआ — “पिता जी, तुस ईआं नईं आखो । घरस्थी पत्नी
 बिनां खाली हुन्दी ऐ । तुसें मूलदेव हुन्दा श्लोक नईं सुनें दा ?
 मूर्ख गै होग जेड़ा घर आवै तां अगगे कोई सुन्दरी बलौ नईं
 करदी होऐ । नेए घरै गी भायें घर आखो पर ओ सीखें ते
 वेड़िएं बगैर कैदखाना गै समझो ।” इस करी जे तुस सुन्दरी
 कन्ने जेदी साथन में चुनी लैती ऐ ब्याह नईं करगेओ तां अऊं
 मरी जाड ।”

ए गल्ल सुनिऐ चण्डसिंह मन्नी गोआ । ते पैरे गी दिक्खी २
 दोऐ दुरदे गये । भीला दे कण्ठै बूटे दे हेठ उनें सौली नुहारा
 आली रानी चन्द्रावती दिक्खी । उसनै हीरे मोतिएं दियां मालां
 पाई दियां हिआं । ओ शिकल दोपहरी अद्धीराती दे शमाना
 आडू लव्वदी ही । नुआदी धी लावन्यवती सुच्ची चिट्ठी दुद्ध
 चाननी ही जेदी लोई इच चन्द्रावती चमकदी ही । ओ
 वव्व पुत्तर नुआदे आसै गए ते ओ बचारी उनें गी डाकू
 समझिऐ घाबरिऐ उठी खड़ोती ।

पर नुहाड़ी धियु नै आखेआ—माता जी, डरो नईं । ए चोर डाकू नईं । चेहेरे मोहरे दा ते पशाका कशा ए कोई राजे बभोदेन । शकार खेडन आये दे न ।” रानी फी बी किश शशोपज इच पई रई । चण्डसिंह घोड़े परा उतरेआ ते उनें दोनें कन्ने गल्लां करन लगा—ब्राहो नईं, अस तुन्दे करी गै इत्थे आईं गये आं । इस करी जकीन करो ते नभक्क होइए असेंगी दस्सो तुस कुण ओ । तुस ते कामदेव दे शिवें द्वारा फूके जाने पर रति ते प्रीति लब्धियां ओ जेड़ियां नस्सिए इस बनै इच आईं गइयां ओ । तुस कीआं इस नकेबले बनै इच आईं पुज्जियां । तुस ते हीरे मोतिएं जड़े महले इच रौहने जोग ओ । थुआड़े पैर ते सुन्दर इस्त्रियें दियें गोदिएं इच रखने जोग न तुसें ए कण्डे कन्ने भरोचा दा बन कीआं चलेआ होग ? बाऊ कन्ने उड्ढरी दी धूड़ जेड़ी तुन्दे चेहरे उपर जम्मी दी ऐ उसी दिक्खिए असें गी शर्म बभोन्दी ऐ । इस तपदे सूरजा दियां तत्तिआं किरनां थुआड़े शरीरें उपर पौन्दियां न ते उन्दी तपश असें गी तपांदी ऐ । तुस अपनी कहानी असें गी सनाओ । असें गी कष्ट होआ करदा ऐ । इस भयानक जीव-जन्तुए आले जंगला इच तुन्दो रौहना असें नईं जरोन्दा ।”

जिसलै चण्डसिंह नै ए आखेआ तां रानी हौके भरन लगी ।

बचारी दुखी ही शरमा करदी ही । उसनै बल्ले २ सारी कत्थ सनाई ओड़ी । चण्डसिंह नै दिक्खेआ जे इन्दा कोई राखा नई, उसनै उनें गी दलासां दित्ता । ते बड़े प्रेम कन्ने उनें गी अपने परिवार दे अंग बनी जाने आस्तै प्रेरेआ । उनें रानी ते नुआड़ी कुड़ी गी अपने घोड़े पर बहालेआ ते अपनी नगरी 'वित्तप पुरी' इच लई आये । रानी वेआसरा ही मन्नी गई । उसी ईआं बम्भोआ जीआं नमां जन्म होआ होए । विपता इच पेई दी वेआसरा जनानी बदेसै इच के करदी ? चण्डसिंह दे पुत्र सिंह पराक्रम नै चन्द्रावती गी व्याही लेआ कीजे नुआड़े पैर लौके हे । ते चण्डसिंह नै नुआड़ी धियु राजकमारी लावण्यवती कन्ने व्याह कीता की जे नुहाड़े पैर बड़े हे । उनें पैरे दिखदे गै शुरू इच ए निश्चा कीता हा । ते अपने प्रण कोला कुण फिरकदा ?

पैरें दी गल्ती करी धी बब्बै दी लाड़ी बनी गई ते मा पुत्तरै दी लाड़ी बनी । धी अपनी माऊ दी सस बनी गई । ते मा अपनी धियु दी नूँह बनी गई । फी दौनें दे धीयां पुत्तर होए अगें समा पाइए उन्दे धीयां पुत्तर होए । ईआं चण्डसिंह ते पराक्रम उस नगरी इच अपगी लाड़िये चन्द्रावती ते लावण्यवती कन्ने रौन लगे ।”

जिसबै बतात न उस राती रस्ते इच ए कत्थ सनाई तां उस

नै राजा त्रिविक्रमसैन गी पुच्छेआ राजा जी, जेड़े धीयां पुत्तर बब्बै पुत्तरै दे उस माऊ धियु चा होए ओ आपु इचें केह साक होआ ? जेकर पता ऐ तां दस्सो । ते जेकर जानिए नई ओ तां पहलें आखे दा श्राप लगा ।”

राजा बताल दी गल्ल सुनिए बार बार सोचदा रेआ पर किश थौ पता नई लगा । इस करी चुप कीते द चलदा गेआ । उस चुक्की दी लोथ इचा बताल ऊपर मृण्डै दे जाई चढ़ेआ । अपने आपै इच हस्सिए सोचन लगा इस गुञ्जलै आले सुआलै दा जबाब राजे गी नई औंदा । इसकरी खुश ऐ ते । चुपचबीता अपने रस्तै पे दा ऐ । ए शूरवीरता दा खजाना ऐ । इसी होर नई धोखा देन हुन्दा । नां गै ईआं उस साधु गी इनें चलाकिण कशा रोकन हुन्दा ऐ । हुण अऊं उस दुष्टै गी टक्करनां । ते इक्के चलाकी कन्ने जेड़ी सफलता उसनै प्राप्त कीती दी ऐ ओ इस राजे गी दर्ई ओड़नां । इस राजे दा औने आला समां बड़ा शानदार ऐ ।

ए सोचिए बताल नै राजे गी आखेआ राजा जी, इस न्हेरी रातीं, मसान घाटा दे आओ जाई दे फेरे लाई लाई तुसें गी कष्ट ते मता होआ पर फी बी तुसें मत्थै ज्यूदी नई पाई । थुआड़ा इरादा बी डिगया नई । तुसें जेड़ा हौसला दस्सेआ ऐ ओ अजीब ऐ ते अऊं तुन्दे पर बड़ा खुश आं । हुण तुस

ए लोथ लई जाओ । अऊं नाढ़े इचा निकली चलैआं । जेड़ी
सिक्ख अऊं तुसें गी देन लगां उसी ध्यान कमे सुनो ते नुआढ़े
उपर अमल करो । ओ दुष्ट साधु जेदे आस्तै तुस ए शरीर
लई चलैओ मिक्की भट गै सहग ते मिकी पूजग । तुन्दी
बलि चाढ़ेने आस्तै ओ बदमाश तुसें गी आखग राजा जी,
साष्टांग प्रणाम करो ।

उसलै राजा जी तुस उसी साधु गी आखेओ पहलै मिकी दस्स
कीआं करनां ऐ फी अऊं ऊंआं गै करड । ते उस बेलै तलवारी
कन्ने नुआढ़ा सिर बड़ी ओढ़ेओ । जेकिश ओ चांहदा ऐ
ओ फल तुसें गी थोई जाग । ओ बिद्या धरें दा राजा बनना
चांहदा ऐ । ओदी बली दईऐ पृथ्वी दा राज करो । जे
कर इआं नई करगे ओ तां उसनै तुन्दी बलि चाढ़ी ओढ़नी ऐ ।
इस कम्मा गी रोकनै गी अऊं तुन्दे रस्ते इच इन्ने चिरै दिआं
भानियां पा करदा हा । जाओ । फलो फुल्लो ।,

बताल ए आखिए राजे दे मूण्डे पर जेड़ा शरीर हा ओदे
इचा निकली गेआ । बताल दी गल्ल सुनिए राजा चान्तिशील
साधु गी अपना शत्रू समझन लगा पर नुआढ़े कश बड़ा खुश २
गेआ । ओ साधु बड़ै दे बूटे हेठ बेंठे दा हा । राजा ओ
लोथ लईऐ उर्थे पुज्जा ।

खीरली कथ (उपसंहार)

अपने मूण्डे पर लोथ चुक्के दे राजा त्रिविक्रमसेन साधु
ज्ञान्ति शील कोल पुञ्जा । उसनै दिक्खेआ साधू बूटे हेठ इक्कला
बैठा दा हा, ओ मस्या दा पक्ख ते मसानघाटै दी रात, ओ राजे
गी बड़ी हीखी कन्ने बल्गा करदा हा । उस हड्डियां पीहए पीला
चूरा बनाइए गोल कार खिचची दी ही । ते भुंजा लहू दा पोचा
फेरे दा हा । मुख २ थारें पर लहुए दे भरोचे दे घड़े रखे दे
हे । मनुक्खै दी चरबी दे दीये बाले दे हे । ते कछ गै आहुतियां
देने गीतै अगग बाली दी ही । बलि देने दियां सारियां तयारियां
पूरियां कीति दिआं हिआं । ते साधू अपने इष्ट देव दी पूजा
करने इच लगा दा हा ।

राजा नुआड़े कोल गेआ । साधू नै दिक्खेआ जे ए लोथ
लई आया ऐ बड़ा खुश होआ ते उठी खड़ोता ते राजे दे गुण
गान लगे—“राजा तूं बड़ा महापुरुष ऐ । तूं माड़े गीतै नेआ
कम्म करी छोड़ेआ ऐ जेड़ा बड़ा कठन ऐ । नेऐ थारा इच नेए

समैं इच एडे बड्डे ते भयानक कम्म दा बीड़ा चुक्कना थुआड़ा
 गै कम्म हा । सच गै आखदे न जे तूं सारे राजे कशा उत्तम एं ।
 थुआड़ा हौसला अडिग ऐ । तूं दूएँ दी भलाई आस्तै अपना आप
 लाई ओढ़या ऐ । स्याने लोक आखदे न जे बड्डें दी बड़याई
 इस्से इच ऐ जे ओ जेड़ा कम्म इक बरी पकड़दे न, उसी अपनी
 जान खतरे इच पाइए बी पूरा करिऐ गै छोड़दे न ।”

साधु नै सोचेआ नुआड़ा कम्म तोड़ चढ़ी गेआ । उसनै राजे
 दे मृण्डे परा लोथ तुआरी । उसी शनान कराया । चन्नन दा लेप
 कीता । ते हार पाया ते चक्करै इच रखेआ । नुआड़े अंगे गी
 बभूत लाई । बालें दा जनेऊ उसी पाया । आपू मुढ़दे दे टल्ले
 लाये । ईआं भलेआं तयारी करिऐ उसनै समाधी लाई । फी
 उसनै मन्तरै दे जोर कन्ने उस बताल गी सदेआ । ते उस लोथा
 इच नुआड़ा प्रवेश कराया । ते नुआड़ी पूजा करन लगा । उसनै
 मनुक्खै दे चिट्टे दन्द खोपड़ी इच पाइये अर्घपात्र बनाइए उसी
 अर्घ दित्ता । पी उसनै फुल्ल चाढ़ै ते सुगन्धि आले धूफ आदि
 दस्से । उसी मनुक्खै दिऐं अक्खिणं दा नवेद लुआया । ते कन्ने
 मनुक्खे दे मासा दी भेटा दित्ती । जिसलै ओ पूजा खत्म करी
 वेठा उसनै कोल वेठे दे राजा गी आखेआ—“राजा भुंवा लेटी

जा, ते जन्तर मन्तरें दे देवता गी जेड़ा इत्थें प्रगट होए दा ऐ साष्टांग प्रणाम कर । ए थुआड़ी मनोकामना पूरी करग ।”

ए सुनदे गै राला गी बताल दी गल्ल चेतै आई गई । उसनै साधु गी आखेआ—महात्मा जी, मिकी पत नई कीआं करदे न पहलें तुस करिऐ दस्सो फी अऊं ऊंआं गै करड ।” राजा गी दस्सने गीतै साधु भुआ लेटी गोआ राजा नै भट तलवारी दे इक्के फट्टै कन्ने नुआढ़ा सिर बड्डी भेठा कीता । नुआढ़ा कालजा चीरिऐ ओदा हिरदा कड्डेआ । ओ हिरदा ते नुआढ़ी मुण्डी ए दौं कमल उस बताल गी भेठा दित्ते ।

उत्थें ओ खुश होए दे भूतप्रेत बड़ा रौला पान लगे ते ताड़ियां बजान लगे । लोथा विन्चा बताल राजे गी आखन लगा—
“राजा जी, जिसलै तुस पृथ्वी दा राज भोगी लैगे ओ उसलै विद्याधरें दा राजे जेदे गीतै ए साधू जतन करा करदा हा तुसें गी थोग । की जे में तुसें गी बड़ा सताया ऐ इसकरी तुस जो मरजी ऐ वर मंगो ।” बताल दी गल्ल सुनिए राजा आखन लगा—
“तुस खुश होई गए असें गी सारे बर पुज्जी गए । पर तुन्दा आखेआ बिरथा नई जन्दा इस करी मिकी ए बर देओ—ए चौबी सुआल ते जबाब ते कन्ने सुन्दर कथां ते ए खीरली कथ

मलाइए पंजी सोरी दुनियां इच प्रसिद्ध होन ते मान पान ।”
 जिसलै राजे नै ए प्रार्थना करती बताल आखन लगा—ईआं गै
 होए । ते राजा सुन अऊं इक खास सिफत दस्सन लगां जेड़ी एदे
 कन्ने होग । ए चौबी कहानियां ते खीरली कथ—“बताल
 पचीसी” दे नां कन्ने जगत प्रसिद्ध होग । जेड़ा कोई श्रद्धा कन्ने
 इक श्लोक बी पढ़ग जां सुनग ओ श्राप कशा मुक्त होई जाग ।
 यत्त, बताल, कूमांड जादुगिरनियां राक्षस ते दूए प्राणिएं दा
 उत्थें कोई असर नईं होग—जित्थें बताल पचीसी दा पाठ होग ।
 बताल ए आखिए उस लोथा इचा निकली गोआ । ते अपनी
 दिब्ब शक्ति कन्नें जित्थें जाना चाहदा हा गोआ उठी ।

शिव जी बड़े खुश होए ते सारे देवत कन्ने उत्थें प्रगट
 होए । राजा नै प्रणाम कीता ते शिव बोले—“शाबाश, मेरे बेटे,
 तूं अज्ज कपटी साधु गी मारिए बड़ा चंगा कीता ऐ । ओ
 विद्याधरें दा राजा बनने दी बड़ी ताड करदा हा । अपने शरीरा
 इचा गै में थुआड़ा निर्माण कीता हा । तूं विक्रमादित्य होइए
 असुरें दा नास कीता । जेड़े मलेच्छ बनिए पहर मचांदे ऐ । हुण
 तुकी त्रिविक्रमसेन नां दा राजा बनाइए इस दुष्ट साधू गी मारने
 गीतै पैदा कीता । तूं इस पृथ्वी, सारे द्वीप ते पताल देस गी

अपने धीन करी लैगा । ते विद्याधरें दा राजा बनी जागा । सुरगै
 दे नन्द भोगी २ तूं अक्की जागा ते आपूं उन्दा त्याग करगा ।
 ते निश्चे कन्ने मोढ़े इच मिली जागा । ए अजेय, नां दी तलवार
 माढ़े कशा लै । एदी बदौलत तुकी सब किश प्राप्त होग । शिवें ए
 आखिए राजे गी ओ तलवार दिक्ती ते आपूं लोप होइ गए ।
 राजा नै उन्दी बड़ी स्तुति कीती ते पूजा कीती ।

राजा त्रिविक्रमसेन नै दिक्खेआ जे सारा कम्म मुक्की गोआ
 ऐ ते रात बी मुक्कन लगी ऐ ओ अपनी नगरी प्रतिष्ठान गी
 वापस आया । सारी प्रजा बड़ी खुश होई ते उनें नुआढ़ा स्वागत
 कीता । उनें गी राजा दे बहादरी दे कारनामें दा जेड़े उसनै उस
 राती कीते हे पता लगगी गोआ हा । उसनै दिने शनान कीता, दान
 दिक्ते, शिवें दी पूजा कीती, बड़े नाच गाने, संगीत ते नन्द मंगल
 होए । किश दिनें परैन्त गै उस तलवारी दी बदौलते राजा नै
 पृथ्वी दा राज भोगेआ । ओदे सारे शत्रू नष्ट होई गए । सारे
 द्वीप ते पताल देस उपपर बी नुआढ़ा कब्जा होई गोआ फी शिवें
 दे बचन मताबक उसी बिद्याधरें दा राज थोआ । मता
 चिर राज करिए ओ शिवें कन्ने जाई मिलेआ ते सारे
 निमित्त पूरे होई गए ।

॥ समाप्तम् ॥

हमारे-प्रकाशन

१. प्रेमनाथ डोगरा (एक व्यक्तित्व) हिन्दी
ले० श्यामलाल शर्मा
२. त्रिवेणी (डोगरी भाषा, संस्कृति ते
साहित्य) निबन्ध संग्रह डोगरी
ले० शक्ति शर्मा, श्यामलाल शर्मा
३. भागवत् दियां कथां (कहानी संग्रह)
श्यामलाल शर्मा
४. बताल पचोसी (कहानी संग्रह) ,,
श्यामलाल शर्मा

आगासी प्रकाशन :-

५. डोगरी निबन्धावली डोगरी
६. डोगरी लोक कथां ,,
७. मेघदूत (गद्यानुवाद) ,,
८. गवाची दी डूठी (अभिज्ञान शकुन्तलम्) ,,
९. डोगरी शब्दकोश डोगरी-हिन्दी-उर्दू

श्रीपति प्रकाशन

१९५, विजयगढ़, जम्मू ।